

ԱՐՈՒՍՅԱԿ ՍԱՀԱԿՅԱՆ

«ԱՎԱՆԱ ԾՐԵԲՐԻ»
ՊԱՏՈՒՄՆԵՐԻ
ՔՆԱԿԱՆ
ՀԱՄԵՐԱՏՈՒԹՅՈՒՆ



АКАДЕМИЯ НАУК АРМЯНСКОЙ ССР
ИНСТИТУТ АРХЕОЛОГИИ И ЭТНОГРАФИИ

АРУСЯК СААКЯН

**СРАВНИТЕЛЬНОЕ ИССЛЕДОВАНИЕ
ВАРИАНТОВ „САСНА ЦРЕР“**

ИЗДАТЕЛЬСТВО АН АРМЯНСКОЙ ССР
ЕРЕВАН 1975

ՀԱՅԿԱԿԱՆ ՍՈՀ ԳԻՏՈՒԹՅՈՒՆՆԵՐԻ ԱԿԱԴԵՄԻԱ

ՀԱՅԿԻՑՈՒԹՅԱՆ ԵՎ ԱԶԳԱԳՐՈՒԹՅԱՆ ԻՆՍՏԻՏՈՒՏ

ԱՐՈՒՍՅԱԿ ՍԱՀԱԿՅԱՆ

«ՍԱՍՆԱ ԾՈՒՐԻ» ՊԱՏՈՒՄՆԵՐԻ
ՔՆՆԱԿԱՆ ՀԱՄԵՄԱՏՈՒԹՅՈՒՆ

A 11
574.673



ՀԱՅԿԱԿԱՆ ՍՈՀ ԳԱ ՀՐԱՄԱՆԱԿՑՈՒԹՅՈՒՆ
ԵՐԵՎԱՆ 1975

Աշխատության մեջ քննության է առնված «Սասնա ծոեր» ժողովրդական վնասի տալագիր պատումների գրառման ժամանակի և պատմական-հասարակական իրադրության կազմը, գրառման վայրը, ստեղծման ու գոյատևման հայրենիքը, տարածումն ու տեղայնացումը, նյուղերի քանակը, ներճյուղային հարաբերությունը, վիազական կառուցվածքային հիմքը վեպում ընդհանրապես և առանձին ճյուղերում մասնավորապես:

Պատասխանատու խմբագիր

Ա. Տ. ՂԱՆԱԼԱՆՅԱՆ

ԵՐԿՈՒ ԽՈՍՔ

Ներկա ուսումնասիրության նպատակն է «Սասնա ծոեր» ժողովրդական վեպի տպագիր տարբերակների համեմատական հնանությամբ պարզել մի քանի խնդիրներ, որոնք նախորդող հայ ժողովրդական վիպագիտության մեջ հատուկ հետազոտության շեն արժանացել, շեն բարձրացվել բանագիտական առանձին և որոշակի խնդրի մակարդակի կամ առկա են միայն առընթեր հարցադրման ձեռվ։

Ուսումնասիրության նյութը կազմում են վեպի բառասունյոր պատումները, որոնք ամփոփված են «Սասնա ծոեր» խորագիրը կրող երկիառոր ժողովածուի մեջ՝ հրատարակված 1936 (հատոր I), 1944 (հատոր II, մաս I) և 1951 (հատոր III, մաս II) թվականներին։

Առանձնացված և ըստ կարելվույն լուծված է չորս խնդիր։

ա. վեպի գրառման ժամանակը և հասարակական պայմանները։

բ. տարածումը և տեղայնացումը (վեպի գրառման վայրը, վերջինիս հարաբերությունը վեպի հայրենիքի հետ)։

գ. նյուղերը (դրանց բանակային բնդգրկումը և ներքին հարաբերությունը)։

դ. կառուցվածքը։

Հեղինակի կողմից կազմված համադրական տախտակները ծառայում են որպես հիմք խնդիրների պարզաբանման համար։ Գրքին կցված է նաև տպագիր պատումների համակարգված նկարագիր ցանկ։



ՎԵՊԻ ԳՐԱՌՄԱՆ ԺԱՄԱՆԱԿԸ ԵՎ ՀԱՍՏՐԱԿԱԿԱՆ ՊԱՅՄԱՆՆԵՐԸ

1874 թ. կ. Պոլսում լույս է տեսնում հայ ժողովրդական «Սասնա ծռեր»¹ վեպի առաջին պատումը։ Դրա գրառողը և լույս աշխարհ բերողը Գարեգին Սրվանձտյանն էր։ Գրառումը կատարված էր 1873-ին։ 1874-ը վեպի հասարակական հայտնության տարեթիվն է։

Սրվանձտյանը ժողովրդական կենդանի գոյատեղ վեպի մասին մի փոքր ավելի վաղ գիտեր։ «Այժմ իբրև բուն նյութ այս գրքույկիս պիտի կցորդեմ «Դավիթ Սասունցի կամ Մհերի գուռ» վեպը, զոր երեք տարի հետամուտ եղա ձեռք բերելու և ոչոք գտա, որ ամբողջապես գիտենար, մինչև 1873 թ. հունիս ամսույն Մշո Առնիստ գեղի երեսփոխան պ. Կրպոն ներկայացավ ինձ արժ. Օհան վարդապետի միջոցավ»²։ Որտեղից և ե՞րբ է հայտնի եղել Սրվանձտյանին վեպը, որ նա երեք տարի հետամուտ է եղել գտնելու իսկ «պ. Կրպոն ներկայացավ ինձ արժ. Օհան վարդապետի միջոցավ» տողերը ենթադրել են տալիս, որ թերևս Սրվանձտյանը վեպի գոյության

¹ «Սասնա ծռեր» ընդհանուր խորագիրը, որպես այդպիսին, վիպասացների մոտ չի հանդիպում. այն առաջարկվել է Մ. Արեղյանի կողմից. տե՛ս նրա «Մատենագրություն «Սասունցի Դավիթ» հայ ժողովրդական վեպի մասին» աշխատությունը (Մ. Արեղյան, Երկեր, Ա. Հ., Երևան, 1966, էջ 534)։ Քննչանրապես, սկսած Սրվանձտյանի պատումից, ներառյալ «Սասնա ծռեր» երկհատորյակի տարրերակների խորագրերի մեծ մասը բանագետքանահավաքներինն է։

² Գ. Սրվանձտյան, Գրոց ու Բրոց, կ. Պոլիս, 1874, էջ 127։


մասին հայտնել է նաև իր ծանոթ-բարեկամներին, և նրանք նույնպես հետաքրքրվել են գտնելու վեպն իմացող։ Այս հարցերը լուսաբանող այլ վկայություններ շունենք ձեռքի տակ։ միայն կամենում ենք ուշադրություն հրավիրել այն հանգամանքի վրա, որ 1873-ը վեպի պատահական հայտնաբերման թվականը չէ, որ Սրվանձտյանը երեք տարի դրանից առաջ փնտրել է ոչ թե ընդհանրապես հայ ժողովրդական որևէ վեպ¹, այլ հենց «Սասունցի Դավիթը»։ Ուրեմն, նա արդեն լսել էր այն, բայց փնտրում էր մեկը, որ «ամբողջապես գիտենար»։

Վեպը գտնված էր այլևս, և դրա նոր պատումների գրառումը հայ մտավորականության շրջաններում դառնում է նպատակային գործ։ Այն շարունակվում է մինչև մեր օրերը։

Գրառման ժամանակը բանագիտական հասկացություն է, և այն կարելի է քննել տարբեր մոտեցումներով։ Այս հարցը հայ վիպագիտության մեջ բարձրացվել է քանից և առանձին, որպես գրառման պատմություն, և տարբեր խնդիրների առնչությամբ, և գիտական ամփոփում ստացել Մ. Աբեղյանի «Մատենագրություն «Սասունցի Դավիթ» հայ ժողովրդական վեպի մասին» աշխատությամբ։ Մեզ մոտ այն դառնում է խնդրառու՝ դրվելով պատմա-հասարակական իրադրությունների ընդհանուր տեսադաշտի վրա, այսինքն՝ հատուկ քննության է առնվում գրառման ժամանակը (թվականը) պատմական ժամանակի մեջ։ Նման մոտեցման դեպքում հնարավոր է դառնում բացահայտել Հիշյալ հասկացության և պատմական ժամանակաշրջանի հարաբերակցությունը, վեր հանել նրանց կապի որոշ օրինաշափություններ։

Դարաշրջանի առումով հարցի ընդգրկման սահմաններն ընկնում են XIX դարի կեսերից մինչև մեր օրերը (տե՛ս գրառ-

¹ Նախքան Սրվանձտյանը և նրա օրերի ըմբռնումներում վեպ հասկացության սահմաններն ավելի լայն էին։ Սրվանձտյանն իր «Մանանայում» նյութի դասակարգման մեջ «Վեպը հայրենյաց» բաժնի տակ դնում է. «Հերթիաթներ, առասպելներ» («Մանանա», Կ. Պոլիս, 1876, էջ 7)։



ման ժամանակի տախտակը, Տախտ. 1): Պատմական ընդհանուր տեսադաշտի վրա գրառման ժամանակը դադարում է սոսկ թվական լինելուց, դառնում է բանագիտական հասկացություն և կանխանշում գրառման պատմության որոշակի փուլեր, վերընթաց և վայրընթաց ժամանակաշրջաններ: Այդ շրջափուլերը համընկնում են պատմա-հաստրակական կարևորագույն իրադարձությունների հետ կամ նշանակում են հայքանագիտության որոշակի աստիճան: Սրա համեմատ գրառման ողջ ժամանակաշրջանը բաժանվում է հետևյալ շրջափուլերի՝ 1873—1914, 1915—1916, 1920—50, 1960—70-ական թվականներ:

Առաջին շրջան (1873—1914 թվականներ).—1873 թվականը ոչ միայն վեպի գրառման առումով, այլ ընդհանրապես հայքանագիտության մեջ ելման կետ է: Այդ տարեթիվը սկիզբն է բանահյուսական բուն ժողովրդական նյութերի գրառումների և բանասիրական ուսումնասիրությունների մի վերընթաց ժամանակաշրջանի: Եվ այդ սկիզբը կապվում է Գարեգին Սրբանձոյանի անվան հետ: Նրանով «կիաստորեն սկսվում է ժողովրդական կենդանի բանահյուսության նմուշների կարգավորված հավաքումն ու հետազոտությունը»²:

Ինչու Սրբանձոյանն է համարվում սկիզբ, երբ մինչ նա ժողովրդական բառ ու բանը Աբովյանով մտել էր գրականության մեջ և խոր արմատներ դցել. երբ Մկրտիչ էմինն ու Հովսեփ Գաթըրճյանը՝ մեկը արևելահայ, մյուսը արևմտահայ հատվածներում, դրեթե միաժամանակ հաստատում էին

1 Գրառման տախտակը ներառում է միայն «Սասնա ծոեր» ժողովածուի մեջ տպագրված պատումները: Եթե գրառման ժամանակը հայտնի չէ, դըրվում է առաջին տպագրության թվականը: Պատումները ժողովածուի մեջ կրում են տառային համարներ, ըստ որում՝ երկրորդ հատորը նորից սկսվում է Ա. տառով: Շփոթից խուսափելու համար պատումների համարների տառային ձևը վերածել ենք թվային ձևի՝ 1—47 հաջորդականությամբ:

2 Ա. Հարուրյունյան, Մանուկ Աբեղյան, Երևան, 1970, էջ 148 (բնդղըծումը՝ Ա. Ս.):

Հայոց հին վիպական բանահյուսության գոյությունը՝ ըստ դրավոր աղբյուրների, իսկ Ստ. Պալասանյանը դրանց կողքին ուշադրություն էր հրավիրում նաև բանավոր աղբյուրների, այսինքն՝ բանահյուսության բուն ժողովրդական գրառումների վրա։ Դրանք սկիզբ չէին, այլ Սրվանձտյանի մուտքը նախապատրաստող ժամանակաշրջան, որովհետեւ՝ եթե ժողովրդական կենցաղն ու մտածելակերպը, նրա ստեղծագործության որոշ նմուշներ թափանցել էին գրականության մեջ—դա գրականության զարգացման շրջափուլ էր, գրականության տեսությանը զբաղեցնող երեսութ, բայց ոչ առանձին գիտություն, ինչպիսին բանագիտությունն է, չնայած, դա կարող է ուսումնասիրության նյութ դառնալ նաև բանագիտության համար։ Եթե առանձին հետազոտության նյութ էր դառնում մատենագրության մեջ պահպանված ժողովրդական ստեղծագործության նմուշները—դա արդեն բանագիտության սկիզբ էր, բայց՝ միակողմանի, որովհետև հետազոտության առարկան միայն գրավոր աղբյուրներն էին։ Եթե մինչև Սրվանձտյանը կային էլ բուն ժողովրդական գրառումներ, ապա դրանք բանահյուսական հատուկենտ նմուշներ էին։

Սրվանձտյանն, անշուշտ, գիտեր այս ամենի տեղն ու դերը. նա ժամանակակիցն էր գրական ու գիտական այդ ողջ անցուգարձի, և նրա գործունեությունն, ինչ խոսք, պայմանավորված էր նախորդող ժամանակահատվածով։ Բայց Սրվանձտյանով է նախանշվում հայ բանագիտության և ազգագրության մեջ առաջին շրջափուլը, որովհետև նախ. նա նախորդներից տարբեր և ավելի ամբողջական պատկերացումներ ու պահանջներ ուներ այդ գիտությունների նկատմամբ¹։

¹ Գ. Սրվանձտյանն իր օրերում իր արած գործի շգնահատվելու ու շհասկացվելու առարկայական մտավախությունն ուներ։ Երբ հրատարակության էր պատրաստում բանահյուսական նյութերի իր առաջին ժողովածուն, «Սասունցի Դավիթ Ահերի դուռ» պատումի առաջարանում գրում է, «Այս գործիս հրատարակությունը հասկացողին համար արժեք կունենա.

Նրա այստեղ-այնտեղ ցրված հատուկտոր տեսական դրույթների, մտորումների ու խոհերի միատեղումից պարզվում է, որ Սրբանձտյանն իր գործունեության հենց սկզբում զգում էր մեղանում այն գիտության բացը, որը որոշակիութեն ձևակերպվում էր որպես ժողովրդագիտություն։ Նա իր գրառումների բազմաժանր ու բազմաթեմա ընդգրկմամբ հող էր նախապատրաստում ժողովրդագիտության համար։ Նյութի դասակարգման մեջ նա համակարգ էր դնում, գրառման մեջ՝ սկզբունք—հավաքել, հավաքել այն ամենը, ինչ վաղվա հետ ենթակա է կորստյան, վեր հանել մեր ժողովրդի երեկն ու այսօրը։

Երկրորդ. Սրբանձտյանը ոչ միայն մեծ ճաշակով ու բանագետի բնատուր տաղանդով հրապարակ հանեց ժողովրդի հոգևոր մշակույթի մինչ այդ անհայտ նմուշները, այլև հասարակական վերաբերմունք ստեղծեց այդ մշակույթի և դրա կրողների նկատմամբ¹։

Բայց կարծեմ, արհամարհողներ ավելի պիտի լինին և այպանողներ, ոչ միայն այս գրվածին կտորը, այլ ամբողջ սույն գրքույկը, ընդոր և իմ անձը։ Ասոնք չհասկացողներն են։ Բայց մեր փույթը չէ։ Քաջալերված կհամարիմ զիս, եթե համրանքով քսան հողի և լինին հավանող այս գործոյն, և կշարունակեմ, խրախուս տալով այլոց, որ հետևին, աշխատասիրեն ձեռք բերել, ի լույս ածել այսպիսի գրվածքները» («Գրոց ու Բրոց», էջ 131)։ Չնայած առաջին ժողովածուն հայ մտավորականության կողմից շատ լայն ընդունելություն գտավ, Սրբանձտյանի անհանգստությունը շվերացավ. այն հաջորդող ժողովածուի մեջ դարձավ քննադատություն՝ իր ժամանակի մտավոր ու հասարակական կյանքի վերաբերյալ. «Կզարհուրիմ ասել՝ գրող և ընթերցողներ ունինք բավական շատ, սակայն անոնցմեն շատերն անզետ են ազգային հին պատմության և ներկա կենցաղավարության. ներվի ինձ ասել, թե անզետ են անոնցմեն շատերը, որ այսօր ազգային օրենսդրի կամ կառավարչի պաշտոն ունին» («Մանանա», էջ 36)։ Սա քննադատություն լինելուց բացի, առաջին հերթին ցույց է տալիս մինչ Սրբանձտյանը և նրա ժամանակի հայ բանագիտության և բանահավաքչական գործի վիճակը։

¹ Սրբանձտյանի ժամանակակից Ս. Մանդինյանը գրում է. «...մեզ, որ ավելի ճաշակ ունենալն էինք երեակայում, բայց և այնպես խոկույն խոստովանեցինք Սրբանձտյանի մեծ ծառայությունը... Միթե՞ մեզ համար դոքա այնքան նորություն էին, որ Սրբանձտյանին այնքան երկինք բարձրացուցինք, միթե՞ մեզ հայտնի շեին եթե ոչ մյուս մասերը, գոնե հերիաթ-

Երբորդ. Նրա ի ցույց դրած բանահյուսական ու ազգակրական նյութը ընդհանուր ու լայն տեսադաշտ էր «Սասունցի Դավիթ» վեպի ընկալման, դնահատման և ուսումնասիրության համար։ Սրվանձտյանը պատումին կից մի քանի էջանոց «Առաջարանով» նշեց նաև վեպի հետազոտման հետաքրքիր ու ճիշտ ուղիներ։

Ուրեմն, Սրվանձտյանը տալիս էր համակարգված առատ ու գունեղ նյութ, ստեղծում վերաբերմունք դրա նկատմամբ, նշում ուսումնասիրության ուղիներ։ Սրանով է պայմանավորված ոչ միայն Սրվանձտյանի տեղն ու դերը հայ բանագիտության մեջ որպես ուահվիրայի, այլև նրան հաջորդած բանահավաքական գործի ու բանագիտության վերընթաց շրջանը։ Վեպի առաջին հրապարակումը ազդակ էր հանդիսացել բանագիտության մեջ մի մեծ շարժման ու վերելքի, իսկ այդ վերելքն էլ իր հերթին ազդակ էր նոր պատումների հայտնաբերման ու հրապարակման։ Սրան մեծապես նպաստում էր այդ ժամանակների հայ մտավոր կյանքի ընդհանուր վերընթացը, ազգային ինքնաճանաշման ու ինքնահաստատման, արտաքին ու ներքին պայքարի ուղիով գնացող վերընթացը։

Ընդհանուր հետաքրքրության պայմաններում, սակայն, տասներեք տարի վեպի նոր պատում երևան շեկավ։ Երկ-

ները։ Անշուշտ հայտնի էին. բայց ցավն այն էր՝ մինչդեռ տեսականապես մենք գիտեինք, թե որքան հարգ ունի ժողովրդական բանաստեղծական երգերը քաղաքակիրթ ազգերի մեջ, մինչդեռ Գրիմմի հոչակը մեզ էլ էր հասել, մենք չէինք կարող գործով ցույց տալ զոնե մի հեքիաթ մեզանում, որ այն զվարճությունը պատճառեր, ինչ որ տեսականապես ցնորում էինք, թե դոքա պետք է զարթեցնել կարողանան։ Ռւսուի և կամ սկսում էինք այն հարդը անտեղի անհամություն համարել, կամ կարծում էինք, թե մեր ազգը զուրկ է լավ հեքիաթներից, և մենք պատրաստ էինք ազգային բանաստեղծության հրապույրներից հրաժարվելով հրաժարվիլ… Սրվանձտյանի մեծ ծառայությունը և ճաշակը հենց նորանումն է, որ մի հարվածով անհավատներին հավատքի բերեց՝ այն հրապույրներն իրանց առաջ իրոր օրինակ դնելով… Դոքա անհերքելի ազացույց են, թե ժողովրդական բանաստեղծության անփոխարինելի ազգեցությունն որքան կախված է հավաքողի շնորհից… («Համով-Հոտով», Կ. Պոլիս, 1884, էջ է—Ը)։

բորդ գրառումը 1886-ին էր, Մանուկ Աբեղյանի կողմից։ Սա հրատարակվեց 1889-ին։ Այս պատումը ևս կից ուներ քննական մի առաջաբան։

Մինչև 1900-ական թվականների սկիզբը վեպի գրառմանը բնորոշ է մի երեսույթ՝ պատումը գրառվում էր և հրատարակվում նախնական հետազոտությամբ հանդերձ։ Նախդա նորից Սրվանձտյանից եկող մի տեսակ ավանդույթ էր արդեն, երկրորդ՝ պատումները գրառվում էին հայտնի մտավորականների կողմից, որոնք ոչ միայն բանահավաք էին, այլև ժամանակի լավագույն կրթությամբ մասնագետ-բանասերներ—Մանուկ Աբեղյան, Գարեգին Հովսեփյան, Բագրատ Խալաթյան, Արտաշես Աբեղյան։ Այսինքն, վեպը մըշտապես գտնվում էր նորաստեղծ բանագիտության ուշադրության կենտրոնում։ Բանահավաքական գործը դրվում էր մասնագիտական հիմքերի վրա։ Այդ գործի համար գրվում է նաև ուղեցույց-ձեռնարկ¹։ Զնայած չկային բանահավաքական գործը կազմակերպող և նյութապես ապահովող հիմնարկներ և ամեն ինչ արվում էր անհատական նախաձեռնությամբ, այնուամենայնիվ, այդ գործն արդեն պատահական բնույթ չէր կրում։ Անհատների եռանդը ընդհանուր հասարակական բնույթ տվեց այդ գործին։

Երկրորդ շրջան (1915—16 թվականներ).—Պատմա-հասարակական տարբեր իրադրության հիմունքով այս թվականները կազմում են առանձին շրջափուլ։ Երկու տարվա ընթացքում գրառվել է տաս պատում, 1915-ին՝ վեց և 1916-ին՝ չորս։ Պատումների այս մեծ քանակը կապված է հասարակական այլ տեղաշարժերի հետ։

1915 թ. կոտորածից փրկված արևմտահայերը հավաքվել էին էջմիածնում։ Քառասուն տարվա ճանապարհ էր անցել հայ բանագիտությունը, ազգագրությունը, աղքային նյութական ու հոգեւոր մշակույթի հավաքման գործը։ Կորուստյան վտանդի առաջ էր կանգնած և հայ ժողովուրդը, և

¹ Գրիգոր Խալարյան, Սրագիր հայ աղղաղրության և աղղային իրավաբանական սովորությունների, Մոսկվա, 1887։

նրա հոգեսր հարուստ մշակույթը։ Հայ մտավորականությունը բարբարոսության ուժին հակադրեց քաղաքակրթության ուժը, և ջարդի ու սովի, մահվան ու ավերի տարիներին գրավեցին հերոսական վեպի տաս պատում։ Կա այս երկույթի գործնական կողմը ևս։ Մինչև այդ եղած գրառման փորձը ցույց էր տվել, որ վեպ կարելի է փնտրել Արևմտահայաստանում կամ Արևելահայաստան տեղափոխված արևմբտահայերի միջավայրում։ Բանահյուսական նյութերի գրառման, հրատարակության ու ուսումնասիրության գործն իրենց ձեռքն էին վերցրել արևելահայ մտավորականները։ Նրանք, սակայն, նյութական, քաղաքական և այլկայլ հանդամանքների պատճառով հնարավորություն շունեին շրջագայելու Արևմտյան Հայաստանում և դրանցումներ կատարելու։ Բանահավաքները չեին կարողանում գնալ բանասցների մոտ, բանասացներին սոցիալական (պանդխտություն) և քաղաքական (կոտորած) աղետները բերում էին բանահավաքների մոտ։ 1915-ից հետո Արևելահայաստանը լցվել էր գաղթական արևմտահայերով, և մտավորականության կենտրոններին մոտ գտնվող վայրերում (Էջմիածնում, Երևանում, Աշտարակում) տիֆի ու համաճարակի պայմաններում բանահավաքներն անձնուրաց գործ էին կատարում՝ գրառելով բանահյուսական ու ազգագրական նյութեր, այդ թվում և վեպը։ Այս իմաստով բացահայտ և բացարձակ է այդ տաս պատումի և դրանց գրառման թվականների կապը, կապ, որը կարելի է քննել պատմական, աշխարհագրական, հասարակական, հոգեբանական կողմերով։

ԵՐՐՈՐԴ շրջան (1920—50 թվականներ).—1932 և 1933 թվականներ՝ ինը պատում։ Այս թվականներն արտահայտում են պատմական ու հասարակական բոլորովին այլ իրադրություն—իր ապրելու և ստեղծագործելու իրավունքը վերագրած հայ ժողովուրդ, գործող ուսումնական բարձրագույն հաստատություններ, պետության կողմից ֆինանսավորվող և խրախուսվող բանահավաքչական գիտարշավներ, ազգային մշակույթի հանդեպ պետական մտածողություն և

Հովանավորություն։ Կուլտուրայի պատմության ինստիտուտի կողմից Կ. Մելիք-Օհանջանյանի գլխավորությամբ կազմակերպված գիտարշավների ընթացքում են գրառվել Հիշյալ ինք պատումներից ութը։ Հայ իրականության մեջ դա առաջին գիտարշավը չէր, անշուշտ։ Տարբեր ժամանակներում և տարբեր անձնակազմերով բանահավաքչական գործի էին ելել նաև XIX դարի վերջերին և XX դարի սկզբներին։ Տարբերությունը ո՞չ թե բանահավաքների և բանահավաքչական գործի մեջ է, այլ՝ հասարակական այն պայմանների, ուր գործում էին բանահավաքները և գիտարշավները։ Մինչև հեղափոխությունը արդեն գրառվել էր տպագրված պատումների մեծագույն մասը՝ երեսուներեք պատում։ Բայց հեղափոխությունից հետո բանահավաքչական, այդ թվում և վեպի դրառման, գործը դադարեց առանձին անհատների եռանդուն նախաձեռնություն լինելուց և դարձավ պետական գործ, շնայծ այստեղ նույնպես մեծ էր կազմակերպող անհատների դերը։

Վեպի տարբերակների հրատարակման, նորերի դրառման 30-ական թվականների վերընթացը կապվում է Եղիշե Զարենցի անվան հետ։ Այդ տարիներին Զարենցը պետհրատի գեղարվեստական բաժնի վարիչն էր։ Նա առաջարկում է Մ. Աբեղյանին վեպի տպագիր ու անտիպ պատումները համախըմբել մի գիտական հրատարակության մեջ։ Զարենցի առաջարկությամբ ու աջակցությամբ, Մ. Աբեղյանի և Կ. Մելիք-Օհանջանյանի ջանադիր աշխատանքի արդյունքն են այժմ այն երեք ստվարածավալ ժողովածուները, որոնք ամփոփում են վեպի քառասունյոթ պատում։ Հենց այս գործի սկզբին նոր պատումներ հայտնաբերելու նպատակով կազմակերպվեց Հիշյալ արշավախումբը՝ Կ. Մելիք-Օհանջանյանի ղեկավարությամբ։ Նույն այդ շարժման տարիներին՝ 1933 և 36 թվերին, Արամ Ղանալանյանը գրառեց երկու պատում։

Զարենցի մտահղացումը պատեհ առիթ էր, բայց ոչ պատահական։ Վեպի պատումների մի առանձին ժողովա-

ծուի գիտական հրատարակության հարցը նախապատրաստված էր վաղուց, գուցե, դեռևս 1892-ից, երբ դարձյալ Աբեղյանի խմբագրությամբ լույս տեսավ Գ. Հովսեփյանի կազմած «Սասմա ծոեր» ժողովածուն։ Բագրատ Խալաթյանը 1898-ին, իր գրառած պատումի առաջաբանում նպատակ է հայտնում հրատարակելու մինչ այդ շտպված և տպագրված պատումների մի միասնական ժողովածու, որը, ցավոք, չկարողացավ իրականացնել¹։

Բազում տարբերակների անհրաժեշտությունը վեպի ուսումնասիրության համար երևան եկավ երկրորդ պատումի գրառումից սկսած։ Աբեղյանի առաջին հոդվածը վեպի մասին Սրվանձտյանի և իր գրառած պատումների համադրությունն էր²։ Սրանով իսկ սկիզբ էր դրվում վեպի տարբերակների համեմատական ուսումնասիրության։ Բագրատ Խալաթյանը տեսականորեն ավելի ուղղակի դրեց այդ հարցը. «Միայն այն ժամանակ, երբ մենք ամփոփ կունենանք աշքի առջև մեր դյուցազնական վեպի վարիանտները (գեթ նորամեծ մասը), ցրված այստեղ և այնտեղ, երբ վերջիններս դասակարգված կլինեն ըստ նյութին, և մենք ավելի հարուստ տեղեկություններ կունենանք սոցա ժողովրդի մեջ գոյության պայմանների մասին, այն ժամանակ միայն կարելի կլինի ձեռնարկել վեպիս լուրջ ուսումնասիրության, որի կարևորությունը մեզանում շատ զգալի է»³։ Բազում տարբերակներ և նրանց ի մի հավաքման կարևորությունը շեշտվում է դեռևս XIX դարի վերջին, այսինքն, վեպի ուսումնասիրությունը մեղանում դրված էր ճիշտ հիմքերի վրա՝ նոր տարբերակ-

¹ «Ավելորդ շենք համարում հաղորդել ի լուր հայ ժողովրդական բանահյուսություն սիրողների, որ մենք դիտավորություն ունենք ամենամոտ ապագայում մի ժողովածուի մեջ ամփոփել մեր ժողովրդական դյուցազնական վեպի վարիանտները, որոնք զանազան ժամանակ և զանազան հանդեսների էջերում կամ առանձին հրատարակությամբ լույս են տեսել...» (Բ. Խալաթյան, Սասմա փահլիվաններ կամ Թըլոր Դավիթ և Մհեր, Վաղարշապատ, 1899, էջ 2)։

² «Նոր-Դար», 1889, № № 137, 140,և 141։

³ Բ. Խալաթյան, Սասմա փահլիվաններ..., էջ 9։

ների գրառման և դրանց համեմատական ուսումնասիրության վրա:

Պատումների գրառման, հրատարակման և ուսումնասիրության բավականին հարուստ փորձը հող հանդիսացավ Զարենցի մտահղացման: Դրան նպաստեց նաև Զարենցի մտադրությունը՝ բանաստեղծական վերամշակման ենթարկել «Սասունցի Դավիթ» ճյուղը: Այդ առիթով նա ուսումնասիրեց վեպի մինչ այդ հրատարակված բոլոր տարբերակները¹: Պատումների գիտական ժողովածուի հրատարակությունը հնարավոր եղավ իրականացնել միայն նոր կարգերում:

1940—60-ական թվականներին վեպի ուսումնասիրությունը շդադարեց, մինչդեռ գրառման գործն ինչ-ինչ մոտեցումներով համարվեց ավարտված: «Սանա ծռեր» գիտական ժողովածուի հրատարակությունը մի տեսակ թուլացրեց վեպի գրառման գործը, և այդ թվականների դատարկությունը մասամբ բացատրվում է կատարված ու ավարտված գործի հանգստությամբ:

Մյուս կողմից, որոշ շրջանում, այն, ինչ մի ժամանակ իրական պատմություն էր և ազգային ճակատագիր, համարվեց ազգայնական: Այս իմաստով, 30-ական թվականներից սկսած որոշ շափով դժվարացավ բանահավաքչական գործը: Ասացողը չէր վստահում անծանոթ բանահավաքին: Այս բոլորը անդրադարձավ 30—50-ական թվականների գրառած բանահյուսական նյութի քանակի և որակի վրա: Եթե վիներ արհեստականորեն ստեղծված այդ արգելքը, նոր կարգերում, նման բանահավաքչական կազմակերպված գործունեության պայմաններում վեպի նոր պատումների թիվն, անկասկած, ավելի շատ կլիներ, քան է: Մանավանդ որ կենդանի բանահյուսական նյութի և վարպետ ասացողների առումով նույնական պայմանները բարենպաստ էին—խաղաղ տարիներ,

¹ «Հիշողություններ Եղիշե Զարենցի մասին» (Կ. Մելիք-Շահնշանյանի հուշերից), Երևան, 1961:

վերջնականապես Արևելահայաստանում հաստատված արևմբտահայության ամբողջական զանգվածներ, «Երկիրը» (Արևմտահայաստան) տեսած ասացողներ, շխաթարված հիշողություններ «Երկրից», համեմատաբար անաղարտ բարբառ և գոյատեսող ավանդույթներ:

Չորրորդ շրջան (1960—70 թվականներ).—1962-ին բանագետ Գր. Գրիգորյանը գրառում է վեպի մի նոր պատում¹. մինչև այսօր հետամուտ լինում նոր տարբերակների, և նա այժմ ձեռքի տակ ունի մոտ տաս նոր գրառումներ։ Այդ նոր պատումի գրառումն ու հրատարակումը նորից հետաքրքրություն առաջացրեց վեպի դեռևս կենդանի գոյատեման նկատմամբ։

1970 թ. ԳԱ հնագիտության և ազգագրության ինստիտուտի բանահյուսական արշավախումբը գրառեց երկու պատում (արշավախումբի ղեկավար՝ Սարգիս Հարությունյան, գրառողներ՝ Սարգիս Հարությունյան և Արուսյակ Սահակյան): Նույն արշավախումբը 1971 թ., այս անգամ արդեն վեպի նոր տարբերակներ գրառելու և հայտնի պատումների հետքերով գնալու հատուկ նպատակով, երեք ամսում, ներկայիս Հայաստանի յոթ շրջաններում գրառեց քառասունից ավելի պատումներ։

Այս գիտարշավի ժամանակ հավաքվեցին մի շաբթակայություններ, ըստ որոնց, որոշ ասացողներից 20—40-ական թվականներին գրառվել են պատումներ, որոնք առաջածըմ մեր ձեռքի տակ չկան, գրանց ասացողներն էլ վախճանվել են, և անհնար է արդեն երկրորդ գրառումը։ Հետադարձ պրադումները գուցե պարզեն որոշ մութ հարցեր և ի հայտ բերեն նոր պատումներ։ Կարեւորն այն է, որ ըստ այդ վկայությունների, հիշյալ թվականներին վեպի ավելի շատ տարբերակներ են գրառվել, քան հայտնի է, այսինքն՝ այդ ժամանակամիջոցում ուշադրությունը վեպի գրառման նկատմամբ ավելի մեծ է եղել, քան դա երեսում է տախտակից։

¹ Այս պատումը հրատարակվեց 1969 թ., «Գարուն» ամսագրում, № 7:

Բանագիտությունը մեր օրերում առաջադրում է հարցեր, որոնք մի ժամանակ թվում էին անկարևոր, զանց էին առնվում կամ քիչ էին լուսաբանվում. դրանց առաջադրման պահանջը նախկինում գուցե հասունացած շէր: Օրինակ. ինչպես է գոյատեսում վեպը մեր օրերում՝ իր առաջին գրառումից հարյուր տարի անց, ասացողների ո՞ր խումբն է պահել կամ պատմում վեպը, տպագրության և գրականության միջոցով գտած տարածումը ինչքանո՞վ է ազդել վեպի վրա, այժմյան պատումները բանավո՞ր աղբյուրից են դալիս, թե՞ գրավոր, ժամանակը և հեռավորությունը վեպի բուն հայրենիքից ինչպիսի՞ փոփոխություններ են բերել իրենց հետ և այլն: Այս հարցերի հասունացումը այն կապն է, որ գոյություն ունի «1971 թվական» և «քառասունից ավել պատումների գրառում» հասկացությունների միջև: Մյուս կողմից, ի տարբերություն 30—50-ական թվականների, մեր օրերում բացարձակ հնարավորություն կա գրառելու բանահյուսական տարբեր ժամրերի այնպիսի ստեղծագործություններ, որոնցից այն ժամանակների ասացողը կարող էր կը բուռուկ հրաժարվել: Սա է նաև պատճառներից մեկը, որ մեր օրերում, երբ ժողովրդական վեպն արդեն դադարել է կենցաղավարելուց, երբ պատմում են միայն ի պատասխան հարցմանը, երբ պրոֆեսիոնալ ասացողներն արդեն եղակի են, գրառվեցին այնքան պատումներ, որպիսի քանակ բաժին շէր ընկել գրառման և ոչ մի տարեթվի: Այս քանակը սերտ կապի մեջ է և իր դրդապատճառի (բանագիտության զարգացման աստիճան), և հասարակական իրադրության (Գիտությունների ակադեմիայի համակարգում բանահյուսության առանձին բաժնի գոյությունը հնագիտության և ազգագրության բաժինների հետ կողք-կողքի, մեծ ուշադրություն ժողովրդի հոգեւոր մշակույթին, ամենամյա պարբերական բանահավաքչական գործուղումներ), և նույնիսկ գրառման տեխնիկական կողմի հետ (արագ շրջադաշելու և ձայնագրման սարքերի հնարավորություններ): Վեպի գրառման 100-ամյա հոբելյանը նորից պատեհ առիթ էր, բայց

նորից ոչ պատահական. բանագիտական և հասարակական նախադրյալները հասունացրին վեպի նոր գրառումների հարցը:

Բանագիտության արդի պահանջով գրառվում էին ոչ միայն ամբողջական ու լիարժեք պատումներ, այլև՝ յուրաքանչյուր պատառիկ, ավանդություն, կապված վեպի հետ, որնէ վկայություն, որ կարող էր լույս սփռել վեպի պատմվելու վայրի և ժամանակի վրա. փորձ էր արվում վերականգնել որոշ ասացողների վարպետ-աշակերտ, համագյուղացի, համերկրացի, ազգակից կամ պարզապես ունկնդիր հարաբերությունը, գտնել նախկինում գոյություն ունեցած վիպասանական դպրոցների ծայրը: Այս վկայություններով ու հավաքած ողջ նյութով լայնացավ պատկերացումը վեպի աշխարհագրական տարածվածության մասին, վեպի աշխարհագրական քարտեզն իր մեջ առավ նորանոր տեղավայրեր թե՛ Արևմտյան և թե՛ Արևելյան Հայաստանում:

* * *

Այն, որ հետաքրքրությունը ժողովրդական վեպի նկատմամբ, դրա գնահատումը, արժեքավորումը, պահպանումն ու ուսումնասիրությունը պայմանավորված է պատմա-հասարակական, նույնիսկ քաղաքական իրադրությամբ, որ գրառված պատումների քանակն անգամ սերտ կապի մեջ է իր գրառման թվականի հետ—սա դեռ գրառման ժամանակ հասկացության մի կողմն է միայն: Այն ավելի կարևոր և որոշիչ դեր է խաղում վեպի կրողների՝ վիպասացների, հասարակական կազմի վերլուծության դեպքում: Վիպասացների սեռի, տարիքի, զբաղմունքի, գրագիտության աստիճանի մասին տվյալների հասարակագիտական վերլուծությունը վեպի գրառման ժամանակից դուրս և գրանից անկախ լինել չի կարող: Եթե վիպասացների հասարակական կազմը ներկայացնում է մի որոշակի դարաշրջան, ապա այդ կազմի նկարագիրը և բանագիտական վերլուծությունը կարող է ճիշտ լինել միայն տվյալ դարաշրջանի համար:

«Սասնա ծոեր» վեպի ժամանակագրությունը և վիպասացների հասարակական կազմը արտացոլում են դրա գոյատեման ամենավերջին շրջանը՝ XIX դարի վերջ և XX դար մինչև մեր օրերը։ Ավելի վաղ գրառումներ չունենք։ Ուրիմն, վեպի ժամանակագրական և հասարակական վերլուծությունը սահմանափակվում է այդ ժամանակահատվածի շրջանակներում և վեպի գոյատեման բազմադարյան ողջ ընթացքի վրա չի տարածվում։

Այս իսկ պատճառով, վիպասացի սեռ, տարիք, դրադմունք բանագիտական հասկացությունները քննվում են միայն իրենց գրառման ժամանակի մեջ։ Ասցողների հետ միասին վերլուծության է ենթարկվում նաև բանահավաքների հասարակական կազմը, որովհետև որոշ օրինաշափություններ վեր են հանվում ասացող-բանահավաք փոխադարձ կապի բացահայտմամբ միայն։

Ս ե ռ.—Բանահավաքները բացառապես տղամարդիկ են, ոչ մի կին բանահավաք։ Կնոջ մուտքը գիտության, առավել ևս՝ բանահավաքական ասպարեզ, գրեթե անհնար էր։ Հասարակական ավանդական կարգ ու կանոնով կինը չէր կարող շրջել դյուղերը, մտնել անծանոթ տներ, խոսել իրենից տարեց տղամարդու հետ։ Այս պարզ բացատրությունն է պատճառը, որ մինչ հեղափոխությունը կին բանահավաք չկա¹։

Նույն ձևով, անծանոթ տղամարդ բանահավաքին գրեթե անմատշելի էր կին ասացողների հասարակությունը։ Նաև սրանով է բացատրվում այն հանգամանքը, որ քառասունյոթ վիպասացներից միայն չորսն են կին։ Նրանց պատումների համեմատական ուսումնասիրությունը ցույց է տալիս, որ կանայք տղամարդկանցից ոչ պակաս վարպետ վիպասացներ են։ Բայց նրանց թիվը քիչ է նաև՝ հիշյալ պատճառով և երկրորդ՝ եթե բանահայուսական մյուս ժանրերը, հատկա-

¹ Այս անվերապահ եղբակացությունը վերաբերում է միայն վեպին, իսկ բանահայուսական այլ նյութերի գրառման գործում հայտնի է որոշ կին բանահավաքների մասնակցությունը։

պես քնարական, ծիսական և փոքր տեսակները, կենցաղ էր բոլորի համար—բոլորն էին պարում և պարելիս երգում, բոլորն էին օրհնում, անիծում, երդվում, աղոթում—մինչդեռ վեալ ոչ միայն հատուկենտ վիպասացներ էին պատմում, այլև ոչ բոլորը կարող էին ունկնդիր լինել: Վեալ և մեծ ժանրի այլ ստեղծագործություններ պատմվում էին հատուկ հավաքատեղիներում՝ օդաներում, ուր երիտասարդների, կանաց ու երեխաների մուտքը արգելվում էր: Կանաց մեծ մասը կարող էր լինել հիանալի ասացող, հեքիաթասաց, բայց վեալ շիմանալ՝ լսած լինելու պատճառով: Հետաքրքիր է, որ հիշյալ շորս կին-վիպասացներն էլ վեալը լսել և սովորել են իրենց տոհմի որևէ ասացողից, հորից, պապից, հորեղբորից, այսինքն՝ տանը, տան պայմաններում: Այստեղ դեր է խաղում ոչ միայն լսելու, այն էլ հաճախակի լսելու պահը, այլև այն, որ պատմելու բնատուր շնորհքը, կարծես, անցնում է ժառանգաբար: 1971 թ. հատուկ դիտարկումները, գրառումներն ու վկայությունները նույնակա հաստատեցին այն, որ վեալը մտապահել և լավ են պատմում նրանք, ում աղջի մեջ եղել է վարպետ ասացող՝ հայրը, պապը, հորեղբայրը, քեռին և այլն: Սա դիտված օրինաշափություն է, բայց ոչ բացարձակ, անշուշտ:

Մեր օրերում բանահավաք-ասացող հարաբերության մեջ սեռային սահմանափակություններ գրեթե չկան, և գրառված նյութի քանակը կամ որակը միայն դրանով պայմանավորված լինել չի կարող, շնայած մեր ժամանակներում անդամ կանանցից բանահյուսական նյութ համեմատաբար քիչ է գրառվում:

Տարիք.—Բանահավաքների տարիքն առանձնապես կապված չէ գրառման ժամանակի կամ հասարակական պայմանների հետ, և դրան հատուկ անդրադառնալը տվյալ դեպում անիմաստ է: Իսկ ասացողների տարիքային տվյալներն այս մոտեցմամբ որոշ օրինաշափություններ տեսնելու հնարավորություն են ընձեռում:

Ասացողների տարիքային խմբերն են.

1-ին խումբ՝ 20—30 տարեկան 1 ասացող

2-րդ	»	30—40	»	5	»
3-րդ	»	40—50	»	4	»
4-րդ	»	50—60	»	10	»
5-րդ	»	60—70	»	6	»
6-րդ	»	70—80	»	2	»
7-րդ	»	80—90	»	5	»
Անհայտ տարիքի՝			14	»:	

Հնդգրկումը լայն է, ներառում է տարիքային բոլոր խըմբերը, բացի մանկական և պատանեկան խմբերից։ Սրա պատճառն ինքնըստինքյան պարզ է. վեպը մանկական բանահյուսություն չէ։

Խմբերի միայն ներքին քանակային հարաբերության մեջ որևէ օրինաշափություն տեսնելը կլինի միակողմանի, նաև՝ սխալ։ Իսկ երբ տարիքային խմբերը քննում ենք դարձյալ իրենց գրառման ժամանակի և հասարակական պայմանների մեջ, այստեղ արդեն տարիքը խոսում է։

Եթե նայելու լինենք թվային ցուցիչին, պիտի ասենք, որ վեպ ամենից շատ պատմում են 50—60 տարեկան ասացողները, իսկ 70—80 տարեկանը՝ ավելի քիչ։ Բոլոր ասացողները վկայում են, որ վեպը լսել և սովորել են իրենց մեծերից, «հալիվորներից», «սպիտակամորուս ծերունիներից»։ Ուր են այդ ծերունի վիպասացները, ինչո՞ւ նրանց թիվը քիչ է տարիքային տախտակի վրա, այնինչ 3-րդ և 4-րդ խմբերը գերակշռող են։ Սա բացատրվում է նախ այն հիմնական պատճառով, որ վեպը պատմելու բուն վայրում, ասացողի բուն հայրենիքում, այնտեղ, ուր վիպասացներ և վիպասանական ավանդներ գոյություն ունեին, գրառումներ շատ քիչ են եղել։ Գրառումները կատարվել են մեծ մասամբ վեպի գոյատևման բուն վայրերի սահմաններից դուրս։ Որոշ պատումներ գրառվել են պանդուխտ արևմտահայերից։ Պարզ է, որ հայրենի տանից հեռու աշխատանք փնտրող

պանդուխտը երիտասարդ պիտի լիներ, մինչև 50—60 տարեկան, ծերունին պանդիստության շէր գնա: Դրա համար էլ այդ ասացողների տարիքը միջինն է: 1915-ին գաղթած արևմբտահայ ասացողների տարիքը նույնպես միջինն է՝ 40—60 տարեկան: Սա ևս բնական է նրանով, որ կոտորածից ծերունիները քիչ են փրկվել, քշերն են դիմացել արհավիրքին ու գաղթի ճանապարհներին: 30-ական թվականների ասացողների տարիքային խմբերը, որոնք դարձյալ արևմտահայ գաղթականներ են, 5—7-րդն է: Բայց նրանք նույնպես 1915-ին եղել են միջին տարիքի. պարզապես նրանցից գրառումներ ուշ են կատարվել:

Վեպի տեղահանումն իր պատմվելու բուն վայրերից փոփոխություն է մացնում բանագիտական այնպիսի մի հասկացության մեջ, ինչպիսին ասացողի տարիքն է: Անհընար է, նույնիսկ սխալ կլինի այդ հարցը քննել պատմաքաղաքական և հասարակական տեղաշարժերից անկախ:

Ապա. ասացողների մեծ մասը ոչ միայն պրոֆեսիոնալ վիպասաց շէ, այլև ընդհանրապես ասացող շէ. պարզապես նա լսել և մտապահել է վեպը, իր շնորհքի ուժով պատմում է լավ կամ վատ: Շատերը այդ իսկ պատճառով հրաժարվել են վեպը պատմելուց, պատճառաբանելով, որ իրենք վիպասաց շեն և միշտ մի առանձին ակնածանքով են խոսել իրենց տեսած վիպասացների մասին: Նման վերաբերմունքը խոսում է ոչ միայն վիպասանական դպրոցի ավանդույթների, այլև ժողովրդի կողմից վեպի ժանրային գիտակցման մասին, այսինքն՝ ամեն մի ասացող չի կարող վիպասաց լինել:

Այս վերաբերմունքը նաև խախտում է մտցնում տարիքային խմբերի մեջ: Եթե որոշ ասացողներից կատարված դրառումները պատահական են այն իմաստով, որ նրանք իսկական վիպասացներ շեն, անընդհատ շեն պատմել վեպը, շրջապատին հայտնի շեն եղել որպես այդպիսին, ապա նրանց տարիքն այս դեպքում ոչ մի դեր չի խաղում:

1971 թ. գիտարշավի ժամանակ գրառված պատումների ասացողների մեծ մասը վիպասաց շէ. նրանք վեպը պատ-

մել են բանահավաքի խնդրանքով միայն։ Դրանք այն ծերունիներն են, որոնք 1915-ի գաղթից առաջ, շատ երիտասարդ հասակում, «երկրում» լսել են վեպը։ Պարզ է, որ նրանց տարիքն այժմ պիտի անցնի 70-ից. պարզ է նաև, որ այս տարիքը շենք կարող քննել իր բուն՝ վեպ պատմելու, առումով։

Այսպիսով, ասացողների տարիքային խմբերը վեպը պատմելու իմաստով կայուն չեն, հարաբերական են, իրենք իրենց ներսում օրինաշափ չեն։ Այդ խմբերը օրինաշափ են ոչ թե վեպի, այլ՝ հասարակական երևույթների նկատմամբ։

Միայն երիտասարդ տարիքի ասացողների դեպքում նկատելի է մի ներքին օրինաշափություն. դրանք մեծ մասամբ այն ասացողներն են, որոնք վեպը լսել և սովորել են իրենց ազգակից ասացողից։

Զբաղմունք.—Բանահավաքներն իրենց զբաղմունքով բացառապես մտավորականներ են՝ հոգնորական, ուսուցիչ, հայագետ, որոնցից շատերը կրթություն էին ստացել ժամանակի լավագույն ուսումնական հաստատություններում՝ Վարագա վանքում, Էջմիածնում, Ռուսաստանում, Եվրոպայում։ Նրանք մեծ մասամբ հայտնի անուններ են, ազգային մշակույթի մեջ իրենց մեծ երախտիքով, և նրանց ներկայացնելն այստեղ ավելորդ է, մանավանդ որ հարցի առումով մեզ այստեղ հետաքրքրում է ոչ թե նրանց տեղն ու դերը հայագիտության մեջ, այլ միայն նրանց զբաղմունքը որպես հասարակագիտական հետազոտության տարր։

Ասացողները հիմնականում հողագործ կամ արհեստագոր գյուղացիներ են, որոնք աշխատանքի ընթացքում կամ դրանից հետո հավաքվել են օդաներում, լսել համագյուղացի վիպասացներին կամ հեռու տեղից եկած աշուղներին։ Նրանք մեծ մասամբ անգրագետ են կամ հազիվ գրաճանաչ, կան մի երկու գրագետ ասացողներ՝ տիրացու Հակոբ Նըրգեյանը և Սարգիս Հակոբյանը։ Նրանց մոտ գրագիտության աստիճանը խիստ վատ է անդրադառել վեպի վրա. Նրանք

վեպը խճողել են անհարկի գրական բառերով, Աստվածաշընչից և այլ գրքերից վերցրած պատմություններով:

Գյուղական արհեստավորները թաղիքագործ, շալ գործող, գղրար, հյուսն, ջրաղացպան վարպետներ են, որոնք իրենց աշխատանքի բերումով շատ էին շփվում մարդկանց հետ, շրջում էին գյուղերը, սովորում վեպը կամ, ընդհակառակը, պատմում, տարածում: Սրանք այնքան հմուտ ասցողներ էին, որ բանահավաք Սարգիս Հայկումին հակված է կարծելու, թե «Սասնա Դավիթ և Մհեր դյուցազնական վեպը Մոկացի գղրարներ տարածած են հեռու գավառներ, նաև փոքր մասամբ՝ Կումանցի և Ռզմիցի գղրարներ»¹: Սամասնավոր փաստերից հանված հետևություն է, իհարկե, բայց ճշմարտությունն այն է, որ վիպասացների մեջ մեծ թիվ են կազմել արհեստավոր գյուղացիները:

Ասացողի զբաղմունքը, գրագիտության աստիճանը համախոս է իր ժամանակի և հասարակական պայմանների հետ: Հայ ժողովրդի մեծագույն մասն այն ժամանակ կազմում էր գյուղացիությունը (հողագործ և արհեստավոր), որի մոտ գրագիտության աստիճանն այնքան էլ բարձր շէր:

Բացի վերը բերված տվյալներից, կան վկայություններ, որոնց միատեղումից կարելի է պատկերացում կազմել մի փոքր ավելի վաղ ժամանակաշրջանի՝ գրառված պատումնեների ասացողների նախորդ սերնդի մասին: Ըստ այդ վկայությունների, դեռևս XIX դարի երկրորդ կեսին գոյություն են ունեցել վիպասանական դպրոցներ, ուր վարպետ վիպասացը ուսուցանել է իր աշակերտներին վեպը և վիպելու արվեստը: Այս մասին առաջին հիշատակությունը տալիս է Տարոնցի Կրպոն՝ Սրվանձտյանի գրառած պատումի ասցողը: Տարոնցի Կրպոն «կը պատմեր, թե յուր վարպետը շատ ընդարձակն գիտեր այս պատմության, և թե մեջ ընդ մեջ շատ տեղեր ոտանավոր խաղեր կային, որ ձայնով կերպեր: Թե այդ վարպետն երկու վոշիկ աշակերտ ուներ, որոնք

¹ «Սասնա ծոեր», հատ. Ա, էջ 303:

շատ կատարյալ սորված էին, և թե ինքն՝ բավական երկար պատմած Ախնելով, շատ կտորներ մոռացած էր»¹: Պրոֆեսիոնալ վիպասացի իմաստով Տարոնցի Կրպոն վեպի գրառված պատումների ասացողների մեջ առաջինն է և միակը, որ անցել է վիպասանական դպրոց: Այն երկու վոշիկ աշակերտներն էլ, գուցե, վերադարձել են իրենց հայրենի բնակավայրերը և նպաստել Ռշտունիքում վեպի տարածմանը:

Վիպասանական մի յուրօրինակ դպրոց է ունեցել Ալաշկերտի Խաստուր գյուղը: № 33 և 34 պատումների ասացողներ Մանուկ Թորոյանը և Կարապետ Թամոյանն այդ գյուղից են: Նրանք իրենցից առաջ հիշում են վարպետ վիպասացներ Ռես Գևորգին և Քոչե Վարդանին: Կարապետ Թամոյանը վկայում է, որ Ռես Գևորգն վեպը սովորել էր իր հոր պապից՝ Դրմեից, որ հոշակված պատմող է եղել: 1971 թ. գիտարշավախումբը հանդիպեց Խաստուրի դպրոցի վերջին վիպասաց ներկայացուցչին՝ Սեղրակ Քերոբի Աբաջյանին: Սեղրակ Աբաջյանը Ռես Գևորգին շի տեսել, նա վեպը սովորել է Փրե Աբրո (Աբրահամ) անունով մի վիպասացից, դարձյալ Խաստուրից: Ճանաչում է Մանուկ Թորոյանին և Կարապետ Թամոյանին, լսել է նաև նրանց, բայց իր ուսուցիչը նա համարում է Փրե Աբրոյին: Որոնումները տարան Փրե Աբրոյի որդու՝ Սմբատ Աբրահամի Գևորգյանի մոտ, որը հիշում է իր հոր պատմածը, բայց, ցավոք, նրա վիպասանական արվեստը շի ժառանգել: Նա լրացուցիլ տեղեկություններ հաղորդեց իր հոր և Խաստուրցի նախորդ վիպասացների մասին: Բոլոր վկայությունների միատեղումից ստացվում է վիպասացների շորս սերնդի պատկերը՝ 1. Դըրմե — 2. Ռես Գևորգ և Քոչե Վարդան — 3. Մանուկ Թորոյան, Կարապետ Թամոյան և Փրե Աբրո — 4. Սեղրակ Աբաջյան և Սմբատ Գևորգյան: Դրմեից, Ռես Գևորգից, Քոչե Վարդանից և Փրե Աբրոյից դրառված պատումներ շկան: Մյուսների պատումների բացարձակ նույնությունը թույլ է տալիս վեպի ավանդական այս փոխանցումը կոչել Խաստուրի վիպասանական դպրոց:

¹ «Մասնա ծոեր», Հատ. Բ, Ա մաս, էջ 3:

Վիպասանական նման ավանդույթներ կարելի է նշել Մոկսում, Կարկառում, Մուշում, Սասունում, Սրանք, ճիշտ է, վիպասանական դպրոցների հետքեր են միայն, բայց ենթադրել են տալիս վեպի գրառման ժամանակաշրջանի նկարագրից մի փոքր տարբեր պատկեր: Բոլոր ասացողներն իրենցից առաջ հիշում են ավելի վարպետ վիպասացների, որոնք իմացել են ավելին, քան իրենք գիտեն, ընդարձակն ու կատարյալը, բազում ճյուղերով, երգերով, շափածո հատվածներով, ողորմիսներով: Եթե վեպի գրառման ժամանակամիջոցում վիպասացների պրոֆեսիոնալ դպրոցներ և պրոֆեսիոնալ վիպասացներ չեն եղել (կամ այդպիսիներից վեպ չի գրառվել), ապա անխտիր բոլոր ասացողների մոտ եղած խիստ ավանդապահ վերաբերմունքը իր լսածի և պատասխանատվության զգացումը իր պատմածի նկատմամբ դառնում է վեպը պահելու և ավանդելու մի ուրուն դպրոց, այսինքն՝ վեպը մի ստեղծագործություն է, որի մեջ ոչինչ չի կարելի փոխել, ավելացնել կամ պակասեցնել, նույնիսկ վատ պատմելը մեղք է: Հաջորդող սերունդը՝ ներծծելով նախորդի ամրող իմաստությունը և փորձը, միշտ մի խորին ակնածանքով ու խոնարհումով վարպետացնում է նախորդ սերնդին, համարելով իրեն աշակերտ, մինչև հաջորդ նոր սերնդի հերթափոխությունը: Նախորդող և հաջորդող սերունդների այդ մշտական վարպետ-աշակերտ, սովորեցնող-սովորող շվավերականացված հերթափոխությունը, որ կոշվում է ավանդույթ, բոլոր տաղանդավոր ասացողների առաջին և հիմնական դպրոցն է: Սրանով հանդերձ, յուրաքանչյուր ժամանակաշրջան ունի ասացողների հասարակական իր բնորոշ կազմը և նկարագիրը, որը չի կարելի տարածել վեպի գոյատևման ու պահպանման երկարատև ընթացքի վրա: Առավել ևս սխալ կլինի վեպի XIX—XX դարերի հասարակագիտական հետազոտության տվյալները դարձնել միջոց վիպաստեղծման բարդ խնդիրը լուծելու համար: Այդ դարերի ասացողների միայն հասարակական կազմը չի կարող բացարձակ որոշիչ դեր խաղալ այն հարցում, թե ժողովրդի ո՞ր խավի ընդերքում կարող էր ստեղծվել վեպը:

ՎԵՊԻ ԳՐԱՌՄԱՆ ՎԱՅՐԸ, ՏԱՐԱԾՈՒՄ, ՏԵՂԱՅՆԱՑՈՒՄ

Բանահյուսության մեջ գրառման վայր հասկացությունը մեծ կարևորություն ունի, եթե համընկնում է բանահյուսական ստեղծագործության հայրենիք հասկացության հետ։ Եթե չեն համընկնում այս երկու հասկացությունները, գրառման վայրն ունի երկրորդական նշանակություն։ Այս հարցադրումը հայ բանագիտության մեջ ունի մի առանձնահատուկ կարևորություն, որովհետեւ հայ բանահյուսության մեջ գրառման վայր և հայրենիք հասկացությունները մեծ մասամբ չեն համընկնում։ Սա բացատրվում է հայ ժողովրդի պատմական ճակատագրով, քաղաքական ու հասարակական իրադարձությունների հետևանք բռնի զանգվածային տեղահանումներով ու վերաբնակեցումներով, երեւլույթներ, որոնք անընդհատ խառնել են հայ ժողովրդի ազգագրական ու բանահյուսական քարտեզը։

Հարցը մասնավորելով ժողովրդական վեպի վրա, այսուեղ փորձ է արվում բացահայտել վեպի գրառման վայրի կապը նրա ստեղծման և գոյատևման բուն հայրենիքի հետ։

Վեպի բուն հայրենիքի խնդիրը վաղուց արդեն լուծված է հայ բանագիտության մեջ Մանուկ Աբեղյանի կողմից և հաստատված մյուս բանագետների համապատասխան աշխատություններում։ Դա Մասունն է, ուր պատմական որոշակի հիմքի վրա ստեղծվել են վիպական զրույցներ, ժամանակի ընթացքում այդ զրույցները միացել են և կազմել վեպ։

Մեզ հասած պատումները ցույց են տալիս, որ վեպը դարեր առաջ դուրս է եկել Մասունի սահմաններից, տարած-

վել Արևմտյան Հայաստանի մյուս շրջաններում՝ ընդգրկելով Մշո դաշտավայրը, Ալաշկերտն ու Բայազետը, Ռշտունիքն ու Վասպուրականը։ Աբեղյանի կողմից նշված են նաև այդ տարածման ուղիները. «Դիտենք, որ վեպն սկիզբ առնելով Սասունում, պատմվում էր Բաղեշի և Մշու կողմերում, Խլաթում և Բուլանըխում, որտեղից անցել էր դեպի Հյուսիս՝ Արճեց և Կաղզվան, ուր 18-րդ դարում արդեն կապված է եղել որոշ տեղի հետ։ Այնուհետև դա մտել է Ալաշկերտ և Այրարատ, էջմիածնի գավառը, ուր տեղացիներն արդեն յուրացրել են և արեւելյան բարբառով են պատմում։ Վեպն ընտանի է և Արագածի լանջերում, Ապարանում և Քավառում։ Մյուս կողմից՝ Շատախի, Ռշտունիքի ու Մոկաց կողմերում վեպն ավելի կենդանի է եղել և անցել Վան՝ կապվելով Մհերի դոան հետ, և այստեղից Աբաղայի դաշտով մտել Պարսկահայք, Հատկապես Խոյի, Սալմաստի և Մակվա կողմերը ուր նույնպես ցույց են տալիս վեպի գործողության տեղերը»¹։

Գոյություն ունի վեպի տարածման երկու ըմբռնում.

ա. վեպը դուրս է գալիս իր ստեղծման բուն վայրից, տարածվում այլ վայրերում և շի տեղայնանում։ Այս դեպքում տարածումը մնում է սոսկ աշխարհագրական-հասկացություն։

բ. վեպը դուրս է գալիս իր ստեղծման բուն վայրից, տարածվում այլ վայրերում և շի տեղայնանում։ Այս դեպքում տարածումը մնում է սոսկ աշխարհագրական-հասկացություն։

Վեպի անցումը Մուշ, Ալաշկերտ, Մոկս, Գավաշ, Շատախ, Վան տեղայնացման իմաստ ունի, որովհետև այդ շրջանները ոչ միայն յուրացրել են վեպը, այլև ամենագործուն մասնակցություն ցուցաբերել վիպաստեղծման և պահպանման ընթացքին։ Վեպը ձուլվել է այդ շրջանների բնակչության հոգևոր մշակութին, դարեր շարունակ եղել նրանունոր սնունդը և կրում է իր վրա հոգևոր կերտվածքի, նաև պատմական, աշխարհագրական ու ազգագրական կնիքը։ Հիշյալ շրջաններից գրառած պատումներն իրենց թե՛ քանակական, թե՛ որակական առումով իրավունք են տալիս.

¹ Մ. Աբեղյան, Երկեր, Հատ. Ա, Երևան, 1966, էջ 328—329 (ընդգծումները մերն են—Ա. Ա.)։

Մշտ դաշտավայրին, Ռշտունիքին ու Վասպուրականին Սասունի հետ հավասարապես կրելու վեպի հայրենիք կոչվելու պատիվը:

Վեպը՝ կապված լինելով հայ ժողովրդի պատմական ճակատագրի հետ, զանգվածային տեղաշարժերի և գաղթերի միջոցով Արևմտյան Հայաստանից անցել է նաև Արևելյան Հայաստան։ Անցումը կատարվել է տարբեր ժամանակներում (տե՛ս Տախտակ-քարտեղ 2):

Կարիքը արևմտահայությանը զանգվածաբար դարձնում էր պանդուխտ և զցում երկրե-երկիր։ Պանդուխտ հայերին մի առանձին ուժով ձգում էր էջմիածինը։ Նոանց մեջ լինում էին վարպետ ասացողներ, որոնք իրենց ինչպես իրենց ձեռքի ուժն ու բնիկ տարազը, բերում էին նաև իրենց էռւթյան անբաժան մասը կազմող հոգեսր մշակույթը՝ բանահյուսությունը։ Այդպիսի ասացողներից են գրառված վեպի մի քանի պատում՝ 1-ին (Մոկացի Նախո Քեռի, 1886 թ.), 2-րդ (Մոկացի Խապոյինց Զատիկ, 1898 թ.), 5-րդ (Մոկացի Հովան, 1892 թ.)¹, նշված երեք ասացողներն էլ Մոկսից են։ Նրանց կապն էջմիածնի հետ ըստ մեզ հետքրքրող խնդրի այնքանով է միայն, որ նրանք էջմիածնում են աշխատանք փնտրել, ինչպես և դրանից առաջ փնտրել են այլ վայրերում²։ Էջմիածինն այդ ասացողների համար պանդխտության միջանկյալ օղակներից մեկն է, ժամանակոր կամ մշտական հանգրվան։ Նրանց բուն հայրենիքը Մոկսն է։ Նրանց պատումների բուն հայրենիքն էլ Մոկսն է և ոյ մի կապ չունի էջմիածնի հետ։ Էջմիածինը նրանց պատումների համար գրառման վայր է, որն այս դեպքում ուն երկրորդական նշանակություն։

¹ «Սասնա ծոեր», Հատ. Ա.:

² «Զատիկը ևս քսան տարեկան հասակից կրել է Երկարամյա պանդըխտություն, երեք անգամ բախտ որոնելով Պոլսում, որտեղ նա անց է կացրել նախ 3, ապա 2 և, վերջապես, ամբողջ 8 տարի, բանելով ջրաղացում։ Վերջին 4 տարին նա անց է կացրել հայրենի գյուղում, որտեղից նա եկել է էջմիածին 1898 թ. Զատիկին» (Թ. Խալաբյան, Սասնա ծոեր, Հատ. Ա., էջ 57—58)։

1915 թ. Հայկական հղեոնը կարճ ժամանակամիջոցում ոշնչացրեց Հայ ժողովրդի մի ստվար հատված: Փրկվածները սփովեցին աշխարհով մեկ: Նրանց մեծ մասի հույսն ու ապավինը նորից էջմիածինն էր, Արևելյան Հայաստանը: Էջմիածնում, Աշտարակում ու Երևանում էին Հավաքված մոկացին, գավառցին, սպարկերացին, վանեցին, մշեցին, սասունցին և այլն: 1915—16 թվականներին այդ դադիթական արևմտահայերից են գրառված վեպի մի քանի նոր պատումներ՝ 11 (մոկացի Վարդան Մուխսի-Բազիկյան), 14 (շատախցի Մանուշակ Զադոյան), 15 (շատախցի Գրիգոր), 20 (գավաշցի Զարդար Տեր-Մխիթարյան), 21 (գավաշցի Մարգարիտ Սարգսյան), 22 (գավաշցի Փոխան-Եղիազարյան), 23 (գավաշցի Համբարձում-Խաչուն Գրիգորյան): Այս ասացողների, ինչպես և նրանց պատումների հայրենիքը Մոկսն է, Շատախը, Գավաշը և ոչ թե Էջմիածինը, Աշտարակը, Երևանը, ուր կատարված են գրառումները¹:

¹ Եթե դադիթականի բախտը նրանց տաներ այլ երկրներ, վեպը նրանց հետ կդնար այնտեղ, ուր նրանք կհանգրվանեին: Նույն տրամաբանությամբ կարելի է ենթադրել, որ գադիթականների հետ ո՞ր երկրները կարող է գնացած լինել վեպը՝ Հայ ճակատագրի հետ թափառելով տարրեր մայրցամաքներում: Արտավազմանում, սփյուռքում գրառած պատում մեզ հայտնի չէ, բայց «Սամանա ծոնքի» հրատարակության առաջացրած արձագանքները սփյուռքի Հայ մտավորականների շրջաններում լավագույն ապացուցն է այն բանի, որ օտար ափերում էլ վեպի նկատմամբ հայերի հետաքրքրությունը չի սառել: Ահա աջդակիսի արձագանքներից մեկը. ամերիկահայ Հովհաննես Ավետիքյանը նամակով Մանուկ Արեգյանին տեղեկացնում է վեպի մի նոր փոփոխակի մասին. «...Մանկությանս օրերին ես լսել էի այդ դյուցազներդական պատմվածքները և մտքումս պահել մինչև այսօրը, որ պարտք էի համարում լույս աշխարհը բերել, ուստի 1933—35 Ֆրեզնոյի «Ասպարեզ» շարաթաթերթում զրեցի որպես թերթոն, որու վերնագիրն է՝ «Դյուցազն Դավիթ, Վասպուրականցի Սասմա ծոնք»: Արդ, եթե ուզում եք ունենալ զայն զետեղելու ձեր հավաքածոյի մեջը, ես սիրով տրամադրում եմ: Չեղմե պատասխան առնելուն պես օդային ճանապարհով ուղարկում եմ: Վասպուրականի Կարկառ գավառի անդիր պատմություն է, որ զրի առած եմ: Այս դյուցազներգությունը պարունակում է 3600 բառեր կամ 250 էջեր»:

Այս նամակը պահպում է Գ.Ա. Մ. Արեգյանի ֆոնդում 132 համարի տակ:

1932 թ. սկսած ՀՄԽՀ կուլտուրայի պատմության ինստիտուտի կողմից կազմակերպված բանահավաքշական գիտարշավների ընթացքում (ղեկավար՝ Կ. Մելիք-Օհանջանյան) Թալինի, Աշտարակի, Վեդու շրջաններում գրառվում են միքանի պատումներ։ Դրանք գրառված են 1915-ին Մոկս, Սասուն, Շատախ, Ալաշկերտ գավառներից ղաղթած ասացողներից։ Նրանց, ինչպես և նրանց պատումների բուն հայրենիքը Հիշյալ գավառներն են և ոչ թե Աշտարակ, Վեդի, Թալին շրջանները։

Վեպը Արևելյան Հայաստան է անցել դեռևս XIX դարի առաջին կեսին։ 1828—29 թթ. ուսու-թուրքական պատերազմի ավարտից հետո ծայր է առնում Հայերի զանգվածային զաղթը Կարսի, Էրզրումի և Բայազետի փուշալություններից դեպի ուսահպատակ վայրերը։ Ասացողների հետ միասին զաղթում է նաև վեպը, նրանց հետ հաստատվում Ապարանում, նոր Բայազետում։ Հիշյալ թվականներին զաղթած ալաշկերտցիների և բայազետցիների երկրորդ և երրորդ սերնդի ասացողներից XIX դարի վերջին և XX դարի սկզբներին գրառվում են պատումներ։ Սրանք նույնպես, շնայած սերունդների հաջորդականությանը և տեսական ժամանակամիջոցին, մնում են Ալաշկերտի և Բայազետի պատումներ, և նրանց կապը Ապարանի ու նոր Բայազետի հետ դարձյալ արտաքին է։ Այստեղ տարբերությունն այն է, որ այդ նոր բնակավայրերը պատմող սերնդի համար արդեն ծննդավայր են, հայրենիք, բայց նրանք իրենց պատմած վեպով տվելի շատ կապվում են իրենց հայրերի ծննդավայրի հետ, քան` իրենց։

Վերոհիշյալ բոլոր պատումների դեպքում գրառման վայրը, որն աշխարհագրորեն ընկնում է Արևելահայաստանի սահմաններում, ունի երկրորդական նշանակություն վեպի բուն հայրենիքի նկատմամբ։

Եթե համեմատում ենք տարբեր վայրերում և տարբեր ժամանակներում գրառված պատումներն ըստ շրջանների, նույն շրջանի պատումները հանդես են բերում բացարձակ

նմանություն, որը բացառում է գրառման վայրն ու ժամանակը: Էական ոչ մի դեր չի խաղում այն հանգամանքը, թե մոկացին Մոկսում է պատմել վեպը, թե՝ էջմիածնում, մշեցին Մուշում, թե՝ Ապարանում, բուն մոկացին ու մշեցին են պատմողը, թե Արարատյան դաշտավայրում կամ Արագածի փեշերին ծնված նրանց երկրորդ սերնդի ասացողները, որոնց վեպն անցել է իրենց մոկացի և մշեցի հայրերի ու վարպետների միջոցով:

Որ վեպի գրառման վայրը նրա հայրենիքի հանդեպ ունի Երկրորդական նշանակություն, կարելի է հաստատել նաև, այսպիս կոչված, արտաքո կարգի փաստերով, որոնք դարձալ բխում են վեպի ներքին էությունից:

«Սասնա ծոերի» Ա. հատորում կողք-կողքի 10 և 11 համարների տակ զետեղված են երկու պատում, գրառված միևնույն ասացողից՝ մոկացի Վարդան Մուխսի-Բազիկյանից: Գրառումներն իրարից բավական հեռու են և ժամանակով, և վայրով: 1911 թ. Մոկս գյուղաքաղաքում մոկացի ուսուցիչը Հարություն Գիլանյանը Վարդանից գրի է առնում մի պատում: 1915-ի կոտորած, ավեր, գաղթ՝ և ընտանիք, հարպատներին ու համերկրացիներին կորցրած բնավեր Վարդանն ապաստանում է էջմիածնի շրջանի Մուղանջըդ գյուղում: 1916 թ. այդ գյուղում Սենեքերիմ Տեր-Հակոբյանը, անտեղյակ Հարություն Գիլանյանի գրառմանը, նորից է պատմել տալիս Վարդանին վեպը և գրի առնում: Միևնույն ասացողի այս երկու պատումներն իրենց սյուժետային ու դեղարվեստական կառուցվածքով գրեթե տողացի նույնն են: Նկատվող տարբերությունները կապված են ասացողի մոռացության, տրամադրության, գրառման հետ՝ պայմանավորված բանավոր ստեղծագործության բնույթով, կարող են ուղեկցել դրան միշտ և ամենուր և ոչ մի կապ չունեն գրառման տեղի ու ժամանակի հետ: Հակառակ սյուժետային ու արտահայտչամիջոցների նույնությանը, բավական մեծ են այդ երկու պատումների գրառման տեղի ու ժամանակի տարբերությունները՝ 1911 թ., հայրենի Մոկս, համեմատաբար

խաղաղ ժամանակներ արևմտահայության համար, համերկրացի բանահավաք և 1916 թ., հայության ընդհանուր ջարդի և սարսափի տարիներ, հայրենիքից հեռու, օտար գյուղ, օտար միջավայր, անծանոթ բանահավաք։ Այս բոլորով հանդերձ, Վարդան Մուխսի-Բաղիկյանն առաջին անգամ պատմել է համեմատաբար ավելի վատ և անտրամադիր, երկրորդ անգամ՝ մեծ ոգևորությամբ, ներշնչանքով, հավելյալ դրվագներով, շափածո և երդային հատվածներով։ Այս դեպքում, թվում է, հակառակը պիտի լիներ, բայց փաստը մնում է փաստ։ Իսկ փաստը ցույց է տալիս, որ պատումը երբեմն կարող է պայմանավորված լինել դրառման տեղով, ժամանակով, ծանոթ և անծանոթ լսարաններով։

Մի պատում հայտնի է որպես արարատյան՝ № 38 (Բ հատոր, Բ մաս)։ Այս պատումը նկատի ունի Մ. Աբեղյանը, երբ գրում է, թե վեպը մտել է Այրարատ, ուր տեղացիներն արդեն յուրացրել են այն և պատմում են արևելյան բարբառվ։ Արդյո՞ք արարատյան է այս պատումը։ Որպես ասցող նշված է՝ այրարատցի Մուրադ Հովսեփյան։ Համաձայն բանահավաք Սարգիս Հայկունու տեղեկությունների, Մուրադ Հովսեփյանի հայրը Մոկսի Գոմանից գյուղից էր, որ 1840-ական թ. գաղթել է հայրենի գյուղից և բնակություն հաստատել սկզբում Գառնիում, հետո էջմիածնի շրջանում, ուր և ծնվել է Մուրադը։ Մուրադը վեպը սովորել է Բարսամ անունով մի աշուղից, որը նույնպես Մոկսի Նանընից գյուղից էր՝ նույն ժամանակներում գաղթած¹։ Այս պատումը, շնայած Արարատյան դաշտավայրում ծնված, արարատյան բարբառվ խոսող մի ասացողից է դրաված, բայց պատկանում է Մոկաց պատումներին, որովհետև նախ՝ այն իր սյուժետային ու գեղարվեստական ողջ կառուցվածքով ուղնչով շի տարբերվում մոկաց պատումներից, երկրորդ՝ այրարատցի Մուրադը ծնվել է մոկացի Հովսեփի ընտանիքում և վեպը սովորել է մոկացի աշուղ Բարսամից։ Այս դեպքում

¹ «Սասնա ծոեր», հատ. Բ, մաս Բ, էջ 233—34։

շէին կարող ներքին և արտաքին տվյալները շհամընկնել, պայմանավորված չլինել մեկը մյուսով։ Ուրեմն՝ վեպը Մոկուց ԽIX դարի 40-ական թթ. անցել է Արարատյան դաշտավայր, պատմվել այնտեղ բազում գյուղերում և փոխանցվել հաջորդ սերնդին։ Բայց այդ սերունդը ոչ թե տեղացի է, բուն Արարատյան դաշտի բնակիչ, այլ՝ նորից մոկաց շառավիղ։

Պատումն իր հայրենի Մոկսից դուրս է եկել անցյալ դարակեսից էլ առաջ, բայց մնացել է անաղարտ, ոչ մի փոփոխության չի ենթարկվել։ Այն իր անաղարտ տեսքով պարտական է Մուրադի վարպետին՝ Բարսամ անունով աշուղին, որը բնատուր ասացող էր, շատ հմուտ ժողովրդական ավանդություններին ու հեքիաթներին, ընտանեկան ապրուստը հայթայթում էր հեքիաթներ ու երգեր ասելով, վեպը սովորել էր իր հորից՝ Մանասերից. իսկ Մանասերի մասին վկայում են, որ տաղանդավոր ասացող է եղել¹։ Երբ ասացողը վարպետ է, բնատուր շնորհքով օժտված, երբ պատմելը նրա համար մասնագիտություն է, մասնավանդ ապրուստի միջոց, երբ նա միևնույն ստեղծագործությունը կրկնում է բազում անգամներ և արդեն անգիր արածի նման, երբ անցել է պատմելու հատուկ դպրոց, առավել ևս աշուղ է և աշուղի որդի, ուրեմն, նա հատուկ վերաբերմունք ունի այն ավանդների նկատմամբ, որոնց ժառանգորդն է ինքը։ Այդ այն ավանդապահությունն է, երբ վիպասաց աշուղն ինքը, լինելով ազատ ստեղծագործող, իրեն իրավունք չի վերապահում ստեղծագործական միջամտությամբ խախտելու որոշ ժանրերի, օրինակ՝ վեպի, ավանդական կարգ՝ ու կանոնը։ Նա նույնպիսի նախանձախնդրությամբ փոխանցում է վեպը և վերաբերմունքը վեպի նկատմամբ նաև իր հաջորդներին։ Ահա թե ինչու, ծնունդով արարատցի Մուրադը, ապրելով հեռու վեպի հայրենիքից, անծանոթ լինելով վեպում հանդիպող տեղավայրերին, այնպիսի հարազատությամբ է վերաբրտադրում իր լսածը, կարծես, հենց այդ վայրերից է եկել։

¹ Տե՛ս նույն տեղում։

Այստեղ է, որ արտահայտվում է ավանդապահության ուժը: Մուրադի պատումի վրա երեսում է աշուղ Բարսամի, նրանից էլ առաջ՝ աշուղ Մանասերի տղեցությունը: Դա երեսում է երգային հատվածների առատությունից, աշուղական որոշ բանաձևային արտահայտություններից, տողերի հանգավորման ձգտող վերջավորություններից, աղոթք-օրհնանքների առատությունից: Եթե ասում ենք երգային հատվածների առատություն, դա չի նշանակում, թե մյուս պատումների հետ համեմատած հավելյալ հատվածներ կան, աշուղ Բարսամը չեղած մասեր է մտցրել իրենից կամ այլ վիպերգերից ու երգերով ուղեկցվող հեքիաթներից, մի բան, որ նա կարող էր հեշտությամբ անել, եթե վիներ ավանդապահական վերաբերմունքը վեպի նկատմամբ: Պարզապես Բարսամն իր խառնվածքով ու մասնագիտությամբ ավելի զգայուն է եղել երգվող հատվածների հանդես, ավելի սիրով է յուրացրել դրանք և ավելի մհծ ներշնչանքով կատարել: Վեպի երգվող մասերը երգել իմացող և երգ սիրող ասացողի մոտ երբեք չեն կարող կորչել, եթե երգերով են փոխանցվել նրան: Այս բոլորից ենթադրում ենք, որ Բարսամի պատումում երգերը մեծ տեղ են գրավել: Արդյոք Մուրադն էլ երգե՞լ է այդ հատվածները, թե՞ միայն երգերի տեքստն է մտապահել կամ անդիր ասել: Բանահավաքն այս մասին համապատասխան նշումներ կամ տեղեկություններ չի թողել: Երգային հատվածները վեպի կայուն, փոփոխության քիչ ենթարկվող ավանդական մասերն են: Դրանցով հարուստ են հատկապես մոկաց պատումները: Այս իմաստով ևս Մուրադի պատումը հարազատ անդրադարձումն է ընդհանրապես մոկաց և մասնավորապես աշուղ Բարսամի պատումի: Մուրադի Արարացյան դաշտավայրում ծնվելը, ապրելը անդրադարձել է պատումի միայն բարբառային կողմի վրա, այն էլ մասամբ, Մուրադի պատումի լեզուն մոկաց և արարացյան բարբառների մի հետաքրքիր խառնուրդ է: Բանաձևային արտահայտությունների, երգային ու շափածո հատվածներում դերիշիշում է մոկաց բարբառը, իսկ այնտեղ, ուր պատ պատ-

մըվածք է, զերիշխում է արարատյանը։ Սա նույնպես խոսում է այդ հատվածների ավանդականության մասին, ինչպես նաև ապացույց է մոկաց պատումների հետ սերտ կապի ու հարազատության։

Մուրագն իր զբաղմունքով նույնպես մոկացի է՝ զգրարևալ զործող։ Արհեստի բերումով նա շրջել է Արևելյան Հայաստանի գրեթե բոլոր շրջանները՝ Արարատյան դաշտավայր, Ապարան, Շիրակ, Փամբակաձոր, Լոռի, Ախալքալաք, և ամենուր պատմել է վեպը։ Նրա ասելով՝ հարյուր գյուղի մեջ պատմել է¹։ Այս տեղեկությունն է նկատի ունեցել Մ. Աբեղյանը, Երբ 1906 թ. զրել է. «Հիշատակություն կա, որ վեպը մտած պիտի լինի և Շիրակա, Փամբակաձորի, Լոռվառ Ախալքալաքի գյուղերը, բայց այդ տեղերում պատմվածք զրող դեռ չի եղել... Մեր գիտեցածն, անշուշտ, վերջնական չէ. գուցե վաղը կամ մյուս օրը իմանանք, որ մեր երկրի ուրիշ կողմերում ևս, ինչպես՝ Կարս, Կարին, գուցե Սյունիք ու Արցախ, պատմում են վեպը, և այս կամ այն ձեռվ կապված է որևէ տեղի հետ»²։ Սակայն մինչև այժմ՝ 1970-ական թթ., նշված տեղերից ոչ մի պատում զրառած չունենք, շնչացած 1906 թ. հետո զրի են առնվել բազում պատումներ, բայց դարձյալ արևմտահայերից, որոնք տարբեր ժամանակներում հաստատվել են Արևելյան Հայաստանում։ 1946 թ. Ապարանի Սարալանջ գյուղում ազգագրագետ Վարդ Բղոյանը զրի է առնում մի պատում Մկրտիչ Պետրոսյանից, որի հայրը դադիւն է Մշո Հացիկ գյուղից, հորից էլ Մկրտիչը սովորել է վեպը³։ 1962 թ. Գրիգոր Գրիգորյանը Ղուկասավան գյուղում զրառում է մոկաց մի պատում Կակո բիծայից⁴։ 1970 թ. Ախուրյանի շրջանի Հովունի գյուղում 85-ամյա մշեցի Քոչե Վարդանյանից Սարգիս Հարությունյանը և Արուայր Սահակ-

¹Տե՛ս նույն տեղում։

²Մ. Աբեղյան, Հայ ժողովրդական վեպը, «Ազգագրական հանդես», 13-րդ դիրք, Թիֆլիս, 1906, էջ 18—19։


³«Սասնա ծոեր», Հայտ, Բ, մաս Բ։

⁴Տե՛ս «Գարուն», 1969, № 7։

յանը գրի են առնում Մշտ մի պատում: Ե՛վ Կակո բիծան, և Քոչե Վարդանյանը 1915-ի գաղթածներից են: 1971 թ. նպատակային գիտարշավի դրառած պատումների ասացողները բացառապես արևմտահայեր են: Այս բոլորը ցուց է տալիս, որ Հետաքրքրությունը վեպի նոր պատումների նկատմամբ մինչև մեր օրերը չի սառել, բայց արևելահայ հատվածից դեռ ոչ մի պատում չունենք գրառած: Արևմտահայ և արևելահայ հատվածների այսպիսի ուժեղ և կենդանի կապի դեպքում անգամ վեպն արևելահայ հատվածին չի անցել, տարածում չի դառել, առավել ևս՝ չի տեղայնացել:

Մուրադն այդքան շատ գյուղերում պատմել է, նույնիսկ որոշ գյուղերում՝ կրկնել. նրանից առաջ պատմել է վարպետ Բարսամը. այդպես բազում գյուղերում պատմել են նաև սարալանջեցի Մկրտիչ Պետրոսյանն ու իր թափառական հեքիաթասաց մուրացիկ հայրը՝ մշեցի Պողոսը. այդպես նոր Բայազետի գավառի բոլոր գյուղերի մեջ անուն հանած վիպասաց է եղել Մուխսի Ավդալ Հազրոյանը, որ բուն Սասունի իշխանաձոր գյուղից էր. այդպես շրջակա գյուղերում անընդհատ պատմել է վեպը քավառցի Հակոբ Նրդեյանը, նրանից էլ առաջ՝ նրա վարպետը, համագյուղացի տիրացու Հակոբ Տեր-Մարտիրոսյանը, որը Նրդեյանի ծնողների հետ 1829-ին գաղթել է Ալաշկերտի Խաստուր գյուղից: Նման փաստեր կարելի է շատ հիշել, բայց և սրանց կողքին կամի փաստ՝ մինչև այժմ ոչ-մի ապացույց չունենք, որ արևելահայ հատվածը յուրացրել է վեպը և ինքն ևս պատմել: Բնդհակառակը, Արևելյան Հայաստանում անգամ վեպը փոխանցվել է մոկացուց՝ մոկացուն, սասունցուց՝ ալաշկերտուն, սասունցուց՝ բայազետուն և այլն: Արևելահայ հատվածը վեպի ունկնդիրներ տվել է, բայց վիսլասացներ՝ առայժմ ոչ¹:

¹ Անվերապահ կարծիքից խուսափելու համար նշենք, որ վեպը պատմելը ուրպես ավանդույթ նկատի ունենք. արևելահայ հատվածում նման ավանդույթ գոյություն չունի: Հնարավոր է, որ հատուկենու պատմողներ կան, մանավանդ մեր օրերում, երբ վեպը համընդհանուր ճանաչում ունի:





Ուրեմն՝ վեպի տեղափոխությունն իր բուն հայրենիքից՝ Արևմտյան Հայաստանից Արևելյան Հայաստան միայն աշխարհագրական տեղափոխություն է, որը կապվում է այդ հատվածի պատմական ճակատագրի հետ։ Այդ դեպքում վեպի տարածվածությունը՝ աշխարհագրական հասկացություն է։

Այժմ տեսնենք՝ ի՞նչ դեր է խաղացել պարսկահայ հատվածը վեպի բախտում։ Խնդրի նույն մոտեցմամբ քննենք նաև այն երկու պատումները, որոնք հիմք են տվել Արեղյանին գրելու, թե վեպը մտել է նաև Պարսկահայք, հատկապես Խոյի, Սալմաստի և Մակվա կողմերը, ուր նույնպես ցույց են տալիս վեպի գործողության տեղերը։

Խաշիկ վարդապետ Դադյանը 1895 թ. Մակվա թաղեոս Առաքյալի վանքի գյուղում հյուսն ուստա Դավթից գրառում է մի պատում, որը նույն տարին տպագրվում է «Արարատ» ամսագրի նոյեմբեր-դեկտեմբեր ամիսների համարներում՝ «Տղա դավթի և Աղջիկ Խանդութի հեքիաթը» վերնագրով։ Պատումի վերջում Դադյանը տալիս է տեղեկություններ ասցողի և աշխարհագրական այն տեղանունների մասին, որոնց հիշատակությունը հանդիպում է վեպում։

Թաղեոս Առաքյալի վանքի գյուղը, ուր ծնվել է ասցողը և ուր զրառված է պատումը, ազգագրական և բարբառային մի հետաքրքիր պատկեր է ներկայացնում։ 28 տուն փոքրիկ գյուղում հավաքված են հայեր զանազան տեղերից, այն է՝ Հայոց ձորից, Ալաշկերտից, Կարինից, Խառակոնիսից, Վանից, Նախորկից, Գուլասարից, Գործոտից, Մուշից, Մակվից և այլն¹։ Ընդամենը 28 տուն, և ազգագրական այդպիսի խայտաբղետ ու հարուստ մի պատկեր։ Խիստ հայկական մի երեսութ, որը հիմա էլ քիչ շի պատահում ներկայիս Հայաստանի այն գյուղերում, ուր կողք-կողքի ապրում են տեղացիներ և Արևմտյան Հայաստանի տարբեր գավառներից տարբեր ժամանակներում գաղթած վերաբնակիչներ։

1 «Արարատ», 1895, դեկտեմբեր, էջ 487. նույնը՝ «Սասնա ծոեր», Բ հատ., Բ մաս, էջ 321։

Պատումիս ասացող ուստա Դավիթն այդ գյուղում ներկայացնում է Վանա գավառը։ Ուստա Դավիթի պատ Հովհաննեսը վանից եկել է Սոքման ավանի Ղայնար գյուղը XIX դարի սկզբներին, իսկ նրա որդի Ալլահվերդին, թաղեռս Առաքյալի վանքի գյուղը փոխադրվելով, ունեցել է ուստա Դավիթին²:

Մի անհայտ բանահավաքի կողմից 1913 թ. նույն թադեոս Առաքյալի վանքի գյուղում զրի է առնվել մի պատում հյուսն Ալո Դավիթյանից։ «Երեսմ է, որ այս պատումի ասացող նաջար (հյուսն) Ալոն եղել է ԺԴ պատումի ասացող ուստա (հյուսն) Դավիթի որդին և ուստա Ալլահվերդու (իմա Ալոյի) թոռը»¹, — ավելացնում է խմբագրությունը բանահավաքի տված կցկտուր տեղեկությանը։ Այս ենթագրությունը ճշշտվում է մի քանի փաստարկներով։ Նախ՝ ուստա Դավիթի և Ալո Դավիթյանի պատումների բացարձակ նույնությամբ։ Երկրորդ՝ 1895 թ. ուստա Դավիթը եղել է 50 տարեկան, իսկ Ալո Դավիթյանը 1913 թ.³՝ 30 տարեկան։ Տարիքային հարաբերությամբ հնարավոր է, որ Ալոն Դավիթի տղան լինի։ Երկուսն էլ հյուսն են՝ հոր արհեստն անցել է որդուն։ Ալոն զըրվում է հոր անունով և կրում է պապի՝ Դավիթի հոր, Ալլահվերդի անունը, որը շատ տարածված և հարգված սովորություն է հայերի մեջ։ Կարելի է ենթագրել, որ այս բոլոր զուգադիպությունները պատահականություն են, բայց և նման պատահականություններ 28 տուն ունեցող փոքրիկ գյուղում քիչ են պատահում։

Եթե ապացուցվում է, որ Ալո Դավիթյանը Դավիթի որդին է, հնարավորություն է ստեղծվում հետեւելու վեալի սերնդից-սերունդ անցնելու ընթացքին։

Չորս սերնդի հաջորդականություն կա՝ Հովհաննես-Ալլահվերդի-Դավիթ-Ալո (Ալլահվերդի)։ Առաջին երկու սերնդի վեան իմանալու մասին հիշատակություն կա միայն։ Ուստա Դավիթը հիշում է. «Էսիկ խեքիաթ սորվեցի իմ խո-

² Տե՛ս նույն տեղում։

¹ «Սասնա ծոեր», Հատ., Բ, մաս Բ, էջ 353։

րից, ուստա Ալլախվերդուց, իմ խերն էլ՝ իմ պապ վանցի օհանեսից. Աստված օղորմի նրանց խոզուն»²: Դժվար է ճշգրրիտ ասել, թե ինչպես է պատմել վանեցի Հովհաննեսը և թե ինչ փոփոխությունների է ենթարկվել վեպը մինչև շորորդ սերունդը, որն իր ծննդավայրով արդեն հեռու է Վանից: Վերջին երկու սերնդից դրառված պատումների համեմատության հիման վրա կարելի է միայն ենթադրել, թե ինչպիսին կարող էր լինել առաջին պատումը և ինչ հնարավոր փոփոխությունների կարող էր ենթարկված լինել ժամանակի և տարածության մեջ: Այս հարցի որոշ պարզաբանումը կարեռ և հետաքրքիր է վեպի սեկդարչա կենսագրությունը տեսնելու առումով:

Այս երկու պատումները մյուսների հետ համեմատած, ունեն ուշադրության արժանի տարբերություններ՝ կապված ժամանակի և տարածության հետ, մի բան, որ չէր նկատվում վերոհիշյալ դեպքերում: Այսինքն՝ եթե վերը նշված պատումներում վեպի աշխարհագրական հեռավորությունն ու ժամանակը նրա ստեղծման և գոյատեման բուն վայրերից աննշան դեր էր խաղացել հայրենական ավանդների պահպանման գործում, այս երկու պատումի հարցում՝ մեծ դեր:

Ուստա Դավթի և Ալո Դավթյանի պատումները, պահպանելով հանդերձ վեպի ծանոթ և ավանդական սյուժետային արտաքինը, կորցրել են մի շատ կարեռ բան՝ վեպի ներքին էությունը, հեռացել են վեպի ժանրային նկարագրից, մոտեցել հեքիաթի ժանրին:

Հենց սկզբից տեղի է ունեցել սյուժետային մի փոփոխություն: Մհերը Մսրա թագավոր է և ունի երկու կին: Կանանցից մեկը դավաճանում է Մհերին, և ծնվում է Մսրա Մելիքը: Մհերը զիտե այդ մասին և երեխային կոշում է Շուն Մելիքը: Մհերից և մյուս կնոջից ծնվում է Դավիթը: Ավաղության իրավունքը ծնունդով Մելիքինն է, և Մհերն իր կտակը զրում է նրա թիփ վրա.

² «Արարատ», էջ 487:

«Ե՞ւն Մելիք, Դավիթ քո պստի ախալեր,
Դու ընտոր ճոշ ախալեր,
Դավիթ քեզի ծառա»:

(Հատ., Բ, մաս Բ, էջ 325, տող 60)

Մյուս պատումների մեծ մասում ևս Մելիքը ապօրինի ծնունդ է: Բայց եթե մյուս դեպքերում այդ ապօրինի կապը Սասնա Մհերի և Մսրա խանումի միջև է որպես վերջինիս քաղաքական ու պետական դիտավորություն, հանուն զորեղ ժառանգի, ապա այս երկու պատումներում դա մի սովորական դավաճանություն է ամուսնական առաջաստին: Փաստորեն ոչ մի բանով Մելիքը Մհերի սերնդից չէ: Եթե մյուս դեպքերում Մելիքի ուժն ու զորեղությունը բացատրվում էր Մհերից սերված լինելու հանգամանքով, այստեղ դա կորել է, և ժառանգ-օջախ վիպական շեշտված գաղափար-թեման իր տեղը զիջել է հավատարիմ-անհավատարիմ կնոջ մոտիվին: Այստեղից սկսած՝ թուլացել է հաջորդող միջադեպերի իմաստն ու դերը: Հրեշտակն այստեղ էլ գալիս է Մհերին աստծու պատգամն հայտնելու: Մյուս պատումներում դա ժառանգ ունենալու ավետիքն է Մհերին, որից հետո Մհերը մահն ընդունում է ուրախությամբ և խաղաղ հոգով, որովհետև այդ մահը հատուցվում է Սասնա տան հզոր ժառանգով: Իսկ այստեղ.

«Բնձի մե քառասուն օր մոհլաթ տու, շատ մեղք եմ արե:
Շատ վիզզարկութեն եմ արե, թաքավոր եմ,
Եմ մեղաց դառնամ, էնով էն յան կամքը քոնն ա.
Ե՛կ, քո ամանաթը տար»:

(Հատ. Բ, մաս Բ, էջ 325, տող 80)

Սովորական մահկանացուի վախ և պայման աստծու հետ մահվանից առաջ:

Եթե չկա ժառանգ-օջախ հասկացությունը, չկա հայրենիք գաղափարը, չկա և Մսրը-Սասուն տեղանունների գաղափարական իմաստը: Եթե լինեին մյուս պատումները և նրանցից մեզ հայտնի հիմնական դաղափարը, եթե լինեին միայն այս երկու պատումները, ապա վեսլի ավանդական ուրվագիծը կարտահայտեր այս իմաստը—ապօրինի եղբայրը, բայց ավագության իրավունքով և հայրական պատգամով, պահանջում է հարազատ, բայց փոքր եղբորից հընազանդություն: Փոքր եղբայրն ավելի ուժեղ է (ինչպես միշտ լինում է հեքիաթներում) և չի ցանկանում հնաղանդվել:

Մեծ եղբայրը հալածում է նրան, ի վերջո պարտություն կը-
րում նրանից: Այստեղ Մսըր և Սասուն տեղանունները կա-
րող են լինել, կարող են և չլինել: Այս պատումները կորցը-
րել են ոչ միայն ավանդական տեղանունների հիշողությունը,
այլև դրանց արտահայտած գաղափարական իմաստը: Հոր
պատումում դրանցից պահպանվել են միայն երեքը՝ Մսըր,
Սասուն և Մարութա Պանցը Աստվածածին: Մարութա Պանցը
Աստվածածին անվան հիշատակությունը հանդիպում է մի-
այն Դավթի հայտնի աղոթք-երդման մեջ.

«Յա խաց-գինի, Տեր կենդանի,
Մարութա Պանցը Աստվածածին,
Որ բազմեցավ վեր մեր թեին»:
(նույն տեղում, էջ 338, տող 336)

Տեղանունն այստեղ պահպանվել է միայն աղոթքի բա-
նաձևային ուժով. ուրիշ ոչ մի տեղ չկա Մարութա Աստվա-
ծածնա վանքի հիշատակությունը: Զկան և վանքի ավերման
ու վերաշինման միջադեպերը, որոնք Դավթի կողմից հայ-
րենական կործանված տերության ու պետականության վե-
րականգնման խորհրդանիշ են, նախապատրաստում և սրում
են բախումը Դավիթ և Մելիք ուժերի միջև: Եվ իզուր չէ, որ
որդին՝ Ալո Դավթյանը, կորցրել է Մարութա տեղանունը, և
աղոթք-բանաձևը նրա մոտ հնչում է այսպես.

«Խաց-գինին, Մայր Աստվածածին,
Որ բազմեցավ վեր մեր թեին»:
(էջ 365, տող 340)

Մայր Աստվածածին հիշում է, որովհետեւ այդ անունով
վանքեր շատ են եղել, բայց Մարութա սար և վանք եղել է
մեկը, որը շատ հեռու է ասացողից, գուցի և անծանոթ:

Հոր պատումում նշվում է, որ Մհերը Մսրա թագավոր է,
իսկ որդու մոտ Մսրա բառը չկա: Այստեղ կարեսը չէ այն
հանգամանքը, որ պատումների մեծ մասում Մհերը Մսրա
թագավոր չէ, այլ՝ Սասնա. սա այլ կարգի աղավաղման
հետևանք է: Կարեսը այն է, որ նրա հաջորդն արդեն Մսրա
Մելիքն է, որը պիտի հանդես գա որպես Դավթի թշնամի:

Հոր պատումում այդ զիծը համեմատաբար խորանում է շնորհիվ այն բանի, որ մի քանի տեղ նշվում է Մելիքի Մսրա թագավոր լինելը. նա հանդես է գալիս նաև իր անվան Մըսրամելիք վիալական ձևով: Իսկ որդու մոտ ոչ մի տեղ չի նըշվում այդ բանը և ոչ մի անգամ չի հանդիպում Մսրամելիք անունը: Մելիքը հանդես է գալիս միայն այս երկու պատումներում հանդիպող Շուն-Մելիք որոշիչ-մականունով կամ պարզապես թագավոր, առանց անվան հիշատակման, ինչպես մեծ մասամբ հեքիաթներում է լինում: Սասնա ծուռ կամ Սասնա Դավիթ արտահայտությունը ևս երկու պատումներում ոչ մի տեղ չի հանդիպում, փոխարինված է Տղա Դավիթ ձևով: Հոր պատումում Մսրը և Սասուն որպես առանձին և թշնամի երկրների գիտակցումը թեև թույլ, բայց կա, որդու պատումում՝ չկա:

Հոր պատում.

«Բերեց ուրան մալ, ուրան կին, ուրան Թուրն ի Կեծակին,
Դրկեց Դավիթի քեռիքի տուն ի Սասուն»:

(Էջ 325, տող 90)

Որդու պատում, նույն տեղը.

«Ուրան վրայի շորերն էր, թե փափախն էր, թե մեջկապն
էր,

Ուրան չահման էր, քուրն էր, ձիան խետ
Ըրբխեց զնաց Դավիթի քեռու տուն»:

(Էջ 357, տող 70)

Հոր պատում.

«Էտոնք դնացին, խասան Սասուն...
Էտոր ախալերներ ելան վեր —
Էտոնք էլ Սասունա տերերն էին»:

(Էջ 333, տող 340—350)

Որդու պատում.

«Խետ ուրան մոր, որ գալլմ ին, հասավ քեռու բալշան»:

(Էջ 366, տող 390)

Հոր պատում.

«Ասաց.—Գնա, ընդոր քեռիքին ասա,
Կամ Դավթին զլոխը տան,
Կամ քառսուն կուս աղջիկ դրկին Մոլր:
Չեն իտա, ասա՝ Սասումա խողը, ջուրը,
Չիան տոպրակով կը քաշեմ, կը բերեմ Մոլր»:

(էջ 335—336, տող 420)

Որդու պատում.

«Ասաց.—Գնա, Տղա Դավթի քեռիքին ասա՝...
Յա Տղա Դավթի զլոխ տան,
Յա քառսուն կուս ախչիկ տան»:

(էջ 369, տող 490)

Մինչև այստեղ որդու պատումի մեջ ոչ մի անգամ Մոլր,
Սասուն տեղանունները հանդիս չեն դալիս: Եռաջին անգամ
հանդիպում է աղջիկներ դերեվարելու միջադեպում, և ալետք
է ուշադրություն դարձնել, թե հատկապես որտեղ:

Հոր պատում.

«Տեսավ՝ մեկ պառավ, ձեռները դրած ծոցը,
Կը լա, կը մոմոա, կ'էթա, կը կա, կ'ասե.
— Ավե՛ր, ավրվի՛ս,
Սասում մեկ աղջիկ ունի, էն էլ գնաց Մոլրա եսիլու:
(էջ 336, տող 450)

Որդու պատում.

«— Ավերվի՛ս, Սասունի՛կ, ավերվի՛ս,
Մե ախչիկ ունեմ, գնաց Մոլրա եղսիր»:

(էջ 370, տող 520)

Պառավի ուղղակի խոսքն է սա և այն էլ հանգավորված,
դարձել է անփոփոխ, քարացած բանաձեւին մի արտա-
հայտություն, որը հեշտ է հիշել: Բանաձեւին այս տեսքը
պարտադրում է ասացողին շմոռանալ: Այստեղ արդեն Սա-
սունիկն ու Մոլրը որպես որոշակի պատմական տեղանուն-
ներ առավել ևս թույլ են դիտակցվում:

Հետաքրքիր է, որ Սասունի Սասունիկ ձեզ հանդիպում է միայն այս պատումում և միայն այս երկու անգամ։ Հեշտ է կուահել դրա պատճառը՝ նայելով Սասունին նախորդող և հաջորդող բառերին։

Հոր պատում։

«— Ավեր, ավերվիս,
Սասուն¹ մեկ աղջիկ ունի...»

Որդին գուցե միասին է լսել այս երկու բառը, ընկալել է Սասունիկ, չնայած նրա համար սլարդ է նաև պառավի մեկ աղջիկ ունենալու հանգամանքը։

«— Ավերվիս, Սասունիկ, ավերվիս,
Մե ախշիկ ունեմ...»

Հոր պատում։

«Գանք էն փահլավանին, որ գնաց Մսրա
Մելիքին...»

Մելիք կանչեց վաքիլ-վազիր։

Զաջ կանչեցին, որ դոշուն խավքեն, էթան վեր
Սասունա»։

(էջ 338, տող 510—520)

Որդու պատում։

«Էտի քեշից, խասավ քագավորի ամարարի տակը։
Թագավոր իշկաց, տեսավ...
Զեռ ավեց դոշուն ժողվել»։

(էջ 371—372, տող 580—600)

Երկրորդ անգամ որդու պատումում Մորը և Սասուն անունները պատահում են Մելիքի մոր երազի հետ կապված։ Պարզ է, որ այստեղ էլ երազի այլաբանական պատկերի բանաձևային ուժն է պահել այդ անունները։

¹ Սասուն բառը, գուցե, առաջին տողի հետ պիտի լինի և ոչ թե հաջորդ տողի, որովհետեւ պառավն անիծելիս Սասունին է դիմում։

Հոր պատում.

«Մսըրա Մելիքի մեր քնել էր.
Երազում տեսավ՝ մե ճոշ աստղ Մսըրա ելավ,
Մե պստի աստղ էլ Սասումա ելավ,
Եկան, դբան իրար»:

(Էջ 338, տող 520)

Որդու պատում.

«Էն դիշեր մերն երազ տեսավ՝
Երկու հատ աստղ ելավ, մեկ՝ Սասնա, մեկ՝ Մսըրա»:

(Էջ 372, տող 600)

Հոր պատում.

«Ժողվեց դոշուն, թավիլ արեց,
Երմիշ ելավ դեպի Սասում,
Գնաց, Սասմա մոտ օրդուն դարկեց»

(Էջ 374, տող 650)

Որդու պատում.

«Շուն Մելիք դոշուն քաշեց, եկավ,
Տղա Դավթի ժեռու ժավշնին դարկեց»:

(Էջ 374, տող 650)

Հոր պատում.

«Յա Դավթի դլոխ տուր, յա կոխվներս կոխվ ա.
Սասում պտի ավեմ»:

(Էջ 339, տող 550)

Որդու պատում.

«Յա Դավթի դլոխ տուր,
Յա թայպիր տես՝ կոխվներս կոխվ է»:

(Էջ 374, տող 650)

«Մասում պտի ավրեմ» սպառնալիքը չկա որդու պատումում:
Անունների կորուստը որդու մոտ, նույնիսկ այս մի

տողի պակասը, որը սովորական մոռացության հետևանք չէ, նեղացնում է կոփվը, Մսըրա և Սասունի միջև եղած կոփվը դառնում է Շուն Մելիքի և Դավթի միջև եղած կոփվ, նսեմանում է և այդ կովի ու հաղթանակի արժեքը։ Սա նաև այն դեպքը չէ, երբ առանց այդ երկրների անունների հիշատակման, Մելիքն ու Դավիթն ընկալվում են որպես երկու երկրների թշնամության խորհրդանիշ։

Որդու պատումում հայրենիքի գաղափարը շկա։ Ո՞րն է Դավթի հայրենիքը—պարզ չէ։ Ինչի՞ համար է կովում Դավթիթը Մելիքի հետ, ի՞նչ է պաշտպանում—իր գլուխը, որ պահանջում էր Մելիքը։ Սասունի մասին, որպես Դավթի հայրենիքի, հիշատակություն անգամ շկա։ Դավիթն սկզբում Մսրում է՝ իր հոր տանը, հետո Շուն Մելիքի հալածանքից փախչում է քեռանց տուն, հետո սպանում է Մելիքին, նըստում Մսրում թագավոր, այսինքն՝ վերացնում է մեջտեղից իր հոր ապօրինի զավակին, տեր կանգնում իր իրավունքներին, իր հայրենական թագավորությանը։ Ալո Դավթյանի պատումի գրառողը նշում է. «Հստ պատմողի (իմա Ալո Դավթյանի) Մհերը եղել է հայ թագավոր՝ Մսրում նստած»¹։ Ո՞վ է այդ դեպքում Մելիքը—Մհերի ապօրինի զավակ, ինքնակոլ թագավոր, բռնի ուժ։ Զկա հայրենիքի գաղափարը, կա բռնի, շար ուժ (Շուն Մելիք) և բռնությանն ընդդիմացող բարի ուժ (Տղա Դավիթ)։

Երրորդ անգամ Մսըր անունը որդու պատումում հանդիպում է որպես Դավթի թագավորության անուն։ Խանդութը, լսելով Դավթի համբավը, աշուղին ուղարկում է Մսըր։

«Ասաց.—Որ էթաս Մսըր՝ Դավիթ թագավորի մոտ...»։
(էջ 379, տող 860)

Ճիշտ այս նույն գիծը կա նաև հոր պատումում։ Տեղանվան հիշատակությունն այստեղ ոչ մի դեր չունի, այն հիշվում է որպես փեսացուի քաղաք կամ երկիր (ինչպես հերիաթներում)։

¹ «Սասնա ծոեր», հատ. Բ, մաս Բ, էջ 353,

Այսպիսով, մի հետաքրքիր ընթացք է ապրել վեպը։ Կա՛ վեպը և շկա՛ վեպը։ Կան Դավթի ճյուղի հիմնական միջադեպերը, շկա հիմնական նպատակը։ Կորել են պատմական որոշակի հետքերը, քաղաքական որոշակի շահերն ու դիտավորությունները կորցրել են իրենց սրությունը և ընդհանրացման ուժը, դարձել սովորական, մարդկային, թուլացել է այդ շահերի բախումը, և Դավթի կոփվն ու հաղթանակը վեր է ածվել ասպետական կամ հեքիաթային հերոսի քաջագործության։ Սա վեպի ուշ շրջանի արդյունք է։ Եվ ուշ շրջանն էլ ոչ թե XIX դարի վերջն է և XX դարի սկիզբը, այսինքն՝ Դավթի և Ալոյի սերունդը, այլ ավելի վաղ՝ վանեցի Հովհաննեսի սերունդը։ Այս կորուստները խորացել են հաջորդ երեք սերնդի մոտ, որովհետև նրանք ոչ թե մոտեցել են վեպի հայրենիքին, այլ հեռացել, ոչնչով չի խթանվել նրանց հիշողությունը, այլ ընդհակառակը՝ հարթվել են տեղերն ու դեպքերը հեռավորության ու անծանոթության ստիպմունքի տակ, վեպը որոշակիությունից դարձել է ընդհանուր, ցայտությունից՝ մակերեսային։

Եվ ահա, շորրորդ սերնդի՝ Ալո Դավթյանի պատումն ավելի հեռու է վեպ լինելուց, մյուս պատումների հետ համեմատած, ավելի մոտ է հեքիաթի, քան նույնիսկ իր նախորդի՝ հոր պատումը։ Որդու մոտ կորել է այն հիմնականը, ինչը ամենատարածված հեքիաթային սյուժեն կարող է դարձնել վեպ կամ հակառակը, դրա բացակայությունը վեպը կարող է դարձնել հեքիաթ։ Պատմական որոշակիությունն է դա, պատմական հիմքը և պատմական արժեքը։ Կա սյուժետային միջուկը, շկա պատմական կեղեր։ Այդ միջուկը կարող է գալ դարերի խորքից, անհայտ ժամանակներից։ Պատմական, աշխարհագրական և ազգագրական կեղենն է, որ այդ միջուկը կապում է որոշակի ժամանակաշրջանի, երկրի ու ժողովրդի հետ։ Առաջին հայացքից աննշան թվացող տեղանունների, հերոսների կամ այլ հատուկ անունների մեջ պահպանված պատմական հիշատակությունների, բանաձևային դարձած որոշ արտահայտությունների, զենք ու զրահի, ար-

տաքինի ու հագուստի, որոշ սովորությունների նկարագրությունների առկայությունը շափազանց մեծ նշանակություն ունի վեպի համար և դրանց բացակայությունը կարող է նշանակել վեպի կորուստ, քայքայում¹:

Վանքերի ու եկեղեցիների ավեր, հարկահանություն ու գերեվարում, անկախության կորուստ, օտարի լուծ և աղատություն Հայաստանն ապրել է բազում անդամներ և բազում դարերում: Եվ ո՛չ միայն Հայաստանը: Բաղդադի խալիֆ, Մսրա Մելիք, Մասնա Մհեր ու Դավիթ, Մոլը, Մասուն, Մարութա Աստվածածին, Ծովասար, Ճայաղուր, Բաթմանա կամուրջ, Աղթամար, Վանն ու Կաղզվանն են, որ վեպը (գոնե երրորդ՝ Դավթի ճյուղը) կապում էն արաբական արշավանքների, Մասունի հերոսական դիմադրության և աղատագրական պայքարի հետ: Հրեղեն քուռակ ու հրեղեն թուր կան բոլոր ժողովուրդների հրաշապատում բոլոր հեքիաթներում, բայց Քուռկիկ Զալալին և թուր Կեծակին ծանոթին, անմիջապես հուշում են վեպը: Բոլոր դյուցազուները, հերոսները խենթության աստիճան անձնագոհ են ու քաջ, բայց Մասնա ծուռը ուրիշ որակ է, ազգային որակ: Նման շատ բաներում արտահայտվող ազգային այս յուրահատուկ որակը վեպի շատ կարևոր և պոազնային (իթե ոչ առաջին) հատկանիշներից է, որ վեպը դարձնում է ազգային, միջազգային սյուժեներով և մոտիվներով հանդերձ:

Հոր պատումում նախկին տեղավայրերի հետ միասին կամ նրանց փոխարեն հանդես են եկել աշխարհագրական նոր անուններ, որոնք միայն Սոքման գավառինն են և միայն այդ պատումինը. ուրիշ ոչ մի պատումում շեն հանդիպում և

¹ Խաշիկ վ. Դադյանի գրառած պատումի առաջին տպագրությանը կից կա նիկողայոս Քարամյանի առաջարանը, որտեղ Քարամյանը ուշադրություն է հրավիրում այդ պատումի մյուսներից ունեցած տարրերությունների վրա: Հոդվածը արժեքավոր է նրանով, որ Դավթի պատումի օրինակով (այն ժամանակ Ալո Դավթյանի պատումը դեռ հայտնի չէր) նշվում է վեպի հեքիաթին անցնելու ընթացքը և պատճառները (տե՛ս «Արարատ», նոյեմբեր, 1895, էջ 429—431):

շէին էլ կարող հանդիպել: Պարզ է, որ այդ անունները ավանդաբար չեն անցել թաղեռս Առաքյալի վանքի գյուղացի Դավթին: Վանեցի Հովհաննեսի պատումում այդ տեղանունները լինել չէին կարող: Նա վանից եկել է Սոքման ավան արդեն հասուն մարդ, իմացել և պատմել է վեպը: Դժվար թե նա անմիջապես մոռանար հայրենի Վանը կամ Վանում լսած, Վանից հետք բերած ավանդական անունները փոխարիներ Սոքման ավանի տեղանուններով: Պատահում է, որ ասացողը վիպական կամ Հեքիաթային դեպքերը պատմելիս ունկնդիրներին հասկանալի դարձնելու կամ հեռավորության տարածական շափը ցույց տալու համար օգտագործվում է մոտիկ տեղավայրերի անունները: Դրանք, իհարկե, տեղանունների պատահական մուտք են վեպի մեջ և երբեք ավանդական ուժ չեն ստանում, ավանդաբար չեն անցնում հաջորդ սերնդին: Ունկնդիրն այդպես էլ ընդունում է այդ տեղանունը պայմանականորեն և չի շփոթում հիմնական վիպական տեղանունների հետ: Կարող էր և վանեցի Հովհաննեսը այդպիսի պայմանական տեղանունների օգտագործմանը դիմել, որոնք կարող էր վերցնել Սոքման ավանի ծանոթ վայրերից: Բայց դժվար թե նրա որդի Ալլահվերդին՝ բանասաց հաջորդ սերունդը, այդ անունները միամտաբար վիպական ընդուներ և փոխանցեր իր որդի Դավթին: Ապացույց՝ Ալլահվերդին՝ նշումը նշում չի օգտագործում նաև այն նոր տեղանունները, որ կան հոր պատումում:

Հոր պատում.

«Ասաց.—Ղուրբան, օխտ փահլավան,
Էկած նալբայժանի¹ կադուկի վրեն նստած են»:

(էջ 345, տող 740)

¹ «Եավարշան, որ և Արտաղ գավառի մի մասը, հնումն անվանվում էր Թիլիսե, հետո փոխարկվել է Սոքման ավան կոչումով. Նալբայժան դյադուկը, Խանդութ-Խանում Դալասին, Դաստակյարի գյաղուկը, գտնվում են Սոքման ավան գավառում, իսկ Փեռա գյուղը՝ Հեր-Խոյ գավառում» (տե՛ս Արարատ, 1895, դեկտեմբեր, էջ 487):

Որդու պատում.

«Ասաց.—Վալլահ,
Կոեսածոր յոթ խատ փահլիվան է էկել ինձի խամար»:
(էջ 381, տող 920)

Հոր պատում.

«Ասաց.—Դավիթ, որ կ'էրթաս, զնա Կոեսածոր,
Դաստարաբի կաղուկի տակ մե մեծ զող ծառ կա,
Գնա, քո թե, քո թուր էն գոզի ծառի վրեն չըռբի»:
(էջ 347, տող 790—800)

Որդու պատում.

«Տղա Դավիթն էլ ասաց, քի
Ճամբի վրա մե խատ ծառ կա,
Քո թեվն ծառի վրեն չըռբի»:

(էջ 383, տող 980)

Հոր պատում.

«Խաթունն ասաց.—Հեյրան, ասեմ քեղիկ՝
Լանդրաբ թաքավեր էկած է Փեռա գեղ»:
(էջ 347, տող 780)

Որդու պատում.

«Ասաց.—Վալլահ, Լանդրա թագավոր էկել,
Զիմ զինա՝ քանի խազար ջանով Զորավին Զիման
քափա»:
(էջ 382, տող 950)

Ինչպես երեսում է մեջբերումներից, որդու համար հոր
բերած ծանոթ տեղանունները ավանդական չեն. նրա մոտ
վիպական դեպքերը չեն կապվել այդ տեղավայրերի հետ,
ինչքան էլ ծանոթ լինեն ու հարազատ. Եթե ուզում էլ է նշել
տեղավայրեր, նշում է հորից տարբեր տեղանուններ:

Իսկ Սոքման ավանի հետ կապված գեղեցիկ ստուդա-
րանություն-ավանդությունը, որ բերում է հայրը, բոլորու-
վին չկա որդու պատումում:

«Աղջիկ Խանդութ փախավ,
Տղա Դավիթ հտեվ ընկավ:
Ընկավ հտեվ՝ Դավթի ձիի պոշեն կապած զուրգ՝
Գետին պատռելով՝ գնում է:—
Էնօրեն էսօր Խանդութ խանումի երկրի անուն
Փոխեց Սոքման ավան՝ Ճեղքված-Քանդված երկիր»:

(էջ 350, տող 890—900)

Ուրեմն՝ Հինը մոռացվել է, նորն էլ ավանդական չի դարձել, չի մերվել վեպին: Այնպես որ, վեպի այս երկու պատռմների կապը նոր տեղավայրերի հետ արտաքին է, թույլ և չի արտահայտում տեղայնանալու իմաստ:

Այս բոլորից կարելի է ենթադրել, որ դեռևս վանեցի Հովհաննեսի պատռմը հարուստ չի եղել պատմական տեղանուններով և այդ վայրերի հետ կապված միջադեպերով. Նրա որդի Ալլահվերդու մոտ սկսվել է պատմական-ավանդական տեղավայրերի գիտակցման մթագնումը, խորացել Դավթի մոտ և գրեթե անհետացել Ալո Դավթյանի պատռմում: Ավելին. Եթե Հովհաննեսի մոտ լինեին օրինակ՝ վանքի ավերման ու վերականգնման միջադեպերը, այն անպայման կհասներ Ալո Դավթյանին: Սյուժեն, այսինքն՝ հետաքրքիր պատմությունների, միջադեպերի մի շարան, ավելի դիմացկուն է, ավելի քիչ է ենթակա քայլայման, քան նրանով արտահայտվող գաղափարը, նպատակը, ժամանակաշրջանը, աշխարհայացքը: Չնայած, վանեց սկսած մինչև Մակու վեպի մեջ տեղի են ունեցել, անշուշտ, նաև սյուժետային փոփոխություններ:

Մեզ հասած վեպի այս պատռմներն ընդգրկում են երկու ճյուղ միայն՝ Մհեր և Դավիթ: Առաջին և շորրորդ ճյուղերը շկան: Վեպը շատ տեղերում և շատ պատռմներում հանդիպում է այս տեսքով՝ Դավթի ճյուղը, քիչ թե շատ պահպանված իր ամբողջական, հիմնական տեսքով և Մեծ Մհերի ճյուղը ոչ որպես առանձին ճյուղ, այլ՝ կապված դարձյալ Մարա Մելիքի և Դավթի ծննդի հետ: Այս դեպքում հե-

տաքըրքիրն այն է, որ այս պատումում հետքեր կան պահ-պանված առաջին ճյուղից:

1. Մհերը մեռնելուց առաջ իր զենք ու զրահը, իր ձին ուղարկում է Սասուն՝ քեռանց տուն: Դավթի հետ Մսլրից քեռանց տուն է փախչում նաև մայրը, որին Մելիքի մտադրության մասին զգուշացնում են Մելիքի վաքիլ-վազիրները: Այս քեռանց տուն, մայրական «Հերանց» հասկացությունը գալիս է առաջին ճյուղից՝ կուապաշտ թագավորի ու խաշապաշտ աղջկա հակառությունից: Այստեղից է առաջ դալիս նաև այն շփոթը, որ Ծենով Հովանը, Ցուան Վեղկեն ու թե Դավթի հորեղբայրներն են, ինչպես մյուս պատումներում, այլ Դավթի մոր եղբայրները, Թեաթորոսն էլ հետները: Դավթի մայրը մեկի հետ լուր է ուղարկում իր եղբայրներին, որոնք Սասունա տերերն էին, թե.

«Գնա՛, իմ ախապերներին մուշտուկուղ տուր,
թե՛ քո քիրն էկավ»:

Էտոնք էլ իրեք ախապեր էին.

Ըստոնց անուններն՝ մեկինը Ծենով Հովան,
Մեկինը Թեաթորոս, մեկալինը Ցուան Վեղկեն»:

(էջ 333—334, տող 340—350)

2. Դավիթը Մելիքի դեմ կոիվ գնալուց առաջ ոչ թե իր հոր Կաթնաղբյուրում է լողանում և հզորանում, այլ հանդիպում է բարակ, բայց զորեղ առվին, ինչպես Սանասարը և Բաղդասարը:

«Դավիթ գնաց, կայնավ մե գետի ափ.

Տեսավ, որ էն մի յանեն մե պստի աղբուր կեր,

Աղբրի ջուր կը եր, մեծ գետի ջուր կը կտրեր,

Կ'անցներ էս դրազ ու կը խառնվեր ի մեջ գետի ջրին»:

(էջ 341, տող 590)

Ինչպես պարզ երևում է, երկու մոտիվ խառնվել են իրար—մեծ գետը կտրողը ոչ թե բարակ առուն է, այլ՝ աղբյուրի ջուրը, աղբյուր, որն իր մեջ պահում է Մհերի Կաթնաղբյուրի հիշողությունը:

Հիշողություններ կան նաև երրորդ ճյուղի այն միջադեպերից, որոնք չկան հիշյալ պատումներում:

3. Պառավը Դավթին նախատում է իր կորեկի արտում որս անելու համար և, ինչպես շատ այլ պատումներում, հայտնում նրան նրա հոր որսասարի մասին:

«Պառավն ասաց.—Ղուրբան, հեյրան,
Էսիկ տեղ ինչ կա, որ քեռիքիդ մոտ կը մնաս էս սարեր
Գնա էնա սար, քո խոր ավլաղ,
Ավ կա, զին-զանավար կա, զարկիր, սպանիր»:

(Էջ 338, տող 500—510)

Հոր որսասարի մասին պահպանված հիշողություն է միայն, որ մնացել է Պառավի ուղղակի խոսքի մեջ, իսկ հաջորդող միջադեպերը (Դավթի որսասար գնալը, բանտված գաղաններին արձակելը, հոր գերեզմանից բխող լույսը տեսնելը, վանքը վերաշինելը) ընկել են:

4. Մսրա Մելիքի մոր երազը հիշողություն է վեպի շատ պատումներում հանդես եկող Մսրա խաթունի ավարտված կերպարի: Ինչպես նաև այն, որ նա զգուշացնում է որդուն շգնալ Սասնա վրա կոհվ, ծանոթ է Սասնա ուժին:

«Ասաց.—Թե դու զիմ ծծի կաթին անկազ կ'անես, շես
էթա:

Սասում զինք պստիկ ա, ամմա հոքմը շատ ա»:

(Էջ 339, տող 530)

5. Մելիքի հարկահանության միջադեպը չկա ո՛չ հոր, ո՛չ որդու պատումում: Մելիքի պահանջը ոլ թե յոթ տարվա խարզն է Սասունից, այլ՝ Դավթի գլուխը կամ քառուն կույս աղջիկ:

Սակայն, յոթ տարվա հարկի մասին մի հիշատակություն կա պահպանված բոլորովին մի այլ տեղում և բոլորովին այլ առիթով: Դավիթը, լսելով աշուղի գովքը Խանդութի մասին, հավաքել է տալիս Մսրա յոթ տարվա խարջը, ուղարկում Խանդութին նվեր:

«Երկու հատ նոքար խեծըցրեց —
Ցոթ տարվա Մարա խարջը շէր ժողվի հալա —
Ժողվեցին, բերին եկան:
Տվեց, մե դաստմալ լի տվեց աշըղին.
Աշըղն ընկավ ճամբախ»:

(էջ 380, տող 870—880)

Այս և նման հետքերը հուշում են այս պատումի իթե ոչ
նախնական տեսքի, ապա նրա կապի մասին նախնական,
ավանդական պատումների հետ, կապ, որը ժամանակի և
վեպի տեղաշարժի պատճառով մթագնվել է, թուլացել:

Վեպը Վանի վրայով XIX դարի սկզբներին անցել է
Պարսկահայաստան, Մակվա շրջան, շորս ազգակից սերունդ-
ների միջոցով ապրել մեկ դար։ Զնայած նրա այս մեկդար-
յա կյանքին, այն լի դարձել Մակվա տարբերակ, այլ մնում
է Վանա տարբերակ։ Վանա այս տարբերակը դեռևս վանեցի
Հովհաննեսի մոտ բավական հեռու է եղել Մուշ—Սասուն—
Մոկս տարբերակներից։ Վեպն արդեն տարրալուծված է եղել
և շատ բան կորցրած։ Մեծ Մհերի կերպարը զրկվել է իր
ողջ վեհությունից ու դերից, խառնվել են երկրները, կորել
է Սասոնա տան ու ծոերի՝ սերնդի հասկացությունը (օջախ-
ժառանգ), թուլացել է պայքարի ու հաղթանակի գաղափա-
րը։ Վեպի այս տարրալուծման ընթացքը խորացել է հա-
ջորդող երեք սերունդների մոտ, և շորրորդ սերնդի պատումն
արդեն վեպ շէ, այլ՝ պատմա-աշխարհագրական որոշակիու-
թյունից հեռացող և ընդհանուր հեքիաթային ժանրին մոտե-
ցող մի միջին որակ։

Ուրիմն՝ Պարսկահայաստան տեղափոխությունը ևս ոչինչ
չի ավելացրել վեպին։ Ավելին, վեպն իր այդ տեղափոխու-
թյունից միայն տուժել է։ Այս դեպքում նույնպես վեպի տե-
ղաշարժը աշխարհագրական հասկացություն է։

Հայ ժողովրդական վեպն իր էությամբ է համազգային
և ո՛չ իր տարածական ընդգրկմամբ։ Եվ իր էությամբ հա-
մազգային լինելով հանդերձ, վեպն իր ընդգրկմամբ կարող
է մնալ տեղային։ Ուրիշ բան, որ այդ տեղային հասկացու-

թյունը շատ էլ նեղ չէ, ընդգրկում է Արևմտյան Հայաստանի շատ գավառներ: Բայց եղել են նաև բանահյուսական ավանդույթներով հարուստ էրզրում, Բասեն, Կարս, Շիրակ, Արարատյան դաշտավայր, Սյունիք, Արցախ, որոնց դերը պատմական և մշակութային իմաստով պակաս չի եղել Մուշից, Սասունից, Վասպուրականից: Սակայն, դրանք ոչ վեպն են յուրացրել, տեղայնացրել, ոչ էլ նման մի վեպ ստեղծել. համենայն դեպս, մեզ այդ մասին վկայություններ չեն հասել:

1890 թ. ամռանը Մ. Աբեղյանը վեպը գտնելու հույսով շրջում է նախիջնանի Աստապատ գյուղում, Երնջակի մի քանի գյուղերում՝ Փորադաշտ, Նորս, ապա գնում Հին Ջուղա, Աղա, Ագուկիս, Քաղաքիկ, Կարծելով, թե հին Գողթան վիպասանների սերունդներ կգտնի այնտեղ: Անցնում է Մեղրի, Ղափանի մի քանի գյուղերը, լինում Հալիձորում՝ հույս ունենալով, թե քաջերի համբավ վայելող այդ վայրերում կգտնի հայ ժողովրդական վեպը: Բայց ոչ մի տեղ դրա հետքը չի գտնում¹:

Երբ վեպը պատմելու տվյալ վայրում գտնում է համապատասխան հող և արմատ գցում, երբ առաջին պատմողից անցնում է տեղացիներին և փոխանցվում սերնդից-սերունդ, երբ հիմնականում պահելով իր նախկին կերպարանքը, դառնում է այդ վայրի, ազգագրական այդ գոտու սեփական նովեռ մշակույթը, այդ դեպքում միայն կարող է խոսք լինել տեղայնացման մասին: Վեպի Արարատյան դաշտավայրում, Ապարանում, Պարսկահայաստանում գրառված պատումները նման տեղայնացման օրինակներ չեն. դրանք արևմտահայ հատվածի հետ աշխարհագրորեն անցել են Արևելյան Հայաստան:

¹ Մ. Աբեղյան, Երկեր, Հատ. Ա, էջ 533.

ՎԵՊԻ ՃՅՈՒՂԵՐԸ

Վեպը կազմված է շորս ճյուղից։ Ճյուղ հասկացությունը վեպում նշանակում է սյուժետային ամբողջություն, մի սերնդի հետ կապված վիպական ավարտված պատմություն։ Վեպը «ոչ թե կենտրոնանում է մի եղելության շուրջ, այլ բաժանված է երեք-շորս, երբեմն և ավելի սերունդների մեջ, որոնցից յուրաքանչյուրի վրա պատմվում են երկու-երեք վեպեր կամ տարբեր-տարբեր սյուժեներ։ «Սասնա ծռերն», ուրիմն, կազմված է բազմաթիվ վեպերից, որ ասացողներն անվանում են «ճուղ»¹։ Այս բազմաթիվ վեպերը և տարբեր սյուժեները «Սասնա ծռերի» մինչև այժմ գրառված պատումներում պատվում են շորս ազգակից սերնդի շուրջ՝ 1. Սանասար և Բաղդասար (երկվորյակ եղբայրներ), 2. Մեծ Մհեր (Սանասարի որդին), 3. Դավիթ (Մեծ Մհերի որդին), 4. Փոքր Մհեր (Դավիթի որդին)։ Բացի հիշյալ շորս ճյուղից, գրառումներում վեպի այլ սերունդ կամ ճյուղ գոյություն շունի։

Վեպի ճյուղերի քննությունը, որպես բանագիտական առանձին խնդիր, ունի հետևյալ հիմունքը. նախ՝ վեպի պատումների ճյուղային տարբեր ընդգրկումը. երկրորդ՝ ասացողների և բանահավաքների վերաբերմունքը ճյուղերի քանակի նկատմամբ։

Վեպի առաջին («Սանասար և Բաղդասար») և երրորդ («Դավիթ») ճյուղերն ըստ պատումների պատմվել են և առանձին, և մյուսների հետ մի ամբողջության մեջ, իսկ երկրորդ («Մեծ Մհեր») և շորրորդ («Փոքր Մհեր») ճյուղերը

¹ Մ. Աբեղյան, Երկեր, Հատ., Ա, էջ 466.

գրառումներում առանձին շեն հանդիպում, միշտ հանդես են գալիս մյուսների հետ միասին։ Ճյուղերի միացությունները մի քանի տարատեսակներ ունեն.

- ա. առաջին-երկրորդ-երրորդ-չորրորդ,
- բ. առաջին-երկրորդ-երրորդ,
- գ. առաջին-երրորդ-չորրորդ,
- դ. երկրորդ-երրորդ-չորրորդ,
- ե. երկրորդ-երրորդ,
- զ. երրորդ-չորրորդ։

Եվ առաջին ճյուղը, մյուսներից բոլորովին անկախ, որ հանդիպում է միայն հինգ պատումներում (տե՛ս Տախտ. 2)։ Դավթի ճյուղն անդամ այսպիսի անկախ տեսք չունի, չնայած համառոտ և ուրվագծորեն, այնուամենայնիվ, նրան միշտ նախորդում կամ հաջորդում են Մեծ և Փոքր Մհերները, առաջինը որպես Դավթի ծնող, երկրորդը՝ ժառանգ։ Այսպիսի դեպքերում, որը գերակշռող է պատումներում, Մհերները ճյուղ ըմբռնման ամբողջականությունը չունեն. այս բանը ճյուղային տախտակի վրա արտահայտված է փակագծերով։

Առկա պատումները մեկ այլ ճյուղի գոյության հիմք չեն տալիս։ Այս փաստն ընդունելով որպես ելակետ, քննվում են այն բոլոր վկայությունները, որոնք վերաբերում են ճյուղերի քանակին։

Որոշ ասացողների վկայությամբ՝ վեպի ճյուղերի թիվը եղել է յոթ, նույնիսկ՝ քառասուն։ «Ինչպես երեսում է, այս նշանավոր վեպը մեծ ընդարձակություն ունի և չէ ամփոփվում երեք ծնունդի՝ Արամելիքի, Դավթի և Մհերի պատմությամբ, այլ Սասնու տերերի ցեղի պատմությունն է դա, Արամելիքից և Սանասարից սկսած մինչև անժառանգ և անմահ Մհերը, որով վերջանում է վեպը։ Դավիթը ոչ թե Արամելիքի որդին է հանդիսանում, այլ՝ նրա սերունդ պայշազատներից մեկը, և պատմողի ասելով, 39-րդ զարմը, որովհետեւ Արամելիքից մինչև Մհեր ժառանգ զարմ են և ունին իրենց ժառանգությունը, որ քառասուն դիշեր կը նստեն և կը պատմեն»¹։

¹ «Սասնա ծոեր», Հատ. Ա., էջ 3 (ընդգծումները մերն են—Ա. Ա.)։

Ու միայն փնտրել, գտնել, վերականգնել, այլև այժմ յան տվյալներով անհնար է ենթադրել անգամ, թե ինչ են պատմել այդ քառասուն գիշերների ընթացքում, և ինչ են իրենցից ներկայացրել այդ քառասուն ճյուղերը։ Ասացողները և ունկընդիրները ի՞նչ են համարել քառասուն ճյուղ։

Վեցերորդ պատումի ասացող Հովակիմինց Ղազարի մասին գրառող Ա. Աբեղյանը գրում է. «Ղազարն այս «Նազըլը» սովորել է յուր համագյուղացի Պողոս անունով մեկից։ Ղազարի ասելով՝ այդ Պողոսը գիտեր այս նաղըլի յոթ ճյուղն էլ, այն ևս՝ լավ»¹։ 7-րդ պատումի ասացող Մոկացի Սախոն (բանահավաք՝ Սարգիս Հայկունի) ասում է, որ վեպը սովորել է իր պապ Պողոսից, որը «Դավթի յոթ ճյուղն խիստ մեծ հաջողությամբ կասեր»²։ Հովակիմինց Ղազարը և Մոկացի Սախոն համագյուղացիներ են, Մոկաց Առինջ գյուղից։ Ամենայն հավանականությամբ, Ղազարի վկայած Պողոսը Սախոյի պապ Պողոսն է։ Սախոն վկայում է նաև, որ իր հորեղբայրը, այսինքն՝ Պողոսի որդին, նույնպես պատմում էր վեպը և սովորել էր հորից։ Ուրեմն, երեք ասացող նշում են միևնույն աղբյուրը՝ Պողոսը, որից լսել և սովորել են վեպը։ Սակայն, այս շորս ասացողները պատմել են վեպը ճյուղացին տարբեր ընդգրկմամբ—Պողոս՝ յոթ ճյուղ, Պողոսի որդի՝ շորս ճյուղ, Ղազար՝ երեք ճյուղ, Սախոն՝ մեկ ճյուղ։ Փատորեն, Պողոսի աշակերտ երեք ասացողներն էլ պատմում են ավելի քիչ, քան լսել են։ Ղազարից գրառված է (ՄՀեր)՝ Դավիթ—ՄՀեր ճյուղերը, Սախոյից՝ Սանասար և Բաղդասար։ Պողոսի պատումի մասին կարող ենք մոտավոր պատկերացում կազմել՝ միացնելով այս երկու, տարբեր ասացողներից գրառված պատումները։ Սա միաժամանակ այն շորս ճյուղն է, որ պատմել է Սախոյի հորեղբայրը և որը բնորոշ է Մոկաց բոլոր ամբողջական պատումներին։

Ի՞նչ բովանդակություն և տեսք են ունեցել Պողոսի պատմած մյուս երեք ճյուղերը։ Շախոն Դավթի ցեղին և

¹ Նույն տեղում, էջ 249։

² Նույն տեղում, էջ 305։

ճյուղերեն կը համարե «Բալաք աշառ», «Շիրին շահ ու Բարակ շահ», որ մենք այլ վեպերու շարքը դասած ենք»¹: 8-րդ պատումի ասացող Մոկացի Վարդանը (գրառող՝ Ս. Հայկունի), շնայած պատմում է (Մհեր) — Դավիթ — Մհեր ճյուղերը, բայց և «որպես Սանասար և Բաղդասար պատմող Սախոն Դավիթի պորտերեն կը համարեն. 1. Սանասար և Բաղդասար, 2. Դավիթ և Մելիք, 3. Մհեր, 4. Սաֆար փաշեն, 5. Սամ, 6. Բալաք աշառ, 7. Շիրին շահ և Բարակ շահ: Վերոհիշյալները բացի «Սամեն» ամբողջն ևս գրի առած եմ»²: Այս վերջին երեքը, եթե ոչ ամենուր, ապա գոնե Մոկսում, հավանաբար շատ տարածված և սիրված են եղել: Հայտնի են դրանց բազմաթիվ գրառումներ, որպես առանձին վեպեր: Դրանց մասին մի այլ առիթով հիշատակում է նաև 2-րդ պատումի ասացող Խապոյենց Զատիկը: Այս պատումի գրառող Բագրատ Խալաթյանը գրում է. «Մհերի գետի վրա կամուրջ կապելը և ճանապարհորդներին արգելք լինելը (ինչպես պատմել է Նախոն) Զատկի ասելով՝ ուրիշ «նաղըլի» է պատկանում, որը երեք ճյուղից է բաղկացած՝ ա. Բարակ Շախ, բ. Շիրին Շախ և գ. Դյուլուն Շախ (երեքն էլ մենք գրի առած ունենք)³: Ուրիմն, մի այլ վիպասացի՝ Խապոյենց Զատիկին, նույնպես հայտնի են եղել այս «ճյուղերը», բայց դրանք նա համարել է ուրիշ «նաղըլ»:

Հնարավոր է, որ Պողոսի պատմած յոթ ճյուղի մեջ մեզ հայտնի շորս ճյուղի հետ միասին մտել է նաև այս երեք ճյուղը՝ Բարակ Շահ, Շիրին Շահ և Դյուլուն Շահ: Հնարավոր է, որ հարակից կամ վիպական հանգունատիպ զրույցներն ու հեքիաթները մի տաղանդավոր ասացող-հանպատրաստից հնարողի մոտ միացվեն նշված շորս ճյուղերին, հարմարեցվեն սյուժետային հիմնական գծին և պատմվեն որպես մի ամբողջականություն, մանավանդ որ վեպը հակված է ներառելու հարակից վիպական զրույցներ:

¹ «Սասնա ծոեր», Հատ. Ա, էջ 305:

² Նույն տեղում, էջ 329:

³ Բ. Խալաթյան, Սասմա փահլիվաններ..., էջ 51—52 (տե՛ս ծանոթությունը):

Պատումների մեծ մասն ունի ողորմիս-նախերգանք, որի մեջ ողորմի է տրվում Սասնա տան բոլոր ներկայացուցիչներին՝ Սանասարից Փոքր Մհեր (Հաճախ նաև կանանց): Ողորմիսները ևս տարբեր ընդգրկում ունեն: Հիշվում են նաև քեռիներ և հորեղբայրներ, մայրական պապ, քահանա: Ողորմիս-նախերգանքները երգեր են, վեպի երգվող հատվածներից, որոնք որոշ պատումներում մեղեղին պահել են և երգվում են, մյուսներում էլ ասվում են առանց մեղեղու: Երգվող հատվածները վեպի ամենահաստատուն և փոփոխության քիչ ենթարկվող մասերն են: Եթե եղել են քառասուն զարմ իրենց քառասուն ճյուղ պատմությամբ, ապա ինչո՞ւ ողորմիսները չեն պահել գոնե նրանց անվան հիշատակությունը: Կան պատումներ, որոնք ունեն միայն մեկ կամ երկու ճյուղ, բայց իրենց ողորմիսում պահում են բոլոր սերունդների անունների հիշատակությունը: Անունների հիշատակության հաջորդականությունը խիստ ավանդական է և նշանակում է սերունդների հաջորդականություն: Ողորմիսները տալիս են Սասնա տան տոհմածառը, ծննդաբանությունը: Անունների ու նրանց հաջորդական կարգի ավանդականությունն ապացուց է շորս ճյուղի գոյության և ո՛չ ավելի:

Սրվանձտյանի գրառած առաջին պատումը ողորմիս-նախերգանք լուներ: Երբ Արեղյանը գրի առավ երկրորդ պատումն իր ողորմիսով և որոշակի տարբերություններով, առաջ եկավ այդ պատումները համադրելու պահանջը: Արեղյանը նկատեց, որ նոր պատումը «լրացնում է Սրվանձտյանցի հրատարակածի թերի կողմերը... և փոխել տալիս վեպի ծավալի մասին մինչ այդ եղած հայացքը: Երևաց, որ վեպը, կազմված լինելով բազմաթիվ «ճյուղերից», ավելի ընդարձակ է, քան կարծում էին»¹:

Բացի այն, որ երկրորդ պատումում կային հավելյալ հատվածներ և կերպարներ, ողորմիսում հիշատակվում էին երկու բոլորովին անծանոթ անուններ՝ Բաղդասար և Մելիք-

¹ Մ. Արեղյան, Երկեր, Հատ. Ա, էջ 525:

սեթ քահանա։ Այդ անունների առկայությունը Աբամելիքից և Սանասարից հետո և Դավթից առաջ ենթադրել էր տալիս, որ նրանք կամ առանձին ճյուղեր պիտի ունենան (ինչպես Աբամելիք և Սանասարը, Դավիթը) կամ կենտրոնական կերպարներ պիտի լինեն, ինչպես նույն ողորմիսում հիշատակվող Զենով Հովանը և Ցուան Վերգոն։ Դրա համար էլ Աբեղյանն ափսոսում է, որ ասացող նախո Քեռին հրաժարվում է պատմել իր լավ շիմացած հատվածները, «թեպետև շատ ցանկալի էր, որ դոնե մի-մի կտորներ ևս Բաղդասարի և Մելիքսեք քահանայի նյուղերից ունենայինք»¹։

Հետագա պատումները պարզեցին Բաղդասարի տեղը և դերը վեպում։ Նա առանձին ճյուղ չէր կազմում, նույնիսկ նոր կերպար էլ չէր, երկվորյակ եղբայրներից մեկն էր և որոշ պատումներում անունն էր միայն փոխվում։ Իրականում նա նախո Քեռու ողորմիսում հիշվող նույն Սանասարն է։

«Դառնամ զողորմին տը տամ Աբամելիքին.

Դառնամ զողորմին տը տամ Սանասարին.

Դառնամ զողորմին տը տամ Բաղդասարին...»

(Հատ. Ա, էջ 9, տող 10)

Աբամելիք, Սանասար, Բաղդասար երկվորյակ եղբայրների անուններն են։ Որոշ պատումներում այդ անունները Աբամելիք և Սանասար է (Բաղդասար չկա), մյուսներում՝ Սանասար և Բաղդասար է (Աբամելիք չկա)։ Երկու եղբայր երեք անուն ունենալ չեն կարող։ Նախո Քեռու ողորմիսում այդ երեք անունների մի հետաքրքիր և եզակի անգամ հանդիպող համադրություն է, որ ենթադրում է այլևայլ պատճառներ, բայց ոչ Բաղդասարի առանձին ճյուղի գոյություն։ Միայն այժմ, երբ պատումների թիվը բավական շատ է, կարելի է դրանց համեմատությամբ ժխտել Բաղդասարի, ինչպես նաև Մելիքսեք քահանայի ճյուղերի գոյությունը։ Այն ժամանակ, երբ պատումները միայն երկուսն էին, Աբեղյանի ենթադրությունը տեղին էր։

¹ «Սասանա ծոեր», Հատ. Ա, էջ 4 (ընդգծումը մերն է—Ա. Ս.)։

Ամենայն հավանականությամբ, Մելիքսեթը խաշապաշտ աղջկան կոապաշտ թագավորի տուն ուղեկցող քահանան է։ Գուցե նրա դերը երբեք ավելի կարևոր է եղել, ավելի մեծ տեղ է գրավել վեպում, մանավանդ որ նա անմիջականորեն առնչվում է առաջին ճյուղի հիմնական դադարիարներից մեկի՝ կրոնական հակամարտության, հետ և հանդես գալիս որպես անհրաժեշտ մեկը կոապաշտ շրջապատում քրիստոնեության պահպանման, եղբայրներին քրիստոնյա կնքելու և կրթելու գործում։ Երեխ հետզհետե նվազել է այդ դերը ճիշտ այնպիս, ինչպես որոշ պատումներում բոլորովին դուրս է մնացել։

Աբեղյանի գրառած պատումի տպագրությունից երեք տարի հետո, 1892 թ., Թիֆլիսում հրատարակվում են Գարեգին Հովսեփյանի գրառած մի քանի տարրերակները «Սասմա ծռեր» ընդհանուր խորագրով։ Չնայած այդ գրքում զետեղված էին շորս պատումներ, որոնք տողատակերին ուղեկցըվում էին մի քանի այլ պատումներից քաղված հատվածներով¹, Հովսեփյանը դրանք խմբավորել է «երկու նոր վա-

¹ Նշված շորս պատումներից երկուաը՝ Ապարանցի Մուրադի և Մոկացի Հովսեփյանի, տողատակերին ունեն Ա. և Բ համարակալումներով տարրերակներ, որոնք Հովսեփյանը գրառել է բոլորովին այլ ասացողներից։ «Մեր վարիանտներից մեկը գրած ենք Ապարանի Զամրլու գյուղում, պատմել է մեզ նույն գյուղի ժամհար Մուրադը. այդ վարիանտի հետ համեմատել ենք երկու ուրիշ վարիանտ (Ա.-ը՝ Ափնա և Բ.-ը՝ Ղազանֆար գյուղում ենք գրել), նշանակելով միայն այն մասերը, որ Զամրլուի վարիանտում շկան կամ տարբեր են պատմված» (Գ. Հավսեփյան, «Սասմա ծռեր», Էջ Բ—Բ, ընդգրծումները մերն են—Ա. Ս.): Ապարանցի Մուրադի պատումի տողատակերում, բացի Ա. և Բ պատումներից (Ափնա և Ղազանֆար գյուղերում գրառած), կա նաև այսպիսի մի հիշատակություն. «Մի պանդուխտ Ապարկերտցու ասելով՝ Խանդութի հայրենիքը «Բերդ Կապոտին» էր կոչվում»։ Մի քանի տող հետո նորից հիշվում է սպարկերտցու անունը. «Սպարկերտցին շար Աստղիկ էր անվանում» (նույն տեղում, Էջ 40 և 56)։ Ուրեմն, մի այլ տարրերակ Հովսեփյանին պատմել է նաև մի սպարկերտցի։ Մոկացի Հովսեփյանի պատումը ևս ուղեկցվում է Ա. և Բ պատումներից տողատակերին բերվող հատվածներով։ Մրանց ասացողների մասին ոչ մի հիշատակություն չկա։ Առաջին հրատարակության ժամանակ, դանաղան պատճառներով Հովսեփյանը հարկ շի համարել առանձին-առանձին զետեղել այդ պատումները։ Հիմա դրանցից կան միայն որոշ հատվածներ։

րիանտ» անվան տակ՝ նկատի ունենալով, որ Սրվանձտյանի պատումը «Մշո վարիանտ» է, իսկ Աբեղյանինը՝ «Մոկաց վարիանտ»։ «Այդ հայտնի վարիանտներին են պատկանում նաև մեր գրած երկու նոր վարիանտները, Ապարանի բարբառովը՝ Մշո վարիանտին (Սրվանձտյանի), իսկ Մոկաց բարբառովը՝ Մոկաց վարիանտին (Աբեղյանի)»¹։ Այդ պատումներն են՝ Ապարանցի Մուրադ, Մի Մոկացի, Մի ուրիշ Մոկացի և Մոկացի Հովան ասացողներից² գրառածները։ Ապարանցի Մուրադի պատումը Հովսեփյանն իրավացիորեն համարում է Մշո տարբերակ, որովհետեւ Ապարանի բնակիչները գաղթել են Մշո դաշտավայրից և Բուլանըխից։

Սրվանձտյանի պատումն ուներ երեք ճյուղ՝ 1. Աբամելիք, 2. Դավիթ, 3. Մհեր, Աբեղյանի պատումը՝ երկու ճյուղ,

¹ Գ. Հովսեփյան, Սասմա ծոեր, էջ Բ։

² Քննանրապես, Հովսեփյանը մանրամասն տեղեկություններ չի հաղորդում վիպասացների, գրառման ժամանակի, վայրի և պայմանների մասին, տեղեկություններ, որոնք այնքան կարենոր են զանազան հարցեր պարզաբանելու համար։ «Մի Մոկացի», «Մի ուրիշ Մոկացի», «Այս կտորը երգում էր Մոկացի Հովանը՝ վարիանտիս պատմողը»։—այսքանը միայն ասացողների մասին։ Հովսեփյանն իր գրառած «Ծոստամ Զալ» ժողովրդական վեպի վերջում (Թիֆլիս, 1905) տեղեկություններ է հաղորդում վեպիս ասացողի մասին։ «Ծոստամ Զալը» գրի ենք առել 1890 թվին, Մայր Աթոռի ճեմարանում։ Այդ տարին գիշերապահության պաշտոն էր կատարում Մոկաց Նորավանց գյուղացի Ռևտենց Հովանը, ժողովրդական բանահյուսության մի կենդանի շտեմարան։ «Փշրանքների նյութի մի մասը... նորանից ենք գրի առել նաև Ծոստամ Զալը։ Հովանը զարմանալի ընդունակություն ուներ պատմելու համար։ Հեռու ավելորդաբանությունից, համառոտ և կենդանի լեզվով։ Նա կլիներ ճոտավորապես հիւռու տարեկան։ կաղ էր, այդ պատճառով էլ շատերի կողմից «Կաղ Հովան» կոչված, բայց սրտոտ և կտրին։ Կարդալ և գրել շղիտեր, բայց յուր պանդուխտ հայրենակիցների շրջանում համարվում էր որպես բանիմաց մարդ։ Մի քանի տարուց ի վեր վախճանված է արդեն յուր հայրենի գյուղում։ Կարծում ենք, սա «Դավիթ և Մհեր» պատմող նույն Մոկացի Հովանն է։ «Փշրանքներում» Ավանդություններ բաժնի նյութերի առնշությամբ տալիս է որոշ տվյալներ։ «Առաջինը պատմել է «Բաղդասարի» ճյուղը պատմող Մոկացին, իսկ երկրորդը՝ Մոկացի Հովանը, Մոկաց վարիանտի պատմողը... Այս երգը ասել է մեզ «Սանասարի և Բաղդասարի ծնունդը» պատմող Մոկացին։

1. Դավիթ, 2. Մհեր և ողորմիսն երկու նոր անուններով (Բաղդասար և Մելիքսեթ քահանա): Կար նաև Աբեղյանի հնթադրությունը նոր ճյուղերի գոյության մասին: Այն ժամանակ հատուկ հետաքրքրություն կար վեպի ամբողջական տեսքը վերականգնելու և նոր ճյուղեր հայտնաբերելու նկատմամբ: Եվ ահա, Հովսեփյանը գրի է առնում Մշո մի նոր տարրերակ, որը մի ամբողջ ճյուղով ավել էր Սրվանձտյանի և Աբեղյանի պատումներից, ուներ չորս ճյուղ՝ Ասլիմելիք (իմա Աբամելիք) — Առյուծածե Մհեր — Դավիթ — Մհեր: Ավելացել էր Առյուծածե Մհերի ճյուղը Ուրեմն՝ Մշո թեմն պատկանող Ապարանցի Մուրադի պատումը եղածների մեջ ամենաամբողջականն էր: Հովսեփյանն այս պատումի ընդհանուր վերնագիրը դրիլ է «Սասմա ծոեր» Ապարանի բարբառով: Չորս ճյուղերը համարակալված են և առանձին-առանձին վերնագըրված՝ Ա. Սանասար և Ասլիմելիք, Բ. Առյուծածե Մհեր, Գ. Դավիթ, Դ. Պղտիկ Մհեր:

Ապարանցի Մուրադի պատումին հաջորդում է նորից «Սասմա ծոեր» ընդհանուր վերնագիրը, այս անգամ՝ Մոկաց բարբառով: Սա նույնպես չորս ճյուղ է, իր առանձին համարակալումներով և վերնագրերով՝ Ա. Սանասարի և Բաղդասարի ծնունդը, Բ. Բաղդասար, Գ. Դավիթ, Դ. Մհեր: Որպեսզի Մոկաց տարբերակը ևս ունենար չորս ճյուղից բաղկացած ամբողջական տեսք, Հովսեփյանը միացրել է երեք տարբեր ասացողներից (Մի Մոկացի, Մի ուրիշ Մոկացի և Մոկացի Հովան) գրառած պատումները և դրանք համարել մի տարբերակ:

«Սանասարի և Բաղդասարի ծնունդը» ճյուղի վերջում, տողատակին Հովսեփյանը գրում է. «Այս ճյուղը պատմել է մեզ տասնյակ տարի մեր կողմերում ապրած մի Մոկացի»¹: «Բաղդասար» ճյուղի վերջում, նորից տողատակին գրում է. «Այս ճյուղը պատմել է մի ուրիշ Մոկացի... Բացի սուրանից այդ Մոկացին պատմել է և Դավիթի, և Մների մասին, բայց մեծ նմանություն ունենալով հետեւյալ նյուղի հետ (իմա-

¹ Գ. Հովսեփյան, Սասմա ծոեր, էջ 67:

Մոկացի Հովհանի պատում —Ա. Ս.), ավելորդ համարեցինք այսուեղ զետեղել»¹:

Ուրեմն՝ Հովսեփյանը այս «Բաղդասար» կոչվող ճյուղը հանել է մի պատումից, որն ունեցել է և Սանասար և Բաղդասար, և Հաջորդող Դավիթ, Փոքր Մհեր ճյուղերը: Եթե շիներ էլ բանահավաքի վերոհիշյալ վկայությունը, հենց «Բաղդասար» ճյուղից առանձին վերցրած երեսում է, որ այն արհեստականորեն կրճատված է սկզբից և վերջից: Պատումն սկսվում է անսպասելիորեն, ողորմիսին անմիջապես հաջորդում է Սանասարի և Բաղդասարի բերդաշինության միջադիպը.

«Վարդապիտ Սանասար, Բաղդասար առից,
Էկավ, մե սարի մեջ բնակվավ...»:

(Հատ. Ա, էջ 141, տող 10)

Բացի սրանից, ուրիշ ոչ մի պատում շունենք, որ սկսվի այս միջադիպով: Պետք է ենթադրել, որ սրան նախորդել է այն մասը, որ դրված է Ա. Համարի տակ «Սանասարի և Բաղդասարի ծնունդը» վերնագրով: Բայց այս պատումը գրի է առնված մի ուրիշ ասացողից: Իսկ վերջում պատումն ընդհատել է այնտեղ, որտեղից նախընտրել է դնել Մոկացի Հովհանի պատումը: Նման ընտրության հետևանքը եղել է այն, որ Մի ուրիշ Մոկացու պատումը կորցրել է իր նախնական տեսքը:

Բանն այն է, որ «Սասնա ծռերի» Ա. Հատորում (1936 թ.) այդ «Բաղդասար» հատվածը հանդես է գալիս որպես մի առանձին պատում (№ 4): Եվ ստացվում է այն տալավորությունը, որ դա անկախ պատում է և, որ ամենակարևորն է, վեպի այդ հատվածը նույնպես առանձին գոյություն է ունեցել և պատմվել ժողովրդի մեջ, այսինքն՝ միայն Բաղդասարի ամուսնության միջադիպերը²: Իրականում այդ հատվածը

¹ Նույն տեղում, էջ 79 (ընդգծումը մերն է —Ա. Ս.):

² Այս իսկ պատճառով «Սասնա ծռերի» 1936 թ. հրատարակության մեջ պատումը կրում է «Բաղդասարի ամուսնությունը» վերնագիրը:

նման տեսքով անհավանական է, որ պատմվեր. տրամաբանական չէ, որ ասացողը մի ուրիշից լսեր միայն այդ հատվածը, կամ իր լսած ամբողջական վեպից մտապահեր միայն այդքանը: Մյուսների հետ համեմատության ժամանակ պետք է նկատի ունենալ այս պատումի սկզբից և վերջից կրճատված վիճակը:

Ինչո՞ւ Գ. Հովսեփյանը «Սանասարի և Բաղդասարի ծնունդը» առաջին ճյուղից հետո դրել է «Բաղդասար» հատվածը որպես առանձին, երկրորդ ճյուղ: Նախ՝ այդ երկու ճյուղերը Սրբանձտյանի և Աբեղյանի պատումների համեմատությամբ նոր, ընդարձակ միջադեպեր շատ ունեին՝ կապված հատկապես եղբայրների ծննդի և ամուսնության հետ: Երկրորդ՝ ենթադրվում էր, որ Բաղդասարը նոր կերպար է և առանձին ճյուղ պիտի ունենա: Եվ երրորդ՝ Մոկաց պատումներն ունեին երեք ճյուղ, Մեծ Մհերը կամ բոլորովին շկար (ինչպես նախու Քեռու պատումը, որտեղ նրա անվան հիշատակությունն անգամ պահպած չէ), կամ էլ ամբողջական ճյուղի տեսք շուներ և միացած էր Դավթի ճյուղին (ինչպես Մոկացի Հովանի մոտ է): Որպեսզի Մոկաց տարբերակը ևս Մշո տարբերակի նման ունենար շորս ճյուղ, Բաղդասարն զբաղեցրել է առանձին ճյուղ: Սրան նպաստել է նաև մի այլ հանգամանք:

Պատումների հետ առաջին ծանոթությունից ստացվում է այն տպավորությունը, որ վեպում կերպարների, սրանց անունների և տեղերի շփոթ կա: Այդ թվացող շփոթն իր հիմքերն ունի, անշուշտ, բայց բոլոր տարբերակների համադրումն ու համեմատությունը յուրաքանչյուր կերպար դնում է իր տեղում, իր որոշակի դերով:

Երկվորյակ եղբայրները վեպի պատումներում հանդիս են գալիս երկու կարգի անուններով: Մշո թևում՝ Աբամելիք և Սանասար, Մոկաց թևում՝ Սանասար և Բաղդասար: Եղբայրներից մեկը թե՛ ֆիզիկական, թե՛ բնավորության և թե՛ մտավոր կարողություններով ավելի կատարյալ է, քան մյուսը: Ասացողների բնորոշմամբ՝ մեկը լիքը բուռ շուր է,

մյուսը՝ կիսատ։ Այս երկու ևղայրների կերպարները կարեվոր են իրենց միասնության մեջ։ սա երկվորյակ ևղայրների վիճական մոտիվն է։ Սրանց դերը պատումներում միշտ մնում է անփոփոխ, այսինքն՝ մեկը միշտ կատարյալ է, մյուսը՝ միշտ մի քիչ ծուռ։ Բայց երբեմն փոխվում են սրանց անունները։ Սա շատ քիչ է պատահում, բայց պատահել է Հենց Հովսեփյանի գրառած հիշյալ «Բաղդասար» հատվածում։ Եթե մեծ մասամբ Սանասարն է կատարյալը, Բաղդասարը՝ ծուռը, այս հատվածում հակառակն է—Բաղդասարն է մեծ հղբայրը և կատարյալը։ Անունների այսպիսի մի պատահական տեղափոխությունը Հովսեփյանին հիմք է տվել Բաղդասարի ամուսնության միջադեպերն առանձնացնելու որպես ճյուղ։ Հովսեփյանը շի նկատել, որ ևղայրներից մեկի դերի առաջնայնության իմաստով, իր միացրած երկու պատումները հակասության մեջ են։ «Սանասարի և Բաղդասարի ծնունդը» պատումում առաջնայնությունը Սանասարինն է, իսկ «Բաղդասար» հատվածում առաջնայնությունը Բաղդասարինն է։ Այդ հակասությունը նկատվում է նաև Հենց իր՝ «Բաղդասար» հատվածի ներսում։ Մի առիթով արդեն նշել ենք, որ ողորմիս-նախերգանքներում անունների թվարկման հաջորդականությունը նշանակում է սերնդաբանություն, իսկ եղբայրների դեպքում՝ կերպարի առաջնայնություն, ավագություն։ Եթե ողորմիսում հիշվում է Սանասար, հետո Բաղդասար, ուրեմն ավագության և առաջնայնության իրավունքը Սանասարինն է։ «Բաղդասար» հատվածի ողորմիսն ունի այսպիսի հաջորդականություն։

«Ողորմի տը տամ՝ ողորմի էն Վարդապետին.»

Ողորմի տը տամ՝ ողորմի էն Սանասարին.»

Ողորմի տը տամ՝ ողորմի էն Բաղդասարին...»։

(Հատ. Ա, էջ 141, տող 10)

Ուրեմն՝ ավագը Սանասարն է։ Սյուժեում նույնպես անունների հաջորդականությունը արտահայտում է նույն իմաստը։ Եթե պատումը ողորմիս շունի, այդ հաջորդականությունը երեվում է սյուժեի ավանդական կարգից։

«Մեկի անուն դրից Սանասար,
Մեկին՝ Բաղդասար...»:

Ուրիմն՝ Սանասարն է ավագ եղբայրը: «Բաղդասար» հատվածի սյուժեում, ինչպես և ողորմիսում, անվան առաջնությունը Սանասարինն է.

«Վարդսալիտ Սանասար, Բաղդասար առից,
Էկավ, մե սարի մեջ բնակվավ:
Սանասար գնաց հարեվելի կողմ քար բիրիլու,
Բաղդասար՝ հարեվմտյան:
Սանասար զԲաղդասարի պատ քակից,
Բաղդասար՝ Սանասարի...
Սանասար ասաց.

— Հա՛յր սուրբ, միր տան անուն ի՞նչ տը դնինք...

Վարդապիտն էր, Սանասարն էր, Բաղդասարն էր...»:

(Հատ. Ա, էջ 141—142, տող 10—20—30)

Ինչպես երեսում է մեջ բերված հատվածներից, անվան, հետևապես և դերի առաջնությունը Սանասարինն է: Բայց Պղնձե քաղաքի թագավորի աղջկա նամակից սկսած՝ Բաղդասարն է ստանձնում առաջնային դերը, Սանասարին մնում է ծուռ և փոքր եղբոր դերը: Բաղդասարին է ուղղված աղջկա նամակը, նա է այդ նույն աղջկա կախարդանքը վերացնողը և նրա հետ ամուսնացողը, այսինքն այն, ինչ մյուս պատումներում կապվում է Սանասարի հետ: Այս պատումի մի դրվագում կա այսպիսի հակասություն: Պղնձե քաղաքի աղջկա նամակաբերները շեն կարողանում ջոկել երկու եղբայրներից Բաղդասարին, որին հասցեագրված էր նամակը, և թուղթը դցում են այն տղայի անկողնու վրա, որը մյուսից տասնապատիկ ավելի գեղեցիկ էր: Եվ այդ «տասնապատիկ աղեկ» տղան ո՛չ թե Բաղդասարն է, այլ Սանասարը, որը փոքր եղբայրն է և ավելի կատարյալ շպիտի լիներ իո մեծ եղբորից:

Անունների շփոթությունն, երեխ, առաջացել է այն բանից: որ Պղնձե քաղաքի աղջիկն իսկապես նամակը դրում է Բաղդասարի անունով, բայց ոչ որպես իր փեսացուի, այլ՝ տագ-

ՎԵՐԻ ՀՅՈՒՂԵՐԻ ԸՆՏ ՊԱՏՈՒՄՆԵՐԻ



ԿՐԱԳԱՀԵՏԻ ԱՆՈՒՆՆԵՐԸ ԿԱՄ ԿՈԶՈՒՄՆԵՐԸ



ԱՐԴԱՊԱՀԾԻ ԱԽՈՒՆՆԵՐԸ ԿԱՄ ԳՈԶՈՒՄՆԵՐԸ

բոջ, որ դա, իրեն տանի Սանասարին կին: Այսպիս է Մոկացի Սախոցի պատումում (№ 7).

«— Քամի՛, նա թուղթ կը տանըս,
Կը տաս իմ տեղը Բաղդասարըն,
Դա, ձը տանը Սանասարըն...»:

(Հատ. Ա., էջ 319, տող 370)

Գուցե նման մի դրվագ հայտնի է եղել նաև «Բաղդասար» հատվածի ասացողին, որը և շփոթության պատճառ է դարձել:

Ուրեմն, «Բաղդասար» հատվածը ոչ միայն առանձին ճյուղ չէ, այլև Բաղդասարի առանձին և առաջնային կերպարի գոյության ասլացուց չէ: Վեպի քառասունյոթ տարբերակներից միայն հինգը ունեն «Սանասար և Բաղդասարի» առանձին, անկախ ճյուղ. և այդ հինգից մեկը այս «Բաղդասար» հատվածն է, որը Գ. Հովսեփյանի խմբագրական մասնատման հետևանքով լիարժեք տարբերակ էլ չէ: Միևնույն ժամանակ, միայն այս հատվածն է, որ ներկայացնում է Բաղդասարը որպես առանձին ճյուղ: Հենց այս և մյուս պատումներն ապացուցում են, որ Բաղդասարը Սանասարի հետ միասին կարող էր հանդիս դալ և իր առանձին ճյուղն ունենալ չէր կարող:

Մի հետաքրքիր հատված կա Մոկացի Հովանի պատումում: Բաղդատ քաղաքի անունն ստուգաբանվում է Բաղդասար անունով: Փոքր Մհերն իր թափառումների ճանապարհին ուզում է անպայման մտնել Բաղդադ. «Իմ խորոխպոր գերեզման,—էսաց,—զեռ Բաղդատա քաղաքն (ինչ Բաղդասար Պղնձե քաղքեն էկիր էր, կեացիր էր էնդեղ մեռիր էր. քաղաք շինիր էր, անուն դրիր էր Բաղդատ, զինք Բաղդասար էր)»¹: Հովսեփյանն ուշադրություն է հրավիրում այս հատվածի վրա. «Այս և հետևյալ հատվածները ցույց են տալիս, որ Բաղդասարի նյուղը շատ ավելի ընդարձակ պիտի լինի և պատմական ակնարկներով ավելի առատ»²: Հաջորդ երկու հատվածները

¹ Գ. Հովսեփյան, Սասմա ծոեր, էջ 143:

² Նույն տեղում, էջ 143, անո ծանոթությունը (ընդգծումը մերն է՝ Ա. Ա.):

Հետևյալներն են. «Բաղդասար,—էսաց,—մի ազգին ի, Սասման տնեն ի, էնու գերեզման ընձը շանք կտա՞ս»¹: «Բաղդասարը գերզմընի վերա քեառառն խորան ժամ շինեցին, անուն դրին սրփի Սարգիս (մկա էլ անուն սրփի Սարգիս ը)»²: Սրանք հետաքրքիր հատվածներ են, բայց ոչ այն բանի ապացույց, ինչի համար մատնանշում է Հովսեփյանը: Ավելի հավանական է, որ սա մի ստուգաբանական ավանդություն է, որը կապվել է Բաղդասար անվան հետ, մանավանդ որ վերոհիշյալ հատվածները հանդիպում են միայն Մոկացի Հովանի պատումում և, միևնույն ժամանակ, կապվում նաև սուրբ Սարգսի անվան հետ:

«Ազգագրական հանդեսի» 20-րդ գրքում (1910 թ.) հրատարակված է վեպի պատումներից մեկը հետևյալ խորագրով. «Սասնա Տուն» յոթ ճյուղ (Վանա գավառաբարբառով): Այդ պատումն արտատպված է «Սասնա ծոեր» ժողովածուի Բ հատորի Բ մասում «Սասնա տուն» (Վանա գավառաբարբառով)» վերնագրով: Խմբագրությունն իրավացիորեն հանել է «յոթ ճյուղ» բառերը, որովհետև այդ պատումի ենթադրյալ յոթ ճյուղերը բոլորովին էլ նոր ճյուղեր չեն, ոչինչ չեն ավելացնում վեպին, իսկ հավելյալ հատվածներն ու անունները ոչ մի կապ չունեն վեպի հետ:

Պատումն սկսվում է Սանասար և Բաղդասար ճյուղով և ավարտվում Մհերի Ազոավու քարում փակվելով: Սյուժեում ավելացել է մի կերպար՝ Զոջ Մելքոն, որը ոչինչ նոր բան չունի իր մեջ: Նրա հետ կապված սյուժեն կազմված է Դավթի ճյուղի բազմիցս կրկնվող միջադեպերից: Պատմության ընթացքն արհեստականորեն ձգձգված է, միևնույն միջադեպերըն ու դրվագները վերագրվում են տարբեր կերպարների: Նույնիսկ, հավելումներով, այս պատումը յոթ ճյուղ չի կազմում: Պատումում սերունդների ճյուղագրությունն այսպիսին է. 1. Սանասար և Բաղդասար, 2. Զոջ Մելքոն, 3. Զոջ Մհեր, 4. Դավթիթ, 5. Մհեր: Այստեղից-այնտեղից հավաքված Զոջ

¹ Գ. Հովսեփյան, Սասմա ծոեր, էջ 144:

² Նույն տեղում, էջ 146:

Մելքոնի կերպարը ոչնչով չի տարբերվում Սանասարի և Զոջ Մհերի կերպարներից։ Այնինչ այդ կրկնությունների մեջ կորել են շատ ավանդական հատվածներ բուն Սանասարի ճյուղից։ Զանփոլադ և մյուս դևերի կերպարները շինծու են և ավելորդ։ Դրանք փոխ են առնված այլ հեքիաթներից և ո՛չ ամբողջությամբ, դրա համար էլ կորցրել են այն համն ու հոտը, ինչ ունեն հեքիաթում։ Սա ցույց է տալիս, թե ինչպես, երբ հեքիաթային հատվածներն ու մոտիվները մեքենայորեն մտցվում են վեպի մեջ, դունազրկվում է հեքիաթը և ոչինչ չի շահում վեպը՝ բացի ճապաղվելուց։

Եթե գրառված լիիներ այս պատումը և պահպանված լիներ սոսկ հիշատակություն, թե եղել է Վանա գավառաբարբառով յոթ ճյուղից բաղկացած մի պատում, պիտի փնտրեինք այդ ենթադրյալ երեք ճյուղերը։ Այս պատումն ևս ցույց է տալիս, որ նման փնտրատուքներն անօգուտ են և ինքնանպատակ։

Յոթ կամ ավել ճյուղերի փնտրատուքներն ու դրանք գտնելու նպատակադրումը հասցնում է վեպն այն տեսքին, ինչ ունի այն Տիգրան Զիթունու կազմած և խմբադրած «Սասունականի» մեջ¹։

Բանահավաք Տիգրան Զիթունին 1907 թվականին, Վանում, մեծ խանդավառությամբ հետամուտ է լինում վեպի նոր տարբերակների հայտնաբերմանը և քրդերի վայրագություններից հալածված ու Վանում ապաստանած Կարկառի, Սպարկերտի գաղթականներից գրի է առնում վեպի երեք նոր տարբերակ, որոնք հետազում ներկայացնում է յոթ ճյուղ տեսքով։ Պատումների գրառումը կատարված է հարազատությամբ, բարբառային տառադարձության ու նրբությունների պահպանմամբ։ Ասացողները՝ Կարկառի Բերկրի գյուղից Խուղոն և Կծկուկ-Ակոբը և Սպարկերտի Ճաժվան գյուղից Կանչոն, վարպետ վիպասացներ են, երդիշներ։ Նրանցից գրառածները լավագույն պատումներից հիմնականում ոչ մի շեղում ու տարբերություն չունեն, ավելին՝ ապացուց են այդ

¹ S. Զիթունի, Սասունական, Փարիզ, 1942։

ավանդականության: Դրանք կազմված են շորս ճյուղից: Սակայն, Զիթունու միտումն այդ պատումներին տվել է յոթ ճյուղի տեսք: Այդ յոթ ճյուղն ստանալու համար Զիթունին կամ երկատում է միկնույն կերպարը (նման դեպքերում մշտապես տուժում է Մեծ Մհերի, մասամբ էլ՝ Դավթի, կերպարը), կամ էլ վեպի վերջում, Փոքր Մհերից հետո շարունակում է Սասնա տան սերունդների թիվը զանազան հեքիաթների ու մոտիվների հաշվին: Դրանք իրականում ոչ մի կապ չունեն վեպի հետ, եթե նույնիսկ ասացողը վկայում է, որ այդ կերպարները Սասնա տանից են:

«Սասունականի» մեջ Զիթունին յոթ ճյուղի փոխարեն յոթն անգամ ավելացրել է այն շփոթը, որ երևան է դալիս բոլոր պատումների համեմատական քննության ու համադրման ժամանակ: 1941 թ. նա արդեն ձեռքի տակ ուներ բավական թվով հրատարակված պատումներ: Ցանկանալով կազմիլ համահավաք մի տեքստ և, ավելին, ենթարկելով այն գրական «վերամշակման», Զիթունին անխտիր օգտագործել է բոլոր պատումների բոլոր միջադեպերն ու փոքրագույն դրվագները: Փոխանակ համադրելու, գիտական քննության միջոցով զատելու և զտելու համեմատարար նախնական, ավանդական միջադեպերը, նա կողք-կողքի շարել է բոլոր հատվածները: Պարզ է, թե այս դեպքում ինչքան կրկնություններ, հակասություններ, տարբերություններ, աղավաղումներ ու շփոթ կարող էր առաջանալ: Առանձնացվել, երկփեղկվել են տարբեր անուններով հանդես եկող միևնույն կերպարները՝ մի Մհերը, մի Դավթիթը դարձել են բազում Մհերներ ու Դավթիթներ: Այդպես վարվելու դեպքում, եթե Զիթունին իր ձեռքի տակ ունենար ոչ թե 35 պատում, այլ մինչ այժմ հայտնի բոլոր տակադիր ու անտիպ պատումները, «Սասունականի» ծավալը պիտի որ կրկնապատկվեր:

«Սասունականը» ևս իր գոյությամբ մի նոր ապացույց է վեպի յոթ ճյուղի շգոյության:

Այսպիսով, ձեռքի տակ եղած պատումներից ոչ մեկը՝ ներառյալ Զիթունու 1907 թ. գրառած երեք պատումները, բա-

ցի հայտնի շորս ճյուղից, մի այլ, առանձին ճյուղի հիշատակությունը կամ հիշողությունն անգամ պահած շունի։ Ընդհակառակը, դրանք հնարավորություն են տալիս հաստատելու, որ վեպն ունեցել է և ունի շորս ճյուղ միայն, որ յոթ և քառասուն ճյուղի վկայությունները վիսլական շափազանցություն է։ Ասացողների վկայությունների մեջ, անշուշտ, մեծ դեր են խաղացել տարբեր ժողովուրդների կողմից այնքան սիրված և ընդունված երեք, յոթ, քառասուն թվերը։

ՎԵՊԻ ԿԱՌՈՒՑՎԱԾՔԸ

1889 թվականին, իր դրասած պատումի առաջաբանում Աբեղյանը, խոսելով վեպի ոտանավորի մասին, գտնում է, որ «արդի ժողովրդական վեպի ձայնական տաղաշափությունը, որ բոլորովին նոր է մեր բանահյուսության մեջ, շատ մոտ է մեր հին հեթանոսական վեպերի շափերին («Երկներ երկին» և մյուս հատվածները Խորենացու պատմության մեջ)»¹: Երկուսի մեջ էլ տեսնելով նույն շափը, Աբեղյանը բացահայտում է մեր հին ու նոր վեպերի մեջ գոյություն ունեցող ձևական հարաբերությունը: Նույն թվին, Նիկողայոս Մաոր Աբեղյանի պատումի դրախոսականում առաջ է քաշում այս հարցի մյուս կողմը՝ մեր հին ու նոր վեպերի բովանդակության կապի խնդիրը²:

Խնդրի ծայրն արդեն գտնված էր, և Աբեղյանը հին ու նոր վեպերի հետազոտման ողջ ընթացքում մնաց դրանց համադրման ու համեմատական ուսումնասիրության սկզբունքին:

Աբեղյանն իր «Հայ վիպական բանահյուսություն» աշխատության երկրորդ՝ «Վիպասանք» բաժինն սկսում է «Մեծ Տիգրանի վեպով»: Խորենացու «Հայոց պատմության» մեջ պահպանված այս վեպի և նրա աղբյուրների վերականգնման հետ է կապված Աբեղյանի տեսական մեծագույն հայտնագործություններից մեկը: Նա քննական պատմական և բանագիտական խորաթափանցությամբ և կուռ տրամաբանությամբ նախ ապացուցում է.

¹ Ա. Աբեղյան, Դավիթ և Մհեր, Շուշի, էջ Բ:

²Տե՛ս Ա. Աբեղյան, Երկեր, հ. Ա, էջ 524—526 (ընդգծումները՝ Մ. Ա.):

1. Տիգրան Մեծի վեպի համար Խորենացին ձեռքի տակ ունեցել է զրավոր մի աղբյուր, որը պատմահայրը կոշում է «Պատմութիւն Հիւսման պիտոյից» կամ «Հիւսումն պիտոյից»։ Այդ գիրքը եղել է բանաստեղծական կամ բանահյուսական մի զրվածք, որի մեջ Հյուսված են եղել զանազան բանահյուսական կամ ճարտասանական օրինակներ, այդ թվում և մի ընդարձակ պատմություն Տիգրանի մասին։ Խորենացին, Տիգրանի պատմական ժամանակաշրջանի մասին գրելիս օգտվել է այդ պատմությունից, այս մասին ինքը՝ Խորենացին է վկայում իր «Հայոց պատմության» Ա գրքի ԺԹ գլխում։ Նույն Ա գրքի իԱ գլխում Խորենացին իր այդ զրավոր աղբյուրը, որի վրա Հիմնվել է Տիգրանի պատմությունը գրելիս, կոշում է «Չորս Հազներգություն»։ Սա նույնպես բանաստեղծական զրվածք է եղել, մի վիպական բանաստեղծություն, որի մեջ էական մաս պիտի կազմեր պատմականը։ Հենց այս պատմական մասն էլ օգտագործել է Խորենացին իր Հայկազանց թագավորների, Հատկապես Տիգրանի պատմությունը գրելիս։ Ուրեմն, Խորենացին Տիգրանի պատմությունը վերցրել է երկու տարբեր անուններով կոշվող մի զրվածքից, այսինքն՝
2. «Հիւսումն պիտոյիցն» ու «Չորս Հազներգությունը» միևնույն աղբյուրն է։ Այդ գիրքը Խորենացու ժամանակ «Հայերի մեջ Հանրածանոթ եղած պիտի լինի, Հանրածանոթ՝ և նրա Հեղինակը. ուստի և Խորենացին բավականանում է գրքի անունը տալով միայն և գովելով նրա «իմաստուն Հեղինակին» և կոշելով նրան «արգասաւոր ի բանս»։
3. Խորենացին հիշատակում է նաև, որ «ի Հինսն» երգեր ու գովեստներ են եղել Տիգրանի մասին, ժողովրդական ավանդական երգեր, որոնք և մշակել է «Հիւսումն պիտոյից» կամ «Չորս Հազներգությունը» գրքում «իմաստուն Հեղինակը», այսինքն՝
4. Այդ զրավոր աղբյուրի համար Հիմք են ծառայել ժողովրդական ավանդական երգերը։

Եվ այսպես, լույս սփռելով «Մեծ Տիգրանի վեպի» դրավոր ու բանավոր աղբյուրների և նրանց առնշակցության վրա, Աբեղյանն անցնում է այդ վեպի և մի այլ աղբյուրի համադրմանը և հանում բանագիտական առանձնահատուկ կարեռություն ունեցող հետևություն։ Այն է.

1. Խորենացու ժամանակ հայտնի է եղել մի «Պիտոյից գիրք», որի մեջ հյուսված են եղել բանահյուսական կամ ճարտասանական կանոններ, այդ կանոնների բացատրությունները և օրինակներ։ Այդ «Պիտոյից գիրքը» վերագրվում է Խորենացուն¹։ Գրքում կա «Սահման ներբողինի» վերնագրով մի գլուխ։ «Սահման ներբողինը» պատմական անձնավորությունները գովարանելու տեսական կանոններ էին։ Տեսական կանոններից հետո որպես համապատասխան օրինակ դրված է «Ներբողեան Մովսեսի»։

2. «Մեծն Տիգրանի վեպը» որպես պատմական բանաստեղծություն իր ձևով ու բովանդակությամբ ամբողջությամբ համապատասխանում է «Սահման ներբողինի» տեսական կանոններին։ «Տիգրանի պատմության մեջ պահված են «Պիտոյից գրքի» ներբողյանի ճարտասանական կանոնները, այն էլ մեծ մասամբ նույն կարգով, ինչ կարգով որ «Պիտոյից գիրքն» է պահանջում։

Իսկ որո՞նք էին այդ տեսական կանոնները, որոնց համապատասխանում էր Տիգրանի վրա ստեղծված «Զորս հագներգությունը» մասնավորապես և նման քերթվածներն ընդհանրապես։

Ա. Նախ՝ փառաբանել այն դեպքը կամ անձը, որը նյութ է դարձել նման մի պատմության։

Բ. Անել այդ անձի ազգի, հայրենիքի, նախածնողի, նախահայրերի պատմությունը։

Գ. Ներբողելի անձի ծնունդը, սնվելը, կրթությունը, մանկական կյանքն ու վարմունքը։

¹Տե՛ս «Մովսեսի Խորենացոյ մատենագրութիւնք», Վենետիկ, 1865, էջ 341—579։

Դ. Ներբողելի անձի դործերը. այս մասը ամենաընդարձակն ու գլխավորը պիտի լինի: Այստեղ պետք է մտնեն.

ա. Ներքին բարձր հատկանիշների նկարագիր,

բ. արտաքին կատարելության նկարագիր,

գ. գործերը, որոնք պիտի ճոխություն ու ընշեղություն պատճառն և սիրելի դարձնեն նրան:

Ե. Ներբողելի անձին դնել բաղդատության մեջ այլ գովելի անձերի հետ և նրան ավելի մեծ համարել:

Զ. Ինչպես ընդհանուր գովեստներով սկսված էր, այնպես էլ ներբողելի անձի վրա արած գովեստն ամփոփել և վերջացնել¹:

Եթե լայնացնելու լինենք ճարտասանական այս կանոնների շրջանակները, մի՞թե սրանք չեն ընկած մեր բոլոր հին ու նոր վեպերի և ընդհանրապես բոլոր ազգերի վեպերի կառուցվածքային հիմքում: Եվ ո՞ր վեպը չի կառուցված այսպիսի ուրվագծի վրա—հերոսի ծնողներ, հայրենիք, ծնունդ, մանկություն, պատանություն, գործեր, ամուսնություն, ժառանգ, մահ: Այս ուրվագիծն ընդհանուր է, որովհետև ընկած է մարդկության պատմության և յուրաքանչյուր անհատի կյանքի հիմքում:

Եվ ահա հենց այս նույն կառուցվածքային հիմքի վրա է, որ սերտ կապի ու առնշակցության եզրեր կան մեր հին ու նոր վեպերի միջև: Եվ այդ կապի բացահայտման պատիվը հայ բանագիտության մեջ պատկանում է դարձյալ Մանուկ Աբեղյանին:

Սկիզբ առնելով անհիշելի ժամանակներից և հանդես դալով մեր յուրաքանչյուր վեպի մեջ, այդ կառուցվածքային ուրվագիծը դարձել է ավանդական: Ուրվագիծը մնում է նույնը, փոխվում են պատմական դարաշրջանն ու դեպքերը, պատմական անձինք ու պատմական հայեցությունը, հինը գոյատեսվում է նորի հետ միասին, կամ նորոգվում նոր մեկ-

¹ Այս ամբողջ համակարգը տե՛ս Մ. Աբեղյան, Երկեր, հատ. Ա, էջ 97—115:

նություններով, կապվում նոր անձանց ու նոր ժամանակաշըրջանի հետ, և ահա, հին ուրվագծի վրա ստեղծվում է նոր ստեղծագործություն:

Հայկական ժողովրդական բոլոր վեպերը՝ սկսած «Վիպասանքից», «Պարսից պատերազմ» և «Տարոնի պատերազմ» մինչև «Սասնա ծռեր», կառուցված են դասականավանդական միևնույն ուրվագծի վրա: Այս վեպերի պահպանման տարբեր բնույթը (գրավոր՝ հատվածաբար, գրական վերամշակման ենթարկված, վերապատմված, և բանավոր) շի խանգարում դրանց բոլորի մեջ տեսնելու վիպական միևնույն ուրվագիծը:

Վիպական կառուցվածքային ուրվագիծը հենվում է որոշակի և սակավաթիվ թեմաների վրա: Սրանց շուրջն են համախմբվում բազմաթիվ մոտիվներ, որոնցով և կազմվում են միջադեպերը. իսկ այս բոլորի հիման վրա ստեղծվում են վիպական սյուժեներ: Այս սյուժեները ժամանակի ընթացքում հարում են միմյանց, այդ նույն ուրվագծի համաձայն համախմբվում մի միասնության մեջ, և ստացվում է վիպական մի ամբողջություն:

Այժմ, միշտ աշքի առաջ ունենալով վիպական ավանդական համընդհանուր ուրվագիծը, մասնավորենք հարցը հայ ժողովրդական վեպերի և հատկապես «Սասնա ծռերի» վրա:

ՀԻՄՆԱԿԱՆ ԹԵՄԱՆԵՐ

1. Կռապաշտ և խաշապաշտ թագավորներ, որոնք ներկայացնում են երկու հակոտնյա, թշնամական երկրներ, այսինքն՝ կովի իրադրություն:
2. Ամուսնություն.
 - ա. բռնի՝ հիմնված քաղաքական և դիվանագիտական նպատակների վրա,
 - բ. հիմնված սիրո և հավասար պայմանների վրա:
3. Հզոր ժառանգ, որը հանդես է գալիս որպես.

ա. երկրի հիմնադիր, նախահայր,

բ. երկիրը օտար նվաճողներից պաշտպանող, ազատագրող:

4. Շինարարություն (բերդաշինություն, եկեղեցաշինություն և այլ կառույցներ), որը խորհրդանիշ է.

ա. երկրի հաստատման,

բ. պաշտպանության,

գ. խաղաղ պայմաններում նյութական ու հոգևոր մշակույթի վերելքի:

Ո՞չ միայն տարբեր վեպերի, այլև մեկ միասնական վեպի տարբեր ճյուղերի հիմքում ընկած է վիպական կառուցվածքային միևնույն ուրվագիծը: Այս իսկ պատճառով, ուրվագիծը քննում ենք նախ՝ ըստ առանձին ճյուղերի, և հետո նոր միայն՝ շորս ճյուղի միասնական ամբողջության մեջ:

Սակայն, վիպական ուրվագիծի նույնության դեպքում, ո՞րն է այն տարբերությունը, որ վեպի ամբողջության մեջ ու մի ճյուղի դոյությունը ավելորդ չի դարձնում, այսինքն՝ ուրվագիծը կրկնվում է, բայց ճյուղերը տարբեր են:

Հիմքում լինելով նույնը, վիպական ուրվագիծը տարբեր ճյուղերում հանդես է գալիս արտահայտման տարբեր ձևերի մեջ. հիմնական թեմաները յուրաքանչյուր ճյուղում դրսեվորվում են յուրովի, փոխվում են սրանց տեղերը, դերն ու նշանակությունը: Այս թեմաներից մեկն ու մեկը տվյալ ճյուղում դառնում է կենտրոնական, մյուսները պտտվում են սրա շուրջը: Հաջորդող ճյուղում այն կորցնում է իր կենտրոնական նշանակությունը, դառնում հարակից՝ իր տեղը զիջելով մյուս թեմաներին: Այսինքն՝ ճյուղից-ճյուղ փոխվում է թեմաների ներքին հարաբերությունը: Հիմնական թեմաների այս ներքին, անկայուն հարաբերությունը վիպական մի ամբողջության մեջ ճյուղերի և միանալու, և միմյանցից տարբերվելու առաջին պատճառն է:

Ապա. միևնույն թեման տարբեր ճյուղերում ստեղծվում է տարբեր մոտիվներով ու նրանցով կազմված միջադեպերով, այսինքն՝ միևնույն թեման արտահայտվում է տարբեր

սյուժեներով։ Սա էլ ճյուղերի միջև գոյություն ունեցող տարբերության երկը որդ պատճառն է։

Երբորդ պատճառն էլ այն է, որ միևնույն ուրվագծի դեպքում տարբեր են լինում նաև յուրաքանչյուր ճյուղի արտահայտած գուղափարական իմաստն ու դերը վեպի ամբողջական կառուցվածքի մեջ։ Այս երրորդ պատճառը հանդես է գալիս որպես նախորդ երկուսի հետեւանք։

Այս բոլորի համեմատ էլ վիպական առանձին սյուժեները և՛ ամբողջանում են մեկ միասնության մեջ, դառնում մեկ վեպի ճյուղեր («Սանա ծոերի» շորս ճյուղերը՝ միասին), և՛ առանձնանում մինչև անկախ գոյության աստիճան (առաջին՝ «Սանասար և Բաղդասար» և երրորդ՝ «Դավիթ» ճյուղերը)։ Իսկ կան ճյուղեր էլ, որ վեպի ամբողջության մեջ առանձին դեր ունեն, բայց եղած գրառումներում մյուսներից անկախ շեն հանդիպում (երկրորդ՝ «Մեծ Մհերի» և շորրորդ՝ «Փոքր Մհերի» ճյուղերը)։

Այժմ քննենք վեպի հիմնական թեմաներն ըստ առանձին ճյուղերի։

Ա. Բ. Ա. Զ. Խ. Ն Ճ Յ Ո Ւ Ղ.

Առաջին՝ «Սանասար և Բաղդասար» ճյուղը հանդիպում է քսանվեց պատումներում, որից հինգը ունեն միայն այս մի ճյուղը։ Նման քանակը ցույց է տալիս, որ առաջին ճյուղը բավական լայն տարածում է ունեցել։ Իսկ հիշյալ հինգ պատումները խոսում են այն մասին, որ «Սանասար և Բաղդասար» սյուժեն պատմվել է առանձին, գոյություն է ունեցել մյուսներից անկախ։ Անկախ գոյությունից է գնացել միացել վեպին, թե՞ հակառակը՝ վեպից հետագայում է անշատվել—դժվար է ասել. սա առանձին քննության հարց է։

Ա. ո. ա. զ. ի ն թ ե մ ա. — (կռապաշտ և խաշապաշտ թագավորներ. ի դեմս նրանց՝ երկու հակոտնյա, թշնամական երկրներ, բախում նրանց միջև)։

Այս թեման հայ բանահյուսության մեջ «Հայկ ու Բելից» սկսած խիստ ավանդական է ու տարածված, թեմա, որ նույնանում է ժողովրդի պատմական ճակատագրին։ Մրա ընդհանուր պատմական ատաղձը պարզ է։ Մյուս կողմից, այս ընդհանուր ատաղձը ինչպես մյուս ճյուղերում, այնպես էլ առաջինում ձգտում է որոշարկման, կապվում պատմական որոշակի դարաշրջանների, անձնանունների ու տեղավայրերի հետ։ Կոապաշտ և խաչապաշտ թագավորությունները, որոնք պատումների մեծ մասում հենց այդպես ընդհանուր անունով էլ հանդիս են գալիս, որոշ պատումներում անվանավորվում են, դառնում այս կամ այն հանրահայտ երկրի թագավորներ, կամ կրում են առասպելական ու հեքիաթային անուններ։

Որովհետեւ կոապաշտ և խաչապաշտ ընդհանրացված ըմբռնումը տիրապետող հասկացություն է՝ գաղափարական խոր հագեցվածությամբ, դրա համար էլ պատումներում ամենից շատ հենց այդպես ընդհանուր անունով հանդիս են գալիս (տե՛ս Տախտակ 3 և Տախտակ 4)։

Մեծ հաճախականություն ունի նաև կոապաշտ թագավորի Սենեքերիմ անունն իր տարբեր տառաղարձություններով՝ Սինաքերիմ, Սինամքարիմ, Սինամքար։ Այդ անվան պահպանումը բավական թվով պատումներում օրինաշափ է նրանով, որ առաջին ճյուղում առկա Աստվածաշնչյան հայտնի պատմությունը Ասորեստանի թագավոր Սենեքերիմի և նրա որդիների մասին, հատուկ անունների հիշողությունը շիկորցրել։ Վեպը մինչև XIX դար է հասցրել այդ պատմությունը՝ Սենեքերիմ թագավորի և նրա Սանասար ու Ադրամելեք որդիների անուններով։ Պատումներում պահպանված է նաև նրանց հայրենիքի՝ Ասորեստանի անունը։ Հաճախ կոապաշտը, առանց անձնանվան, գործում է որպես այլակրոն տարբեր երկրների թագավոր՝ Բաղդատի, Մսրա, Եգիպտոսի, Աջմու։ Այս երկրանունների մեջ դրսեորվում են պատմական որոշակի դարաշրջանների հիշողություններ։ Պատմական այս անաքրոնիզմները նույնպես օրինաշափ են վեպի

Համար: Հանդիպում են նաև Հնդա Մելիք և Համդա Մհեր անվանածները, երկուսն էլ՝ եղակի անգամ. առաջինը մհելիքությունների հետ կապվող հասարակ անվան հատուկ դարձած ձեն է՝ կապված Բաղդադի խալիֆայության և Եգիստոսի տիրապետության ժամանակների հետ, ճիշտ այնպիս, ինչպիս Մսրա Մելիք. երկրորդը՝ երեսի շփոթի արդյունք, որովհետև Մհերը բոլոր պատումներում անխտիր միայն և միայն Սասնա խաչապաշտ թագավոր է: Եղակի անգամ կուպաշտ թագավորին փոխարինում է Ոստանա քուրդ բեզը¹: Սա, հավանաբար, շատ ավելի ուշ ժամանակի շերտ է:

Անունների հեքիաթային ձևերը վեսլին բնորոշ չեն, բայց և հանդիպում են, որովհետև վեպն իր գրառման ժամանակ արդեն անկման, հետևաբար և հեքիաթացման որոշ ընթացք էր ապրում:

Խաչապաշտ թագավորի համար ամենից շատ հանդիպող Գագիկ անունն է: Գուցե դա, իրոք, իր մեջ պահում է հիշողություններ պատմական Գագիկ թագավորների մասին: Պապ անվանածնը գուցե բանավոր ավանդմամբ է պահպան-

1 Ոստանա քուրդ բեզ հանդիպում է № 12 պատումում: Մրա ասացող Մանուկ Հարությունյանը և № 10, 11 պատումների ասացող Վարդան Մուխսի-Բագիկյանը համերկրացիներ են՝ Մոկսից. ոչ միայն ծանոթ են եղել, այլև՝ գործընկեր, ո. Գևորգ Փութկու վանքի փութկապաններ: Աշխատանքի բերումով միասին երկար ճանապարհ են կտրել, գիշերներ լուսացրել վեպը լսելով կամ ասելով և, որ ամենակարենորն է. «Մանուկ Ռիձայի ասելով, նրանք հաճախ կնստեին միասին, և յուրաքանչյուրը մեկ ճյուղ կասեր» («Սասնա ծոեր», հատ. Ա, էջ 474, Կ. Մելիք-Օհանջանյան): Այս երկու ասացողների պատումների մեծ նմանության հետ միասին նկատվում են նաև ուշադրության արժանի տարրերություններ, որոնցից մեկն էլ սա է, և սրանից բխող հետագա միջադեպերը. Մանուկը հիշում է Ոստանա քուրդ բեղ, Վարդանը՝ կուպաշտ (անանուն) թագավոր: Երկուսի մոտ էլ խաչապաշտի անունը Գագիկ է:

Ինչպես են համաձայնության եկել այս հարցում երկու ասացողները, երբ միասին են պատմել: Լավագույն ասացողները խիստ նախանձախնդիր են իրենց ասածի ճշմարտությանը՝ հատկապես անունների: (Մանուկ Հարությունյանի և Վարդան Մուխսի-Բագիկյանի պատումները տե՛ս «Սասնածոեր», հատ. Ա):

վել, նորից կապված Պապի թաղավորության օրերի հետ, գուցե և գրավոր աղբյուրների ազդեցությամբ հետագա մուտք է վեպի մեջ¹: Գումրիկ, Ղումրիկ, Գորդիկ, Աստղիկ, Խաչիկ անունների մասին ենթադրություններ շենք ուզում անել, որովհետեւ ձեռքի տակ օժանդակ վկայություններ շունենք, մանավանդ որ դրանցից յուրաքանչյուրը հանդիպում է միայն մեկական պատումում, այսինքն՝ համեմատության հնարավորություններ շի տալիս: Բնական է, որ խաչապաշտ թագավորը նույնպես կապվում է որոշակի տեղանունների հետ՝ Վանա, Սասնա, Հայաստանի, Կապուտկողի:

Վերը բերված անվանումներով սպառվում է առաջին ճյուղում կռապաշտ և խաչապաշտ թեմայի արտաքին ձևավորումը: Բովանդակության համար անվանումները ձև են, բայց ժողովրդական վեպի համար՝ ոչ ձևական: Այս անունները վեպի համար պատահական չեն. եթե որոշակի պատմական էլ չեն, ապա բավարարում են վեպի ժամանակին պահանջմունքը՝ կապվել պատմական անձնանունների և տեղանունների հետ: Ըստ վեպի այդ պահանջմունքի և ասացողների ժամանակին ընկալման, երբ որևէ դեպք, զրույց, պատմություն՝ պարուրված թեկուզ ոչ արժանահավատ առասպելական շղարշով, կապվում է որոշակի անձնանունների ու տեղանունների հետ, դառնում է հավաստի: Հենց այս հավաստի, էական մասը, որը կազմում է վեպի պատմականը, արտահայտվում է դարաշրջանի և տեղավայրերի որոշակիությամբ: Այս հիմնական էությունն էլ վեպը դարձնում է «պատմական բանաստեղծություն»²: Սրա մեջ է վեպի ժան-

¹ Պապ անունը հանդիպում է միայն մեկ անգամ, բայազետցի Առաքել Շակոյանի պատումում (№ 36, «Սասնա ծոեր», հատ. Բ, մաս Բ): Առաքելը վեպը լսել է № 35 պատումի (նույն տեղում) ասացող Հակոբ Նրգեյանից, որը, ինչպես վկայում է բանահավաքը, Աստվածաշունչը, «Հայոց պատմությունը» և Բաֆֆու վեպերը յուրօրինակ բեմականացման էր ենթարկում և խաղալով պատմում: Գուցե անդրադեռ Առաքելի հիշողության մեջ մի անկյունում պահպանվել է Պապ անունը որպես վեպի հայոց թագավորի անուն, որը, սակայն, շի հանդիպում իրեն՝ Հակոբի պատումում:

² Մ. Արեգյան, Երկեր, հատ. Ա, էջ 94:

րային տարրերակման հիմքը վիպասացների ըմբռնումներում։ Նրանք որոշակիորեն սահմանազատում են վեպը հեքիաթից և անհավաստի այլ ստեղծագործություններից, անվանելով այն իրական «պատմություն», որի մեջ ոշինչ լի կարելի փոխել¹:

Վեպն իր ժանրային ստիլմունքով ձգտում է պատմական ու աշխարհագրական որոշարկման։ Վեպի այս ձգտման հետևանքը լինում է անունների այն արտաքին շփոթը, որ կա վեպում և նկատվում է հենց անունների տախտակի վրա։ Բայց և երբեմն իրական, երբեմն թվացող այս շփոթը կարող է պահել պատմական անգնահատելի հիշողություններ։

¹ «Դավիթի պատմութենը հեքաթ-նաղըլ չէ, պատմութեն ա, եղելութեն ա։ Հեքաթ ընդուր կ'ըսենք, որ սուտ բան կա, էղիկ հեքաթ չէ, եղելութեն ա, պատմութեն»,—ասում է վիպասացներից մեկը՝ Մանուկ Թորոյանը («Սասնա ծոեր», Հատ. Բ, մաս Ա, էջ 250):

Վեպի ժանրային տարրերակման հարցում վեպ ստեղծողների, պահպանողների և Խորենացու տեսակետները զարմանալիորեն համընկնում են։ «Մեր պատմագիրը նման պատմություններից ճշմարիտ է համարում ոչ միայն այն, որ Ս. Գրքի համեմատ է, այլև այն, որ «ոճով է գրված... ոճով պատմել» նշանակում է՝ հայտնել տեղը, ժամանակը, պատճառը, դործող անձերը և պահեր և ողորկ ձևով մանրամասն հորինել։ Բայց զի ոչ ճշմարտութեամբ և ոճով պատմէ և ոչ զանուանսն նշանակե, կամ տեղիս կատարմանցն՝ ոչ ինչ կարևորագույն համարեցաք երկրորդել» (Բ. 75)։ Տե՛ս Մ. Արեղյան, Հատ. Ա, էջ 296։

Այս հիմնական մոտեցմամբ էլ Խորենացին անհավաստի առասպելներից առանձնացնում է Մեծն Տիգրանի պատմությունը և օգտվում դրանից իր «Հայոց պատմությունը» գրելու համար։ Խորենացու գրքում «վեպ» նշանակում է «պատմություն», և նա այդ բառը միշտ դործածում է գրավոր պատմական հիշատակարանների համար (տե՛ս Արեղյան, նույն տեղում, էջ 94)։ Այստեղ նույնպես համընկնում են պատմահոր և լավագույն վիպասացների տեսակետները։ Վիպասացները հավաստում են, որ Դավիթի պատմությունը եղել է գիրք։ № 30 պատումի ասացող Թամո Դավթյանը օհամարում է այս «բաղմությունը» եղելություն։ «Դավիթի մասին պատմածները «գրքից է բաղած»,—ավելացնում է նա։ «Դավիթի գիրքը» գոյություն է ունեցել, «ինքը տեսել է»—մեկ լիտր կը քաշեր և պահպում էր Գոմաց վանքում։ Հետազայում կոիվների ժամանակ քրդերը դիրքն այրել են» (տե՛ս «Սասնա ծոեր», Հատ. Ա, մաս Բ, էջ 156)։

Առաջին ճյուղում կուապաշտ-խաչապաշտ թեման թեսլիտ բռնություն, թշնամական վիճակ արտահայտում է, բայց չկա հիմնական մասը՝ կովի իրադրություն։ Խաչապաշտ թագավորը հարկատու է կուապաշտ թագավորին, իրավիճակը հավասար չէ, անշուշտ, բայց խաչապաշտի կողմից դիմադրությունը, ըմբոստությունը թույլ է, վիճակների հավասարեցման փորձ չկա։ Բախումը կա, բայց առանց կովի իրադրության։ Կուապաշտի հարկահանները տեսնում են խաչապաշտի գեղեցիկ աղջկան, նրա մասին պատմում իրենց թագավորին. վերջինս խաչապաշտին պարտադրում է նրա աղջկան կնության առնելու իր կամքը։ Խաչապաշտը հաճույքով շպիտի ընդուներ այդ առաջարկը։ Բախումը նախապատրաստվում է, բայց մի ուրիշ վիպական մոտիվ՝ անձնազնություն, լուծում է տալիս այդ իրադրությանը։ Աղջիկը համաձայն է բռնի ամուսնությանը, միայն թե զոհ չգնա մի ամբողջ ազգ։ Աղջկա անձնազն արարքը, իհարկե, լուծում չէ կուապաշտ-խաչապաշտ հակամարտության համար. ընդհակառակը, հենց նրա ու նրա ժառանգների միջոցով խորանում է այդ հակամարտությունը մինչև իր բնական լուծումը՝ կովի իրադրությունը։

Բոլոր պատումների առաջին ճյուղում կուապաշտ-խաչապաշտ թեման այսպիսի դրսենորում ունի։ Վիպական առանձին մանրամասները թեմայի էությունը շեն փոխում։

Ուրիմն, այս թեման առաջին ճյուղում հիմնական, կենտրոնական չէ, որովհետև իր հիմնական ուղին ու նպատակը չունի։

Երկրորդ թեմա.—Սա հանդես է դալիս իր ամասով՝ բռնի ամուսնություն, հիմնված քաղաքական ու դիվանագիտական նպատակների վրա։ Ինչպես տեսանք, երկրորդ թեման դործում է առաջինի հետ միաձույլ, դառնում մի յուրօրինակ բախում կուապաշտի և խաչապաշտի միջև։ Սա նույնպես առաջին ճյուղի համար հիմնական թեմա չէ։

Հետաքրքիր է, որ որոշ պատումներ բռնի ամուսնու-

թյանը տալիս են քաղաքական դիտավորությունների երանգ։ Քաղաքական-դիվանագիտական նկատառումները կարևոր տեղ են բռնում ամուսնության թեմայում։ Հիշենք՝ Տիգրանուհու ամուսնությունը Աժդահակի հետ («Վիպասանք»), Տարունի ամուսնությունը («Աղջիկ Տարուն»)։ «Սասնածոերում» քաղաքական-դիվանագիտական նպատակներ հետապնդող ամուսնական կապի թեման հանդես է դալիս երկրորդ ճյուղում։ Սակայն, այդ երանգը որոշ պատումներում առկա է նաև առաջին ճյուղում։ Կոռապաշտ թագավորը ոչ միայն խելքահան է եղել աղջկա գեղեցկությունից կամ անպայման ուզում է օգտվել իր գերիշխող դիրքից և հարկի դիմաց տանել աղջկան, այլ՝ նաև ուզում է անպայման փիսադառնալ խաշապաշտ թագավորին, իր համար մեծ պատիվ ու պատեհություն համարելով նրա հետ ազգակցական կապը¹։ Ամուսնական թեմայի այս կողմի ցուցադրումը վեպում կմընար առկախ, մի թուցիկ հիշողություն նախորդ վեպերից, եթե այն շխորացվեր հաջորդող երկրորդ ճյուղում։ այս մասին իր տեղում։

Ե Ր Բ Ո Ր Դ Թ Ե Մ Ա .—Առաջին ճյուղում ժառանգ թեման դրսնորվում է իր ա՝ երկրի հիմնադիր, նախահայր մասով։ Թեման կառուցվել է երկվորյակ եղբայրների մոտիվի վրա։ Վիպական այս մոտիվը վեպ է մտել աստվածաշնչյան հայտնի պատմության ձևով։ Բայց սա աստվածաշնչյան պատմությունից անկախ մոտիվ է, ավելի շուտ՝ աստվածաշնչյան պատմությունը երկվորյակ եղբայրների վիպական մոտիվի դրսնորումներից մեկն է։ Եթե շդիմենք այլ ազգերի մեջ այդ մոտիվի նույնանման դրսնորումներին և բավարպենք միայն հայկական զուգահեռներով, իրար մոտ կգան Սանասար և Աղրամելեք=Դեմետր և Գիսանհ=Մամիկ

1 «Կըսը (կոռապաշտը).—Զանըմ, համա տու քու ախճիկ տու ձի.

Իմ անուն վար քու ախճկան թըխ իլնը,

Զի թըխ ըսին՝ Կակիդ թաքավուրի փեսին՝ բած ը»:

(Հատ. Ա., էջ 476, տող 30)

և Կոնակ Հիմքերը, և ընդհանրությունները կհանգեցնեն մի Հիմնական դժի՝ երկվորյակ եղբայրների փախուստ և հաստատում Հայաստանում, այն էլ խիստ որոշակի մի տեղավայրում՝ Տարոնում։ Երեք զույգ եղբայրներն էլ հաստատվում են Տարոնում. բնօրրանի Հիշողություն չէ^o, արդյոք, սա, և բոլոր դեպքերում սա չէ^o Հիմնականը և ոչ այն, որ վեպի առաջին ճյուղում հանդես եկող եղբայրները կապվում են աստվածաշնչյան Սանասարի և Աղրամելեքի հետ։ «Վիպական զրույցների մեջ ռկապն անունի և մոտիվի մեջ շատ թույլ է. անունները հաճախ փոխվում են, մոտիվներն ավելի կայուն են»։ Անունների այսպիսի փոփոխություն տեսնում ենք մեր նոր վեպի մեջ։ Մամիկոնյանների ծագումն ըստ Բուզանդի, Խորենացու և Սեբեոսի՝ շինական է, բայց այստեղ երկու եղբայրները Հնդկաստանից են։ Երկու դեպքում էլ այդ պետք է առնվի ոչ իսկական իմաստով։ Հնդկաստանն ու Չինաստանն իրեւ արևելյան հեռավոր երկրներ միշտ իրար տեղ դուրս են գալիս մեր Հեքիաթների մեջ։ Մեր նոր վեպի մեջ հենց, օրինակ, երկու եղբայրները՝ Սանասար և Բաղդասար, կամ մի կուապաշտ թագավորի որդիք են, կամ...»¹ զանազան հայրենիքներ են Հիշվում եղբայրների համար։ Թե ինչու նույն վեպի տարբեր պատումներում տարբեր երկրներ են Հիշվում՝ այլ հարց է և ցույց է տալիս մի ստեղծագործության վրա պատմական ու վիպական տարբեր շերտերի դարսվածք։ Սա ցույց է տալիս նաև, որ որոշ պատումներում հանդիպող Ասորեստանի Սինեքերիմ թագավորի Հիշողությունը, ինչպիս նաև նրա որդիների անունները, ինչքան էլ նրանք սերտաճած լինեն վիպին, ունեն երկրորդական նշանակություն իրենց Հիմքի, այսինքն՝ երկվորյակ եղբայրների մոտիվի նկատմամբ։ Իսկ եղբայրների մոտիվում Հիմնականը երկրորդ մասն է՝ Հայաստանում հաստատվելը։ Այս հարցում համախոս են բոլոր պատումները։ Մոտիվի առաջին մասը՝ որտեղից փախան, ինչ-

¹ Մ. Աբեղյան, Երկեր, հատ. Դ, Երևան, 1968, էջ 449.

պե՞ս փախան, ինչո՞ւ փախան, երկրորդ մասի նկատմամբ ունի երկրորդական նշանակություն: Եվ հենց սա է պատճառը, որ եթե մոտիվի երկրորդ մասում բոլոր պատումները համախոս են, ապա առաջին մասում դրանց միջև նկատվում են ծանրակշիռ տարբերություններ:

1. Հայրն ուզում է իր որդիներին զո՞մատուցել կը ուրեմն: Պատումները տալիս են տարբեր պատճառներ՝ ակոքերն են պահանջում այդ մեծագույն զո՞ր հորից և ք. Հայրը նեղության մեջ է և իր փրկության համար կոքերին խոստանում է մեծ փրկագին՝ զո՞հել իր որդիներին (տե՛ս Միջադեպերի տախտակը, Տախտ. 6, միջադեպ 4 տ և բ): Այս երկու տարբեր մեկնակետերն իրենց հետ բերում են, իհարկե, սյուժետային տարբերություններ. այսինքն՝ սրանց վրա կառուցված միջադեպերը տարբեր են¹: Առաջին մեկնությունը դերակշռող է Մոկաց պատումներում, երկրորդը՝ Մշու:

¹ № 32՝ Խլաթ («Սասնա ծոեր», Հատ. Բ, մաս Ա), 35 և 37՝ Ալաշկերտ և 47՝ Մուշ (Հատ. Բ, մաս Բ) պատումները շեղվում են այս երկու հիմնական մեկնություններից: Շեղումները հետաքրքիր են ոչ թե սյուժետային առումով, այլ՝ բանահյուսական: № 47 պատումն իր հիմքով կապվում է Մշու պատումների հետ, բայց գրառման վայրով (Ապարան) և ժամանակով (1946 թ.) բավական հեռու է Մուշից: Տարածությունը և ժամանակը խաղացել են իրենց դերը որոշ միջադեպերի, առանձին հատվածների բնկնելու կամ փոփոխվելու հարցում: Մշու պատումներում ընդարձակ միջադեպերով պատմվում է Սենեքերիմի կողմից Երուաղեմը պաշարելու, Երուաղեմի սովի, աստծո միջամտության, Սենեքերիմի պարտության մասին: Այսուղ է, որ Սենեքերիմը Զոջ կուռքին խոստանում է զո՞մատուցել իր որդիներին (կամ մեկին): № 47 պատումում այս միջադեպերը շկան. թաղավորը մի օր կնոջն հայտնում է, որ ինքն իրենց որդիներից մեկին խոստացել է զո՞նել: Այս շպատճառաբանված խոստումը այն պատճառաբանված խոստման հիշողությունն է, անշուշտ: Միջադեպն ընկել է, մնացել է հիշողությունը: Սա էլ պահպանվել է հաջորդող միջադեպերի ստիպմամբ՝ Հայրը պիտի զո՞նի իր որդուն, որ որդին էլ կուատան մեջ սպանի իր հորը և փախչի:

№ 32 Խլաթա պատումը տալիս է մի նոր մեկնություն. Ժողովուրդը բողոքում է թաղավորին, թէ. «Ամեն օր մեր տղեկներ կը մորթես կոքան, յես օր լե մեր աղիղ օրն ա, յես օր լե քու տղեն պտի բերես մորթես» (Հատ. Բ, մաս Ա, էջ 229): Այսուղ՝ կամ կոքերի պահանջը մոռացվել է, դարձել է ժողովրդի պահանջ, կամ՝ դեր է խաղացել հերիաթային տարածված մի-

2. Եղբայրները կռատան մեջ սպանում են իրենց հորը՝ Այս հիմքի վրա են կառուցվում երկու (*Մոկաց* և *Մշո*) թևում էլ համապատասխան միջադեպերը։ Եթե նախորդ դեպքում տարբերություններն առաջանում են միևնույն հիմքի տարբեր մեկնություններից, այստեղ ինքը՝ հիմքը, տարբեր մեկնությունների հնարավորություն չի տալիս՝ ու առ առ ու մ են։ Ինչո՞ւ են սպանում—այս հարցը կապվում է նախորդ հիմքի հետ՝ հայրն էր ուզում զոհել իր որդիներին, որդիները սպանեցին իրենց հորը։ Բուն սպանության հիմքի հետ կապվում են որտեղ սպանեցին, ինչպես սպանեցին, ե՞րբ սպանեցին հարցերը։ Միջադեպերը կառուցվում են սրանց վրա, տարբերություններն էլ կապվում են սրանց հետ, հատկապես՝

մոտիվ, այն է. չըի դեմն առնող վիշտապին օրական մի աղջիկ են տալիս, ժողովուրդը պահանջում է, որ տան նաև թագավորի աղջկան, կամ պարզապես հերթը հասնում է նաև նրան։

Եթե վերոհիշյալ երկու դեր են խաղում բանահյուսական առարկայական պատճառներ՝ ժամանակ և տարածություն, ապա № 35 և 37 (*Ալաշկերտ*) պատումների շեղման հիմքը բանահյուսական անհատական պատճառներն են։ Այս երկու պատումի տևացողները՝ Հակոբ Նրգեյանը և Սարգիս Հակոբյանը, համազյուղացի են, նաև՝ փեսա ու աներձագ, վեպը լսել և սովորել են միևնույն անձնավորությունից՝ տիրացու Հակոբ Տեր-Մարտիրոսյանից, որն առաջինի աներն է, երկրորդի հայրը։ Այս տիրացու Հակոբ Տեր-Մարտիրոսյանը վեպը, հատկապես նրա առաջին ճյուղը, խճողել է աստվածաշնչյան դանաղան մոտիվներով ու անուններով։ Այդպես էլ անցել է Հակոբ Նրգեյանին և Սարգիս Հակոբյանին։ Առաջինի մոտ այս գիծն այնքան է խորացել, որ խմբագրությունն ստիպված է եղել առաջին ճյուղից ամբողջական հատվածներ դուրս թողնել, որպես աստվածաշնչյան մոտիվների վերապատմումներ, որոնք կապ չունեն վեպի հետ (տե՛ս Հատ. Բ, մաս Բ, էջ 9—11)։ Այս երկու պատումներում եղբայրները, որոնց ուզում են զոհել կոքերին, ոչ թե կռապաշտ թագավորի ու խաշապաշտ աղջկա որդիներն են, այլ՝ կռապաշտ թագավորի երկրում ապրող մի քրիստոնյա իշխանի։ Այն, որ սա աղավաղում է, երևի տիրացու Հակոբ Տեր-Մարտիրոսյանից եկող, երեսում է ոչ միայն այն բանից, որ սրանք միակ շեղումն են մնացած բոլոր պատումներում հանդիպող միևնույն միջադեպից (տե՛ս միջադեպ 3 Ա), այլև այս երկու պատումն իրենց ներսում են համաձայն չեն՝ նույն միջադեպը նրանք պատմում են տարբեր մանրամասներով, տարբեր անուններով։

Ե՞րբ սպանեցին հարցի հետ։ Որոշ պատումներ իրենց սյուժետային գծի հաջորդականությամբ համապատասխանում են աստվածաշնչյան պատմության այդ մասին՝ սպանեցին, հետո փախան (տե՛ս միջադեպ 11)։ Մշտ շորս պատում մի հետաքրքիր շեղում են տալիս այդ գծից (տե՛ս միջադեպ 12)։ Մոր խորհրդով եղբայրները փախչում են, զնում, հաստատվում Սասունում, նույնիսկ ամուսնանում, հետո եղբայրներից մեկին կոքերը երազում անընդհատ տանջում են. այդ մղձավանջից ազատվելու համար նա վերադառնում է հոր մոտ, սպանում նրան (նույն տեղում՝ կուատանը, նույն ձևով, ինչ մյուս բոլոր պատումներում), փշրում կոքերը, ազատվում նրանց հետապնդումից։ Այս տարբերության, ինչպես նաև կոքերի հետ կապված բոլոր միջադեպերում, պահպանված են հեթանոսական հավատալիքների որոշ տարրեր։ Հետաքրքիր են ոչ միայն այդ տարրերը, այլև՝ XIX դարի ասացողի վերաբերմունքը դրանց նկատմամբ։ XIX դարի քրիստոնյա ասացողը շի հավատում կոքերի զորությանը, և ավանդության ուժով պահպանված այդ հատվածներն ասացողների մոտ ստացել են երգիծական մեկնություն և երանգ։ Ծաղրվում են կենդանակերպ կուոքերը (ասացողները պարզ պատկերացում շունեն նաև նրանց արտաքին տեսքի ու կերպի մասին), նրանց զորությունը, դրան հավատացող ու ապավինող կուապաշտ թագավորը։ Այս ծաղրը՝ ընդհանուր վերաբերմունք լինելով, կապվում է մերթ այս, մերթ այն միջադեպի հետ, երբեմն դառնում է միջադեպի լուծում։ Օրինակ. կուապաշտ թագավորը հավատում է, որ իր կնոջ հղիությունը կոքերի (կամ իր շնչի) զորությունից է։ Այս երգիծանքը որոշ դեպքերում հասնում է զավեշտի, որովհետև աղջիկն է թագավորին ներշնչում այդ հավատը և դրանով իսկ թաքցընում իր հղիության իսկական պատճառը՝ ջուրը։ Ժողովուրդը մի դեպքում պահում է բնության երևույթների՝ ջրի տարերքի, ամպրոպի ու կայծակի, հեթանոսական հավատքը, մյուս դեպքում ծաղրում բաներ, որոնց հավատացել է դարեր շարունակ։ Վեպի դրաման ուշ շրջանը՝ XIX դարը,

իրեն զգացնել է տալիս հատկապես առասպելական, հեթանոսական կամ պատմական հնագույն շերտերին վերաբերող հատվածներում, այսինքն՝ այնտեղ, որտեղ մարդկային երևակայության, պատկերացումների, կյանքի ու կենցաղի որոշ երևույթների նախնական իմաստը դարերի մեջ մթագնովել է և XIX դարի ասացողի համար դարձել անծանոթ ու անհասկանալի։ Ավանդության ուժով պահպանված այդ հատվածներն ասացողների մոտ գտնում են նոր մեկնաբանություններ, ձևավորվում նոր պատկերացումներով։ Կոքերի ու կուպաշտության մասին հեթանոսական պատկերացումները վեպում ներկայանում են XIX—XX դարերի մեկնություններով, որոնք և նույնանման լինել չեն կարող։

Հայրասպանության հետ կապված որոշ միջադեպեր՝ հորն սպանելուց հետո եղբայրներից մեկի նրա տեղ թագավոր նստելը կամ շնոտելը բոլորովին անկարևոր են վեպի համար, որովհետև դրանք մնում են ինքնին ու առկախ, անհետեանք, ավելի շուտ, հետեանքը մնում է նույնը՝ նրանք թողնում են կուպաշտի երկիրը, թագավորությունը և գնում, մի ամայի վայրում հիմնում իրենց հայրենիքը։

Ահա եղբայրների փախուստի մեկ այլ մեկնություն, որը բոլորովին կապ շունի կոքերի, զոհողության և հայրասպանության հետ։ Փախուստն ունի անկախ վիպական հիմք, կապվում է այլ մոտիվների հետ։ Այսպես. թագավորը (կուպաշտ կամ այլ) շի հավատում իր կնոջ անապական հղիությունը, շի ներում նրան և շի հանդուրժում իր տան մեջ ապօրինի ծնունդ, հրամայում է դահճին սպանել եղբայրներին (ինչպես և մորը) (տե՛ս միջադեպ 6): Կամ՝ մայրը շի հաշտվում կուպաշտ թագավորի հողում ապրելու մտքի հետ, պատմում է որդիներին իր հայրական երկրի մասին, և միասին վերադառնում են մոր երկիրը (տե՛ս միջադեպ 15): 6-րդ միջադեպին է հարում նաև 8-րդը, որը որպես առանձին տարբերակ է հանդիս դալիս. այստեղ էլ խաշապաշտ հայրը շի հավատում իր աղջկա անմեղությանը, աղջիկը հոր պատժից փախչում է Սասնո կողմերը, ուր և ծնվում են երկվորյակ եղբայրները։

Եթե հիշատակություն չկա կոքերի, եղբայրներին նրանց գոհելու, հորն սպանելու մասին, ինչպես պետք է վերաբերվել այս պատումներին. ինչի՞ հետ է կապվում այս տարբերությունն աստվածաշնչյան հայտնի մոտիվից: Եթե ընդունենք, որ առաջին ճյուղի հիմքում ընկած է աստվածաշնչյան մոտիվը, այս տարբերությունները պետք է համարենք հետեւանք մոռացության կամ աղավաղման: Իսկ եթե սրանք անկախ, առանձին, հավասարազոր վիպական մոտիվներ են և կապ չունեն աստվածաշնչյան պատմության հետ: Նման մոտեցումն այս պարագայում ավելի ճիշտ է, քան` առաջին ճյուղի հիմքում ընդունել մեկ մոտիվ, պատումներում եղած տարբերությունները համարել այս մեկի տարբեր դրսերումները կամ մասնակի աղավաղումները: Ուրեմն՝ որոշ պատումներ առաջին ճյուղի իրենց նկարագրով ցույց են տալիս, որ երկվորյակ եղբայրների մոտիվը կարող է կապ չունենալ աստվածաշնչյան պատմության հետ և հանդիս դալ առանձին, իր դրսերումը գտնել վիպական այլ մոտիվների կապակցության մեջ: Երկվորյակ եղբայրների մոտիվը կարող է փոխառած լինել միայն անուններ՝ Սանասար և Աղրամելիք, և այն ևս ենթարկել փոփոխությունների, Աղրամելիքը՝ Բաղդասար և այլն:

Ինչու աստվածաշնչյան պատմության առաջին մասն երկրորդի հանդեպ ունի պակաս կարևորություն, և որո՞նք են առաջին մասի հետ կապված տարբերությունների ծնող պատճառները:

Նախ. վեպի առաջին ճյուղի ժառանգ թեմայի հիմքում ընկած է երկու եղբայրների վիպական մոտիվն իր պատմական հավաստի կամ անհավաստի հիմքով, իսկ աստվածաշնչընչյան պատմությունն այդ մոտիվի դրսերումներից մեկն է միայն, որից վեպն երբեմն ամբողջությամբ է օգտվում, երբեմն՝ մասամբ: Ընդունված է, որ վեպի առաջին ճյուղի հիմքում ընկած է այդ պատմությունը: Աբեղյանը նույնպես ընդունում է այս հիմքը, բայց և դրում է. «Առասպելաշեն ժողովուրդը Ս. Գրքի այս միջադեպն առել, իր ձեռվ մշակել,

Հայացրել է՝ մեջ խառնելով հայոց պատմական կյանքի դեպքեր, ինչպես և շատ կենցաղական, դիցազնական գծեր, այնպիս որ, եթե Հինեւին Սենեքը իրիմ և Երուսաղեմ անունները (նաև Սանասար և Աղքամելիք՝ Ա. Ա.), ինչպես և Երկու եղբայրների՝ իրենց հորը կուտան մեջ սպանելը, դժվար կլիներ այս երկու պատմությունը նույնացնել »¹ (ընդգծումը մերն է—Ա. Ա.): Սա շատ կարեոր դիտողություն է, որովհետեւ իրականում աստվածաշնչյան պատմությունը ոչ թե առաջին ճյուղի հիմքն է, այլ՝ հիմնական մոտիվներից մեկը միայն:

Երկրորդ. առաջին ճյուղում զոհաբերության և հայրասպանության միջադեպերը կայուն են, հիմնական, բայց ոչ առանցքային։ Հիմնականը և առանցքայինը այս պատմության մեջ, ինչպես և ողջ առաջին ճյուղում, շորրորդ թեման է։

Չորրորդ. թեմա.—(շինարարություն)։ Առաջին ճյուղում սա մի անծանոթ, ամայի, բայց զորավոր վայրում հաստատվելու՝ բերդաշինության թեման է։ Բերդաշինությունն այստեղ ունի օջախ - տուն - հայրենիք իմաստը։ Այս հարցում համախոս են բոլոր պատումները։ Սա նաև առաջին ճյուղի հիմնական գաղափարն է։ Ուրեմն՝ բերդաշինությունն այն միջուկն է, որի շուրջը պատավում է երկվորյակ եղբայրների մոտիվն իր հարակից մոտիվներով։ Այդ մոտիվների ուրվադիմն այսպիսին է. սկսենք բերդաշինության թեմայից.

ա. Եղբայրների փախուստ ինչ-որ երկրից, ինչ-որ մեկից ինչ-որ պատճառով և հաստատվելը որոշակի տեղավայրում։

բ. Նրանց ծնունդը մոր գծով դարձյալ կապվում է այդ տեղավայրի հետ՝ մոր հայրենական տուն, մոր կրոնի հետ՝ խաշապաշտ։

գ. Նրանց մոր բոնի ամուսնություն՝ այլակրոն մեկը

¹ Ա. Արեդյան, Երկեր, Հատ. Ա., էջ 381։

կնության է առնում հայազգի աղջկան. Նրա հետ կենակցում է աղջիկը կամ շի կենակցում.

դ. Նրանց ծնունդը՝ առասպելական կամ իրական.

ե. Նրանց մանկությունը, պատանեկությունը, դորժերը, ամուսնությունը:

Հիմնական ուրվագիծն այս է: Սրանցից յուրաքանչյուրը կարող է լինել և շատ հին, նախնական, և հետագա շերտերի արդյունք, կարող է ունենալ պատմական որոշակի հիմք, կարող է լինել զուտ վիպական, կարող է մնալ կայուն, կարող է առաջացնել փոփոխակներ:

Բերդաշինության միջադեպը գրեթե տողացի նույնն է բոլոր պատումներում, բացի № 30-ից (Սասուն) և 28-ից (Մուշ): Այս վերջին պատումի գրառումը հարազատ չէ և փոփոխություն է զգացվում նաև սյուժետային գծի, հատկապես հաջորդականության, մեջ: Այս պատումն սկսվում է Դավիթ թագավորի մահով, որն ավագ եղբայրն է Մհերի, Բաղդասարի և Զենով Հովանի: Դավիթին փոխարինում է Բաղդասարը. սրա կինն է Խանդութ խանումը: Բաղդասարն սպանվում է Մսրա Մելիքի հետ մենամարտում (կովի պատճառը նշված չէ), Մելիքը հղի Խանդութին գերում է և առնում կնության: Մսրում ծնվում է Թլոֆ Դավիթը: Այս բոլորը պատմվում է ճիշտ այսպիսի ուրվագծային հիշատակմամբ միայն, առանց ամբողջական միջադեպերի: Ինչպես պարզ երևում է, սրանք այն միջադեպերի աղավաղված արձագանքներն են, որոնք մյուս պատումներում վերագրվում են Մեծ Մհերին: Երրորդ ճյուղին վերաբերող միջադեպերն իրենց տեղում են, ավանդական հաջորդականությամբ: Թլոֆ Դավիթի ամուսնում է Կապուտկողի Խանդութ խանումի հետ, ծնվում են Մհերը և Միհրանը: Փոքր Մհերի ավանդական վախճանը, որով և վերջանում է վեպը, չկահոր վրեժը լուծելուց հետո նա այլևս հանդես չի գալիս: Երկրորդ որդին՝ Միհրանը, Տեվլաթ ղուշի ընտրությամբ դառնում է մի ինչ-որ Պետքրիսանա երկրի թագավոր: Սրա աղջկան է, որ կոապաշտ թագավորը բռնի առնում է կնու-

թյան։ Այս աղջիկն է հղիանում զրից, ծնվում են Բաղդասարը և Սեղնասարը։ Ուրեմն, ըստ այդ պատումի սյուժետաշին գծի, երկվորյակ եղբայրները Դավթի թոռներն են։

Եվ սյուժետային գծի, և անունների մեջ պարզորոշ շփոթ է զգացվում, որի պատճառները կարող են լինել և ասացողի պատմությունը, և գրառման թերությունները՝ գրառողի միջամտությունը ինչպես ոչ բառացի գրառելու, այնպես էլ սյուժեն խառնելու հարցում։ Բառացի բերված որոշ ավանդական շափածո և երգային հատվածներից երեսում է, որ պատումն սկզբնապես շատ ավելի լավ է եղել, քան իր գրառված վիճակում, և ասացողն էլ՝ շատ ավելի վարպետ ու գիտակ, քան գրառողը։ Որ սա շփոթ է և ուշադրության ոչ արժանի տարբերություն մյուս պատումներից, հաստատվում է նաև հենց այդ պատումի ողորմիսով։ Այս պատումի ողորմիսն իր անուններով և դրանց հաջորդականությամբ շի համապատասխանում սյուժետային գծի հաջորդականությանը։ Ողորմիսի մեջ հաջորդաբար հիշվում են՝ Դավիթ թագավոր—Բաղդասար—Զենով Հովհաննես—Մարտիրոս Մելիք։ Ինչպես երեսում է ողորմիսից, Զոյ Մհերը Թլոֆ Դավթի հայրն է, իսկ սյուժետում Մհեր անունը միայն մի տեղ է հիշվում (առանց Զոյ հատուկ որոշվի), այն էլ որպես Թլոֆ Դավթի հորեղբայր։ Խանդութ խանումի անունը Դավթից հետո հիշելը նշանակում է, որ Դավթի կինն է սա, իսկ որպես մայր՝ Խանդութ խանում շի հիշվում։ Մինչդեռ սյուժետում Թլոֆ Դավթի և մայրն է Խանդութ խանում, և կինը։ Սա այն դեպքը չէ, երբ միանույն միջադեպը պատմվում է տարբեր կերպարների վրա, կամ տարբեր կերպարներ միջադեպերի ու բնավորության գծերի հետ միասին նախորդներից ժառանգում են նաև անուններ։ Սա

¹ Այս պատումը գրառել է Հայուապետ Հ. Համամճյանը։ Պատումի առաջին հրատարակիչը տալիս է մի այսպիսի տեղեկություն (առաջին անդամ տպագրվել է «Հայրենիք» ամսագրի 1933 թ. № 3)։ «Ամենեն վերջ Հ. Համամճյան ծանոթություն մը գրած է, ուր կ'ըսե. «Տեղ-տեղ հերիաթի խոսքերը, բառերը, ոճերը նույնությամբ գործածված են»։

պարզապես շփոթ է: Դավթի տղա Փոքր Մհեր և Միջրան և սրա էլ թոռներ՝ Բաղդասար և Սեղնասար, ողորմիսում չի հիշվում. նորից անհամապատասխանություն սյուժեի հետ:

Այսպիսով, № 28 պատումում բերդաշինության միջադեպը չկա, որովհետև առաջին ճյուղի տեղն ու բովանդակությունը ընդհանրապես խախտված է: Երկվորյակ եղբայրների հետ կապվում է ընդամենը երկու միջադեպ. կուապաշտհոր սպանությունը և այս առիթով մենամարտ եղբայրների միջև՝ Բաղդասարը չի կարողանում ներել Սեղնասարի հայրասպան արարքը, մինչև որ մայրը բացատրում է, որ կուապաշտը նրանց հայրը չէ¹: Հենց այստեղ էլ վերջանում է պատումը: Եվ բնականաբար, Սասնա բերդի հիմնադրումը չկա, որովհետև Սասնա տունը Մելիքից պաշտպանող Դավթի ծոռները չեին կարող նոր միայն հիմնադրել Սասունը:

Սասնա պատումում (№ 30) բերդաշինության միջադեպն իր տեղում չէ. այն կապվում է Մեծ Մհերի անվան հետ, իսկ առաջին ճյուղում դրա հետքն անդամ չկա²: Ընդհանրապես, Սասնա այս պատումի առաջին ճյուղը միջադեպերի ընդգրկմամբ հետաքրքիր դիրք է դրավում Մոկաց և Մշո խմբավորումների միջև: Նախ. միջադեպերի թիվը շափազանց քիչ է, շորս միջադեպ, որոնցից իրականում միայն առաջինն է միջադիալ իր ծավալով ու ընդարձակությամբ: Մյուս երեքը խիստ հակիրճ հիշատակություններ են միայն, որոնք մյուս պատումներում ունեն իրենց ծավալուն և մանրամասն պատմությունները: Բատ այսմ էլ, ծավալային հարաբերությամբ սրա և մյուս պատումների միջև տարբերությունները մեծ են. Եթե Մոկաց պատումներում այդ ճյուղն ունի 580 շափածո տող և պատմվել է մյուս ճյուղերից անկախ (օրինակ՝ № 7 պատումը, Ա. Հատոր), ապա սա ունի

¹ Մի օրինակ ևս այն բանի, թե ինչպես, երբ միջադեպերը մոռացվում են և նրանցից մնում են միայն հիշողություն, այդ հիշողությունը պարուղում է նոր մեկնաբանություններով, առաջացնում նոր միջադեպեր:

² Այս մասին մանրամասն խոսք կլինի երկրորդ՝ Մեծ Մհերի, ճյուղի քննության ժամանակ:

50 տող միայն և այդ տեսքով երբեք առանձին գոյություն ունենալ չէր կարող:

Սաստից միայն երկու պատում է մտել «Սասնա ծռեր» երկհատորյակի մեջ՝ Հիշյալ № 30-ը և № 31 (Հատ. Բ, մաս Ա): № 31-ը շունի առաջին ճյուղը և սկսվում է Մեծ Մհերով: Ուրիմն, Սասնա պատումների մեջ ներքին համեմատության հնարավորությունը բացառվում է. համեմատության և հետևությունների համար պահանջվում են մեծ թվով պատումներ¹:

Այսպիսով, առաջին ճյուղում հիմնականը, կենտրոնականը շորրորդ թեման է, իսկ նախորդ երեքը նախապատրաստում են այն:

Երկրորդ և երրորդ թեմաներն առաջին ճյուղում ունեն կրկնակի դրսնորում:

Երկիրը հիմնված է, երկու եղբայրներն արդեն հաստատել են իրենց իրավունքը, այսինքն՝ կատարել են մեծ գործեր, որոնք սիրելի են դարձրել նրանց անձը: Սրան, ըստ կյանքի և վիպական շղթայի, պիտի հաջորդի ամուսնությունը: Այս թեման այս դեպքում արդեն հանդես է գալիս իր բմասով, այսինքն՝ ամուսնություն, հիմնված սիրո և հավասար պայմանների վրա:

Մի գեղեցկուհի, դյուցազնուհի, նաև կախարդուհի լսում է Սանասարի համբավը և սիրո նամակով ամուսնության առաջարկ անում նրան: Սանասարը զանազան դժվարությունների, փորձությունների միջով բերում է աղջկան:

Եղբայրների ամուսնությունն ընդարձակ պատմությամբ առկա է միայն Մոկաց թևի պատումներում: Այն իր մեջ է ներառնում առասպելական ու հեքիաթային մոտիվներ: Սրանք վիպական ընդհանուր հենքի մեջ ստանում են վիպական խառնվածք, համեմվում հավատալիքային, ծիսա-

¹ Արխիվներում և 70-ական թվականների գրառումներում կան Սասնա բազմաթիվ պատումներ, որոնք ընձեռում են նման համեմատության հնարավորություն. դա առայժմ դուրս է մեր նպատակից և ընդորկած նյութի շրջանակներից:

կան, կենցաղային մանրուքներով և հեշտությամբ սերտաճում վեալին։ Հեքիաթային մոտիվների ու միջադեպերի մուտքը վեալ, վեալի ներքին պահանջմունքից շի բխում և կապ չունի նրա ժանրային նկարագրի հետ։ Բայց եթե միջադեպերն իրենք վեալի պահանջով չեն առաջանում, ապա դրանց վիպականացումը, պատմական ու աշխարհագրական երանդավորումը լինում է վեալի ստիպմունքով, որպեսզի դրանք արտաքին հարդարանքով ևս ձուլվեն վեալին։ Ահա թե ինչու, որոշ պատումներում հեքիաթային միջադեպերը նույնպես երանդավորվում են պատմական որոշակիությամբ՝ կապվում պատմական տեղավայրերի հետ։ Մեծ մասամբ վեալը ներառնում է ոչ թե պատրաստի հեքիաթային միջադեպեր, այլ՝ միայն հեքիաթային մոտիվներ, որոնց վրա իր ողուն համաձայն կառուցում է վիպական միջադեպեր։

Հեքիաթային մոտիվների առկայությունը վեալում ունի մի բացասական կողմ։ Դրանք հեշտությամբ իրենց են ձգում նման այլ մոտիվներ, խայծ են հեքիաթային՝ այլ տարրերի համար, իրենց հետ բերում են հեքիաթային բանաձևերի ու բանաձևային արտահայտությունների առատություն, ունենում են հեքիաթային ավանդական բանաձևային սկիզբ ու վերջ։ Օրինակ, այն հինգ պատումները, որոնք ունեն միայն «Սանասար և Բաղդասար» ճյուղը, վերը ասվածի լավագույն ապացուցներ են։ Հեքիաթային տարրերը՝ մոտիվներ, բանաձևային արտահայտություններ, հեքիաթային սկիզբ ու վերջ, այդ պատումներում գերիշողը դարձնում է հեքիաթային հոգեբանությունն ու խառնվածքը։ Դրանք, բացի մեկից, շունեն ողորմիս-նախերդանք, որը վեալի բնորոշ հատկանիշներից մեկն է։ Դրա փոխարեն ունեն հեքիաթային ավանդական բանաձևային սկիզբ։

«Կար շկար մի ժամանակ՝
Մի կուալաշտ թագավոր կար,
Մի խաշալաշտ թագավոր...»։

(Ն 3 պատում, հատ. Ա, էջ 127, տող 10)

«Ժամանակով կ'ըլեր, շէր ըլեր՝

Մեկ խաշապաշտ թագավոր...»:

(№ 7 պատում, հատ. Ա, էջ 307, տող 10)

«Ժամանակով կ'ըլնի մե խայու թաքավոր...»:

(№ 44, հատ. Բ, մաս Բ, էջ 557, տող 10)

Վերջանում էն.

«Յոթ օր խարսնիս արիցին,

Քեֆ-ուրախութուն արիցին,

Կեր ու խում արիցին,

Մե մի բան շտվեցին:

Համա Աստծուց իրեք խնձոր իրե՝

Մեկ ականջ արռղին...»:

(№ 3, էջ 135—136, տող 270)

«Անունք խասան ուրինց մուրազ...

Երկնուց իրեք խնձոր իրի...»:

(№ 7, էջ 325, տող 580)

«Նրանք խասան ուրենց սրտի մուրադին...

Երկնքից հիրեք խնձոր իջավ...»:

(№ 44, էջ 560, տող 30)

Այս հինգ պատումներից № 4 պատումը, որ կրում է «Բաղդասարի ամուսնությունը» վերնագիրը, բանահավաք Գարեգին Հովսեփյանի կողմից սկզբից և վերջից արհեստականորեն կրճատվել է՝ հարմարեցվելով նրա կազմած «Սամա ծոեր» ժողովածուի պահանջմունքներին: Այս մասին մի այլ առիթով մանրամասն խոսվել է: Պարզ է, որ սրա սկզբավածքի և վերջի մասին խոսք լինել չի կարող: Եվ հենց այս պատումն է, որ ունի ողորմիս: Հինգ պատումների մեջ է մտնում նաև № 20 պատումը (Գավաշ) («Սամա ծոեր», հատ. Ա). սա բանաձևային սկիզբ ու վերջ չունի, սկսվում է սյուժեիտալին անմիջական պատմվածքով, վերջանում սյուժետային դժի կտրուկ ավարտով՝ եղբայրների բերդաշինության միջադեպով:

Առասպելական-հեքիաթային մոտիվներով կազմված

միջադեպերի ու այլ տարրերի առատությունն է, որ հիմք է ստեղծել «Սանասար և Բաղդասար» ճյուղի առանձին, անկախ գոյությանը։ Եվ բնական է, որ առանձին տեսքով առաջին ճյուղը հանդիպում է միայն Մոկաց թեում, իսկ Մշո թեու պատումներում բոլորովին չի հանդիպում։ Մշո պատումները, ի տարրերություն Մոկաց թեու, ընտրում են ավելի իրական, վիպական մոտիվներ ու ձևեր։

Առասպելականի ու իրականի, հեքիաթայինի և վիպականի նախընտրության հարցում տարածայնությունները Մոկս և Մուշ խմբերի միջև սկսվում են եղբայրների ծնունդով։ Մոկաց պատումներում եղբայրներն ունեն զրային ծնունդ։ Երկվորյակ եղբայրների մոտիվին միացել է անպական հղիության և զրային ծննդի հեթանոսական առասպելը։ Իսկ Մշո պատումներում եղբայրների ծնունդն իրական է։ Նույն տարրերությունը զգացվում է նաև ամուսնության միջադեպերում։


Ինչո՞ւ հատկապես Մոկաց պատումներում են պահպանվել առասպելական տարրերը կամ դրանք փոխվել հեքիաթային միջադեպերի։ Ինչո՞ւ հատկապես այդ պատումներում է նկատվում դրանց առատությունը։


«Արդեն Խորենացու ժամանակ Սանասարի պարզ զրուցը մշակված և ընդարձակված է եղել։ Մեր պատմագիրը (Բ. է.) Արծրունի անունը «արծիվ ունի» ձևից բացատրելով՝ հիշում է Արծրունի անունը բացատրող մի առասպել, որ պատմում են Հաղամակերտում։ «Թողում զառասպելացն բազաղանս, որ ի Հաղամակերտին պատմին մանկան նիրհելոյ անձրեւ և արև հակառակիալ; և հովանի թոշնոյ պատանւոյն թալկացելոյ»։ Խորենացին, արհամարհելով առասպելը՝ դրանից շատ քիչ բան և շատ սեղմ ոճով է մեջ բերում, բայց երեվում է, որ Արծրունի անունը բացատրել են Արծրունյաց նախնուն, Սանասարին կամ իր եղբորը, հովանի անող արծից։ Կնշանակի՝ Սանասարի զրուցն արդեն նյութ է դարձած եղել ժողովրդական բանաստեղծության»¹։ Եթե Խորենացու

¹ Մ. Արեգյան, Երկեր, հատ. Ա, էջ 383.



LAWRENCE





ժամանակից սկսած, վանա լճի ավազանում պատմվել է այդ առասպելը և նմանները, և եթե դրանց տարրերը Աբեղյանը ցույց է տալիս մեր վեպի ու այլ հեքիաթների մեջ իրենց զուդահեռներով, ապա բնական է, որ այդ առասպելները կամ դրանց տարրերը պահպանված լինեն հենց նույն տեղում՝ վանա լճի շրջակայրում, այսինքն՝ Մոկաց թեկի պատումներում: Բնական է նաև, որ դրանք չհանդիպեն Մշո պատումներում, որովհետև, ըստ երեսուցին, այդ առասպելներն ի սկզբանե չեն միացել երկվորյակ եղբայրների զրուցին և չէին կարող պահպանվել: Ամպրոպային հերոսի կամ թոշունտոտեմի առասպելների միացումը եղբայրների զրուցին տեղական երեսուցի է՝ հատուկ միայն Մոկաց թեկին:

Ամուսնության թեմայի այս երկրորդ դրսեորումը առաջին ճյուղում բավարարում է վիպական ուրվագծի պարտադիր պահանջներից մեկը: Ամուսնությունը վեպում մշտական առկա թեմա է: Բայց այն կարեռ է վեպի համար ոչ հենց ամուսնանալու փաստով, այլ դա միշոց է երկրորդ սերնդի՝ Մեծ Մհերի ծննդի: Այս պատճառով էլ առաջին ճյուղում ամուսնությանը ուղեկցող միջադեպերը պատումների գերակըշող մասում բացակայում են, և միայն հիշատակություն կա երկվորյակ եղբայրների ամուսնանալու մասին: Պատահական չէ նաև, որ մեծ մասամբ ամուսնանում է եղբայրներից մեկը միայն, իսկ եթե մյուսն էլ է ամուսնանում, ապա մնում է անժառանգ: Առաջին ճյուղը բերդաշինությունից հետո նախապատրաստում է Մեծ Մհերի ծնունդը: Այդ նախապատրաստությունը որոշ պատումներում երկարում է, ձղձղվում, որոշ պատումներում էլ Մհերի ծնունդն անմիջապես հաջորդում է բերդաշինությանը, այսինքն՝ հիմնադրվեց Սասունը, Սասունին պետք է զորեղ ժառանգ: Որովհետև Մշո պատումներում հատկապես շեշտվում է զորեղ ժառանգի գաղափարը, դրա համար էլ եղբայրների ամուսնության մանրամասները վեպի նպատակներից դուրս են մնում: Ծընվում է Մհերը, և վեպը հոգ չի տանում այն մասին, որ եղբայրներից մեկը մնում է անժառանգ: Իսկ եթե որոշ պա-

տումներ կատարում են ժառանգների բաժանումներ՝ Մհերը Սանասարի որդին է, Զենով Հովանն ու Վերգոն՝ Բաղդասարի, կամ Հակառակը, սա արդեն մեկ միջադեպի երկատում է, միևնույն հիմնական գաղափարի մասնակի կողմեր, որոնք էական նշանակություն չունեն վեպի համար։ Պատումներն իրենք իրենց ներսում լուծում են նման մասնատումների հարցը, այսինքն՝ պատումների ճնշող մասը զերծ է մասնատում-երկատումներից, վերապահումներից։

ԵՐԿՐՈՐԴ Ճ Յ Ո Ւ Ղ

Մեծ Մհերի ճյուղը, ինչպես արդեն նշել ենք, մեզ հասած գրառումներում առանձին և անկախ չի հանդիպում, բայց մյուսների հետ միացության մեջ բավական լայն տարածում ունի։ Մեծ Մհերի մասին պատմվում է երեսունվեց պատումներում։

Այս ճյուղում նույնպես գործում է վիպական-ավանդական ուրվագիծն իր հիմնական թեմաներով։ Սա տարբերվում է մյուս ճյուղերից նրանով, որ այստեղ թեմաներն ունեն մեծ մասամբ ուրվագծային պատկեր, այսինքն՝ դրանց շուրջ ամբողջական միջադեպեր չեն կառուցվում, վիպական հայտնի մոտիվները մնում են սոսկ որպես մոտիվ, սյուժեի տարր, նրանցով առանձին, ընդարձակ սյուժե չի կազմվում։ Այս իսկ պատճառով Մեծ Մհերի վիպական ուրվագիծը վերականգնվում է ոչ թե մեկ միասնական ընդարձակ սյուժեի հիման վրա, այլ՝ տարբեր պատումներում պահպանված առանձին մոտիվների կամ դրանց թոռուցիկ հիշատակությունների և սակավաթիվ ամբողջական միջադեպերի վրա։

Երկրորդ ճյուղը (համեմատաբար ամբողջական տեսքով, կամ թերի պատմված) պարունակող պատումների համադրումն ու համեմատությունը ցույց է տալիս, որ որոշ կարգի պատումներ պահել են առաջին թեման, մի այլ կարգը՝ երկրորդ թեման, մի մասը՝ շորրորդը (տե՛ս միջադեպերի տախտակը, Տախտ. 7)։ Բայց անխափիր բոլոր պատումնե-

րում հիմնականը երրորդ թեման է: Տարբեր պատումներում ցրված բոլոր չորս թեմաների գոյության հանգամանքը թույլ է տալիս ենթադրել, որ երբեք Մեծ Մհերի ճյուղն ավելի լնդարձակ ու ամբողջական է եղել և հետագայում է մասնաւովել, տարրալուծվել: Այդ է ապացուցում ոչ միայն համեմատական ուսումնասիրության միջոցով բոլոք պատռմների հիման վրա վերականգնված վիպական-ավանդական ուրվագիծը, այլև Մեծ Մհերի ճյուղի ու կերպարի կարևոր դերն ու նշանակությունը վեպի ամբողջական կառուցվածքի մեջ:

Երկրորդ ճյուղի կառուցվածքային ուրվագծի քննությունը տալիս ենք առաջին ճյուղի համադրությամբ, որովհետև նախ. Մեծ Մհերի ճյուղը, որպես այդպիսին, վերակառուցում ենք տարբեր պատումներում ցրված առանձին թեմաների համախմբմամբ միայն: Ապա. առաջին և երկրորդ ճյուղերի համեմատական զուգադրությունը ցույց կտա, որ, իրոք՝

ա. վեպի տարբեր ճյուղերում հանդես է գալիս վիպական միևնույն ուրվագիծը.

բ. տարբեր ճյուղերում փոխվում է թեմաների ներքին հարաբերությունը:

Առաջին թեմա.—(Կոապաշտ և խաչապաշտ թագավորներ, երկու հակոտնյա երկրներ, մշտական հակամարտություն, կովի իրադրություն):

Առաջին ճյուղ

Երկրորդ ճյուղ

Կոապաշտ և խաչապաշտ թագավորներ¹. մեկը զորեղ մյուսից, թույլը (խաչապաշտ) ենթակա և հար-

Մորա թագավոր Մորա Մելիք (մեծ) և Սասնա թագավոր Մհեր (Մեծ). որոշ պատումներում² Սասունը

¹ Առաջին ճյուղում առկա կոապաշտի և խաչապաշտի ու նրանց տերությունների անունների պատմական ու ժամանակագրական անախոնիղմներն այստեղ զանց են առնվում:

² Պատումներ՝ № 14, 17, 18, 22, 28, 30, 36:

կատու զորեղին (կոա-
պաշտ):

Հարկատու է և ենթակա
Մսլրին, մյուսներում¹ Մը-
սլրը ենթակա է և հարկա-
տու Սասունին:

Երկրորդ ճյուղում կոապաշտ-խաչապաշտ հարաբերու-
թյունը պատմականորեն և աշխարհագրորեն ավելի որոշա-
կի է, քան առաջին ճյուղում: Եթե առաջին ճյուղում այդ եր-
կու թագավորությունների ժամանակաշրջանն ու աշխարհա-
գրական սահմաններն անորոշ են, ապա երկրորդ ճյուղում
դրանք երկու հարեւան տերություններն են՝ Սասունը և Մսլ-
րը, իսկ ժամանակաշրջանը՝ միջին դարեր:

Բոլոր պատումներում Սասունը Մեծ Մհերի թագավո-
րության շրջանում ներկայանում է որպես հզոր տերություն:
Սա պատումներում արտահայտվում է և՛ պատմական որո-
շակի հիշողությունների, և՛ վիպական ձեռվ: Շատախի Կա-
ճետ գյուղացի Հովան Զոհրաբյանի պատումում, որպես Մեծ
Մհերի կողմից նվաճված երկրներ, հիշատակվում են պատ-
մական որոշակի տեղավայրեր.

«Մհեր էլավ էտա երկրի թաքավոր.
Տիրեց շատ երկրներ, քավառներ:
Էնոր երկրի սահմաններ խասավ Ֆարկին.
Կնաց, խասավ շում Համիթի սահմաններ.
Տիրեց էտա տեղեր, նստավ...
Սասնա Մհեր կովու սկսեց.
Կնաց, խասավ մինչև Սեվարակ.
Սեվարակեն անցավ Բալաճուկ.
Կնաց, խասավ Մսրա երկիր,
Մսրա թաքավորին պոնեց...
Տարցավ, էկավ Համիթ նստավ.
Համիթ թաքավորութուն ընել սկսավ»:

(Հատ. Ա, էջ 1093, տող 60—70)

¹ Պատումներ՝ № № 15, 16, 17, 22, 23, 25, 26, 38:

Իսկ մոկացի Մանուկ Հարությունյանի մոտ Մհերի հզոր թագավորության պատմական հիշողություններն արտահայտվում են վիպական ձևով.

«Մհեր քառսուն տարի թաքավորութուն արավ.

Մհեր ըսկո՞ն կը շախեր Սասուն,

Որ մարթ կը վախեներ, Սասուն մոտիսասներ.

Չուրս պուլուր զաֆտեր էր, ուր ծեռաց տակ կը պախեր.

Հա՛վք շրր կանա էրթեր էնտեխ»:

(Հատ. Ա, էջ 614, տող 210—220)

Միայն Մհերի մահից հետո է, որ Մելիքը կարողանում է տիրել Սասունին, դարձնել իրեն հարկատու և գերեվարել նրա կնոջն ու Դավիթ որդուն (տե՛ս Տ7, միջադեպ 25): Կամ էլ ասվում է, որ Սասունը մինչև Մհերն է եղել Մսրից կախյալ վիճակում, նրան հարկատու, իսկ երբ մեծանում է Մհերը և դարձնում Սասունը հզոր, կտրում է Մսրա հարկը. ավելին, հարձակվում է Մսրա վրա, սպանում Մելիքին, գերեվարում նրա կնոջը (տե՛ս Տ7, միջադեպ 28): Երկու պատումում գործում է (№ 18՝ Սպարկերտ¹ և № 28՝ Դատկու Մոճկոնց գյուղ²) նաև խաբեությամբ սպանության վիպական մոտիվը, որը դարձյալ իր մեջ պահում է պատմական որոշակի հիշողություններ. Մելիքը խաբեությամբ որսի ժամանակ (կամ այլ պարագայում) սպանում է Մհերին: Ալաշկերտցի Մանուկ Թորոյանի պատումում (№ 33)³ Մհեր-Մսրա Մելիք (մեծ) հարաբերությունն ավելի խաղաղ ընթացքի մեջ է. նրանք եղբայրանում են՝ արյուն-արյան խառնելով: Իսկ Մշո թեհն պատկանող մի խումբ տալիս է Մհերի և Մելիքի միջև գոյություն ունեցող փոխադարձ պայմանի իրադրություն, որի համաձայն մեկն ու մեկի մահից հետո մեռնողի որդիներին մինչև շափահաս դառնալը պետք է պահի մյուսը (տե՛ս Տ7, միջադեպ 34, 35):

¹ «Սասնա ծոեր», Հատ. Ա:

² Նույն տեղում, Հատ. Բ, մաս Ա:

³ Նույն տեղում, Հատ. Բ, մաս Ա:

Միևնույն՝ Մհեր-Մսրա Մելիք, հարաբերության տարրեր մեկնությունները, վեպում երկու տերությունների պատմական դարավոր իրավիճակի գեղարվեստական ընդհանրացված անդրապատկերումները լինելով հանդերձ, հուշում են երկրորդ ճյուղում առաջին թեմայի երբեմնի ավելի ծավալուն և միջադեպերով հարուստ վիճակ։

Երկրորդ թեմա.—(ամուսնություն):

Հիմքում լինելով նույնը՝ այս թեման առաջին և երկրորդ ճյուղերում ունի վիպական տարրեր դրսեորում և արտաքին ձևավորում։

Առաջին ճյուղում դործում են հետևյալ մոտիվները և դրանցով կազմված միջադեպերը։

1. Կուապաշտ թագավորի հարկահանները տեսնում են խաչապաշտի գեղեցիկ աղջկան, պատմում իրենց թագավորին աղջկա գեղեցկության մասին։
Կուապաշտը խաչապաշտին պարտադրում է աղջկան կնության առնելու իր կամքը։

2. Բոլոր պատումներում կուապաշտի այդ ցանկությունն ընդունվում է դժկամությամբ։ Նրանց մեջ խոսում է կրոնական ինքնասիրությունը՝ իրենք խաչապաշտ, նա կուապաշտ։

Երկրորդ ճյուղում մտիվները մի փոքր այլ են. այլ են նաև միջադեպերը։

1. Մսրա թագավորն անժառանգ է։ Նրա կինը հրավերք է ուղարկում (աշուղ, նամակ, իր գըլխաշորը, գոտին) հարեվան Սասուն երկրի թագավոր Մհերին, առաջարկելով կենակցել իր հետ։

2. Բոլոր պատումներում Մսրա թագուհու հրավերքըն ընդունվում է դժկամությամբ։ Դժգոհ են հատկապես Մհերի կինը, Զենով Հովանը (Քեռի Թորոսը), որոնք հրավերքի ետևում տեսնում

են պետական նպատակ-ներ: Շեշտվում է նաև կրոնական տարբերությունը:

3. Խաչապաշտ հայրը խորհուրդ է անում իր մեծամեծների, ազգականների (Քեռի Թորոս) և աղջկա հետ՝ տալ, թե շտալ: Հանում են մարդասիրական ու դիվանագիտական խոհեմ վճիռ՝ մի աղջկա համար մի ազգ շկոտորել: Այստեղ մեծ դեր է խաղում աղջկա անձնագոհության մոտիվը:

Առաջին ճյուղում գործում է բռնությունը և ուժը, կոպապաշտի հզորության գերակշռությամբ, երկրորդում՝ խարդավանքը և տղամարդկային թուլությունը, խաչապաշտի հզորության գերակշռությամբ:

Հիշյալ երկու թեմաները Մեծ Մհերի ճյուղում կարևոր են, բայց ոչ կենտրոնական, հանգուցային: Դրանք նախապատրաստում են հանգույցը, որը կառուցվում է երրորդ թեմայի վրա՝ հզոր ժառանգ: Այս մասին մի փոքր հետո:

Չորրորդ թեմա.—(Չինարարություն):

Այստեղ արդեն թեմայի և՝ դրսնորման ձևն է տարրեր, և՝ արտահայտած գաղափարը:

Առաջին ճյուղ
Երկվորյակ եղբայրները՝
փախչելով կոպապաշտ հոր

Երկրորդ ճյուղ
Մհերը արդեն հաստատ-
ված Սասունում և նրա

¹ ռԱսաց (Մհերը).—Խող տամ էնուր կուտիկ,

Որ կը տա կուտիկ, շառնը կուտիկ»:

(Հատ. Ա, էջ 332, տող 10):

Երկրից, տարբեր այլազգի թագավորների մոտ ապաստան խնդրելուց և երկար թափառումներից հետո մի ամայի, անառիկ վայրում հիմնում են իրենց բերդը՝ Սասունը, շինում են գյուղ իրենց համերկրացիների համար։ Հիմք է դրվում Սասնա մեծ տան։

Չրակացին ճյուղում բերդաշինությունը կենտրոնական, հանգուցային թեմա է և անխտիր բոլոր պատումներում արտահայտվում է եղբայրների կողմից Սասնա բերդի հիմնադրման միջադեպերով։ Երկրորդ ճյուղում այն հանգուցային չէ, առանձին միջադեպեր չունի, բայց երկրորդ ճյուղի և Մեծ Մհերի կերպարի համար ունի մեծ կարևորություն։ Մհերի անվան հետ է կապվում բերդերի, Մարութա Բարձր Աստվածածնա և Ծովասարի շինությունը։ Մհերի բերդաշինությունը առաջին ճյուղում եղբայրների կողմից Սասնա բերդի, Սասնա տան հիմնադրումից տարբերվում է նրանով, որ եթե այնտեղ բերդը խորհրդանիշ էր հայրենիքի որոնման, հիմնադրման ու բնօրրանի, իսկ իր արտաքին նկարագրությամբ համապատասխանում էր կիկլոպյան ամրոցների շինության ձևին ու ժամանակին (երկու գետերի խառնուրդի ակունքում շինվելու հանգամանքը նույնպես լոկ խորհրդանշային պատկերավորում չէ, այլ, իրոք, այն ժամանակների բնակության համար հարմար դիրք), ապա այստեղ այն իր մեջ պահում է միջնադարյան բերդաշինության պատմական արձագանքները, երբ Հայաստանն ստիպված էր դիմելու բերդերի ու ամրոցների պաշտպանական համակարգին¹։ Սա խորհրդա-

¹Տե՛ս Ս. Վ. Հարույրյունյան, Անրերդը 10—11-րդ դդ., «Լրաբեր», 1966, № 10 և Անրերդի պաշտպանական սիստեմը, «Պատմա-բանասիրական հանդես», 1967, № 1։

Նիշ է նաև խաղաղ ժամանակներում նյութական ու հոգեսոր մշակույթի վերելքի: Եթե առաջին ճյուղում շորրորդ թեման հանդես է գալիս իր ա մասով (երկրի հաստատում), ապա երկրորդ ճյուղում՝ բ և գ մասերով (պաշտպանություն և խաղաղ պայմաններում նյութական ու հոգեսոր մշակույթի վերելք): Մհերի դերը վեպում, եթե վերացարկված մոտենանք հարցին, արդեն հիմնադրված տան հաստատումն ու պաշտպանությունն է: Սասնա մի անտիպ պատումում այդ դերն այնքան է շեշտված ու որոշարկված, որ թվում է պատմական իրողությունների ու պատմական անձնավորության կատարած գործերի փաստագրում:

Սասնա այդ անտիպ պատումը, որը շունի առաջին ճյուղը, սկսվում է հենց Մհերի բերդաշինության ու եկեղեցաշինության նկարագրությամբ. իսկ նրա տիրապետության ժամանակները պատմականորեն առավել ճշգրտված են՝ արարական արշավանքների ժամանակաշրջան։ Պատումն սկսվում է այսպես.

«Եապար արապնին տեր եղան Հայաստանին,

Մեջ Սասունին կ'ապրեր Առյուծ Մհեր,

Ըր աղբեր Զենով Օհան։

Մհեր գտրին ու խելացի մարդ էր։

Մեջ Սասունին շատ բերդիր դնեց.

Շինեց, ուար արապնու հճումի շաղ ասե (՝)

Էղնի մեջ իր շինած բերդերուն։

Շինեց աղկեցիք։

Մեկ հադդա միկա լի կը մնա

Սասունի ամենաբարձր սարի գլուխ։

Էն ժամանակ, օր արապնին էկան հաղա Հայաստան

Ու զամեն տեղ քարուքանդ էնձին,

Սասուն ազատ մնաց»։

Պատումը ոչ մի հասցե շունի, հայտնի չէ ո՞չ ասացողի, ո՞չ բանահավաքի անունը։ Զեռագիր տետրի կազմի վրա գրված է միայն. «Սասուն Հազզո գյուղաքաղաքի բարբառով»։ Պատումը վերնագրված է՝ «Առյուծ Մհեր»։

Ահա մի այլ անտիպ պատում՝ գրառված Բաղեշի նահանգի Դատիկ գավառի Պաս գյուղացի ուս Մարգար Մանուկի Ստեփանյանից (գրության տեղ, թիվ և բանահավաքի անուն նշված չէ): Ծովասարն այս պատումում Մհերի որսասարը չէ միայն, այլ՝ Մսրա Մելիքի դեմ պաշտպանական մի կառույց:

«Ճռ Մհեր ախալերտեքանց խոսավ, թե՝
— Խերիք չէ՞», օր Մսրա Մելիք գա,
Մեր մընեն տուրք ու խարաճ առնի:
Ախալերտիք ցավցին էնոր ասածից, թե՝
— Ախալեր, մենք ի՞նչ կարող ենք Մսրա Մելիքին էնել:
Մհեր ասաց.—Էրթանք, Ծովասարին պարիսալ շինինք
Ու շորս տուռ թողնինք.
Մսրա Մելիք երբ գա միր մընե տուրք-խարաճ առնի,
էն տոներուց մեկուց ներս մտնի,
Մենք էն ժամանակ իր առաջ կրոնենք,
Ուր կխոսինք, թե՝ խերիք է:

Շինեցին զպարիսալ Ծովասարի բոլորը:
Մսրա Մելիք արևմտյան տոնեն ներս մտաւի,
Առաջը բռնեցին: Ճռ Մհեր ասելով.—Խերիք է,
Թե քաղցած իս՝ կեր կերակուր,
Թե ծարավ իս՝ խմա ջուր:
Մսրա Մելիք տարցավ, գնաց:
Ասաց.—Էլ ձեր երկիր շեմ իգա»:

Տպագիր պատումներում Մհերի կողմից վանքերի, բերդերի շինության նման ընդարձակ միջադեպեր շկան: Միայն երկու պատումում պահպանվել են այսպիսի դրվագներ:
Գավաշցի Գրիգոր Փոխան Եղիազարյան.

«Մհերին կը եր Գանձասար, ամեն ըդտեղ էր.
Մեղն շինել էր Խաչ Մարութա Բանձր Ասվարածին.
Էնոր սարն էր, էնոր ուխտատեղն էր»:

(Հատ. Ա, էջ 947, տող 250—260)

Կաճետցի (Շատախ) Հովան Զոհրաբյան.

«Մհեր պերեց, Արդնու վանք շինեց.
Ելավ էտա տեղ անգալներ տրավ.
Ելավ պերեց կուրեր, կաղեր,
Պերեց պակաս մարմին ունեցողներ.
Կանչեց, պերեց տերտերներ, վարտապետներ,
Մե խորոտ ճոշ վանք շինեց,
Իթող էլ մ' էլ էկավ Սասուն»:

(Հատ. Ա, էջ 1094, տող 80)

Այսպիսի բեկորները ենթադրել են տալիս Մհերի շինարարությունը արտացոլող ավելի ընդարձակ միջադեպեր։ Սրանք են նաև այն բանի բանալին, որ Մհերը, որպես Սասունա տերության սահմանները հաստատող, հզորացնող ու շինարար, ուղղակիորեն հանդես չի գալիս, այլ դա բացահայտվում է հաջորդ ճյուղի մեջ։ Դավիթն ամրացնում է իր հոր քերդերն ու վանքերը, որոնք քանդել էր Մսրա Մելիքը (մեծ), որս անում իր հոր պարսպապատած Ծովասարում, որը նույնպես զավթել էր Մելիքը Մհերի մահից հետո։ Ամեն տեղ, հատկապես արտատեր Պառավի խրատական ու նախատական խոսքերում, վերակենդանանում է Մեծ Մհերի ժամանակների ու կերպարի հիշողությունը, այն, որ Մհերի թագավորության ժամանակ Սասունը հզոր տերություն էր։ Այս հիշողությունը նույնպես պատմական ու գեղարվեստական ընդհանրացնող ուժ ունի։ Կերպարի այս անուղղակի ամրողացումը տիպականացման միջոց լինելուց բացի, իր մեջ պահում է պատմական որոշակի իրողությունների ու իրադարձությունների, ինչպես նաև Մհերի շուրջը հյուափած ծավալուն զրույցների արձագանքներ։ Պատմական այս հիշողություններով Մեծ Մհերի դերն ու կերպարը դառնում է որոշակի պատմական իր վաղնջական առասպելական շերտերով հանդերձ։ Մհերի նախնական կերպարից շատ քիչ բան է պահպանել վեպը, գրեթե աննշան տարրեր։ Վեպն օգտըվել է այդ առասպելական կերպարից պատմական անց-

քերի ու անձանց դյուցազնական կերպավորման համար։ Միջնադարյան պատմական կյանքը հարթել է հին հիշողությունները, իր զորեղ կնիքը դրել հնի վրա, օգտվել բանահյուսական վիպական նյութից, ծառայեցրել եղածն իր նոր ապրածը, խոհն ու խոյանքը արտահայտելու համար։ Ահա թե ինչու, վեպն իր ամենահին տարրերով, իր ավանդական ուրվագծով հանդերձ, նորովի ձևավորվել է միջնադարում, միջնադարյան դեպքերի աղղեցության տակ։

Ե Ր Բ Ո Ր Դ թ ե մ ա . — (Հզոր ժառանդ)։

Զորս ճյուղերից և ոչ մեկում հզոր ժառանդի հարցն այնպիսի սրությամբ չի դրված, ինչպես երկրորդ ճյուղում։

Կա երկու տերություն՝ Սասուն և Մոլու. չկան դեռևս դահածառանդներ։ Եվ ժառանդի հարցը մշտապես ուղեկցում է առաջին (Մհեր—Մորա Մելիք) և երկրորդ (Մհեր—Մորա խանում) թեմաներին։ Այսինքն՝ 1. երբ Մհերը զավթում է Մոլու, դարձնում իրեն հարկատու, կենակցում է Մորա խանումի հետ—ծնվում է Մորա Մելիքը (փոքր), 2. երբ Մորա խանումի հրավերով Մհերը կենակցում է նրա հետ—ծնվում է Մելիքը։ Մելիքը զորեղ ժառանդ է, նրա ծնունդը խորհրդանշում է Մորա հզորացում, այն, ինչ ակընկալում էր Մորա խանումը։ Մհերը տեսնում է դա. Մորա խանումն էլ այլևս չի թաքցնում իր դիտավորությունը։

«Մհեր մեռնի քի, Մորա Մելիք,

Մորա օջախ կայնացըցիր,

Սասնա օջախ փրնացըցիր»։

(Հատ. Ա, էջ 492—493, տող 570)

Մհերն զգում է իր սխալի վտանգավորությունը, և նրա համար նոր միայն իմաստավորվում են իր կնոջ խոսքերը.

«Էնիկ (Մորա խանումը) շորդքա քու խորոտկութեն,

Կը որդքա քու հեղիթութեն, քու կտըրճութեն.

Քու կտըրճութեն լսիր ը, խասկըցիր ը։

Քի կը տանը՝ մեկ տղի մ՝ իլնը ուր խամար։

Իլնը, Մսրա օնախ կայնացրցը,
Սասնա օջախ փրնացրցը:
Քի տղա շկա, մ'էրթա, կաց էստեղ,
Աստված բալքի տղե մ' տա քի,
Իլնը Սասնա օջխը վերա:
Սասնա օջախ մը փրնացրցը, Մսրա՝ կայնեցրցը»:

(Հատ. Ա, էջ 492, տող 540—550)

Անընդհատ կրկնվող օջախ-Հայրենիք գաղափարը միանում է ժառանգ գաղափարին և դառնում երկրորդ ճյուղի հանգույցը: Այսպիսով, Մեծ Մհերի ճյուղը ունի վիպական կառուցվածքային մեկ հիմնական թեմա՝ ժառանգ-օջախ: Առաջին երկու թեմաները պատվում են սրա շուրջը, նախապատրաստում գաղափարական այս հանգույցը:

Նախքան Սասնա ժառանգի՝ Դավթի ծնունդը, այդ ծնունդը դառնում է անհրաժեշտություն: Միջանկյալ միջադեպերը՝ Մհերի խորհրդածությունները և վերադարձը, կնոջ երդումն ու Երդմնազանցությունը, նրանց հաշտությունը, նախապատրաստում են Դավթի ծնունդը: Ծնվում է Դավիթը. Հայի ճրադրն ու օջախը վառ է մնում:

Ժառանգ-ճրադ-օջախ-Հայրենիք գաղափարը որոշ պատումներում ուղեկցվում է իր սերնդի մեջ իրեն տեսնելու ծնողի ու կյանքի հարատեսության կենսափիլիսոփայությամբ: Հանուն ժառանգի ու Սասնա տան, Մհերի ու նրա կնոջ անձնագոհությամբ ու կյանքի հարատեսության գաղափարով կնքված Դավթի ծնունդն ստանում է վիպական վեհ կերպարանք:

Վեպի երեք ճյուղերն ավարտվում են հզոր ժառանգի ծնունդով: Ծնվում է Մեծ Մհերը, ավարտվում է առաջին ճյուղը. ծնվում է Դավիթը, ավարտվում է երկրորդ ճյուղը. ծնվում է Փոքր Մհերը, ավարտվում է երրորդ ճյուղը: Զորորորդ ճյուղն այսպիսի ավարտ չունի: Սակայն չորրորդի համար նույնպես ժառանգը մնում է առաջնակարգ հարց՝ Փոքր Մհերին ժառանգ կլինի^o, կշարունակվի^o Սասնա տան դյուցազունների սերունդը—հոր անհծրով Փոքր Մհերը մնում է

անժառանգ, և փակվում է Սասնա հզոր տան դյուցազնական պատմության վերջին էջը:

Մեծ Մհերի ծնունդը, ուրեմն, ո՞չ թե երկրորդ ճյուղի սկիզբն է, այլ՝ առաջին ճյուղի վերջը: Դա բխում է վիպական կառուցվածքային ուրվագծի ավարտից: Վեպը հերոսի երջանիկ ամուսնությամբ շի սահմանափակվում: Նրա պահանջը ժառանգն է, ժառանգ, որ վիպական տրամաբանության համաձայն ամեն ինչով պիտի դերազանցի իր հորը՝ հետնորդ սերունդն ավելի ուժեղ պիտի լինի, քան նախորդը: Վեպի կառուցվածքային ուրվագծի ժառանգ պահանջի համաձայն է, որ առանձին գոյություն ունեցող տարբեր սյուժեները միանում են, դառնում ճյուղ. ճյուղերն էլ միանում, կազմում են մի ամբողջություն: «Սասնա ծոեր» վեպի շորս ճյուղերն իրար հետ կապվում են շորս սերունդների հաջորդականությամբ, սերնդակցությամբ¹:

Վիպական-ավանդական ուրվագծի համաձայն հերոսը պետք է ունենա վիպական ծննդի, մանկության, պատանեկության ու ամուսնության նկարագրություններ, իր ծնունդով պետք է կապվի աստվածների, բնության տարերքի, կամ մեծանուն, աղնվազարմ տոհմի հետ: Մհերն իր ծնունդով կապվում է առասպելական ծագումով Սանասարի հետ, որը միաժամանակ Սասնա տան հիմնադիրն է: Մոկաց պատումները (Մոկս, Շատախ, Գավաշ, Սպարկերա, Հայոց ձոր, Վան)² Մեծ Մհերի մանկություն և պատանեկության, տմունության մասին միջադեպեր շունեն: Սրանք տալիս են միայն Մհեր-Մսրա խանում և ժառանգ-օջախ թեմաների հետ կապված միջադեպեր, այն էլ՝ խիստ սահմանափակ թվով: Այս պատումներում է, որ Մեծ Մհերի ճյուղն ունի ուրվագծային պատկեր: Եվ այս ընդդրկմամբ Մեծ Մհերը Մոկաց թեում ամբողջական ու ինքնուրույն ճյուղի տեսք ու ծավալ շունի:

¹ Հերոսների սերնդակցության մասին տե՛ս Մ. Աբեղյան, Երկեր, չ. Ա, էջ 117, Հ. Օրբելի, Հայկ. հերոսական էպոսը, էջ 77—80:

² Մոկաց պատումներ՝ № 2, 5, 6, 8, 9, 10, 11, 12, 13, 14, 15, 16, 17, 18, 19, 21, 22, 23, 24, 25, 38, 41, 44:

Այն կազմում է Դավթի ճյուղի սկիզբը՝ նախապատրաստելով նրա և Մսրա Մելիքի ծնունդը: Պարզ է, որ այս տեսքով ու ծավալով Մհծ Մհերի ճյուղը Մոկաց պատումներում առանձին ու անկախ հանդես գալ չէր կարող: Իսկ Մշո պատումներն¹ ավելի ամբողջական են: Մրանք Մհեր-Մսրա խանում, Մհեր-Մսրա Մելիք և ժառանգ դժի հետ միասին լրացնում են նաև վիպական ուրվագծի մանկության ու պատանեկության պահանջը: Հատկապիս Ալաշկերտի № 33 և 34 պատումները (ասացողներ՝ Մանուկ Թորոյան և Կարապետ Թամոյան) կերտում են կերպարին խիստ բնորոշ վիպական միջադեպեր: Մշո պատումներն են պարունակում նաև այն միակ միջադեպը, որ վեպում կապվում է միայն Մհծ Մհերի կերպարի հետ. նրա մենամարտը առյուծի հետ և առյուծին հաղթելը: Այստեղից էլ, ըստ պատումների մեկնաբանության, նրա Առյուծ Մհեր կամ Առյուծածկ Մհեր անունը: Սա հանդիպում է միայն երեք պատումում (№ 27, 29, 45՝ Մուշ): Երկու պատումում պահպանված է Մհերի միայն Առյուծ անունը, առանց միջադեպի՝ № 12 (Մոկս, «Առյուծ Մհեր», էջ 614, տող 210) և № 34 (Ալաշկերտ, «Առյուծ Մհեր», էջ 375, տող 520): Սա նշանակում է. կամ՝ ա) առյուծ սպանելու միջադեպն այդ պատումներում ընկել է, մնացել է միայն անվան հիշողությունը, կամ՝ բ) անհայտ ժամանակներից եկող Առյուծ Մհեր անունը ենթարկվել է հետագա մեկնաբանության, և առաջացել է առյուծ սպանելու միջադեպը: Ամեն պարագայում, ուշադրության արժանի է, որ այդ անունը և միջադեպը կապվել է հենց Մհերի անվան հետ և ոչ ուրիշ կերպարի:

Բոլոր ճյուղերում գործող միևնույն վիպական ուրվագիծը երբեմն պատճառ է դառնում որոշ պատումներում առկա ներքին անաքրոնիզմների, հակասությունների:

Օրինակ. Սասնա № 30 սղատումը²: Սասնա տպագիր

¹ Մշո պատումներ՝ № № 27, 29, 33, 34, 36, 42, 45:

² «Սասնա ծռեր», հատ. Բ, մաս Ա:

պատումներից միայն սա ունի «Սանասար և Բաղդասար» ճյուղը, այն ևս խիստ համառոտ և մյուսներից բավական տարրեր։ Այստեղ եղբայրների հետ կապվող Սասնա քերդաշինության միջադեպը չկա, այսինքն՝ այդ ճյուղի հիմնական և կենտրոնական թիման։ Չկա նաև Սասուն տեղանվան հետ կապված վիպական ստուգաբանական ավանդությունը, որն առկա է անխտիր բոլոր պատումներում։ Այս պատումում Սասուն տեղանունն առաջին անգամ հանդիս է գալիս որպես արդեն գոյություն ունեցող երկիր։ Պատմվում է այսպես, երբ։

«Մելիք զարդից, սպանից զՍանասար,
Մսըր զավթից, էղավ Մսրա թակավուր։
Մհեր քողից, էգավ Սասուն։
Մելքոն թակավուր գ'աբրեր Ախլաթ.
Քեռի թորոս գ'աբրեր Մանզգիրդ.
Մհեր էգավ, նսդավ Սասուն։
Քառսուն դարի Սասուն էրից իշխանութին»։

(էջ 160—161, տող 50—60)

Եվ երբ Մհերն ամուսնանում է Քեռի թորոսի աղջկա հետ։

«Առան զախճիկ, թորոս լը ուրանց հիդ,
Կացին, հասան Մսրա ժաղաք։
Ժամանագ ըմ մանցին անդիխ, էղավ խլայի։
Թորոս ասից.—Մհեր, էղպես չէղնի,
Ելի էրքանի, մըզի երգիր ըմ կաշին։
Ելան էգան, հասան Սասուն։
Բըղըդեցին, ճրիր կիշըռեցին,
Ծովասըրու ճըրին հավնան։
Զարգեցին, շինեցին ատ ճրի գոխկին զուրանց պիրթ։
Աղդիխ Տավիթ էղավ»։

(էջ 161, տող 70—80)

Այստեղ բացահայտ վիպական անաքրոնիզմներ կան, եթե Մհերը Մսրից թողել եկել էր Սասուն, քառասուն տարի

Սասունում իշխանություն արել, ամուսնացել Քեռի Թորոսի աղջկա հետ, որը նաև Մանազկերտի տերն էր, ինչո՞ւ Թորոսի հետ միասին գնում են նորից Մսըր, մնում այնտեղ մի ժամանակ, հետո նոր փնտրում իրենց մի հարմար բնակավայր, որը դուրս է գալիս դարձյալ Սասունը, ուր և հիմնում են իրենց բերդը։ Վեպն ընդհանրապես պատասխանատու չէ նման անաքրոնիզմների համար։ Բայց այստեղ, մի քանի տողում դրանք ակնառու հակասական են, և ասացողը պարտավոր էր պահպանել իր պատմածի տրամաբանական ընթացքը։ Հակասությունների պատճառը նույն շինարարության թեմայի երկու՝ ա և բ մասերի խառնվելն է, այսինքն՝ երկվորյակ եղբայրների կիկլոպյան բերդաշինության և Մհերի միջնադարյան ամրոցաշինության, եկեղեցաշինության։ Նըշված պատումում գերակշռում է բ մասը՝ Մհերին վերաբերող, միայն թե այն պահել է հիշողություն նաև եղբայրների բերդաշինությունից։

Բայազետի № 36 պատումը¹ ակնհայտորեն շեղվում է երկրորդ ճյուղի հիմնական սյուժետային գծից։ Այստեղ, մյուս պատումների համեմատությամբ, խախտված է առաջին և երկրորդ ճյուղերի տեղն ու դերը—խաչապաշտ աղջկա ջրային հղիությունից ծնվում է Մհերը, իսկ երկվորյակ եղբայրները Մհերի որդիներն են, այսինքն՝ փոխվել է հայրերի և որդիների տեղերը։ Այս խախտման պատճառը նույնպես վիպական ուրվագիծն է։

Այլ պատումներ

Առաջին ճյուղ

- Կռապաշտը բռնի խաչապաշտի աղջկան առնում է կնության. տանում է իր երկիրը. աղջիկը շիկենակցում նրա հետ. (տարբեր) տարի ժամա-

№ 36 պատում

Առաջին ճյուղ

- Կռապաշտը բռնի խաչապաշտի աղջկան առնում է կնության. շիտանում իր երկիրը, ոսովհետև աղջիկն անշափահաս է. ծնողները 12 տա-

¹ «Սասնա ծոեր», հատ. Բ, մաս Բ:

նակ է խնդրում կռապաշտից, վերջինս թույլ է տալիս. աղջիկը հղիանում է զրից, ծնվում են երկվորյակ եղբայրները:

2. Եղբայրները՝ խմելով նույն ջուրը, ինչից հղիացել էր իրենց մայրը, հզորանում են:

3. Եղբայրները սպանում են իրենց կռապաշտ հորը, փշրում կռւոքերը և փախչում նրա երկրից:

4. Եղբայրներն իմանում են իրենց մոր վրա գործադրած բռնության մասին, սպանում են կռապաշտին, փախչում մոր հայրական երկրից:

5.

Հիք

6. Եղբայրները ծառայության են մտնում տարբեր թագավորների մոտ:

7. (Որոշ պատումներում թագավորներից մեկն իր աղջկան տալիս է Աբամելիքին կնության):

8. Եղբայրները հիմնում են Սասնա բերդը:

որի ժամանակ են խնդրում կռապաշտից, վերջինս թույլ է տալիս. աղջիկը հղիանում է զրից, ծնվում է Մհերը:

2. Մհերը՝ քնելով նույն մատուռում, ուր ջուր էր խմել և հղիացել իր մայրը, հզորանում է:

3.

Հիք

4. Մհերը Պառավից իմանում է, որ իր մայրը կռապաշտի նշանածն է, գնում, սպանում է կռապաշտին ու նրա որդուն:

5. Մհերի և Վանա աղջկա ամուսնությունից ծնվում են զույգ եղբայրները՝ Աբամելիք և Սանասար:

6. Եղբայրները ծառայության են մտնում Բաղդադի խալիֆի մոտ:

7. Բաղդադի խալիֆը իր աղջկան տալիս է Աբամելիքին կնության:

8. Եղբայրները հիմնում են Սասնա բերդը:

9. Սանասարից ծնվում է
Մհերը:

9. Աբամելիքից ծնվում է
Դավիթը:

Պատումների այժմյան վիճակով և դրանց ընդհանուր համեմատության մեջ հեշտ է տեսնել, որ այս միակ պատումում խառնվել են երկու ճյուղերը և կերտվել նորովի: Միայն փոխվել են կերպարների և միջադեպերի տեղերը, իսկ վիպական ուրվագծի մեջ փոփոխություն չի մտել:

Այն, ինչ մյուս պատումներում միայն Մեծ Մհերի ճյուղինն է, առկա է նաև այս պատումում՝ Մհերի ապօրինի կապը Մսրա թագավորի կնոջ հետ, Մսրա Մելիքի ծնունդը, Մելիքը Մհերի մահից հետո գերեվարում է սասունցիներին, Մհերի կնոջն ու որդիներին: Ուրեմն, պահպանվել են Մհերի ճյուղի հիմնական միջադեպերը, եղբայրների ճյուղից ավելացել են նորերը: Այս ընթացքի մեջ Մհերը շահել է, եղբայրները՝ կորցրել: Եղբայրների դերը խիստ նսեմացել է և փոքրացել:

Այս պատումում առավել ես շեշտված է զորեղ ժառանգի գաղափարը. այդ մասին բարձրածայն խորհրդածում է Քեռի թորոսը: Նա խստագույնս ընտրություն է կատարում Աբամելիքի որդիների միջև. նրանց ծնունդը շի ուրախացնում Քեռի թորոսին: Միայն Դավիթի ծննդյան լուրն առնելիս.

«Թևերը վեկալեց խաղցավ:
Ասին.—Հընչ ես խաղում:
Ասավ.—Սասունա ճրագ կպավ.
Ասուն փառք յըլնի»:

(էջ 117, տող 790)

Շեշտված է Մհերի ու Դավիթի ծնունդը, Աբամելիքինը և Սանասարինը՝ շեշտադրկված: Նրանք ոշնչով շեն ապացուցում իրենց հորն արժանի կամ նրան գերազանցող (ինչպես հատուկ է վիպական տրամաբանությանը) հետնորդ լինելու հանգամանքը:

Այս պատումի քննությունը պարզում է, որ վիպական ուրվագիծը ո՞չ միայն պարտադրում է սերունդների հաջորդ-

դափոխություն, այլև՝ հաջորդականություն, այսինքն՝ տվյալ դեպքում, «Սասնա ծռերում» գոյություն ունի սերունդների ավանդական հաջորդականություն՝ Սանասար—Մեծ Մհեր—Դավիթ—Փոքր Մհեր: Երբ խախտվում է այս ավանդական կարգը, խախտվում է նաև սերունդների տեղն ու դերը վեպի ընդհանուր կառուցվածքի մեջ:

Սասնատման պատճառով թափից ընկել է նաև նրանց միակ միջադեպը՝ Սասնա բերդաշինությունը: Սկզբում եղբայրները հիմք են դնում իրենց գյուղին, հետո թողնում գնում են, մտնում ծառայության Բաղդադի խալիֆի մոտ, Քեռի Թորոսին նույնպես տանում իրենց մոտ, ամուսնանում, Քեռի Թորոսի այն դառը մտքերից հետո, թե.

«Մենք հելեր ենք կնկա կնիկ...

Որ մեր դուշման թողեր ենք Կապուտկող,

Մենք էկե, խալիֆին ղուլուղ ենք անում.

Էս ջուրը գորեղ չի,

Չեր էրեխեն ղոշաղ չյըլնի դուս».

(էջ 114, տող 710—720)

Թողնում գալիս են իրենց ընտրած վայրը, հիմնում իրենց գյուղը, շինում ժամ ու բերդ: Այստեղ բերդաշինության միջադեպն արժեքազրկվել է և մնացել առկախ: Նման պարագայում եղբայրների դերը հանգել է այն բանին, որ նրանք միջանկյալ և կապող օղակ են Մհերի և Դավիթի միջև, օղակ, որը կարող էր լինել, կարող էր և լինել:

Ինչո՞վ կարելի է բացատրել № 36 պատումում կատարված ճյուղերի տեղափոխությունը:

Պատումիս ասացող Առաքել Շակոյանն այս վեպը սովորել է իր հորից և ավագ եղբորից, որոնք գաղթել են Ղըշլաղ (Նոր Բայազետ) 1828 թվին Բայազետի Բարաքյաթ գյուղից, ուր վերաբնակվել էր նրանց պապը Դիղամից: Առաքելը, իր ասելով, վեպը մի քանի անգամ լսել է նաև Նոր Բայազետի գավառի Բաշքենդ գյուղի մշեցի Ավդալից, որ հըշակված է եղել նրանց կողմերում որպես լավ հերիաթասաց¹:

¹ «Սասնա ծռեր», Հատ. Բ, մաս Բ, էջ 91:

№ 35 պատումի ասացող Հակոբ Նրգեյանի մասին նույնական հիշատակվում է, որ վեպը լսել է Բաշքենդ գյուղում Մուխսի Ավդալ Հզրոյանից՝ բնիկ Սասուն գավառի Իշխանաձոր գյուղից¹, որը եղել է 115 տարեկան։ Ավդալ Հզրոյանը լսել է այս պատմությունը իր հորից կամ պապից և իր աշքերով տեսել պատմության մեջ հիշվող բոլոր նշանները, տեղանունները։ Բանահավաք Երվանդ Լալայանը նույնպես հաստատում է, որ Հակոբ Նրգեյանը սովորել է Բաշքենդցի նույն Ավդալից, ինչ որ Առաքել Շակոյանը։ Այս Ավդալը մի բանահավաքի մոտ հիշվում է մշեցի, մյուսի մոտ՝ Սասունի Իշխանաձոր գյուղից։ Ավելի հավանական է, որ սասունցի է։ Մեծ Մհերի կերպարը թե՛ Սասնո, թե՛ Մշո պատումներում խիստ գործուն է և ամբողջական։ Թերևս, այդպես է եղել նաև սասունցի Ավդալի մոտ։ Հնարավոր է, որ Մհերի մեծ դերը վեպում խառնել է ասացող Առաքել Շակոյանի մտքի ընթացքը, մանավանդ՝ Սասնո պատումներն ապացուցում են, որ «Սանասար և Բաղդասար» ճյուղը մեծ տարածում չի ունեցել Սասունում։ Բավական հարուստ է նաև այս պատումի աշխարհագրական կենսագրությունը—Առաքելի ապուպապը՝ Դիդամից, հայրը՝ Բայազետից, ինքը՝ Նոր Բայազետից, Ավդալը՝ Սասունից։ Ըստ այսմ էլ կարող էին տարբեր լինել վեպի վրա ներգործող և իրենց հետքը թողնող ազդակները։

Այս բոլորով հանդերձ, Բայազետի № 36 պատումը մյուսներից առանձնանում է երկրորդ ճյուղի իր միջադիպերի տեղով ու դրությամբ, իսկ ներքին էռությամբ ու կառուցվածքով՝ նույնանում։ Սա այն պատումն է, ուր Մեծ Մհերի ճյուղն ամենաընդարձակն է։ Սակայն, այդ ընդարձակությունը, միջադիպերի հարստությունը սոսկ երևութական է, արտաքին, սեփական չէ, հարստացել է առաջին ճյուղի հաշվին։

Քննենք մի երկու պատում ևս, որոնք շեղվում են սյուժեներին ընդհանուր գծից։

¹ Նույն տեղում, էջ 10։

Շատախի № 14 պատումը, ասացող՝ Մանուշակ Զադո-
յան:

Մելիքը, Վհաբը, Հովանը եղբայրներ են: Հավասարա-
պես բաժանում են իրենց գյուղերը. Մելիքն ու Հովանը հա-
րստանում են, Վհաբը՝ աղքատանում. գալիս է եղբայր-
ների մոտ, որ իրեն մի գործ տան, դլուխը պահի: Կարգում
են նախրորդ: Նախրի հետ գնալիս, նա հավաքում է տավարի
ոտքերից ընկած պայտերը, տալիս վարպետին, սա հալում
է դրանք, խփում փայտի ծայրը, շինում մի «զոմփ»:

Այստեղ գործող մոտիվները պարզ են և տարածված:
Առաջին մոտիվ. Եղբայրներից մեկն անշնորհք է, վատնում է
իր բաժին հարստությունը և մնում եղբայրների հույսին:
Երկրորդ մոտիվ. Եղբայրներից մեկը նախրորդ է մյուսների
մոտ: Նախրորդությունը վիալական, դյուցազնական կերպա-
րին ուղեկցող գրեթե պարտադիր հատկանիշներից մեկն է.
Հիշենք՝ Մեծ Մհերը՝ նախրորդ, Դավիթը՝ նախրորդ: Մհերը
և Դավիթը հենց նախրորդության ժամանակ է, որ պատա-
հականորեն գտնում են երկնքից ընկած հրաշալի քարը, որից
Քեռի թորոսը նրանց համար պատրաստել է տալիս թուր
կեծակին: Այստեղ էլ Վհաբը նախրորդ է և պայտերից պատ-
րաստել է տալիս մի զոմփ: Այս մոտիվն, ուրեմն, ուղեկ-
ցում է միայն դրական, ուժեղ կերտվածքով օժտված հերոս-
ներին: Սպասվում է, որ Վհաբն այդպիսին պիտի լինի պա-
տումի հետագա շարադրանքի մեջ: Բայց պատումում զոմփ
պատրաստել տալուն անմիջապես հաջորդում է.

«Անու (Վհաբին) երկու խոլամ կը եր.

Մեկ Կուղ Բահղին ք...պերան,

Մեկի անուն Հասան Բակ էր»:

(Հատ. Ա, էջ 706, տող 20)

Իր այս երկու ծառաների հետ Վհաբը նյութում է եղ-
բայրների մահը: Սառաներն սպանում են Մելիքին (սպանու-
թյան պարագաները բավական միամտորեն են պատճառա-
րանված): Հետո Վհաբը պահանջում է Մելիքի կնոջն իրեն

կնության և յոր տարվա հարկ: Հովանը հարկը տալիս է, եղբոր կնոջը՝ ոչ (տե՛ս միջադեպ 16):

Այս երկու հատվածները՝ Վհաբի նախրորդությունը և եղբոր սպանությունը, հակասական են: Սրա պատճառը երկու տարբեր մոտիվների խառնվելն է և անտրամաբանական կապը՝ ընդհատվում է նախրորդության մոտիվը, անսպասելիորեն սկսվում է Մսրա Մելիք—Մեծ Մհեր գիծը: Որ Մսրա Մելիքը խաբեությամբ սպանում է Մհերին, այս միջադեպը տարբեր հարասումներով հանդիպում է նաև երկու այլ պատռմներում՝ № 18 (Սպարկերտ) և № 28 (Դատկու Մոճկոնց դյուդ), (տե՛ս միջադեպ 25): Իսկ որ Մհերի մահից հետո Մելիքը գերեվարում է Սասունը և Մհերի կնոջը՝ առկա է պատռմների մեծ մասում (տե՛ս միջադեպ 25): Սրան հաջորդում է Դավթի ճյուղն իր ավանդական միջադեպերով՝ ծննդից մինչև Վհաբի պարտությունը:

Այս պատռմի Մեծ Մհերի ճյուղում կա մոտիվների և անունների շփոթ: Մոտիվների մասին խոսվեց վերևում: Անունների շփոթն այսպիսինն է՝ Մհեր անվան հիշատակությունը ոչ մի տեղ չի հանդիպում. նրա փոխարեն հանդես է գալիս Մելիք անունը: Ավելացել է Վհաբ (նաև՝ Վհաբ Կոր) անունը, որը փաստորեն փոխարինում է այլ պատռմների Մսրա Մելիքին: Այս անունը բոլորովին նոր է և հանդիպում է միայն այս մի պատռմում: Դժվար է որևէ փաստարկով բացահայտել այդ անծանոթ անվան մուտքը վեպ: Հավանաբար, Շատախում պատմվող որևէ զրույցի, հեքիաթի հերոսի անվանում է, որ մեքենայորեն մտել է վեպի մեջ, մանավանդ որ վերը նշած առաջին մոտիվները նույնպես ներմուծված են վեպ և մնում են եղակի, այլ պատռմներում չեն հանդիպում: Երևի, այդ մոտիվներն իրենց հետ բերել են նաև Վհաբ անունը:

Շատախի № 14 պատռմի շեղումն ընդհանուր գծից պատահական է, թերևս, իր հիմքում ունի անհատական պատճառներ՝ կապված ասացող Մանուշակ Զադոյանի հետ:

Մանուշակ Զադոյանը Շատախի Հինենց դյուդից է,

Միրզո Զադո Զադոյանի աղջիկը։ Այս գյուղից են նաև № 15 պատումի ասացող Շատախցի Գրիգորը և № 16 պատումի ասացող Ավո Զադոյանը։ Այս երեք ասացողները ոչ միայն համագյուղացիներ են, այլ նաև աղջականներ՝ Զադու տներից են, հորեղբոր զավակներ¹։ Սրանց ազգի մեջ եղել են նաև այլ վիպասացներ՝ սրանց մեծերը, որոնցից սովորել են վեպը Մանուշակը, Գրիգորը և Ավոն։ Շատ հարցերի առնչությամբ հետաքրքիր է համեմատել աղջակից, միմյանց լսած, իրարից կամ ընդհանուր աղբյուրից սովորած ասացողների պատումները։ Այժմ զբաղեցնող հարցն այն է, թե Գրիգորն ու Ավոն պատմում են նո՞ւյնը, ինչ Մանուշակը։

Մանուշակ Զադոյանի, Գրիգորի և Ավո Զադոյանի պատումներում նույնն է ճյուղերի քանակը՝ (Մհեր) — Դավիթ, այսինքն՝ դրանք առաջին և շորրորդ ճյուղերը շունեն, իսկ երկրորդ ճյուղը պատմված է թերի։ Մանուշակի և Ավոյի պատումները վերջանում են նույն տեղում՝ Մելիքի դեմ Դավիթի տարած հաղթանակով, իսկ Գրիգորը պատմում է նաև Դավիթի և Խանդութի ամուսնությունը, բայց խիստ համառոտ։ Գրիգորի և Ավոյի մոտ նույնն է սկը։ Մսրա Մելիք-Մեծ Մհեր հարաբերությունը։ Այս պատումներում Վհաբ անվան հիշատակությունն անգամ լկա։ Մեծ երի ճյուղը բոլորովին չի համընկնում Մանուշակի պառումի Վհաբի (այսինքն՝ Մեծ Մհերի) ճյուղին։ Իսկ Գրիգորի և Ավոյի մոտ Մեծ Մհերի ճյուղը բացարձակապես նույնն է։ Այս երեք պատումների նմանություններն սկսվում են Դավիթի ճյուղից միայն։ Ինչո՞ւ աղջակից այս երեք պատումները, մեծ նմանություններով հանդերձ, մի տեղում բացառակապես տարբերվում են։ Եթե Մանուշակի մոտ նկատվող շեղումը՝ Վհաբն իր մոտիվներով, հանդիպեր նաև նրա աղջակից երկու այլ ասացողների՝ Գրիգորի և Ավոյի պատումներում, հիմք կունենայինք ենթադրելու, որ Շատախում մի ինչ-որ նոր կերպար՝ Վհաբը, իր նոր մոտիվներով մտել է վեպ և գրավել Մեծ Մհերի տեղը։ Բայց քանի որ դա չի հաստատվում, ապա

¹Տե՛ս «Սասնա ծոեր», Հատ. Ա, էջ 703—704, 723, 756։

մնում է ենթադրել, որ Մանուշակի մոտ հանդիպող եղակի շիղումը ունի անհատական պատճառներ, այսինքն՝ միայն Մանուշակի մոտ են խառնվել վեպին խորթ մոտիվներ:

Գրիգորի և Ավոյի պատումների համադրությունից ևս պարզվում է, որ Շատախի Հիննց գյուղի ասացողների մոտ Մեծ Մհերի ճյուղը բավական խաթարված է եղել: Սրանց մոտ էլ նկատվում է մի այլ կարգի շփոթ: Միայն այս երկու պատումներում է, որ անորոշ է, թե ո՞վ է Մհերի այն կինը, որից ծնվում է Դավիթը: Մյուս պատումներում դա շատ որոշակի է և երբեք չի շփոթվում Մսրա խանումի հետ, իսկ այս երկու պատումում շփոթված են Մհերի կինը և Մսրա խանումը: Այս շփոթի հետևանքն եղել է այն, որ Դավիթը դարձել է Մհերի և Մսրա խանումի որդին: Որ սա պարզ շփոթ է, երևում է հենց Գրիգորի և Ավոյի պատումներից:

Գրիգորի սկզբում.—Երբ Մհերը հարձակվում է Մսրա վրա և գերեվարում Մսրա Մելիքի կնոջը, այդ կինն իր հետ բերում է իր տղային՝ Մելիքին (փոքր):

«Հետո մնաց, ժամանակ վրեն անցավ,
ՄՀԱՅՐԹասմա մեռավ:
Որ Մհեր մեռավ, Մհերի կին ծոցվոր էր:
Էդո՞յ Վամանակ լցվավ, էդոր տղե մ' էլավ:
Անուն ՚իդիր Դավիթ»:

(Հատ. Ա, էջ 726, տող 20)

Այս հատվածից պարզ չէ, թե Մհերի կին կոչվածը նույն Մսրա խանումն է, թե այլ մեկը: Հաջորդ հատվածում, շնայած աղոտ, բայց պարզվում է, որ այդ կինը Մսրա խանումն է, և որ Դավիթը նրանից է (մի բան, որ ուրիշ ոչ մի պատումում չի հանդիպում): Մհերի մահից հետո Մելիքը (փոքր) վերադառնում է Մսրը, հզորանում, գալիս է Սասունը քարուքանդ անում, գերեվարելու ժամանակ նկատում է, որ

«Մելիքի մեր ուր տղեն գրկել էր ուր սրտին,
Զինք պատի առաջն էր տվել:
Դավիթ երեխա էր, էլաց:

Մելիքն իմացավ, որ իր մեր Դավիթ գրկեր,

Պատի առաջ դադրեր էր,

Ասաց.—Մարհ՝, արի էրթանք:

Մարե՛, ի՞նչ տղա է քու դիրկ:

Ասաց.—Մելիքը, քու ախալերն է:

Դավիթ էտոր հետ դնաց, գնաց Մսրա տեղը»:

(Հատ. Ա, էջ 726, տող 30—40)

Այժմ համադրենք Շատախի մի այլ պատում, դարձյալ Հինենց գյուղից՝ № 17 (ասացող՝ Ազիզ Ղարիբյան): Երբ Մսրա Մելիքը (մեծ) Մհերի մահից հետո հարձակվում է Սասունի վրա և քարուքանդ անում այն.

«Քաղքից որ տուս տելներ Մսրա Մելիք,

Տեսավ, լսավ՝ մեկ էրեխի մ՝ ծեն փողնի մեջ կը գտ.

Տեսավ Մելիք Մհերի ընտանիք, ճանշրջավ:—

Մհերի ընտանիք առեր էր Տավթին,

Գնացեր էր, մտեր մեջ փողնին:—

Առեց Մհերի ընտանիք ու Տավթ,

Ելավ, եղսիր տարավ Մսր»:

(Հատ. Ա, էջ 789, տող 10—20)

«Մհերի ընտանիք» արտահայտությունն այստեղ գիտակցվում է Մհերի կին: Պարզ է, որ Գրիգորի մոտ շփոթվել են Մհերի կողմից գերված Մսրա խանումն իր Մելիք որդով և Մհերի խաշապաշտ կինն իր Դավիթ որդով:

Այս շփոթն իր նույն դրսենորմամբ հանդիպում է նաև Ավո Զաղոյանի պատումում: Միայն թե Ավոյի մոտ շփոթը խորանում և միննույն ժամանակ պարզվում է հետեւյալ հատվածով: Մհերը գերում է Մսրա խանումին, բերում իրեն կին: Մրան անմիջապես հաջորդում է.

«Ելան ըսին.—Քառսուն տարին տը թամամի,

Նոր էրթանք մըր նըվին:

Երկուսն էլ խալվորցեր են:

Մըցին.—Ախըր, մըր յաշ ընցիր ի.

Քառոսուն տարին անինք քառոսուն օր...
Քառոսուն դաղիղան օր թըմըմավ,
Գացին մե-մեկու կուշտ, քնան:
Տարին շըթըմըմավ, Մհեր մեռավ:
Կնիկ մնաց տղով:
Կնիկ անտեր կնիկ էր, ապա շշախվավ,
Ելավ գնաց Մսրա երկիր մատ ուր լան:
Ասված էտու՝ վար ին ամսվան Տավիր էլավ»:

(Հատ. Ա, էջ 759, տող 10—20)

Ի՞նչ «քառոսուն տարվա» մասին է խոսքը:— Այլ պատումների այն քառասուն տարին, որ Մհերի կինն երդվել էր շընդունել Մհերին՝ Մսրա խանումի հետ խաբվելու համար: Մեջբերված հատվածին հաջորդում է այն, որ Դավիթը շիրոնում Մսրա խանումի կուրծքը. եթե իր հարազատ մայրն էր Մսրա խանումը, ինչո՞ւ Դավիթը շիրոնում իր մոր կուրծքը, և ի՞նչ են նշանակում Մելիքին՝ իր մորն ուղղված խոսքերը, թե.

«Ան խայ անօրա, տու քուրտ իս,
Անօրա, քուրտ մե-մեկու էլ շպըռնի:
Նոր սաց.—Հորողկի Սասուն մա Ծենով Հովան,
Քառոսուն տիկ մեղր, քառոսուն տիկ կարաք
Թըխ առնին, պիրին,—ուտի»:

(էջ 760, տող 20)

Պարզ է, որ սա էլ այն բանի հիշողությունն է, որ որք մնացած Դավիթին ուղարկում են Մսրա խանումի մոտ, և Դավիթը շիրոնում նրա կուրծքը, սնվում է հայրենական Սասունից բերված մեղր ու կարագով:

Դրիգորի և Ավոյի պատումներն, ուրեմն, այս շփոթշեղման հարցում իրենք իրենց ներսում հակասական են, մյուս պատումների հետ համեմատության մեջ առավել ես ոլարզվում է ալդ շփոթը:

Մհերի ճյուղն աղավաղված է հանդես դալիս նաև № 39 և 40 պատումներում (տե՛ս միջադեպ 29): Այս երկու պատումները համարում ենք աղավաղման մեկ և միևնույն դեպ-

քը, որովհետև դրանք գրառված են հայր և որդի ասացողներից, և հոր պատմածը նույնությամբ փոխանցվել է որդուն: Այս երկու պատումների մասին խոսք է եղել մի այլ առիթով, և Մեծ ՄՀերի կերպարի հետ կապված փոփոխությունների պատճառները բացահայտված են այնտեղ¹: Վանա մի պատումի (№ 41) մասին նույնպես խոսվել է որպես հեքիաթային թափառիկ մոտիվներից առատորեն օգտվող, զանազան կրկնվող միջադեպերով ու կերպարներով պատումի: Մեծ ՄՀերի կերպարը այդ կրկնվողներից մեկն է²:

Այսպիսով, վերը նշած մասնակի շեղումները՝ Մեծ ՄՀերի ճյուղի հիմնական և ընդհանուր գծից, մնում են եղակի, չեն հաստատվում այլ պատումներով: Ճիշտ է, եղակի անդամ հանդիպելը շի կարող անվերապահ շափանիշ լինել միջադեպի համար: Կարող է որևէ միջադեպ հանդիպել միայն մեկ անգամ, մեկ պատումում, բայց լինել խիստ բնորոշ և տիպական տվյալ ճյուղի կամ տվյալ կերպարի համար: Ասվածի լավագույն օրինակն են № 8, 9, 10 միջադեպերը, որոնք հանդիպում են միայն Ալաշկերտի № 33 և 34 պատումներում, բայց խիստ բնորոշ են ՄՀերի կերպարին: Իսկ վերը նշված եղակի շեղումներն այդպիսի որակ շեն բերում ՄՀերի ճյուղին և կերպարին, ավելին, դրանք, ինչպես տեսանք, անհատական պատճառներով առաջացած աղավաղում-շփոթ-շեղումներ են կամ պատահական մոտիվների մուտք:

Աղավաղումները կարող են ունենալ նաև առարկայական պատճառ՝ վեպի փոփոխություն ժամանակի և տարածության մեջ: Բոլոր կարգի շեղումներն էլ, հարկավ, կապվում են ժամանակի ու տարածության հետ, որը մեծ գործոն է բանավոր ստեղծագործության ճակատագրում: Հարցն այն է, որ որոշ դեպքերում փաստարկներով կարելի է բացահայտել դրանց դերը և ազդեցությունը (ինչպես օրինակ № 39 և 40 պատումների), որոշ դեպքերում՝ ոչ:

¹ Տե՛ս այս աշխատությունը, էջ 43:

² Նույնը, էջ 74:

Մեկ պատումի ներսում և բոլոր պատումների ներքին հարաբերության մեջ նկատվող վիպական անաքրոնիզմներն ու հակասություններն անզամ դալիս են հաստատելու վեպում մեկ հիմնական կառուցվածքային ուրվագծի դոյությունը:

ԵՐԵՌՈՒԴ ՃՅՈՒԴԻ

Երրորդ՝ Դավթի ճյուղը մյուսներից անհամեմատ ավելի տարածված է, ծավալուն և կայուն: Դավթի մասին չեն պատմում այն հինգ պատումները, որոնք ունեն միայն «Սանասար և Բաղդասար» ճյուղը, իսկ մնացած քառասուներկու պատումներում հիմնականը Դավթի պատմությունն է:

Ճյուղերի ներքին այսպիսի հարաբերությունը բխում է վիպական կառուցվածքի հետևյալ առանձնահատկությունից: Թեև վեպի բոլոր ճյուղերն իրենց կառուցվածքով նույնանում են, բայց համազոր չեն: Դրանցից մեկը վիպական ամբողջական ցիկլի մեջ դառնում է կենտրոնական, միջուկ: Այս ճյուղի գլխավոր կերպարի շուրջն են համախմբվում վիպական-ավանդական բոլոր թեմաներն ու մոտիվները: Ավելին, նա իր զորությամբ իրեն է ձգում այլ կերպարներից հատկանիշներ, նրանց վրա պատմվող միջադեպեր, հարստանում մյուսների հաշվին:

Թեմաների քննարկման ժամանակ պարզ կդառնա, թե ինչու է Դավթի ճյուղը կենտրոնական: Նախքան թեմաների քննությունը, այս ճյուղի միջադեպերի տախտակի հիման վրա կառուցենք դրա վիպական ուրվագիծը: Վեպում միայն Դավթի ճյուղի հիման վրա կարելի է վերականգնել նման մի ուրվագծի ամբողջական և մանրամասն տեսքը, որովհետև միայն այստեղ է, որ միջադեպերի ճնշող մասն ըստ պատումների ունի ծայրագույն խտություն, այսինքն՝ դրեթե բոլոր միջադեպերը խիստ կայուն են, փոփոխության քիչ են և նթարկվել, հանդիպում են բոլոր պատումներում և գրեթե տողացի նույնն են (տե՛ս Տախտակ 8): Նման խտու-

թյունը և հաստատում վիճակը խոսում է հենց իր՝ միջադեպի, ավանդականության մասին։ Իսկ այս ավանդականությունն էլ իր հերթին վիպական ուրվագծի կառուցման հնարավորություն է տալիս։ Դրա համար էլ ուրվագիծը տալիս ենք միայն երրորդ ճյուղի համար։

Ուրվագծում պահպանված է հիմնական թեմաների ստորաբաժանումը, սակայն խախտված է դրանց հաջորդականությունը։ Խախտումը բնական է, որովհետև վիպական ուրվագիծն իր հաջորդական կարգով ավանդական է (Հերոսի ծնողներ, ծնունդ, մանկություն, պատանեկություն, գործեր, ամուսնություն, ժառանգ, մահ), իսկ թեմաների հաջորդականությունը մեր հաստատածն է՝ ըստ նրանց գաղափարական դերի և կարևորության։

ԵՐՐՈՐԴ ՃՅՈՒՂԻ ՎԻՓԱԿԱՆ ՍՑՈՒԺԵՏԱՅԻՆ ՈՒՐՎԱԳԻՌԸ

Հերոսի ծնողներ և ծնունդ

1. Ծնողները մտահոգված են ժառանգի ծնունդով.
 - ա. անժառանգ են,
 - բ. ժառանգ ունեն, բայց դա նրանց չի ուրախացնում, սպասվում է մի այլ ժառանգ։
2. Արտասովոր գուշակություն ժառանգի ծննդի մասին. ծնողներից պահանջվում է մեծագույն զոհաբերություն.
 - ա. ժառանգի ծննդյան օրը կմահանան ծնողները։
3. Հերոսը ծնվում է որևէ նշանով,
Հերոսի մանկություն և պատանեկություն
4. Հերոսն օրորոցում.
 - ա. կտրատում է թևակապերը,
 - բ. կուրծք ուտելիս սպանում է ստնառուներին։
5. Հերոսը ծննդյան օրից մնում է որը.
 - ա. կարեկից վերաբերմունք նրա նկատմամբ,
 - բ. անկարեկից վերաբերմունք նրա նկատմամբ։
6. Հերոսը մեծանում է օտար, թշնամական միջավայրում, ոչ իր հայրենական տանը, այլ երկրում, այլազգիների մեջ։

- ա. նրան նայում են շար աշքով, ցանկանում են բռնա-
նալ նրա վրա.
- բ. Հերոսն ընդդիմանում է բռնությանը, ցուցադրվում
է նրա գերբնական ուժը (գուրգ նետել, թրի տակով
շանցնել).
- գ. Հակառակորդ կողմի վախն ու զգուշավորությունը
հերոսից.
- դ. օտար միջավայրում մեկը կարեկից և հովանավոր
հերոսին.
- ե. Հերոսին ենթարկում են փորձությունների (կրակ և
ռսկի).
- զ. ուզում են ազատվել հերոսից, քանի դեռ փոքր է
(հանձնարարում են ճանապարհին սպանել, արյունից
բերել որպես ապացույց). Հերոսն է հաղթում իրեն
սպանել ցանկացողներին:
- 7. Հերոսի վիրադարձը հայրենիք.**
- ա. նրան դիմավորում են ուրախությամբ:
- 8. Հերոսի մանկական շարությունները.**
- ա. Ժողովրդի դժգոհությունը և բողոքը:
- 9. Հերոսին դնում են որևէ գործի (գառնարած, նախրորդ,
հովիվ, հորթարած):**
- ա. նրա վերաբերմունքն ընտանի կենդանիների և վայրի
գաղանների հանդեպ.
- բ. առտնին այլ աշխատանքներ (վար ու ցանք, արտ ու
արոր):
- 10. Հերոսը որսորդ.**
- ա. նրա առաջին շփումն ու ծանոթությունը զենք-զրահի,
ձիու հետ:
- 11. Գործի և որսորդության մեջ Հերոսն ենթարկվում է զա-
նազան փորձությունների:**
- 12. Հերոսն ենթարկվում է բարոյական փորձությունների
(որևէ կնոջ գայթակղություն):**
- 13. Հերոսից թաքցնում են որոշ ճշմարտություններ. խրա-
տատու և հովանավոր մեկը, որը հերոսին իրազեկ է
պահում բոլոր անցուդարձերին:**

14. Հերոսը հաստատում կամ վերականգնում է իր իրավունքները.

ա. ժառանգական,

բ. անձնական,

գ. շրջապատն ընդունում է հերոսի ուժն ու իրավունքները և ենթարկվում նրան:

Չ ո ր բ ո ր դ թ ե մ ա

15. Հերոսը շինարար.

ա. վերականգնում, վերահաստատում է ժառանգություն ստացած շինությունները (ամրոց, վանք, որսասար).

բ. շինում նորերը (կամուրջ, իրեն նստավայր):

Ա ո ա զ ի ն թ ե մ ա

16. Հերոսի ինքնահաստատումը և տերության գլուխ կանգնելն անհանգստացնում է հակառակորդ կողմին. նա ցանկանում է վերականգնել հերոսի և նրա երկրի վրա ունեցած իր երթեմնի իրավունքները.

ա. հարկահանություն,

բ. վանքերի ավեր,

գ. սպառնագին լուր՝ ուղղված հերոսին, ենթարկվելու պահանջով. կովի իրադրության նախապատրաստում:

17. Հերոսի շրջապատը հակված է ենթարկվելու թշնամու կամքին և բռնությանը. շրջապատը զգուշանում է ընդհարումից. նա դեռ հերոսի մեջ չի տեսնում իր ազատարարին.

ա. հերոսից թաքցնում են թշնամու պահանջները (հարկ, հնագանդություն).

բ. հերոսից թաքցնում են հայրական ունեցվածքը (զենք-զրահ, ձի, կախարդական զորություն):

18. Հովանավոր անձը հակադրվում է շրջապատին և շարունակում է բացահայտել հերոսի համար ողջ իրադարձությունները և դրանց ծնող պատճառները:





	1	2	3	4	5	6	7	8	9	10	11	12	13	14	15	16	17	18	19	20	21	22	23	24	25	26	27	28	29	30	31	32	33	34	35	36	37	38	39	40	41	42	43	44	45	46	47		
83	Պարզության կամքացույց մասին թիվ 10 օրենքը																																																
84	Պարզության կամքացույց մասին թիվ 10 օրենքը																																																
85	Հայոց հանուն և աշխարհական պատճենների պահպանի մասին օրենքը																																																
86	Պարզության կամքացույց մասին թիվ 10 օրենքը																																																
87	Պարզության կամքացույց մասին թիվ 10 օրենքը																																																
88	Շենք ուղղակի գործառնություն ունեցող պահպանի մասին օրենքը																																																
89	Պարզության կամքացույց մասին թիվ 10 օրենքը																																																
90	Պարզության կամքացույց մասին թիվ 10 օրենքը																																																
91	Ոլոր թիվը																																																
92	Պարզության կամքացույց մասին թիվ 10 օրենքը																																																
93	Պարզության կամքացույց մասին թիվ 10 օրենքը																																																
94	Շենք ուղղակի գործառնություն ունեցող պահպանի մասին օրենքը																																																
95	Ա-Անդրադարձ և առաջարկ պահպանի մասին օրենքը																																																
96	Պարզության կամքացույց մասին թիվ 10 օրենքը																																																
97	Շենք ուղղակի գործառնություն ունեցող պահպանի մասին օրենքը																																																
98	Պարզության կամքացույց մասին թիվ 10 օրենքը																																																
99	Պարզության կամքացույց մասին թիվ 10 օրենքը																																																
100	Պարզության կամքացույց մասին թիվ 10 օրենքը																																																
101	Պարզության կամքացույց մասին թիվ 10 օրենքը																																																
102	Պարզության կամքացույց մասին թիվ 10 օրենքը																																																
103	Շենք ուղղակի գործառնություն ունեցող պահպանի մասին օրենքը																																																
104	Ա-Անդրադարձ և առաջարկ պահպանի մասին օրենքը																																																
105	Շենք ուղղակի գործառնություն ունեցող պահպանի մասին օրենքը																																																
106	Պարզության կամքացույց մասին թիվ 10 օրենքը																																																
107	Պարզության կամքացույց մասին թիվ 10 օրենքը																																																
108	Պարզության կամքացույց մասին թիվ 10 օրենքը																																																
109	Պարզության կամքացույց մասին թիվ 10 օրենքը																																																
110	Պարզության կամքացույց մասին թիվ 10 օրենքը																																																
111	Պարզության կամքացույց մասին թիվ 10 օրենքը																																																
112	Պարզության կամքացույց մասին թիվ 10 օրենքը																																																
113	Պարզության կամքացույց մասին թիվ 10 օրենքը																																																
114	Պարզության կամքացույց մասին թիվ 10 օրենքը																																																
115	Պարզության կամքացույց մասին թիվ 10 օրենքը																																																
116	Պարզության կամքացույց մասին թիվ 10 օրենքը																																																
117	Պարզության կամքացույց մասին թիվ 10 օրենքը																																																
118	Պարզության կամքացույց մասին թիվ 10 օրենքը																																																
119	Պարզության կամքացույց մասին թիվ 10 օրենքը																																																
120	Պարզության կամքացույց մասին թիվ 10 օրենքը																																																
121	Պարզության կամքացույց մասին թիվ 10 օրենքը																																																
122	Պարզության կամքացույց մասին թիվ 10 օրենքը																																																
123	Պարզության կամքացույց մասին թի																																																



19. Հերոսը ուժով հաստատում է իր իրավունքը՝ նա միակն է, որի հետ պետք է կապել ազատագրության հույսը.
- ա. հերոսը պատուհասում է հարկահաններին, վանք ավերողներին.
- բ. հերոսը պատասխան սպառնագին լուր է ուղարկում թշնամուն.
- գ. շրջապատն իր վերաբերմունքով սրում է լարվածությունը երկու թշնամական կողմերի միջև (ծաղրում է հարկահաններին, թշնամու զորքը).
- դ. հերոսն ուժով ստանում է իր հոր զենք-զրահը, ձին.
- ե. հերոսին օրհնում են և հայտնում կախարդական որևէ զորության գաղտնիք:
20. Հերոսը փորձում է կախարդական զորությունը, հզորանում, հասնում և անցնում իր նախորդի (հոր) դյուցազնական արտաքին շափերից:
21. Հակառակորդ կողմը նույնպես հզորության գագաթնակետին է. նա հավաքել է իր ողջ զայրույթը, ատելությունը, զորքը և անհամար բանակով պաշարել հերոսի երկիրը. կովի իրադրությունը ծայր աստիճան սրված. է:
22. Հերոսի և իր շրջապատի ներքին կապը.
- ա. նրա հրաժեշտի խոսքերը՝ ուղղված շրջապատին.
- բ. շրջապատում մեկը, որ (նախանձից, չկամությունից) թերահավատ է հերոսի ուժի նկատմամբ և ծաղրում է նրան:
23. Հերոսի ներքին ուժի և բնավորության ցուցադրում.
- ա. ասպետականություն (հերոսն զգուշացնում է թշնամուն հարձակումից առաջ).
- բ. ողջախոհություն (որևէ մեկի խորհրդով կարողանում է ճիշտ գնահատել կովի իրադրությունը և ելքը, խուսափել անտեղի արյուն թափելուց և զատել իր իսկական թշնամուն).
- շ. անհեռատեսություն, դյուրահավատություն, ազնիվ, շիտակ խառնվածք (հերոսը չի կարողանում գուշակել հակառակորդի խարդավանքը, խարվում է և դառնում նրա նկնդության զոհը):

24. Հերոսի մշտական կապն իր շրջապատի հետ (մեկը գուշակում է հերոսի նեղ վիճակը և հասնում օդնության):
ա. մենամարտ հերոսի և նրա հարազատներից մեկի միջև:
25. Մեծահոգություն, անհիշալարություն, երախտագիտություն.
ա. հերոսը մոռանում է իր թշնամու նենդ վարմունքը.
բ. առաջինը հարվածելու իրավունքը զիջում է թշնամուն.
գ. ընդունում է նրա ինքնապաշտպանության բոլոր առաջարկները.
դ. առաջին երկու զարկը բաշխում է թշնամու հարազատներին (մորը, քրոջը):
26. Դյուցազնական ուժ.
ա. մի հարվածով սպանում է թշնամուն:
27. Հարգանք բոլոր ժողովուրդների (նույնիսկ իր թշնամու) անկախության հանդեպ.
ա. ազատ է արձակում թշնամու բանակը և նրանց հանձնում իրենց երկրի տնօրինությունը:

Ե Ր Կ Բ Ո Ր Դ Թ Ի Մ Ա

28. Թշնամին պարտված է, հայրենիքը ազատագրված. հերոսի համբավը տարածվել է աշխարհով մեկի:
29. Որևէ դյուցազնուհի հայտնում է հերոսին (նամակով, աշուղի միջոցով) իր հիացմունքը և սերը:
30. Հերոսը գնում է հարսնացուին տեսության. փորձություններ ճանապարհին.
ա. խաբվում է մի այլ կնոջից.
բ. զանազան արարքներով ցուցադրվում է հերոսի ֆիզիկական ուժը և բնավորության գծերը (հանդիպում գութանավորների հետ, միամտություն, շատակերություն):
31. Փորձություններ հարսնացուի տանը.
ա. հանդիպում հարսնացուի հետ, հարսնացուն ցուցա-

դըրում է իր ուժը, կանացի ներքին արժանապատվությունը և բնավորության գծերը:

- բ. Հանդիպում հարսնացուի այլ ուզնկանների հետ, մենամարտ, հաղթանակ նրանց հանդեպ. ուզնկանների քենը և վրեժինդրությունը հերոսի նկատմամբ, թշնամանք կամ հաշտություն նրանց միջև:
- գ. Հերոսը կովում է հարսնացուի թշնամիների հետ, հերոսի հաղթանակը:

32. Հերոսի և հարսնացուի մենամարտը. նրանք իրենց արտաքին և ներքին բարեմասնություններով արժանի են միմյանց:

33. Հերոսի ամուսնությունը:

Ե Ր Բ Ո Ւ Դ Թ Ե Մ Ա

34. Ծնվում է հղոր ժառանգ.

ա. Հերոսը ներկա է ծնունդին, ինչ-ինչ նշաններից գուշակում է իր որդու արտասովորությունը.

բ. Հերոսը, նախքան իր որդու ծնունդը, գնում է օտար երկիր (զանազան պատճառներով), որեւէ նշան է թողնում կնոջը որդուն տալու համար:

35. Գժտություն հոր և որդու մեջ.

ա. տարբեր պատճառներով.

բ. նրանք չեն ճանաշում միմյանց. հայրը վերադառնում է օտարությունից և պատահաբար հանդիպում որդուն:

36. Հոր և որդու մենամարտը, հայրն անհծում է որդուն:

37. Հերոսի սպանությունը.

ա. սուտ երդման պատճառով.

բ. իր ապօրինի զավակի ձեռքով:

38. Հերոսի կինն ինքնասպան է լինում:

Սա է «Սասնա ծռեր» վեպի կենտրոնական ճյուղի վիպական հիմնական ուրվագծային պատկերն ըստ պատումների: Որոշ պատումներում նկատվող մասնակի շեղումները ուրվագծի մեջ փոփոխություն չեն մտցնում:

Ինչպես երեսում է վիպական ուրվագծից, Դավթի ճյու-

դում միջաղեպերի ճնշող մասը խմբված է առաջին թեմայի շուրջը: Այս կուտակումը պատահական չէ և պայմանավորված է այն բանով, որ առաջին թեման Դավթի ճյուղում կենտրոնական է, առանցքային:

Առաջին թեմա.—(կուպաշտ և խաշապաշտ թագավորներ, մշտական հակամարտություն նրանց միջև):

Այս հակամարտությունը և թշնամանքը Դավթի ճյուղում դառնում է պատերազմական իրադրություն, որը պահանջում է վերջնական լուծում: Հենց այս լուծումն է հերոսական վեպի կառուցվածքային և գաղափարական առանցքը և հենց սա էլ Դավթի ճյուղը դարձնում է կենտրոնական:

Ինչպես պարզվեց վերևում, առաջին ճյուղում կուպաշտ-խաշապաշտ կողմերն ավելի շուտ վիպական են, քան պատմական, շնայած՝ վիպի ժանրային ստիլմունքով այդ վիպականը ձգտում է պատմական որոշարկման: Այսուհանդերձ, պատմական որոշակիությունն առաջին ճյուղում թույլ է արտահայտված և առանձնապես մեծ դեր չի խաղում: Հակառակ դրան, երկրորդ ճյուղում Մսրա Մելիք (մեծ) — Մեծ Մհեր հարաբերության հիմքում ընկած են առավելապես պատմական որոշակի իրադարձությունների հիշողություններ: Երրորդ ճյուղում Մելիք-Դավիթ կոիվը, թվում է, պատմականորեն ավելի է որոշարկվում՝ արաբական խալիֆայության ժամանակաշրջան: Բայց այստեղ արդեն դա այնքան կարևոր չէ, որքան Մելիք-Դավիթ կովի ընդհանրացված գաղափարը: Այս իսկ պատճառով, այդ կոիվն ավելի շուտ ընդհանրացված գաղափար է, քան պատմական որոշակի իրադարձությունների անդրապատկերում: Անշուշտ, առաջին և երկրորդ ճյուղերում ևս այն ընդհանրացված գաղափար է, բայց երրորդ ճյուղում է, որ այն հասնում է իր բարձրակետին և ստանում իր լուծումը՝ Դավիթն սպանում է Մելիքին, վերացնում իր երկիր ազատության և անկախության վրա բռնացող ուժը, այսինքն՝ կուպաշտ-խաշապաշտ մշտական հակամարտությունն ավարտվում է խաշապաշտի վերջնական հաղթանակով:

Այդ ընդհանրացված գաղափարն ուժեղ է իր ավանդականությամբ, իսկ ավանդականն էլ վեպում ուժեղ է պատմական որոշակիությամբ։ Հայերի կոհիվն այլազգի բռնակալների դեմ հայ ժողովրդի դարավոր պատմությունն է, ազգային ճակատագիր։ Նաև՝ ավանդական և առանցքային թեմա հայ վիպական բանահյուսության մեջ։ Այս թեման, ընդհանուր լինելով «Հայկ ու Բել» առասպելից մինչև «Սասնածոեր», ժամանակ առ ժամանակ հազել է պատմական որոշակի զգեստ՝ ասորեստանցիներ-հայեր («Հայկ և Բել»), մարեր-հայեր («Վիպասանք»), պարսիկներ-հայեր («Պարսից պատերազմ» և «Տարոնի պատերազմ»), Վերջին որոշարկումն է՝ արաբներ-հայեր («Սասնածոեր»)։

Այստեղ ուշադրության պետք է առնել մի երևույթ։ Հայ բանահյուսության մեջ վիպական ցիկլը «Սասնածոերով» ավարտվեց։ Այլևս հին ավանդույթի վրա նոր վեպ շտեղծվեց, վիպական ցիկլը շնորովվեց, շնայած հայ ժողովրդի պատմությունն արաբական տիրապետությունից հետո լնթացավ նույն արյունոտ բռնության ճանապարհով, տեսավսելջուկյան և թաթարական տիրապետություն։ Այս երևույթը բացատրվում է առաջին թեմայի վիպական կառուցվածքային հետեւյալ առանձնահատկությամբ։ Թեման է՝ կովի իրադրություն երկու թշնամի երկրների միջև։ Թեմայի պահանջընն է։

ա. այնպիսի կովի իրադրություն, որը կազմի հերոսական ժամանակաշրջան։

բ. ունենա հաղթական ավարտ։

գ. նախանշի պետության հաստատում կամ կորցրած պետականության վերականգնում։

«Հայկ և Բելից»—«Սասնածոեր» վիպական ցիկլն անդրադարձնում է պատմական-հերոսական այնպիսի դարաշըրջաններ, որոնք պսակվել են հայերի հաղթանակով, պետության հաստատումով կամ վերահաստատումով։ «Սասնածոերի» պատմական ժամանակաշրջանին հաջորդած դարերը թեև տալիս են կովի իրադրության ամենասուր ու ողբեր-

գական էջեր, ժողովրդի հերոսական դիմադրության օրինակներ, բայց շկա հաղթական ավարտ և կործրած պետականության վերականգնում։ Սա ժողովրդական վեպի կառուցվածքային խնդիր է, վիպաստեղծման առաջին և անհրաժեշտ պայման։

Ապա. ոչ միայն վիպական ցիկլը «Սասնա ծռերից» հետո չի նորոգվել, այլև հաջորդող պատմական ժամանակաշրջաններն ու իրադարձությունները վեպի վրա աղդեցություն չեն թողել, վեպ մուտք չեն գործել. եթե ինչ-որ ձեռվ էլ կըցվել են վեպին, ապա շեն մերվել, մնացել են ավելորդության վիճակում։ Մուտք չեն գործել, որովհետև երրորդ ճյուղում Մսըր-Սասուն հակամարտությունն իր վիպական դասական ձեի մեջ է և՛ իր ընթացքով, և՛ իր լուծմամբ։ Մսըր-Սասուն հակամարտության ընդհանուր ված գաղափարն այնքան ուժեղ է, որ չի ընդունում հակամարտության մի այլ մասն ակի դեպք, նույնիսկ բացասում է¹։ Այս իսկ պատճառով,

¹ Օրինակ՝ 10 և 11 համարների տակ դրված միջադեպերն ունեն այսպիսի բովանդակություն։ — Դավթին ու Վեգոյին տանում են Մսըր։ Քրողերն սպառնում են Սասունին. քեռիները գնում են Մսըր, որ բերեն Դավթին ու Վեգոյին Սասունը քրդերից պաշտպանելու համար։ Մելիքը Դավթին թաքցնում է, տալիս է միայն թուլակամ Վեգոյին։ Վեգոն չի կարողանում պաշտպանել Սասունը։ Քեռիները նորից են գնում Մսըր։ Զենով Հովանի կանչով Դավիթն ելնում է ներքնատնից (ուր նրան թաքցրել էր Մելիքը) և քեռիների հետ վերադառնում Սասուն (տե՛ս միջադեպ 13)։ Այստեղ դորժում են վիպական հայտնի մոտիվներ (տե՛ս վիպական ուրվագծի 6 և 7 կետերը), որոնք իրենց վիպական կատարյալ ձեւ մեջ են այլ պատումներում։ Այն, որ այստեղ քրդերն են սպառնում Սասունին, հետագաժամանակների պատմական իրադարձությունների հիշողություն է։ Այս իրադարձությունն իր հերթին պատմականորեն զուրկ չէ ընդհանուր հիմքից. բայց վեպում, հատկապես երրորդ ճյուղում Մելիք-Դավիթ հիմնական հակամարտության ընդհանուր տեսադաշտի վրա ավելորդ հավելում է։ Եվ բնական է, որ հիշյալ երկու միջադեպերը հանդիպում են միայն երկու պատումում (№ 32¹ Խլաթ և 47¹ Մուշ)։ Դրանք հենց այդ երկու պատումների ներսում անգամ նկատելիորեն զուրս են մնում վիպական ներքին կառուցվածքից, այսինքն՝ զրանց ավելորդությունը զգացվում է ոչ միայն բոլոր պատումների ընդհանուր տեսադաշտի վրա, այլև հենց իրենց՝ № 32 և 47 պատումների ներսում։

երրորդ ճյուղում առաջին թեմայի առումով պատմական հետագա խավավորումներ շկան։ Բոլոր պատումներում առաջին թեմայի այս կարդի կայուն, անփոփոխ վիճակը ցուց է տալիս, որ.

ա. այն երրորդ ճյուղում ըստ ամենայնի հիմնական է և առանցքային։

բ. գաղափարական ընդհանրացման ուժի հիմունքով մասնակի շեղումները և հավելումները բացասում է։

Առաջին թեմայի հետ կապված բոլոր միջադեպերը՝ կովի իրադրության նախապատրաստում, հարաբերությունների լարվածության սրում, բախում և լուծում, բոլոր պատումներում գրեթե տողացի նույնն են։ Նկատվող տարբերությունները գերազանցապես արտաքին բնույթի են՝ ոճական, արտահայտչամիջոցների և այլն։ Արտաքին տարբերությունները վիպական հիմնական ուրվագծի հետ շեն առնչվում, շեն թուլացնում նրա կառուցվածքը, ընդհակառակը, երբեմն նույնիսկ հարստացնում են դրա դրսեորման ձևերն ու միջոցները։

Ավելի կարևոր են ներքին տարբերությունները, որոնք անմիջականորեն կապ ունեն վիպական ուրվագծի հետ, խախտում և թուլացնում են այն։

Այսպիսի մի տարբերություն է նկատվում Ալաշկերտի № 33 պատումում (ասացող՝ Մանուկ Թորոյան)։ Միայն այս մի պատումում է, որ Դավիթը Մելիքին չի սպանում, այսինքն՝ Դավիթը չի կատարում իր հիմնական դերը։ Մարա Մելիքը կովի ժամանակ փախչում է Մողը, իսկ զորքը կոտորվում է։ Բայց, վեպի պահանջով Մելիքը շապանվել է կարող. և ահա, նրան սպանում է Փոքր Մհերը։

Ալաշկերտի № 33 պատումը լավագույններից է։ Ընդգրկում է բոլոր շորս ճյուղերը, ընդարձակ է, հարուստ վի-

Նման ավելորդության վիճակում է նաև № 31 միջադեպը՝ Դավիթը հարկ է պահանջում Մելիքի ցեղակից-հպատակներից և նրանց ունեցվածքը քշում-բերում է Սասուն (պատումներ № 27՝ Մուշ, 42՝ Ալաշկերտ, 36՝ Բայրազետ)։

պական վեհ հանդարտությամբ պատմված անթերի միջադեպերով, հատկապես Մեծ և Փոքր Մհերների ճյուղերում ունի բոլորովին նոր և այլ պատումներում շհանդիպող հատվածներ։ Սա այն պատումներից չէ, որտեղ շեղումները և աղավաղումները ընդհանուր խաթարման արդյունք են. կան որոշ թույլ պատումներ, որոնք արդյունք են վեպի քայքայման ու տարրալուծման, և դրանց համար աղավաղումները, մի տեսակ, բնական են. Սակայն, № 33 պատումն այդպիսիներից չէ, այն լավագույնս պահպանել է վիպական սյուժետային ու պատմողական ավանդները։ Եվ ահա, նման մի շեղում՝ Դավթի կոփվը Մսրա Մելիքի հետ անցնում է աննըշան ու անգույն պատերազմական իրադրության մեջ, և Դավթ-Մելիք հակամարտությունն ստանում է իր ամենաթույլ լուծումը՝ Մելիքը փախչում է կովի դաշտից, Դավիթն ու Քեռի թորոսը կոտորում են նրա զորքը։ Այսինքն՝ շկա հաղթական ավարտ։ Սա ոչ միայն հակառակ է վիպական սկզբունքին, այլև բնականոն չէ հենց այդ նույն պատումում մենամարտին նախորդող միջադեպերին։

Ամենաուժեղ թափով նախալատրաստվում է պատերազմական իրադրությունը՝ սկսած հարկահանների մուտքից Սասուն։ Քեռի թորոսը հարբեցնում է Դավթին, որ կասեցնի ընդհարումը Դավթի և հարկահանների միջև (այս միջադեպն էլ, ի դեպ, շկա մյուս պատումներում, բացի նորից Ալաշկերտի № 34 պատումից, որի ասացող Կարապետ թամոյանը Մանուկ թորոյանի համագյուղացին է, խաստուրցի)։ Այսուհանդերձ, տեղի է ունենում Դավիթ—հարկահաններ հանդիպումը, և Քեռի թորոսի զգուշավորությունն ու դիվանագիտական հեռատեսությունն ավելի են շեշտում երկու թշնամական ուժերի բախման անխուսափելիությունը և թափը։ Ծայրահեղ լարումը հասնում է իր գագաթնակետին, երբ Մելիքը տեսնում է իր անպատվված մեծավորներին և, թւել ճղելով, իր արյունով զորակոշ է գրում աշխարհի շորս կողմերին Դավթի դիմ կոփվ դնալու համար։ Քեռի թորոսը նորից է հարբեցնում Դավթին, նրան կովից հեռու պահելու

և դրան ավելի խաղաղ ընթացք տալու համար։ Խաղաղ բառ-
նակցություններն արդեն անհնար են, և Քեռի Թորոսը Սաս-
նա տան մյուս տղաների հետ դնում է կոփվ։ Դավիթը հար-
բած, քնած է։ Քայլ առ քայլ նախապատրաստվում է այն
միտքը, թե ու պիտի կապի Մելիքի մայրը, եթե Դավիթն
արթնանա։ Արթնանում է Դավիթն իր սգավոր Մամիկի ար-
ցունքից. սուգ է պատել Սասունին, և ինքը քնա՞ծ։ Սրան Շա-
շորդում են այն ավանդական միջադեպերը, ուր Դավիթը
Մամիկից իմանում է Հոր զենք-զրահի, ձիու տեղը, հաղնում,
զրահավորվում, բարոյական հզորությանն ու վճռականու-
թյանը ավելանում է և ֆիզիկական հզորությունը, որ ձեռք է
բերում Դավիթը Մարաթուկում քնելով։ Կատարելապես
պատրաստ է Դավիթը իսկական դյուցազնական մենամար-
տի։ Եվ այդ մենամարտը տեղի չի ունենում։ Հենց
այնտեղ, որտեղ վիպական բնականոնությամբ պիտի նկարա-
դրվեր Դավիթ-Մելիքի մենամարտը, տրված է մի այլ մենա-
մարտի նկարագրություն՝ Դավիթ-Քեռի Թորոս։ Հերոսի և իր
հարազատներից մեկի մենամարտն իրար շճանաշելու վիպա-
կան պատճառով նույնպես ուրվագծի պարտադիր պահանջ-
ներից է (տե՛ս ուրվագիծ, 21ա)։ Դավիթ-Քեռի Թորոս մե-
նամարտը լրացնում է այդ պահանջը, թերևս, այստեղ նաև
իր տեղում է, մանավանդ, նրանց հանդիպման ողջ նկարա-
դրությունը տարվում է վարպետ պատմելածնով, բայց, այս
բոլորով հանդերձ, այն շի կարող փոխարինել և շպե՛տք է
փոխարինի Դավիթ-Մելիք մենամարտին, լցնել դրա բացը
հիշյալ պատումում և ընդհանրապես։

Մարա Մելիքի հետ մենամարտի նկարագրությունն այս
պատումում կա, բայց՝ մի այլ տեղում, մի այլ կերպարի հետ։
Մարա Մելիքը փախչում է Մսըր, այլևս նրան շի մտահոգում
Դավիթի ու Սասունի հզորությունը, և միայն այն ժամանակ,
երբ Դավիթի տղան՝ Փոքր Մհերը, հանդես է գալիս որպես
Գոհարի ուղնկան, նա էլ ստիպված է պաշտպանել իր անձ-
ն ական պատիվը որպես Գոհարի փեսացու։ Փաստորեն, տե-
ղի է ունենում մենամարտ Գոհարի ուղնկանի (Փոքր Մհեր)

և նշանածի (Մսրա Մելիք) միջև Այստեղ Մսրը-Սասուն հակամարտություն չկա: Մինամարտի նկարագրությունը բառացիորեն նույնն է, ինչ մյուս պատումներում Դավիթ-Մելիք մենամարտինը: Բայց սա արդեն նույն արժեքը չունի, ինչ Դավիթի ճյուղի դեպքում, որովհետև ոչ մի կապ չունի առաջին թեմայի՝ կռապաշտ-խաչապաշտ հակամարտության հետ: Այս պատումում առաջին թեման մնում է կիսատ, զլուծված: Նսեմանում է Դավիթի դերը և չի շահում Փոքր Մհերը, որովհետև այս դեպքում ոչ մի նշանակություն չունի, թե Գոհարի նշանածը Մսրա Մելիքն է, թե՝ որևէ այլ մեկը: Այլ պատումներում Գոհարի նշանածները շատ են և հանդես են դալիս զանազան անունների տակ:

Ուրեմն, եթե այս միակ պատումում Մսրա Մելիքն ազատվում է Դավիթի ձեռքից և սպանվում նրա որդու՝ Փոքր Մհերի ձեռքով, սա չի նշանակում, որ Մհերի կոփվը Դավիթի կովի բնական շարունակությունն ու ավարտն է: Փոքր Մհերի կոփվը Մսրա Մելիքի հետ չի լրացնում Դավիթի ճյուղում այդ կովի թերին: Այս դեպքում մնում է ասել, որ Փոքր Մհերի հետ կովի մեջ մտած Գոհարի նշանածի անունը Մսրա Մելիք շպիտի լիներ. դա արտաքին շփոթ է՝ ըստ վիպական տրամաբանության:

Այս հարցի լուսաբանմանը մեծապես կօգներ մի հանգամանք՝ համագյուղացի ասացողների պատումների համեմատական ուսումնասիրությունը: № 33 և 34 պատումների ասացողներ Մանուկ Թորոյանը և Կարապետ Թամոյանը, ինչպես նշել ենք տարբեր առիթներով, համագյուղացիներ են՝ Ալաշկերտի Խաստուր գյուղից: Երկուսն էլ վեպը լսել և սովորել են խաստուրցի վիպասաց Ռես Գոպոյից: Գուցե և միմյանց են լսել: Միևնույն աղբյուրից սովորելու, համագյուղացի լինելու հետեանքով այս երկու ասացողների պատումները տողացի նույնն են: Միակ տարբերությունը վերը նշած շեղումն է: № 34 պատումում, Կարապետ Թամոյանի մոտ Դավիթի ու Մելիքի մենամարտն իր տեղում է, այն նույն տեղում, ինչ մյուս պատումներում, այսինքն՝ Դավիթը կոտորում է Մելիքի գորքը, ալեսորի խրատով գաղարեցնում

կոտորածը, մենամարտում Մելիքի հետ և սպանում նրան։ Սրան անմիջապես հաջորդում է Դավթի ու Քեռի թորոսի մենամարտը, որը բացարձակապես համընկնում է № 33 պատումի նույն միջադեպին։

Դժբախտաբար, № 34 պատումը շունի Փոքր Մհերի ճյուղը, ավարտվում է Դավթի մահով և Խանդութի ինքնասպանությամբ։ Հետաքրքիր էր իմանալ՝ ինչպես կպատմեր նույն այդ Կարապետ Թամոյանը շորրորդ ճյուղը, ո՞վ կլիներ այնտեղ Գոհարի նշանածը։ Մի բան պարզ է, որ Մսրա Մելիքը չէր լինի։ Զորրորդ ճյուղի գոյությունը Կարապետ Թամոյանի պատումում թերեւս պարզաբանում մտցներ Մանուկ Թորոյանի պատումի այդ միակ շեղման հարցում։ Վիպական ավանդական կառուցվածքային սկզբունքի համաձայն Կարապետ Թամոյանի պատումը ճիշտ է, Մանուկ Թորոյանից նը՝ շեղում վիպական սկզբունքից։ Դժվարանում ենք այդ շեղման պատճառը գտնել։ Մնում է ենթադրել. կամ՝ Խաստուրի վիպական դպրոցից է գալիս այդ շեղումը (այդ դեպքում, ինչու նույն շեղումը չի հանդիպում Ռես Գոպոյի մյուս աշակերտի՝ Կարապետ Թամոյանի պատումում), կամ՝ անհատական է (այս դեպքում էլ այն մեծ վերապահությամբ, որ Մանուկ Թորոյանը վարպետ վիպասաց է և ունի խիստ ավանդական ու ավանդապահ վերաբերմունք իր պատմածի նկատմամբ։ «Մարդ որ մի բան սովորավ, էղպես էլ պետք ապատմի. բան չի կարելի փոխել։ Մարդիկ կան, որ ասում են, թե մոռացել են, բան կը փոխեն։ էղ լավ չէ»,—ասում է Մանուկ Թորոյանը¹)։ Բնավորության այս գծին և նման վերաբերմունքին չհավատալու իրավունք շունենք. այդ ապացուցվում է նրա պատումի ավանդականությամբ։

Այս շեղումը չի կարելի բացատրել նաև այն հանգամանքով, որ վեպում ընդհանրապես շատ են թափառիկ միջադեպերը, որոնք կապվում են մերթ այս, մերթ այն հերոսի հետ։ Դավիթ-Մելիք մենամարտը չէր կարող պատկանել թափառիկ միջադեպերի թվին. նրա տեղն ու դերը շատ որոշակի է և կայուն։

¹ «Մասնա ծոեր», հատ. Բ, մաս Ա, էջ 250։

Դավիթ-Մելիք մենամարտի հետ կապված այլ կարգի շեղումներ են նկատվում որոշ պատումներում (տե՛ս միջադեպ 73): Հայոց ձորի № 24 և Վանա № 41 պատումներում մենամարտը փոքր-ինչ թափից ընկած է նկարագրված, որովհետև հենց մենամարտի ժամանակ, երբ Մելիքը վիրավոր էր և ուժասպառ, Մելիքի մայրը Դավիթին խաբեռությամբ շղթայել է տալիս կամ գցում հորը: Սրան հաջորդում է Հովանի երազը, օգնությունը Դավիթին, ազատվելը, և շարունակվում է ընդհատված մենամարտը: Այս ընդհատումը թուլացնում է վիպական նկարագրության թափը. այդ պահի վիպական ամբողջականությունը շպետք է կիսել: Ահա թե ինչու, այնքան կարենոր է ոչ միայն միջադեպերի ավանդականությունը, այլև՝ դրանց ավանդական հաջորդականությունը: Դավիթին խաբելը և Հովանի օգնությունը իրենց տեղում են, երբ նախորդում են մենամարտին և ոչ թե ընդմիջում մենամարտը: № 35 և 37 (Ալաշկերտ) պատումներում մենամարտն ընդմիջվում է մի այլ միջադեպով: Առաջին անգամ շի հաղթում Դավիթը Մելիքին, ընդհակառակը, մարտը գնում է Մելիքի գերազանցությամբ: Հետո ուժասպառ Դավիթը աղթում է Մարաթուկում, նշաններից իմանում է, որ ինքը պիտի հաղթի Մելիքին: Այս պատումների ասացողների նախորդ վիպասաց սերնդի հայրենիքը նույնպես Ալաշկերտի հաստուր գյուղն է: Մանուկ Թորոյանի և Կարապետ Թամոյանի պատումներում Դավիթը քնում է Մարաթուկում և հզորանում (տե՛ս միջադեպ 51): Բայց այս միջադեպը նախորդում է մենամարտի միջադեպին, այսինքն՝ սա նույնն է, ինչ մյուս պատումներում՝ Դավիթը խմում է Կաթնաղբյուրի ջուրը և հզորանում: Մարաթուկում քնելու և հզորանալու միջադեպը ավանդաբար անցել է նաև № 35 և 37 պատումների ասացողներ Հակոբ Նրգեյանին և Սարգիս Հակոբյանին: Բայց այստեղ փոխվել է միջադեպի ավանդական տեղը. այն ընդմիջարկել է մենամարտի հատվածը: Ոչ միայն այս

ընդմիջարկումն է անհարկի, այլև միջադեպի ներքին էռլթյունն ստացել է այլ երանգ: Այն դարձել է այստեղ անհարկի տուրք Մարաֆուկի զորությանը, որովհետև թուլացրել է Դավթի դերը, նսեմացրել նրա հաղթանակը:

Վերը նշած շեղումները բոլոր պատումների ծանրակշիռ նույնության ու նմանության համեմատությամբ մեծ դեր չունեն, որովհետև դրանք կրում են մասնակի բնույթ և առարկայական պատճառներ շունեն իրենց հիմքում: Պատումների մեծագույն մասը համախոս է երրորդ ճյուղում առաջին թեմայի առանցքային լինելու հարցում: Շեղումներն ու մասնակի տարբերություններն անգամ ապացույց են վիպական կառուցվածքային ուրվագծի ուժեղության:

Չ ո ր ր ո ր դ թ ե մ ա .—(շինարարություն)

Սա երրորդ ճյուղում հանդես է գալիս առաջին թեմայի հետ սերտ կապի մեջ: Այստեղ շինարարության թեմայի արտահայտած գաղափարը փոքր-ինչ տարբեր է առաջին և երկրորդ ճյուղերում նույն թեմայի դրսեռումներից: Առաջին ճյուղում այն մարմնավորում էր հայրենիքի հիմնադրման գաղափարը, երկրորդում՝ հայրենիքի հաստատման, պաշտպանության, երրորդում այն խորհրդանիշ է կորցրած պետականության և իրավունքների վերականգնման, վերահաստատման: Դավիթը վերաշինում է իր հոր վանքերը, որ ավերել էր Մսրա Մելիքը: Եվ իզուր չէ, որ հենց այստեղ Դավիթ-Մելիք թշնամական լարվածությունը հասնում է իր գագաթնակետին: Առաջին թեման իր զորության հիմունքով ձգել, իրեն է միացրել շորրորդ թեման: Այս իսկ պատճառով Դավթի հետ են կապվում այն միջադեպերը, որոնք կարող էին նաև Մեծ Մհերինը լինել: Մեծ Մհերը շինում է վանք, որսասար, ամրոց, բայց պատումներում դրանց հիշատակությունը կա միայն, առանձին և ամբողջական միջադեպեր չկան: Անշուշտ, Մհերն էլ իր վանքերը շինելիս կանչել է տվիկ:

«Խինգ խարիր խամար խազար քար կտրող,
Խինգ խարիր խամար խազար քար տաշող,
Խինգ խարիր խամար խազար խող մաղող,
Խինգ խարիր խամար խազար խիճ տվող» և այլն. վանքի

մեջ. կարգել.

«Քառսուն վարտապիտ, քառսուն երեց,
Քառսուն սարկավագ» և այլն:

Բայց այս բոլորը ոչ մի անգամ Մեծ Մհերի վրա այս-
պիսի վիպական ամբողջականությամբ չի պատմվում, իսկ
Դավթի վրա՝ գրեթե բոլոր պատումներում, ոճական ու վի-
պական բազում տարբերակներով:

Սա ապացույց է այն բանի, որ վիպական-ավանդական
բոլոր միջադեպերը հավաքվում են կենտրոնական թեմայի
և կենտրոնական հերոսի շուրջը:

Երկրորդ թեմա.—(ամուսնություն):

Դավթի ամուսնության հետ կապված միջադեպերն իրենց
ուրվագծային հիմքով գրեթե նույնանում են Սանասարի
ամուսնության միջադեպերին, միայն այն մեծ տարբերու-
թյամբ, որ Դավթի ճյուղում այդ միջադեպերը վիպական են,
Սանասարի դեպքում՝ մեծ մասամբ առասպելական հիմքով
հեքիաթային: Ե՛վ նույնությունը, և տարբերությունը երևան
է զալիս միջադեպերի պարզագույն համադրությունից ան-
գամ:

Առաջին ճյուղ

1. Սանասարի համբավը
տարածվում է աշխարհով
մեկ. Պղնձե քաղաքի թա-
գավորի աղջիկը՝ Քառ-
սուն Դեղձուն ճուղ-ծա-
մը, թոշուն-աղջիկների
ձեռքով նամակ է ուղար-
կում Սանասարին:

Երրորդ ճյուղ

1. Դավթի համբավը տա-
րածվում է աշխարհով
մեկ. Կաղզվանի թագա-
վորի աղջիկը՝ Խանդութը,
աշուղ է ուղարկում Դավ-
թի մոտ՝ իրեն գովելու

2. Թոշուն-աղջիկները սը-
խալվում, նամակը գցում
են Բաղդասարի անկող-
նու վրա. խռովություն
եղբայրների միջև:
3. Սանասարը գնում է աղ-
ջրկա մոտ:
4. Ճանապարհին հովիվը
կաթ է կերցնում Սանա-
սարին՝ փորձելու համառ
նրա ուժը:
5. Սանասարի հանդիպումը
դոնապան Համդոլի հետ.
Սանասարը սեղմում է
Համդոլի ձեռքը. արյուն
է կաթում նրա եղունգնե-
րից:
6. Աղջկա քաղաքների պա-
րիսաների տակ հանդի-
պում է կախարդված փե-
սացուներին: Սանասարի
և փեսացուների զրույցը:
7. Սանասարը չի կովում
փեսացուների հետ:
8. Սանասարն ինչ-որ մե-
կից իմանում է աղջկան
տիրանալու գաղտնիքնե-
րը և կատարում բոլոր
պահանջները:
9. Սանասարը կովում է
աղջկա հոր զորքի հետ և
հաղթում այդ կովում:
Բաղդասարը գալիս է
Սանասարին օգնության:
2. Աշուղները սխալվում
են պատահում են Զենով
Հովանին. Զենով Հովա-
նը ծհծում է աշուղներին:
3. Դավիթը գնում է աղջկա
մոտ:
4. Ճանապարհին Դավիթը
ուտում է գութանավոր-
ների հացը և վարում ար-
տը:
5. Դավիթի հանդիպումը
դոնապան Համդոլի հետ.
Համդոլի և Դավիթի փո-
խադարձ վախը միմյան-
ցից. նրանք վախից բա-
րեվում են իրար:
6. Դավիթը Խանդութի տա-
նը հանդիպում է նրա
փեսացուներին: Դավիթի
և փեսացուների քեֆը,
փեսացուների խարդա-
վանքը:
7. Դավիթը կովում է փե-
սացուների հետ:
8. Խանդութն ինքն է նախ-
ընտրում Դավիթին մյուս
փեսացուներից և հրավի-
րում իր մոտ:
9. Դավիթը կովում է Խան-
դութի հոր թշնամիների
հետ և հաղթում այդ կըո-
վում: Հովանը (Թորոսը)
գալիս է Դավիթին օգնու-
թյան:

10. Բաղդասարը մենամարտում է տղամարդու շորերով ծպտված։ մի աղջկա հետ, հաղթում նրան, ամուսնանում նրա հետ։

10. Դավիթը մենամարտում է տղամարդու շորերով ծպտված խանդութի հետ, հաղթում նրան, ամուսնանում նրա հետ։

Սրանք այն մոտիվներն են, որոնք իրենց ուրվագծային հիմքով լրիվ համընկնում են, բայց իրենց դրսեռման արտաքին ձևով՝ տարբերվում։ Սանասարի ամուսնության միջադեպերում շարունակում է արտահայտվել նրա կերպարի առասպելական կողմերը։ Դավիթի ամուսնության միջադեպերում դերիշխում է իրական սիրո ու ամուսնության տարրը՝ վիպական գեղեցիկ պատկերավորմամբ։ Իսկ խանդութի գովքը բացահայտորեն հիշեցնում է միջնադարյան սիրո հայրենները, միայն թե այդ քնարական հատվածն անդամ ներծրծված է հանդիսավոր վիպականությամբ, համահնչուն խանդութի դյուցազնական կերպարին, նախորդող և հաջորդող միջադեպերի վիպական ոգուն։

Սանասարի ամուսնության միջադեպերի խտության աստիճանը պատումներում այնքան էլ մեծ չէ, այնինչ՝ Դավիթի դեպքում դրանք հանդիպում են գրեթե բոլոր պատումներում և բառացի նույնությամբ։ Իսկ շատ պատումներում, հատկապես Մշո թեկի, Սանասարի ամուսնության միջադեպերը բոլորովին չկան։ Հակառակ դրան, այդ նույն պատումներում Դավիթի ամուսնությունը պատմվում է ընդարձակ վիպական միջադեպերով։ Սա նույնպես ցույց է տալիս, որ կենտրոնական կերպարն իրեն է ձգում ավանդական միջադեպերը և հարստանում մյուսների հաշվին։

Երբորդ թեմա.—(Հզոր ժառանդ)։

Ժառանդ թեման երրորդում ունի նույն լուծումը, ինչ նախորդող ճյուղերում, այսինքն՝ Դավիթին հաջորդում է Հզոր

ժառանգը: Տարբերությունը վեպի վերաբերմունքի մեջ է՝ հանդես այդ ժառանգի ծնունդը: Առաջին ճյուղում Սանտարի և Բաղդասարի ծննդի հանդես վեպի վերաբերմունքի մեջ մի փոքր անհանգստություն կա՝ կապված աղջկա հղիության անբնականության հետ: Իսկ այն պատումներում (*Մշոթի*), որտեղ աղջկա հղիությունը բնական է, այդ անհանգստությունը չկա: Երկվորյակ եղբայրների ծնվելուց հետո անհանգստությունը գնում է կրոնական հակադրության երանդով՝ նրանց հայրը կռապաշտ, մայրը խաշապաշտ: Նույն այդ ճյուղում Մեծ Մհերի ծնունդը ունի տրամաբանական հետեւյալ իմաստը՝ «դյուցազնից դյուցազուն ու կես պիտի ծնվեր»: Բոլորովին այլ է վեպի վերաբերմունքը Մեծ Մհերի ժառանգի ծննդի նկատմամբ: Այստեղ տագնապ կա, մեծ սպասում՝ կծնվի՝ Մեծ Մհերին հզոր ժառանգ,—պիտի ծնվի նա, նդատ ծնունդը քաղաքական տհասակետից անհրաժեշտություն է: Դրա համար էլ, ինչպես արդեն նշել ենք, երկրորդ ճյուղում կենտրոնական թեման ժառանգն է: Երրորդ ճյուղում ժառանգ թեման այդպիսի սրություն չունի, մեծ հանգստություն կա վեպի վերաբերմունքի մեջ: Բայց ահա, Դավթի ժառանգի հետ կապվում է մի բան, որ չկա մյուս ժառանգների դեպքում՝ Փոքր Մհերը ծնվում է նշանով, որը մեծ խորհուրդ ունի—ձեռքը փակ է, և փակված ափի մեջ՝ մի պուտ արյուն: Վանա № 39 և 40 պատումներում այս բանը պատմվում է Դավթի վրա: Սրանք այն պատումներն են, որոնք շունեն առաջին և շորրորդ ճյուղերը, բայց պահել են որոշ հիշողություններ դրանցից: Սա այդ հիշողություններից մեկն է: Դավթի գուշակությունն իր որդու փակ ափի մասին արդեն ինչ-որ շարագուշակ բան ունի իր մեջ, որը խորանում է միշտադեպից-միջադեպ:

Պատումների միջև եղած տարբերությունները տարբեր հիմք ունեն. որոշ դեպքերում դրանց հիմքը պատմական է, որոշ դեպքերում՝ վիպական: Երկրորդ ճյուղում այդ տարբերություններն առաջացել են դերադանցապես պատմական հիմքով, առաջին և երրորդ ճյուղերում՝ վիպական: Պատմա-

կան Հիմքով առաջացած տարբերությունները պատճառ են դառնում պատումներում նկատվող անաքրոնիզմների, իսկ վիպական Հիմքով տարբերությունները նման անաքրոնիզմներ չեն առաջացնում, միծ մասամբ չեն հակադրվում վիպական ուրվագծին, հակառակ՝ հարստացնում են այն:

Օրինակ. Հերոսն օրորոցում մոտիվը տարբեր պատումներում ունի վիպական տարբեր դրսեորումներ, որոնք երբեմն առնշվում են որևէ Հիմնական գաղափարի հետ, լրացնում կամ բացահայտում այն, երբեմն էլ՝ ոչ մի գաղափարի հետ չեն կապվում և ծառացում են լոկ կերպավորման միջոց:

Նորածին Դավիթը մնում է հորից և մորից որբ: Նրան ուղարկում են Մորը, որ Մորա խանումը կերակրի, մեծացնի: Դավիթը շի ընդունում Մորա խանումի կուրծքը (տե՛ս միջադեպ 2): Հերոսի՝ իր շրջապատին հակադրվելու գաղափարն սկսվում է այստեղից: Նա սնվում է միայն Մասունից քերած մեղր ու կարագով: Այստեղից էլ սկսվում է հայրենի հողի հետ հերոսի մշտական կապի գաղափարը: Մրանց կողքին գործում է նաև վիպական մեկ այլ մոտիվ՝ նորածին Դավիթն ուտում է օրական մի փութ մեղր, մի փութ կարագ: Վիպական այս շափաղանցություն-պատկերը պարզապես կերպավորման միջոց է և ամբողջացնում է կերպարի մանկության շրջանը: Իսկ նույն միջադեպի մի այլ տարբերակ (տե՛ս միջադեպ 4): Դավիթը կուրծք ուտելիս սպանում է ստնտուներին, ոչ մի գաղափարի հետ շի կապվում, բայց և ինքնանպատակ չէ, կերպավորման միջոց է, սեղմ և արտահայտիչ պատկեր, որի միջոցով ցույց է տրվում մանուկ Դավիթի դյուցազնական ուժը: Կա նաև՝ ոչ մի ծծմոր շի ընդունում տարբերակը (տե՛ս միջադեպ 5): Մրանց մեջ ամենաթույլ տարբերակն այն է, որ Դավիթն ուտում է Մորա խանումի կուրծքը (տե՛ս միջադեպ 3): Սա վերը նշված գաղափարական ու պատկերավորման միջոցներից ոչ մեկին շի հարում:

Ահա վիպական Հիմքի վրա առաջացած տարբերությունների մի այլ օրինակ՝ կապված հերոսի զինավառման հետ: Թե ինչպես է հերոսը ձեռք բերում իր ձին, զենք-զրահը,

պատումների ճնշող մասում հանդիպում է № 42 միջադեպի ձևով՝ Դավիթը Պառավի խորհրդով հորեղբորից առնում է իր հոր ձին, զենք ու զրահը։ Այս միջադեպը գրեթե տողացի նույնությամբ պատմվում է քսանութ պատումներում, որոնք ընդգրկում են բոլոր շրջանները։ Տարածվածության նման աստիճանը ցույց է տալիս, որ այդ միջադեպն ավանդական է և ամբողջական, կատարելապես բավարարում է վիալական ուրվագծի պահանջներին, այն, որ

ա. ձին, զենք-զրահը, կախարդական որևէ զորություն անցնում է սերնդից-սերունդ որպես ժառանգություն, այսինքն՝ Դավիթը պիտի կրի այն, ինչ մի ժամանակ իր դյուցազն հորն էր։

բ. Անցած ժառանգությամբ՝ ձի, զենք-զրահ, փորձվում է, թե արդյո՞ք հերոսն իր հոր արժանի հետնորդն է, այսինքն՝ նախապատրաստվում է ուրվագծի մի այլ պահանջ՝ զավակը հզոր հորից։

գ. Շրջապատը դեռևս հերոսի մեջ չի տեսնում իր ազատարարին, չի վստահում նրա ուժին, այսինքն՝ հերոսը որպես կերպար պատրաստի չի հանդիս գալիս, նրա կերպարը որպես այդպիսին կերտվում է քայլ առ քայլ, միջադեպից-միջադեպ, բնական ու բանական հետևողականությամբ։

Այս միջադեպն ավանդական ու կատարյալ է նաև այնու, որ Դավիթին ուղղված Պառավի ուղղակի խոսքի մեջ, թե.

«Քո խեր ուներ՝
Քուոկիկ Զալալին,
Թուր Կհծակին,
Գլխու Գոտին,
Կապեն Խաբուկին,
Քամարն ի Մեջքին,
Մարութաւ Բանձրիկ Աստվարածին,
Խաշ Պատրագին, ինչ վար ազ թեին»։

(Հատ. Ա, էջ 18, տող 270—280)

որ նույն հանգով կրկնում է Դավիթն իր հորեղբորը որպես պահանջ.

«Ասաց.—Խրողբեր, կուղեմ քենհ՝
Մարութա Բանձրիկ Աստվարածին,
իմ խոր Խաչ Պատրաղին, ինչ վար աջ թևին,
Քուոկիկ Զալալին,
Թուր Կեծակին,
Գլխու Գոտին,
Քամարն ի Մեջքին,
Կապեն Խաբուկին»:

(Նույն տեղում, էջ 19, տող 290—300)

Պահպանված է զենք-զրահի, ձիու անուններն ու դրանց հնաբույր նկարագիրը: Այս հանգավորված վիպական հատվածը կրկնվում է մի քանի անգամ՝ երբ Դավիթը հագնում է, վրան մեծ հն զգեստները և փոքր, երբ խմում է Կաթնաղբյուրի ջուրը, Հովանի ափսոսանքի մեջ, Դավիթի աղոթք-երդման մեջ և այլուր: Այս կրկնություններն ստեղծում են պատմողական կատարյալ ընթացք, վիպական շունչ ու թափ հաղորդելով դրան:

Զենք-զրահին տիրանալու միջադեպի մեկ այլ տարբերակ հանդիպում է Ալաշկերտի № 33 և 34 պատումներում: Այստեղ Դավիթն իր տատ Արմաղանին ստիպելով իմանում է հոր ձիու և զենք-զրահի տեղը: Սա նախորդից տարբերվում է միայն պատմելու իր ուրույն ձևերով, մի երկու այլ մոտիվի օգտագործմամբ, եթե նկատի շունենանք այն հիմնական տարբերությունը, որ այս երկու պատումներում Արմաղանի կերպարն ընդհանրապես նորություն է, շնայած մեծ մասամբ իր դերով ու գործով նույնանում է այլ պատումների արտադրեր Պառավի կերպարի հետ:

Այս նույն զինավառման № 43 միջադեպ-տարբերակը կառուցված է Հավատալիքային Հիմքի վրա՝ Դավիթը ճգնում է Մարաթուկում և ձեռք բերում ձին, զենք-զրահը: Այստեղ դործում է բոլորովին մի նոր մոտիվ, որն այլ պատումներում հանդիպում է այլ միջադեպերի մեջ՝ Դավիթը Պառավի

խորհրդով ուխտ է գնում Աստվածածին և մատաղ անում, այնտեղ քնելով ու աղոթելով՝ դառնում հզոր (տե՛ս միջադեպ 50, 51): Այս միջադեպերում և այլուր կրոնա-հավատալիքային տարրի ուժեղությունը փոխել է դրանց ավանդական տեսքն ու բովանդակությունը, երբեմն էլ՝ ուղղակիորեն փոխարինել հեթանոսական նույնատիպ հավատալիքներին: Պատումների մեծ մասում Դավիթը հզորանում է Կաթնաղբյուրի ջուրը խմելով, այսինքն՝ ջրի զորության հեթանոսական պաշտամունք, որը մեծ տեղ է գրավում բոլոր շորս ճյուղերում՝ սկսած երկվորյակ եղբայրների ջրային ծննդից: Ջրի հետ մշտական կապի այս զորությունն է նաև, որ որպես ժառանգություն փոխանցվում է սերնդից-սերունդ: Որևէ մատուռում, վանքում աղոթելու, քնելու, Աստվածածնահրաշք երազի, զոհաբերության քրիստոնեական նոր մեկնաբանություններն ուղեկցում են հեթանոսական այս պաշտամունքին՝ դարձյալ առաջին ճյուղից սկսած:

Այնպես որ, եթե որոշ միջադեպերում մեկը փոխարինում է մյուսին անգամ ամբողջապես, նույնպես բնական է վեպի բանավոր գոյատեման բազմադարյան ընթացքի համար:

Հատուկ ուշադրության ու բացատրությունների հարկ չունեն այն տարբերությունները, թե՝ ո՞վ խորհուրդ տվեց Դավթին Կաթնաղբյուրի ու Պողպատե սյան մասին (Զենով Հովան, Քեռի Թորոս, Սգավոր Մամիկ, Քուոկիկ Զալալին. տե՛ս միջադեպ 47, 48, 49): Վեպական այս տարբերությունները շեն հակասում միմյանց, այլ միայն հարստացնում են վեպի կառուցվածքային հենքը: Այս և նույնանման տարբերություններին շենք անդրադառնում. դրանք արդեն արտացոլված են միջադեպերի տախտակի վրա:

Քննական առանձին համեմատության հնարավորություննեն տալիս նաև այն տարբերությունները, որոնք կապվում են «կա-շկա» հասկացություններին, այսինքն՝ ինչո՞ւ այսինչ միջադեպն այս պատումներում կա, մյուսներում՝ ոչ. ինչո՞ւ վիպական մի անզուգական միջադեպ հանդիպում է միայն մեկ պատումում և այլն:

Բայց եթե այդ տարբերությունները տալիս են մի այնպիսի որակ, որն արտացոլում է ազգագրական շրջանների միջև եղած տարբերություններ և դառնում օրինաշափություն, հենց այստեղ է բացվում բանադիտական համեմատական ուսումնասիրության հնարավորությունը:

Երրորդ ճյուղում Մոկս և Մուշ խմբավորումներն այնպես շեշտված չեն, ինչպես մյուս ճյուղերում։ Սրա պատճառը երրորդ ճյուղի կայուն ավանդականությունն է։ Կարելի է ասել նաև հակառակը, այսինքն՝ երրորդ ճյուղի համասեռ, համանման պատկերը ապացույց է նրա ավանդականության։ Բոլոր հիմնական միջադեպերը առկա են անխտիր բոլոր պատումներում՝ թե՛ Մոկաց, թե՛ Մշո թեկի։ Այնուամենայնիվ, երրորդ ճյուղում ևս Մոկաց պատումները որոշ կետերում զգալիորեն տարբերվում են Մշո պատումներից։ Ամենից առաջ այդ տարբերությունը կապվում է երկու հիմնական կերպարների՝ Զենով Հովանի և Քեռի Թորոսի հետ։ Այս տարբերությունը միայն երրորդ ճյուղինը չէ, սկսվում է առաջին ճյուղից, վերջանում շորրորդով։ Այս երկու կերպարների հիմքը մեկն է, մեկ կերպար միայն՝ Սասնա տաննահապետը, միտքը, փորձը, հեռատեսությունը, սերունդների մշտական ուղեկիցը, հերոսների արարքների բարոյաշափը, սատարը, նեցուկը։ Վիպական ուրվագծի բազում կետեր անմիջականորեն առնչվում են այս կերպարի հետ, որովհետև սա է, որ ստեղծում է հերոսի և նրա շրջապատի փոխհարաբերությունը, պահում է հավասարակշիռ վիճակ այդ հարաբերության մեջ։ Այս կերպարի հետ ունեցած մշտական կապի և հանդեպ հերոսն ունեցած նրա վերաբերմունքի միջոցով է արտահայտվում հերոսի աստիճանական աճը, այլ խոսքով, այս կերպարի աշքի առջև և նրա օգնությամբ է հերոսը հերոս դառնում։ Եվ ահա, այս մեկ կերպարը վեպի պատումներում դարձել է երկու—Մոկսում՝ Զենով Հովան, Մուշում՝ Քեռի Թորոս։ Հիմքում նույնը լինելով հանդերձ, այս երկու կերպարներն իրենց նկարագրով տարբերվում են, շնայած նույն հիմքը ենթադրում է նույն դերը։ Այս տարբերությունները միայն խառնվածքային չեն, թեև խառնվածքը

նույնպես արտահայտում է ազգագրական շրջանի պատկերը Այդ երկու կերպարների միջև եղած տարբերություններն, ավելի հետաքրքիր են իրենց վիպական և պատմական հիմքերով:

Հերոսը մեծանում է օտար միջավայրում. սա վիպական ուրվագծի կետերից մեկն է։ Համաձայն այս կետի, Մեծ Մհերի որդիները գերի են Մսրա Մելիքի մոտ։ Այս մոտիվը գործում է և Մոկաց, և Մշո պատումներում։ Բայց ահա, Մշո թեում կա մի այսպիսի միջադեպ, որ չկա Մոկսում։ Քեռի թորոսը շատ է վշտացած Սասնա տան ժառանգների նման վիճակով և որոշում է ամեն գնով նրանց վերադարձնել հայրենի Սասուն։ Նրա այս վիշտն ու մտահոգությունն անմիջականորեն հարում է ժառանգ-օջախ թեմային։ Քեռի թորոսը գնում է Մսրու Մսրա Մելիքն առաջարկում է իր պահանջանները, որոնք նույնպես բխում են այդ գաղափարից, այս սինքն, նա էլ իր օջախի՝ Մսրա տերության անվտանգությունն ապահովելու համար Սասնա ժառանգներից պահանջում է ցմահ հնագանդություն—նրանք պիտի անցնեն իր թրի տակով։ Քեռի թորոսն ունի մեծ փորձառություն, նա այդ իրադրության մեջ մեծ կարևորություն չի տալիս Մելիքի պահանջին և պատրաստ է կատարելու այն։ Այս միջադեպի հիմքում ընկած է թրի տակով անցնելու վիպական հայտնի մոտիվը, որին կարելի է բերել բազում զուգահեռներ պատմությունից՝ բոնի գերություն, պատանդ, հնագանդության պահանջ, առերես հնագանդություն կամ անհնագանդություն։ Անընդհատ կրկնվող այդ պատմությունը հայ բանահյուսության մեջ դարձել է սիրված վիպական մոտիվ և լայն տարածում գտել։ Այն, ըստ վեպի, ավելի մեծ նստվածք է տվել Սասուն-Մուշ հատվածում և մտել է վեպ՝ նորոգվելով Դավթի կերպարի միջոցով։ Մոկաց պատումներում այդ մոտիվը կորել է, կամ վեպ չի մտել, և դրանք զրկվել են վիպական մի գեղեցիկ միջադեպից և կատարելության հասած հետևյալ պատկերից։

«Դավիթ շգնաց թրի տըկով, կշտով ընցավ.
Ուր ճոշ բոթ քիսավ ի ջարդու քար՝
Կրակ ելավ մոտեն»:

(Հատ. Բ, մաս Ա, էջ 19, տող 390)

Այս միջադեպերում առանց ճիզ ու ջանքի մի նոր աստիճանի են քարձրանում Քեռի թորոսի և Դավիթի կերպարները:

«— Հե՞յ, շան որդի,
Ես նստիմ հողա, կերուխում էնիմ,
Մսրամելիք իզա, տանի զմբր ճժեր,
ԶԱՐԹԱՄԷԼԻՔԻ տղեկներ զըրթրին,
Ես նստիմ հողա, կերուխում էնիմ,
Ամոթ չէ՞ մըզի...
Հաց զինի ու տեր կենդանի,
Քըն զըդ կըթխեն եվել խմած շեղնիմ.
Ելնեմ էրթամ իմ ճժերուն էրեվան»:

(Նույն տեղում, էջ 13, տող 360)

Սա Քեռի թորոսի խոսքն է, որն ինքնին տալիս է այդ կերպարի բնորոշումը: Այսպիսի վիշտ ու մտահոգություն ու մի պատումում շի ապրում Զենով Հովանը, որովհետև շկա այդ ամբողջ միջադեպը, շկա թրի տակով անցնելու վիպական մոտիվը: Եվ առաջանում են Քեռի թորոսի ու Զենով Հովանի կերպարների նաև խառնվածքային տարբերությունները: Այս և մյուս բոլոր միջադեպերում Քեռի թորոսի կերպարը շարունակում է դրսեորվել որպես ամենախեկան Սասնա ծուռ, Սասնա տան մեծ ծուռ, որը շատ հաճախ անմիջապես մոռանում է և՛ իր տարիքը, և՛ հեռատեսությունը, և՛ զգուշավորությունը: Սրան հակառակ, Զենով Հովանը Սասնա ծուռ չէ. նա ծոերի խելամիտ հորեղբայրն է:

Մի այլ միջադեպ, ուր պատմվում է Դավիթի ու նրա նախրորդ ընկերոջ, ցասման ժամի հարիսայի, դեկտի հետ Դավիթի հաշվեհարդարի, քարայրի մեծ գանձի մասին, նույնպես ճնշող դերակշռությամբ Մշո պատումներինն է (տե՛ս միջադեպ 20, 21, 22), Մոկսից միայն չորս պատում ունեն այդ միջադեպերը (պատումներ՝ № 5, 10, 11, 38): Դավիթի՝ Մըս-

րա Մելիքի բանակում ծպտված հյուրասիրվելու (տե՛ս միջադեպ 63), նրա գութան անելու ու շատակերության (տե՛ս միջադեպ 83) միջադեպերը նույնպես կամ բացառապես Մշո պատումներինն են, կամ ավելի սիրված ու տարածված են այդ թեում:

Զրի հեթանոսական պաշտամունքի հետ կապված առասպելական տարրի գերակշռությունը այս ճյուղում ևս, ինչպես առաջինում, մնում է Մոկաց պատումների կողմը. մի բան, որ համեմատաբար թույլ է պահպանվել Մշո կողմերում: Մոկաց թեր հետևողականորեն դարձացնում է զուրը ոռպես Սասնա դյուցազունների հզորության աղբյուր վիպական մոտիվը: Այս իմաստով, Հովանի խորհուրդը Դավթին Կաթնաղբյուրի մասին, Դավթի ու Քուոկիկ Զալալու այնտեղ լողանալու ու հզորանալու միջադեպերը Մոկաց պատումների մենաշնորհն է, Մշո թեում դրանք քիչ են պատմվում: Սա բնական շարունակությունն է Մոկս-Մուշ խմբերի այն հիմնական տարբերության, որ նկատվում է առաջին ճյուղում՝ կապված երկվորյակ եղբայրների ծննդի հետ:

Ամբողջ վիպականությամբ հանդերձ, շատ տեղերում զգացվում է, որ Մոկաց պատումներն առանձնապես հակված են առասպեկտական ու հեքիաթային մոտիվների եղողմը: Մշո կողմերում ավելի սիրված են վիպական ու իրապատում մոտիվները:

Այս հողի վրա պատումների մեջ կան նաև մանր տարբերություններ, որոնք մասնակի համեմատությունների հնարավորություն տալիս են, բայց քանի որ դրանք առանձնապես մեծ սկզբունքների ու համակարգման հետ շեն կապվում և արդեն ինքնին արտացոլվում են միջադեպերի տախտակի վրա, դրանց շենք անդրադառնում:

Սա Փոքր Մհերի ճյուղն է, որով և փակվում է «Սասնածոերի» վիպական ցիկլը։ Փոքր Մհերը Սասնատան դյուցաղնական վերջին սերունդն է։

Չորրորդ ճյուղն իր կառուցվածքով մի փոքր տարբերվում է նախորդներից։ Հիմնական թեմաներն այստեղ նույն գերը շունեն, ինչ առաջին երեք ճյուղերում։ Դրանք այստեղ ևս այս կամ այն շափով գործում են, բայց վիպական այլ դրսեորումներով։

Առաջին թեմա.—(Կոապաշտ և խաչապաշտ երկրներ, մշտական հակամարտություն նրանց միջև, կովի իրադրություն)։

Կոապաշտ-խաչապաշտ թեման Դավթի ճյուղում արդեն ավարտվել էր. այն իր վիպական բնականոն լուծումն ստացել էր՝ Դավիթն սպանել էր Մորա Մելիքին, վերջ դրել բռնությանը, կոապաշտ-խաչապաշտ հակամարտությանը։

Նման լուծումից հետո այդ թեմայի շարունակվող դրսեորումները նույն նպատակը և նույն մեկնաբանությունը ունենալ շեն կարող։ Ահա թե ինչու, առաջին թեման շորրորդ ճյուղում հանդես է գալիս շատ թույլ։ Փոքր Մհերի բոլոր կոիվները զանազան թշնամիների հետ, տեղի են ունենում նրա թափառումների ճանապարհին. այդ կոիվներից ոչ մեկը Սասունի ներսում չէ և Սասունի համար չէ։ Եթե նույնիսկ այդ կոիվների միտումն ու գաղափարն այն է, թե Մհերն ուզում է աշխարհի երեսից վերացնել կոապաշտությունը, դադարձյալ կապ շունի կոապաշտ-խաչապաշտ թեմայի հիմնական գաղափարի հետ։ Եթե նույնիսկ Մորա Մելիք—Սասնածուու գիծը Դավթով շի ավարտվում և հասնում է մինչև Փոքր Մհեր, նույնիսկ այս դեպքում Մելիքի և Փոքր Մհերի կոիվն այլ կերպարանք ունի։ Խոսքը Ալաշկերտի № 33 պատումի մասին է. այս հակամարտության բնույթը մենք արդեն բացահայտել ենք Դավթի ճյուղի առնշությամբ։ Մորա Մելիքն այստեղ բռնություն մարմնավորող ուժ չէ, այլ՝ Գոհարի

նշանած (տե՛ս Տախտակ 9, միջադեպ 18): Իսկ Սասնա ո՞ր հերոսը չի կովում իր ընտրած աղջկա փեսացուների հետ: Սա վիպական ուրվագծի այլ կետ է և կուպաշաղտ-խաշապաշտ թեմայի հետ կապ չունի:

Միայն մեկ պատումում պահպանվել է Սասնա վրա բռնության և Փոքր Մհերի կողմից այդ բռնության վերացման գաղափարը. դա Մոկաց № 5 պատումն է: Այստեղ պատմվում է, որ Կողբադնի թոռները հարձակվում են Սասունի վրա, Մհերը կոտորում է նրանց (տե՛ս միջադեպ 13): Կողբադնի դիմն ուղղակիորեն շարունակվել է շորորդ ճյուղում: Բայց, արդյո՞ք սա բնորոշ է այդ ճյուղին: Մյուս պատումներում շկա այս միջադեպը: Թեմայի մեքենայորեն կրկնվող դրսեորումն ավելորդ է վեպում. թեման պիտի միջադեպից-միջադեպ, ճյուղից-ճյուղ զարգացում ապրի: Եթե շկա այդ զարգացումը, միջադեպը դառնում է թույլ կրկնություն, և բնական է, որ մնում է եղակի պատումի սահմաններում:

Առաջին թեմայի հետ կապ չունեն կովի նաև այն միջադեպերը, երբ Փոքր Մհերը լուծում է Դավթի վրեժը (տե՛ս միջադեպ 8): Մրանց հիմքում ընկած է այլ մոտիվ՝ վրիժառությունը:

Երկրորդ թեմա.—(ամուսնություն):

Փոքր Մհերի ամուսնությունը նույնպես հիմնված է սիրո և հավասար պայմանների վրա, բռնության հիմքը շկա: Միջադեպերը փոքրինչ տարբեր են, որովհետեւ հիմնված են տարբեր մոտիվների վրա: Էռությունը նույնն է, ինչ Սանասարի և Դեղձուն Ծամի, Դավթի և Խանդութի ամուսնության դեպքում:

Ասվել է արդեն, որ վեպում ամուսնությունը ինքնին նպատակ չէ, նպատակը ժառանգն է: Հենց այստեղ է Փոքր Մհերի ճյուղի տարբերությունը մյուսներից:

Ե Ա Ր Ո Ռ Ո Ւ Թ Ի Մ Ա .— (Հ Ա Պ Ո Ւ Ժ Ա Պ Ա Ն Դ) :

Փոքր Մհերը ժառանգ շունի և հոր անհծքով մնալու է անժառանգ: Սա ժառանգ թեմայի նոր լուծում է վեպում: Գաղափարը նույն հարցադրումն է՝ ժառանգ կլինի՞, թե՞ չի լինի. տարբերությունը պատասխանի մեջ է—ո՛չ, չի լինի:

Վեպի միասնությունը և շարունակական ընթացքը սերունդների հաջորդափոխության մեջ է: Փոքր Մհերը փոխարինող սերունդ շունի, և վեպը, բնականաբար, պիտի ավարտվեր:

Ալաշկերտի № 33 պատումը միակն է, որ պատմում է, թե Փոքր Մհերը ժառանգ ունեցավ, իր ձեռքով սպանեց իր որդուն և որդեսպանության մեղքից ու կոկծից փակվեց քառի մեջ (տե՛ս միջադեպ 30):

Մհերի որդու ծնունդը հիմնված է մի մոտիվի վրա, որը կրկնվում է վեպի բոլոր շորս ճյուղերում, կապված բոլոր շորս սերունդների՝ Սանասարի, Մեծ Մհերի, Դավթի և Փոքր Մհերի հետ: Այդ մոտիվը հետևյալն է. հերոսը ապօրինի կապի մեջ է մտնում մի այլազգի կնոջ հետ, այդ կապից ծնված ժառանգի ձեռքով էլ տեղի է ունենում հերոսի մահը (տե՛ս Տախտակ 6, միջադեպ 27, Տախտակ 7, միջադեպ 30, Տախտակ 8, միջադեպ 87 և 117, Տախտակ 9, միջադեպ 28):

№ 26 պատումի (Մուշ) առաջին ճյուղում Աբամելիքը (այսինքն՝ Սանասարը) ապօրինի կապի մեջ է մտնում մի որբեայրի կնոջ հետ, ծնվում է Մսրամելիքը, որը և սպանում է Աբամելիքին՝ իր հորը (տե՛ս Տախտակ 6, միջադեպ 27):

Մեծ Մհերը № 27 (Մուշ) և № 42 (Ալաշկերտ) պատումներում մտնում է ապօրինի կապի մեջ մի որբեայրի կնոջ հետ, ծնվում է Մսրամելիքը: Զկա երկրորդ մասը՝ Մելիքը չի սպանում Մհերին (տե՛ս Տախտակ 7, միջադեպ 30), բայց այդ նույն Մելիքն է, որ դառնում է պատուհաս Սասնա դըլիին:

Դավիթը նույնպես ապօրինի կապի մեջ է մտնում մի կնոջ հետ. որոշ պատումներում դա Զմշկիկ Սուլթանն է (տե՛ս Տախտակ 8, միջադեպ 87), և այդ կապից ծնված աղ-

շիկը (կամ տղան՝ № 43 պատում) սպանում է Դավթին (տե՛ս
Տախտակ 8, միջադեպ 117):

Այս մոտիվներին երբեմն միանում է նաև մեկ ուրիշը՝
հերոսը զնում է օտարություն և մի որևէ նշան է տալիս
(ապարանջան, իր թաշկինակը) կնոջը, իրենց ապագա զա-
վակի համար. այդ նշանով վերջում ճանաշում են իրար հայր
ու որդի (մեծ մասամբ մենամարտի ժամանակ):

Այս բոլոր մոտիվները գրեթե նույնանման միջադեպի-
րով կրկնվում են նաև Փոքր Մհերի ճյուղում (տե՛ս Տախտակ
9, միջադեպ 28, 29, 30): Միայն այստեղ հոր և որդու կոփին
ունի այլ լուծում: Եթե մյուս դեպքերում որդին էր սպանում
հորը (Սանասարին, Դավթին), կամ մենամարտում որդին
հաղթում էր հորը, և հայրն անիծում էր որդուն (Դավիթը
Փոքր Մհերին), ապա այստեղ հայրն է (Փոքր Մհեր) սպա-
նում իր որդուն: Այսպիսի լուծումն իր հիմքում անկախ մո-
տիվ է, բայց երբ Փոքր Մհերի դեպքում միացել է հոր և որ-
դու կովի վիպական մոտիվին, դարձել է Մհերի Ագռավու-
քարում փակվելու մեկնություն՝ Մհերն սպանեց իր որդուն և,
զգալով իր մեղքի ծանրությունը, ճեղքեց աղառած քարը,
փակվեց քարի մեջ:

Բոլոր դեպքերում, Մհերի քարում փակվելը հետեանք է
հոր և որդու կովի, անկախ այդ կովի լուծումից. մի դեպքում՝
պարտված հայրը (Դավիթ) անիծում է որդուն (Փոքր Մհե-
րին) մնալ անժառանգ, անմահ, և հողը չի վերցնում Մհերին,
փակվում է քարում. մյուս դեպքում՝ հաղթանակած և որ-
դեսպան հայրը (Փոքր Մհեր) իր մեղքի ծանրության հետ
փակվում է քարում:

Ժայռերին դամված կամ քարում փակված հերոսների
առասպելը, միանալով նոր վեպին, պիտի ինչ-որ ձևով են-
թարկվեր վեպի ընդհանուր կառուցվածքին, ձուլվեր նրա
հետ՝ մի ամբողջություն կազմելու համար: Չուլվելով հան-
դերձ, սակայն, այս առասպելն իր հիմքով ավելի անկախ
է մնացել, քան վեպի մյուս ճյուղերը և նրանցում հանդես
եկող առանձին առասպելները: Մյուսները համեմատաբար
ավելի լավ են ձուլվել միմյանց, քան Փոքր Մհերի ճյուղը:

Նախորդ երեք ճյուղերի այդքան լավ միանալու և սերտաճման հիմքը հիմնական թեմաների զորությունն է և դրանց ընձեռած հնարավորությունները։ Մհերի ճյուղում այդ թեմաների դերը թույլ է, որովհետեւ նախ՝ այդ թեմաները հարատե չեն և մի տեղ ստանում են իրենց լուծումը, սպառում իրենց հնարավորությունների դրսեւորումները. երկրորդ՝ Փոքր Մհերի ճյուղում ուժեղ է բոլորովին մի նոր թեմա, իր անկախ հիմքով՝ քարում փակված արդեմ հազել էր պատմական որոշակիության զգեստ, կապվել Արտաշեսի որդի Արտավազդի անվան հետ և միացել «Վիպասանքին»։ Երկրորդ անգամ այն կապվում է առասպելական մի այլ կերպարի Մհերի անվան հետ, դառնում Դավթի որդի և մտնում «Սասնածոեր» վեպի մեջ։ Ուրեմն քարում փակված հերոսն երի թեմայի միացումը ժողովրդական վեպին՝ նույնականացնելու առաջնական գործընթաց է։

Չ ուրսորդ թեմա. — (Հինարարություն):

Շինարարության թեմայի միայն հետքեր կարելի է դրանել Փոքր Մհերի ճյուղում, այն էլ՝ ոչ բոլոր պատումներում։

Մհերը կամուրջ է կապում գետի վրա, կամրջով անցնողին ծեծում, որ շանցնեն իր կամրջով, շանցնողին ծեծում, որ անցնեն կամրջով, գետով շանցնեն (տե՛ս Տախտակ 9, միջադեպ 4)։ Այս միջադեպը Մհերի կերպարին հատուկ երկվության (շարու բարի) դրսեւորման մի բնորոշ օրինակ է¹։

Հետեւ պատումում շինարարության թեմայի հետ կապված միջադեպերն այսպիսին են. Մհերը հեղեղումից ազատում է Զղիբու քաղաքը (տե՛ս միջադեպ 5) և Բաղդադում եկեղեցի

¹ Վիպասաց Զատիկի հապոյանը վկայում է, որ այդ միջադեպը վեպի հետ գործ չունի և վերցված է այլ հեքիաթներից։

կառուցում իր պատ Բաղդասարի գերեզմանի վրա (տե՛ս միշտեալ 27):

Այս հատուկենտ միջադեպերը հնարավորություն շեն տալիս չորրորդ թեմայի մասին ավելին ասելու:

Այս բոլորի բնական հետեւանքով, Փոքր Մհերի ճյուղն ունի մյուսներից բոլորովին տարբեր ավարտ:

Ինչպե՞ս են ավարտվում վեպի այն պատումները, որոնք շունեն Փոքր Մհերի ճյուղը (թվով 17 պատում): Նախ՝ այն հինգ պատումները, որոնք պատմում են միայն Սանասարի և Բաղդասարի մասին: Դրանցից երեքը՝ № 3, 4 և 44 վերջանում են Սանասարի և Բաղդասարի ամուսնությամբ: № 7 պատումը նույնպես ունի այսպիսի ավարտ, բայց և նշվում է, որ.

«Սանասարին՝ Աստված էտու, լաճ ըմ էլավ.

Անուն դրին Մհեր»:

(Հատ. Ա, էջ 325, տող 580)

Այս պատումի ասացող Մոկացի Սախոն եթե նշում է, որ Սանասարին Մհեր անունով որդի եղավ, ուրեմն, նա լսել է նաև Մհերի մասին. չէ՞ որ Սախոյի իսկ վկայությամբ, վեպը լսել է իր պատ վիպասաց Պողոսից, որն իմացել է վեպի «յոթ ճյուղը»: Սախոն կարող էր Սանասարից և Բաղդասարից հետո անցնել Մեծ Մհերի ճյուղին, որովհետև նրա պատումից երեսում է, որ շատ լավ ասացող է, արտակարգ հիշողության ու հարուստ պատմելառնի տեր, ասացողների սերնդից և քանից լսել է վեպն ամբողջությամբ: Այս իմաստով, Սախոյի պատումի ավարտը նույնը չէ, ինչ № 3, 4 և 44 պատումներինը: Սա ինչ-որ պատճառով ընդհատված պատում է:

Ընդհատվածի տպավորություն է թողնում նաև № 20 պատումը: Այն վերջանում է երկվորյակ եղբայրների բերդաշինության միջադեպով: Այս ավարտը նույնպիս մեզ թվում է անբնական: Կարող է ասացողը պատմել կամ լսած լինել միայն այսքանը, բայց սա չի նշանակում վիպական ավարտ:

Մնացած տասներկու պատումները, որոնք ունեն ճյուղացին տարբեր ընդգրկում, ունեն երեք կարգի ավարտ, վերջանում են.

ա. Մելիքի դեմ Դավթի տարած հաղթանակով.—№ № 14, 16, 18, 22, 31, 46:

բ. Դավթի և Խանդութի ամուսնությամբ.—№№ 15, 39, 40:

գ. Դավթի և Խանդութի մահով.—№№ 34, 43:

Փոքր Մհերի ճյուղն այս ավարտներից և ոչ մեկը շունիր Մհերը փակվում է Ագռավու քարում։ Միայն մեկ պատում (№ 9՝ Մոկս) Մհերի այլ վախճան է տալիս։ Մհերն սպանում է իր հորը՝ Դավթին, և անհայտանում։ Սա էլ առնչվում է Վերը բացահայտված հոր և որդու կոփվը վիպական մոտիվին։

Փոքր Մհերի ճյուղի վիպական ավարտը թելադրված է նրա հիմնական թեմայի զորությամբ՝ ժայռերին դամված կամ քարում փակված թեմայի պահանջով։ Այս թեման գործում է միայն Փոքր Մհերի ճյուղում և, բնականաբար, միայն սրա ավարտն է պայմանավորում։ որը այս և վերը նշած ճյուս պատճառներով նախորդող երեք ճյուղերի ավարտ լինել չէր կարող։

* * *

Այժմ, երբ արդեն տրված է «Սասնա ծոեր» ժողովրդական վեպի կառուցվածքային վերլուծությունը, հարկ է կրկին անդրադառնալ նախորդ երեք խնդիրներին՝ վեպի գրառման ժամանակին և հասարակական պայմաններին, տարածմանն ու տեղայնացմանը և ճյուղերի քանակային հարաբերությանը։ Այդ անհրաժեշտությունը բխում է խնդիրները և դրանց լուծումներն ամբողջացնելու պահանջից։

Առաջադիր խնդիրներից յուրաքանչյուրը կարելի է լուծել հարցադրման իր իսկ շրջանակներում, ինչպես և դա արված է աշխատանքի առանձին գլուխներում։ Սակայն, ինչպես հարցադրումն ինքը, այնպես էլ վեպի կառուցվածքաբանական հիմքի բացահայտումը, ենթադրում է ավելի լայն և ամփոփ հետևությունների հնարավորություն։

Հայոց Ծյուղ

1. Վեպի ժամանակագրությունը և ասացողների հասարակական կազմի բնույթն ու էռությունը բացահայտված է առաջին գլխում ինքնին, անկախ վեպի բովանդակությունից և կառուցվածքից։ Վեպի կառուցվածաբանական օրինաշափությունների պարզաբանումն առաջ է քաշում խնդրի լուծման նաև այսպիսի պահանջ։ Վեպի հիմքում, ինչպես ասվեց վերևում, ընկած է վիպական կառուցվածքի հետևյալ անհըրաժեշտ պայմանը։

ա. Հերոսական կովի իրադրություն։

բ. Կովի հաղթական ավարտ։

գ. պետության հաստատում կամ կորցրած պետականության վերականգնում։

Այսպիսի իրադրության ընկալումը կարող է միայն համաժողովական լինել և ոչ ժողովրդի որևէ խավի մենաշնորհը։ Այս ընկալման ներշնչանքը միայն կարող է վեպ կերտել, և վիպակերտման այդ ընթացքին կարող են մասնակցություն բերել ժողովրդական բոլոր զանգվածները, ժողովուրդ բառի տմելայն իմաստով։

Այս իսկ պատճառով էլ, վեպի ասացողների հասարակական կազմի վերլուծությունն առաջին գլխում բարձրացված է միայն ու միայն գրառման ժամանակաշրջանի (XIX դարավերջ և XX դար) պատմա-հասարակական պայմանների տիստաշտի վրա և այդ պայմանների հետ կապի մեջ։ Այսինքն՝ դա վեպի գոյատևման և պահպանման միայն մեկ ժամանակաշրջանի պատկերն է, և վեպի ստեղծման ու փոխանցման ողջ ընթացքի վրա տարածել չի կարելի։

2. Վեպի կառուցվածաբանական վերլուծությունը հնարավորություն է տալիս բացահայտել վեպի ժանրային այն առանձնահատկությունը, թե ինչու վեպը ոչ միայն իր ստեղծմամբ, այլև գոյատևմամբ կարող է չկրել համազգային բնույթ և մնալ պատմա-աշխարհագրական որոշակի տարածքի սահմաններում։ «Սասնա ծոերը» որպես ավանդական-վիպական մի ամբողջ ցիկլի օղակներից մեկը, պիտի ստեղծվեր հենց այնտեղ, ուր պատմական և վիպական

ամուր ավանդներ ունեին նախորդ վեպերը։ Վիպական այդ բնօրրանն իր աշխարհագրական ընդգրկմամբ համընկնում է պատմական այն բնօրրանին, ուր առաջացել են հայկական առաջին ցեղերն ու պետությունները, այն տարածքն է, որ մշտապես եղել է այլազդիների դեմ հայերի մղած կոփվների կենտրոններից մեկը։ Ազգապահպանման համար մըղված կոփվների պատմական որոշակի իրադարձությունները ժամանակ առ ժամանակ նյութ են դարձել հանգունանման վիպական զրույցների և կերտվել որպես նոր վեպ՝ վեպի հին հայրենիքում։

Վեպի այդ հին հայրենիքն իր տարածքով մեծ մասամբ համընկնում է Տուրուբերան—Վասպուրական աշխարհին։ Այդ աշխարհն էլ պահել է վեպը և հասցրել XIX դար։

Տեղայնացման իմաստով վեպը լայն, համահայկական բնույթ չի կրել, որովհետև նախ՝ վեպն իր ժանրային առանձնահատկությամբ կապվում է պատմական որոշակի տեղավայրերի հետ, այսինքն՝ վեպն ունի որոշակի հայրենիք։ Երկրորդ. վեպը երկար դարեր կապված է եղել իր հայրենիքի հետ և շատ ուշ է դուրս եկել նրա սահմաններից։ ըստ մեզ հասած վկայությունների, միայն XIX դարի առաջին կեսին այն արևմտահայ հատվածի հետ անցավ Արևելահայաստան։ Այդ անցման բնույթն արդեն քննարկված է երկրորդ դիմում։

3. Վեպի կառուցվածքային հիմքի հետ է կապված նաև ճյուղերի քանակային հարաբերությունը։ Եթե պարզվում է, որ բոլոր ճյուղերի հիմքում ընկած է վիպական կառուցվածքային միևնույն ուրվագիծը, և դա պատճառ է նրանց միանալու կամ անջատվելու, ապա վեպի ճյուղային տարբեր ընդգրկումը լրիվ բնական է։ Եթե ճյուղերի միացությունը մեքենայական չէ, այլ ներքին հարաբերակցության հիման վրա, և այդ հարաբերության մեջ ճյուղերը համագոր չեն, բնականաբար, ամենից շատ տարածում պետք է ունենակենտրոնական, հիմնական ճյուղը, որպես առանձին վեպ։ Այս դեպքում, այդ կենտրոնականին նախորդող կամ հա-

ջորդող ճյուղերը կորցնում են իրենց ինքնուրույն, անկախ գոյությունը և միանում նրան. նախորդը, որպես կենտրոնական հերոսի ծնող, հաջորդը՝ ժառանգ: Ահա թե ինչու, այն պատումներում, որոնք անում են Դավթի պատմությունը որպես առանձին վեպ, Մեծ և Փոքր Մհերներն ունեն ընդամենը մի երկու միջադեպ: Այդ ընդգրկմամբ նրանք երբեք առանձին պատմվել չեն կարող: Դավթի հետ միասին էլ նրանք ընկալվում են ոչ որպես առանձին ճյուղեր, այլ՝ առաջինը Դավթի հայր, երկրորդը՝ Դավթի որդի: Վեպի այսպիսի տեսքը գերակշռող է Մոկաց թևում:

Իսկ այնտեղ, ուր այդ երկու ճյուղերն ավելի մեծ ընդարձակություն ունեն (Հատկապես Մեծ Մհերը՝ Մշո թևում), խոսում է վիպական կառուցվածքի մի այլ առանձնահատկություն. Հնարավոր է, որ բոլոր ճյուղերում ևս վիպական ուրվագիծը հանդես գա իր ամբողջությամբ, այսինքն՝ բոլոր կերպարների նկատմամբ կիրառվեն ուրվագծի բոլոր կետերը (ծնող, ծնունդ, մանկություն, պատանեկություն, գործեր, ամուսնություն, ժառանգ, մահ): Ընդարձակության դեպքում անգամ երկու Մհերները չեն առանձնանում՝ դարձյալ վեպում իրենց գրաված դիրքի պատճառով, նախորդում կամ հաջորդում են Դավթի ճյուղին, չեն կարողանում պոկվել Դավթի ձգողական մեծ ուժից: Մինչդեռ Դավիթը կարողանում է առանց նրանց գոյություն ունենալ, նրանք առանց Դավթի՝ չեն կարողանում: Դավթի անկախությունն ապահովվում է հերոսական կովի իրադրությամբ և լուծմամբ: Երկու Մհերների դեպքում այս պայմանը չի գործում կամ գործում է շատ թույլ: Օրինակ. որոշ պատումներում պատմվում է Մեծ Մելիքի կամ Մեծ Մհերի կոփվների և Հաղթանակների մասին: Բայց այդ պատմությունները ոչ թե առանձին միջադեպեր են, այլ՝ թուցիկ հիշողություններ, որովհետև եթե դրանք երկու ճյուղում էլ ունենային վիպական նույն ընթացքը, ճյուղերից մեկն ու մեկը վեպում կդառնար կրկնություն: Ուրեմն, ճյուղերի ներքին հարաբերությունն այս դեպքում նույնպես բնական է, որովհետև կովի իրադրությունը երկու ճյուղում վիպական նույն ընթացքն ունենալ չեր կարող:

Երբ բոլոր ճյուղերում կիրառվում է վիպական ուրվագիծն իր բոլոր մասերով, ճյուղերի միանալու դեպքում սյուժետային գծի մեջ առաջանում են կրկնություններ, կրկնվող միջադեպեր, որոնք պատմվում են մի քանի սերունդների վրա:

Զնայած, ուրվագիծի նույնության պատճառով կրկնվող միջադեպերը կարող են բնական և բնորոշ լինել յուրաքանչյուր կերպարի, այնուամենայնիվ, դրանք բոլոր պատումների և շորս ճյուղերի ընդհանուր համեմատության մեջ գրտնում են իրենց տեղը: Եթե անգամ միևնույն միջադեպը կապվում է երկու-երեք կերպարի հետ, հակասություն չի առաջանում, բայց նայած ինչ միջադեպ, որ կերպարի հետ, որտեղ:

Վիպական-ավանդական կառուցվածքային ուրվագիծը, գործելով բոլոր շորս ճյուղերում, պատճառ է դառնում կըրկընվող միջադեպերի առաջանալուն, բայց և կարգավորում է դրանց տեղն ու արտահայտման ձևերը:

Երբ մաս առ մաս համեմատվում ու համեմատվում են վեպի բոլոր ճյուղերն ըստ վիպական ուրվագիծի և հիմնական թեմաների, բացահայտվում է այն մեծ ճշմարտությունը, որ նույն հիմքի վրա, բանահյուսական նույն նյութով ու շաղախով կառուցվում են վիպական տարբեր ճյուղեր, որոնք վեպի ամբողջության մեջ ոչ թե կրկնում են իրար, այլ շարունակում, լրացնում են միմյանց, դառնում մի ողջ ժողովրդի «բանաստեղծական պատմություն կամ պատմական բանաստեղծություն»:

ՎԵՊԻ ՊԱՏՈՒՄՆԵՐԻ ՀԱՄԱԿԱՐԳՎԱԾ ՆԿԱՐԱԳԻՐ-ՑԱՆԿԻ

Պատում 1

1. Էջմիածնում, Մոկաց Գինեկաց գյուղից, 1886 թվին.
2. Մանուկ Աբեղյանը, մոկացի նախո Քեռուց (35 տարեկան, գյուղացի, անգրագետ).
3. «Դավիթ և Մհեր», 2 ճյուղ՝ Դավիթ-Մհեր, 1350 տող, տողատած (Մ. Աբեղյան և խմբագրություն).
4. «Սասնա ծոեր», հատ. Ա., Երևան, 1936, 9—54 էջերը, Ապատում.
5. «Դավիթ և Մհեր», Շուշի, 1889, տողատած է մեծ մասմբ (Աբեղյան):

Պատում 2

1. Էջմիածնում, Մոկաց Գինեկաց գյուղից, 1898 թվին.
2. Բագրատ Խալաթյան, մոկացի Խալպոյենց Զատիկից (50 տարեկան, հողագործ, կտավագործ գյուղացի, անգրագետ).
3. «Սասմա փահլիվաններ կամ Թըլոր Դավիթ և Մհեր», 3 ճյուղ՝ (Մհեր)-Դավիթ-Մհեր, 1820 տող, տողատած (Բ. Խալաթյան և խմբագր.):

1 Պատումների համակարգված նկարագիր-ցանկը յուրաքանչյուր պատումի համար տալիս է.

1. Պատումի գրառման վայրը, ասացողի ծննդավայրը, գրառման ժամանակը (որտե՞ղ, որտեղի՞ց, ե՞րբ).
2. Գրառողը, ասացողը՝ տարիք, զբաղմունք, գրագիտություն (ո՞վ, ումի՞ց).
3. Պատումի վերնագիրը ժողովածուի մեջ, ճյուղերի քանակը, ծավալը, տեսքը (տողատած, արձակ).

4. «Սասնա ծոեր», հատ. Ա, Երևան, 1936, 59—118 էջերը,
Բ պատում.

5. «Սասմա փահլիվաններ կամ Թըլոր Դավիթ և Մհեր», էջ-
միածին, 1899, տողատած (Բ. Խալաթյան):

Պատում 3

1. ..., Մոկացի, ..., 1891 թվին.
2. Գարեգին Հովսեփյան, Մի Մոկացուց, ...
3. «Սանասար և Բաղդասար», 1 ճյուղ՝ Սանասար և Բաղ-
դասար, 270 տող, տողատած (խմբագրություն).
4. «Սասնա ծոեր», հատ. Ա, Երևան, 1936, 127—136 էջերը,
Գ պատում.
5. «Սանասարի և Բաղդասարի ծնունդը», «Սասմա ծոեր»,
Թիֆլիս, 1892, տողատած շէ:

Պատում 4

1. ..., Մոկացի, ..., 1891 թվին.
2. Գարեգին Հովսեփյանը, Մի ուրիշ Մոկացուց, ...
3. «Բաղդասարի ամուսնությունը», 1 ճյուղ՝ Սանասար և
Բաղդասար, 480 տող, տողատած (խմբագրություն).
4. «Սասնա ծոեր», հատ. Ա, Երևան, 1936, 141—156 էջերը,
Դ պատում.
5. «Բաղդասար», «Սասմա ծոեր», Թիֆլիս, 1892, տողատած
շէ:

Պատում 5

1. ..., Մոկացի, ..., 1891 թվին.
2. Գարեգին Հովսեփյանը, Մոկացի Հովանից, ...
3. «Դավիթ և Մհեր», 3 ճյուղ՝ (Մհեր)-Դավիթ-Մհեր, 2600
տող, տողատած (խմբագրություն).

4. Ժողովածուի հասցեն, պատումի էջը, տառային համարը.

5. Նախորդ հրատարակության վերնագիրը, հասցեն, տեսքը:

4. «Սասնա ծոեր», հատ. Ա., Երևան, 1936, 161—245, էջերը,
ծ պատում.
5. «Դավիթ», «Սասմա ծոեր», Թիֆլիս, 1892, տողատած շէ:

Պատում 6

1. Էջմիածնում, Մոկաց Առինջ գյուղից, 1899 թվին.
2. Արտաշես Աբեղյանը, մոկացի Հովակիմենց Ղազարից
(60 տարեկան, հողագործ, արհեստավոր գյուղացի, ան-
գըրագետ).
3. «Թլվատ Դավիթ և Մհեր», 3 ճյուղ՝ (Մհեր)-Դավիթ-Մհեր,
1610 տող, տողատած (Ա. Աբեղյան և խմբագրություն).
4. «Սասնա ծոեր», հատ. Ա., Երևան, 1936, 251—300 էջերը,
ծ պատում.
5. «Թլվատ Դավիթ», «Ազգագրական հանդես», Զ գիրք, Թիֆ-
լիս, 1900, տողատած (Ա. Աբեղյան):

Պատում 7

1. ..., Մոկաց Առինջ գյուղից, 1901 թվին (տպագրված).
2. Սարգիս Հայկունին, մոկացի Սախոյից, (... հողագործ,
արհեստավոր, կիսագրագետ).
3. «Սանասար և Բաղդասար», 1 ճյուղ՝ Սանասար և Բաղդա-
սար, 580 տող, տողատած (խմբագրություն).
4. «Սասնա ծոեր», հատ. Ա., Երևան, 1936, 307—325 էջերը,
է պատում.
5. «Սանասար և Բաղդասար», «Էմինյան ազգագրական ժո-
ղովածու», Մոսկվա—Վաղարշապատ, 1901, տողատած
շէ:

Պատում 8

1. ..., Մոկացի ... 1901 թվին (տպագրված).
2. Սարգիս Հայկունին, մոկացի Վարդանից (... հողագործ,
անգրագետ).

3. «Դավիթ և Մհեր», 3 ճյուղ՝ (Մհեր)-Դավիթ-Մհեր, 1540 տող, տողատած (խմբագրություն).
4. «Սասնա ծռեր», Հատ. Ա, Երևան, 1936, 331—378 էջերը, Ը պատում.
5. «Դավիթ և Մհեր», «Էմինյան ազգագրական ժողովածու», Մոսկվա—Վաղարշապատ, 1901, տողատած չէ:

Պատում 9

1. ..., Մոկաց Հաղին գյուղից, 1909 թվին (տպագրված).
2. Սարգիս Հայկունին, մոկացի թումաս Պետրոսյանից (65 տարեկան, ...).
3. «Զոջանց տուն», 3 ճյուղ՝ (Մհեր)-Դավիթ-Մհեր, 2950 տող, տողատած (Ս. Հայկունիի և խմբագրություն).
4. «Սասնա ծռեր», Հատ. Ա, Երևան, 1936, 383—470 էջերը, Թ պատում.
5. «Թլու Դավիթ», «Արարատ» ամսագիր, 1909, մայիս-հունիս-հուլիս-օգոստոս-սեպտեմբեր ամիսների համարներում, տողատած է մասամբ: «Զոջանց տուն», «Զոջանց տուն կամ Սասմա ծռեր վեպի երեք փոփոխակ», խմբագրեց և հրատարակեց Ստ. Կանայանց, Վաղարշապատ, 1910, տողատած չէ:

Պատում 10

1. Մոկսում, Մոկս ավանից, 1911 թվին.
2. Հարություն Գիլանյանը, մոկացի Վարդան Մուխսի-Բաղիկյանց (50 տարեկան, հողագործ, արհեստավոր, կիսագրագետ).
3. «Սասնա փահլեաններ», 4 ճյուղ՝ Սանասար և Բաղդասար- (Մհեր)-Դավիթ-Մհեր, 1570 տող, տողատած (խմբագրություն).
4. «Սասնա ծռեր», Հատ. Ա, Երևան, 1936, 475—524 էջերը, Ժ պատում:

Պատում 11

1. Մուղանջուղ գյուղում (Էջմիածնի շրջան), Մոկս ավանից,
1916 թվին.
2. Սենեքերիմ Տեր-Հակոբյանը, մոկացի Վարդան Մուխսի-
Բազիկյանից (55 տարեկան, հողագործ, արհեստավոր,
կիսագրագետ).
3. «Սասնա ծռեր», 4 ճյուղ՝ Սանասար և Բաղդասար-(Մհեր)-
Դավիթ-Մհեր, 1570 տող, տողատած (խմբագրություն).
4. «Սասնա ծռեր», հատ. Ա., Երևան, 1936, 529—600 էջերը,
ԺԱ պատում:

Պատում 12

1. Աշտարակում, Մոկս ավանից, 1933 թվին.
2. Կարապետ Մելիք-Օհանջանյանը, մոկացի Մանուկ Հարու-
թյունյանից (60 տարեկան, հողագործ, արհեստավոր,
անգրագետ).
3. «Սասնա ծռեր», 4 ճյուղ՝ Սանասար և Բաղդասար-(Մհեր)-
Դավիթ-Մհեր, 1310 տող, տողատած (Կ. Մելիք-Օհան-
ջանյան և խմբագրություն).
4. «Սասնա ծռեր», հատ. Ա., Երևան, 1936, 607—648 էջերը,
ԺԲ պատում:

Պատում 13

1. Էջմիածնում, Շատախի Ավետի Մեղրե գյուղից, 1902 թվին
(տպագրված).
2. Սարգիս Հայկունին, շատախցի Մկրտիչ Հարությունյանից
(30 տարեկան, հողագործ, անգրագետ).
3. «Դավիթ և Մհեր», 3 ճյուղ՝ (Մհեր)-Դավիթ-Մհեր, 1550
տող, տողատած (խմբագրություն և Հայկունի).
4. «Սասնա ծռեր», հատ. Ա., Երևան, 1936, 653—700 էջերը,
ԺԳ պատում.

5. «Դավիթ և Մհեր», «Էմինյան ազգագրական ժողովածու», Մոսկվա-Վաղարշապատ, 1902, տողատած չէ, բացի մի երկու էջից:

Պատում 14

1. Երևանում, Շատախի Հինենց գյուղից, 1915 թվին.
2. Շահեն Կուժիկյանը, շատախցի Մանուշակ Զադոյանից (45 տարեկան, հողագործ, անգրագետ).
3. «Դավիթի և Վհաբի կոփվը», 2 ճյուղ՝ (Մհեր)-Դավիթ, 460 տող, տողատած (խմբագրություն).
4. «Սասնա ծռեր», հատ. Ա., Երևան, 1936, 705—720 էջերը, ԺԴ պատում:

Պատում 15

1. ..., Շատախցի Հինենց գյուղից, 1916 թվին.
2. Սենեքերիմ Տեր-Հակոբյանը, շատախցի Գրիգորից (60 տարեկան, հողագործ, անգրագետ).
3. «Սասունցի Դավիթ», 2 ճյուղ՝ (Մհեր)-Դավիթ, 910 տող, տողատած (խմբագրություն).
4. «Սասնա ծռեր», հատ. Ա., Երևան, 1936, 725—752 էջերը, ԺԵ պատում:

Պատում 16

1. Շահաբլու գյուղում (Վեդու շրջան), Շատախի Կաճետ գյուղից և Շատախի Հինենց գյուղից, 1933 թվին.
2. Կարապետ Մելիք-Օհանջանյանը, շատախցի Ռաշո Մուրադյանից և շատախցի Ավո Զադոյանից (50 տարեկան և 40 տարեկան, հողագործ, անգրագետ).
3. «Սասնա Տավիթի խեքաթ», 2 ճյուղ՝ (Մհեր)-Դավիթ, 790 տող, տողատած (Կ. Մելիք-Օհանջանյան և խմբագրություն).

4. «Սասնա ծոեր», հատ. Ա, Երևան, 1936, 759—784 էջերը,
ԺԶ պատում:

Պատում 17

1. Ագարակում (Աշտարակի շրջան), Շատախի Հինենց գյուղից, 1933 թվին.
2. Կարապետ Մելիք-Օհանջանյանը, շատախիցի Ազիզ Ղարիբյանից (65 տարեկան, հողագործ, անգրագետ).
3. «Դավթի կոփվը Մսրա Մելիքի հետ», 2 ճյուղ՝ (Մհեր)-Դավթիթ, 810 տող, տողատած (Կ. Մելիք-Օհանջանյան և խմբագրություն).
4. «Սասնա ծոեր», հատ. Ա, Երևան, 1936, 789—814 էջերը,
ԺԷ պատում:

Պատում 18

1. Երևանում, Սպարկերտի Բազինց գյուղից, 1933 թվին.
2. Արամ Ղանալանյանը, սպարկերտի Փառիկից (80 տարեկան, հողագործ, անգրագետ).
3. «Թլու Դավթիթ», 2 ճյուղ՝ (Մհեր)-Դավթիթ, 340 տող, տողատած (խմբագրություն).
4. «Սասնա ծոեր», հատ. Ա, Երևան, 1936, 819—830 էջերը,
ԺԸ պատում:

Պատում 19

1. ..., Էջմիածնում, Գավաշի Տեղող գյուղից, 1909 թվին
(տպագրված) և 1932 թվին.
2. ... և Հարություն Ավլյանը, գավաշցի Եղիազար Հակոբյանից (25 և 46 տարեկան, ...).
3. «Հողանց տուն կամ Սասմա ծոեր», 4 ճյուղ՝ Սանասար և
Բաղդասար-(Մհեր)-Դավթիթ-(Մհեր), 1100 տող, տողատած և արձակ (խմբագրություն).
4. «Սասնա ծոեր», հատ. Ա, Երևան, 1936, 835—869 էջերը,
ԺԹ պատում.

5. «Թլոթ Դավիթ», «Արարատ» ամսագիր, 1909, հոկտեմբեր-նոյեմբեր ամիսներ. «Զոջանց տուն կամ Սասմա ծռեր» վեպի երեք փոփոխակ, խմբագրեց և հրատարակեց Ստ. Կանայանցը, Վաղարշապատ, 1910, տողատած չէ:

Պատում 20

1. ..., Գավաշի Նարեկ գյուղից, 1915 թվին.
2. Արտաշես Բարսեղյանը, գավաշցի Զարդար Տեր-Մխիթարյանից (50 տարեկան, հողագործ, անգրագետ).
3. «Սասմա ծռեր», հատ. Ա., Երևան, 1936, 875—885 էջերը, ի պատում:

Պատում 21

1. Էջմիածնում, Գավաշից ..., 1916 թվին.
2. Սենեքերիմ Տեր-Հակոբյանը, գավաշցի Մարգարիտ Սարգսյանից (40 տարեկան, հողագործ, անգրագետ).
3. «Թլոլ Դավիթ և Մհեր», Յ ճյուղ՝ (Մհեր)-Դավիթ-Մհեր, 1330 տող, տողատած (խմբագրություն).
4. «Սասմա ծռեր», հատ. Ա., Երևան, 1936, 891—933 էջերը, իԱ պատում:

Պատում 22

1. Էջմիածնում և Երևանում, Գավաշի Հարբերդ գյուղից, 1916 և 1933 թվականներին.
2. Սենեքերիմ Տեր-Հակոբյանը, գավաշցի Գրիգոր Փոխան Եղիազարյանից (45 տարեկան, հողագործ, անգրագետ).
3. «Սասմա ծռեր», Յ ճյուղ՝ Սանասար և Բաղդասար-(Մհեր)-Դավիթ, 1250 տող, տողատած (խմբագրություն).
4. «Սասմա ծռեր», հատ. Ա., Երևան, 1936, 939—977 էջերը, իԲ պատում:

Պատում 23

1. Աղարակում (Աշտարակի շոջան), Գավաշի Բողնիս գյուղից, 1916 և 1933 թվականներին.
2. Սենեքերիմ Տեր-Հակոբյանը, գավաշցի Համբարձում-Խապու Գրիգորյանից (56 տարեկան, հողագործ, անզրագետ)։
3. «Սասնա ծռեր», 4 ճյուղ՝ Սանասար և Բաղդասար-(Մհեր)-Դավիթ-Մհեր, 1230 տող, տողատած (խմբագրություն)։
4. «Սասնա ծռեր», հատ. Ա., Երևան, 1936, 983—1022 էջերը, իդ պատում։

Պատում 24

1. ..., Հայոց Զորի Անկշտան գյուղից, ...
2. ..., հայոց Ճանապարհի թառո Կազարյանից, ...
3. «Ճոշանց տուն կամ Սասմա ծռեր», 4 ճյուղ՝ Սանասար և Բաղդասար-(Մհեր)-Դավիթ-Մհեր, 1890 տող, տողատած (խմբագրություն)։
4. «Սասնա ծռեր», հատ. Ա., Երևան, 1936, 1077—1086 էջերը, իդ պատում։
5. «Արարատ» ամսագիր, 1909, մարտ-մայիս-հունիս ամիսներին. «Ճոշանց տուն կամ Սասմա ծռեր» վեպի երեք նոր փոփոխակ, խմբագրեց և հրատարակեց Ստ. Կանայանց, Վաղարշապատ, 1910, տողատած շէ։

Պատում 25

1. Երևանում, Շատախի Կաճետ գյուղից, 1934 թվին.
2. Կարապետ Մելիք-Օհանջանյանը, Հովհան Զոհրաբյանից (70 տարեկան, հողագործ, կիսագրագետ)։
3. «Սասնա ծռեր», 4 ճյուղ՝ Սանասար և Բաղդասար-Մհեր-Դավիթ-Մհեր, 1120 տող, տողատած (Կ. Մելիք-Օհանջանյան և խմբագրություն)։

4. «Սասնա ծոեր», հատ. Ա, Երևան, 1936, 1091—1126 էջերը, ին պատում:

Պատում 26

1. ..., Մշո Առնիստ գյուղից, 1878 թվին.
2. Գարեգին Սրվանձտյանը, Տարոնցի Կրպոյից (... երեսփոխան, գրագետ).
3. «Սասունցի Դավիթ կամ Մհերի դուռ», 3 ճյուղ՝ Սանասար և Բաղդասար-Դավիթ-Մհեր, 1200 տող, տողատած (Գ. Սրվանձտյան և խմբագրություն).
4. «Սասնա ծոեր», հատ. Բ, մաս Ա, Երևան, 1944, 7—44 էջերը, Ա պատում:
5. «Գրոց ու Բրոց և Սասունցի Դավիթ կամ Մհերի դուռ», Կ. Պոլիս, 1874, շատ քիչ է տողատած:

Պատում 27

1. Զամբլու գյուղում (Ալարանի շրջան), 1892 թվին (տպագրված).
2. Գարեգին Հովսեփյանը, ապարանցի Մուրադից (...ժամանակ, գրագետ).
3. «Սասմա ծոեր», 4 ճյուղ՝ Սանասար և Բաղդասար-Մհեր-Դավիթ-Մհեր, 1520 տող, տողատած (խմբագրություն).
4. «Սասնա ծոեր», հատ. Բ, մաս Ա, Երևան, 1944, 49—102 էջերը, Բ պատում.
5. «Սասունցի Դավիթ», «Սասմա ծոեր», Թիֆլիս, 1892, տողատած լէ:

Պատում 28

1. Մուշում, Դատկու Մոճկոնց գյուղից, 1912 թվին.
2. Հայրապետ Համամճյանը, Ավետիս Մարտիրոսյանից, ...
3. «Դավիթ և Մհեր», 4 ճյուղ՝ (Սանասար և Բաղդասար)- (Մհեր)-Դավիթ-(Մհեր), 600 տող, տողատած լէ.

4. «Սասնա ծոեր», հատ. Բ, մաս Ա, Երևան, 1944, 107—129
էջերը, Գ պատում:

Պատում 29

1. Զոլախաշում (Քավառի շրջան), 1892 թվին (տպագրված).
2. Վահան ք. Տեր-Գրիգորյանը, Դանիել Ղազարյանից, ...
3. «Սասնու թագավորներ», 3 ճյուղ՝ Սանասար և Բաղդասար-Մհեր-Դավիթ, 490 տող, տողատած չէ.
4. «Սասնա ծոեր», հատ. Բ, մաս Ա, Երևան, 1944, 135—159 էջերը, Դ պատում:

Պատում 30

1. Իրինդում (Թալինի շրջան), Սասունի Ճախրկան գյուղից, 1932 թվին.
2. Կարապետ Մելիք-Օհանջանյանը, Թամո Դավթյանից (85 տարեկան, հողագործ, զրադացպան, անգրագետ).
3. «Սասնա Տուն», 4 ճյուղ՝ Սանասար և Բաղդասար-Մհեր-Դավիթ-Մհեր, 1210 տող, տողատած (Կ. Մելիք-Օհանջանյան և խմբագրություն).
4. «Սասնա ծոեր», հատ. Բ, մաս Ա, Երևան, 1944, 159—197 էջերը, Ե պատում:

Պատում 31

1. Աշնակում (Թալինի շրջան), Սասունի Գոմբրդեր գյուղից, 1932 թվին.
2. Կարապետ Մելիք-Օհանջանյանը, Առաքել Սարուխանյանից (44 տարեկան, հողագործ, անգրագետ).
3. «Սասնու Դավիթ», 2 ճյուղ՝ (Մհեր)-Դավիթ, 680 տող, տողատած (Կ. Մելիք-Օհանջանյան և խմբագրություն).
4. «Սասնա ծոեր», հատ. Բ, մաս Ա, Երևան, 1944, 203—223 էջերը, Զ պատում:

Պատում 32

1. ..., ..., 1898 թվին (տպագրված).
2. (Սարգիս Հայկունին(՝), Անհայտ ոմն, ...)
3. «Սասունա Դավիթ», 3 ճյուղ՝ Սանասար և Բաղդասար-Դավիթ-Մհեր, 490 տող, տողատած լէ:
4. «Սասնա ծոեր», հատ. Բ, մաս Ա, Երևան, 1944, 229—246 էջերը, է պատում.
5. «Սասունա Դավիթ», «Արարատ» ամսադիր, 1898, նոյեմբեր-դեկտեմբեր ամիսները, տողատած լէ:

Պատում 33

1. Երևանում, Ալաշկերտի Խաստուր գյուղից, 1932 թվին.
2. Կարապետ Մելիք-Օհանջանյանը, Մանուկ Թորոյանից (66 տարեկան, հողագործ, անզրագետ).
3. «Սասունա ծոեր», 4 ճյուղ՝ Սանասար և Բաղդասար-Մհեր-Դավիթ-Մհեր, 3360 տող, տողատած (Կ. Մելիք-Օհանջանյան և խմբագրություն).
4. «Սասնա ծոեր», հատ. Բ, մաս Ա, Երևան, 1944, 253—338 էջերը, Է պատում:

Պատում 34

1. Արալըղում (Թալինի շրջան), Ալաշկերտի Խաստուր գյուղից, 1932 թ.
2. Կարապետ Մելիք-Օհանջանյանը, Կարապետ Թամոյանից (55 տարեկան, հողագործ, գրագետ).
3. «Սասունա ծոեր», 3 ճյուղ՝ Սանասար և Բաղդասար-Մհեր-Դավիթ, 1460 տող, տողատած (Կ. Մելիք-Օհանջանյան և խմբագրություն).
4. «Սասնա ծոեր», հատ. Բ, մաս Ա, Երևան, 1944, 359—404 էջերը, Թ պատում:

Պատում 35

1. Երանոսում (Մարտունու շրջան), 1926 թվին.
2. Խաշատուր Մնացականյանը, Հակոբ Նրգեյանից (85 տարեկան, տիրացու, գրագետ).
3. «Սասնա տուն», 3 ճյուղ՝ Սանասար և Բաղդասար-Դավիթ-Մհեր, 2090 տող, տողատած չէ.
4. «Սասնա ծոեր», Հատ. Բ, մաս Բ, Երևան, 1951, 13—88 էջերը, Ժ պատում:

Պատում 36

1. Ղըշլաղում (Նոր-Բայազետի շրջան), 1905 թվին.
2. Երվանդ Լալայանը, Առաքել Շակոյանից (60 տարեկան, հողագործ, անգրագետ).
3. «Սասմա ծոեր», 4 ճյուղ՝ Սանասար և Բաղդասար-Մհեր-Դավիթ-Մհեր, 2660 տող, տողատած (խմբագրություն).
4. «Սասնա ծոեր», Հատ. Բ, մաս Բ, Երևան, 1951, 93—172 էջերը, ԺԱ պատում:

Պատում 37

1. Երանոսում (Մարտունու շրջան), 1903 թվին.
2. ..., Սարգիս Հակոբյանից (50 տարեկան, տիրացու, գրադետ).
3. «Դավիթ և Մհեր կամ Սասունա ծոեր», 3 ճյուղ՝ Սանասար և Բաղդասար-Դավիթ-Մհեր, 1530 տող, տողատած չէ.
4. «Սասնա ծոեր», Հատ. Բ, մաս Բ, Երևան, 1952, 177—230 էջերը, ԺԲ պատում:

Պատում 38

1. Մուղանջրղում (Էջմիածնի շրջան), Մոկաց Գոմանից գյուղից, 1902 թ.

2. Սարգիս Հայկունին, Մուրադ Հովսեփյանից (58 տարեկան, արհեստավոր գյուղացի, անգրագետ).
3. «Սասնա ծռեր», 4 ճյուղ՝ Սանասար և Բաղդասար-(Մհեր)-Դավիթ-Մհեր, 2600 տող, տողատած (Ս. Հայկունի և խմբագրություն).
4. «Սասնա ծռեր», հատ. Բ, մաս Բ, Երևան, 1951, 235—318 էջերը, ժողովագիր.
5. «Դավիթ և Մհեր», «Էմինյան ազգագրական ժողովածու», Մոսկվա—Վաղարշապատ, 1902:

Պատում 39

1. Թաղեռս Առաքյալի վանքի գյուղում (Մակվա շրջան), 1895 թվին.
2. Խաչիկ վ. Դադյանը, Դավթից (50 տարեկան, հյուսն, գյուղացի, անգրագետ).
3. «Տղա Դավիթ», 2 ճյուղ՝ (Մհեր)-Դավիթ, 910 տող, տողատած (Խ. վ. Դադյան և խմբագրություն).
4. «Սասնա ծռեր», հատ. Բ, մաս Բ, Երևան, 1951, 323—350 էջերը, ժողովագիր.
5. «Տղա Դավթի և աղջիկ Խանդութի Հեքիաթը», «Արարատ» ամսագիր, 1895, նոյեմբեր-դեկտեմբեր ամիսներին, տողատած (Խ. վ. Դադյան):

Պատում 40

1. Թաղեռս Առաքյալի վանքի գյուղում (Մակվա շրջան), 1913 թվին.
2. ..., Ալո Դավթյանից (30 տարեկան, հյուսն, անգրագետ).
3. «Տղա Դավիթ», 2 ճյուղ՝ (Մհեր)-Դավիթ, 1110 տող, տողատած (խմբագրություն).
4. «Սասնա ծռեր», հատ. Բ, մաս Բ, Երևան, 1951, 355—386 էջերը, ժողովագիր.

Պատում 41

1. ...
2. ...
3. «Սասնա տուն», 4 ճյուղ՝ Սանասար և Բաղդասար-Մհեր-Դավիթ-Մհեր, 3560 տող, տողատած և արձակ (խմբագրություն).
4. «Սասնա տուն», յոթը ճյուղ (Վանա գավառաբառառվ), «Ազգագրական հանդես», 20-րդ և 21-րդ գրքեր, 1910 և 1911 թ., Թիֆլիս, տողատած չէ:
5. «Սասնա ծոեր», հատ. Բ, մաս Բ, 392—480 էջերը, ԺԶ պատում:

Պատում 42

1. Բազարնուղում (Ապարանի շրջան), 1912 թվին.
2. Երվանդ Լալայանը, Բարսեղ Սահակյանից (50 տարեկան, հողագործ, անգրագետ).
3. «Սասնա ծոեր», 4 ճյուղ՝ Սանասար և Բաղդասար-(Մհեր)-Դավիթ-Մհեր, 1550 տող, տողատած (խմբագրություն).
4. «Սասնա ծոեր», հատ. Բ, մաս Բ, Երևան, 1951, 485—531 էջերը, ԺԷ պատում.
5. «Սենեքերիմ թագավոր», «Մարգարիտներ հայ բանահյուսության», էջմիածին:

Պատում 43

1. Վանի գյուղերից մեկում, 1915 թվին.
2. ..., Մի Վանեցուց ...
3. «Դավթի կոփվը Մսրա Մելիքի հետ», 2 ճյուղ՝ (Մհեր)—Դավիթ, 320 տող, տողատած չէ.
4. «Սասնա ծոեր», հատ. Բ, մաս Բ, Երևան, 1951, 539—550 էջերը, ԺԲ պատում:

Պատում 44

1. Երևանում, Վանից, 1915 թվին.

2. Երվանդ Հալայանը, Դավիթ Գալստյանից (35 տարեկան, մանրավաճառ, կիսագրագետ).
3. «Սանասար և Բաղդասար», 1 ճյուղ՝ Սանասար և Բաղդասար, 180 տող, տողատած լէ.
4. «Սասնա ծոեր», հատ. Բ, մաս Բ, Երևան, 1951, 555—560 էջերը, ԺԹ պատում:

Պատում 45

1. ..., Մուշի Շողգոմ գյուղից, 1915 թվին.
2. ..., Հարություն Դավթյանից (39 տարեկան, ..., գրագետ).
3. «Սասունա Դավիթ», 3 ճյուղ՝ Մհեր-Դավիթ-Մհեր, 1510 տող, տողատած լէ.
4. «Սասնա ծոեր», հատ. Բ, մաս Բ, Երևան, 1951, 565—616 էջերը, Ի պատում:

Պատում 46

1. Երևանում, Խոշաբի շրջանի Քոել գյուղից (Վանի նահանգ), 1936 թվին.
2. Արամ Ղանալանյանը, Վարդան Վարդանյանից (52 տարեկան, հողագործ, կիսագրագետ).
3. «Սասունա Տավիթ», 1 ճյուղ՝ Դավիթ, 490 տող, տողատած լէ.
4. «Սասնա ծոեր», հատ. Բ, մաս Բ, Երևան, 1951, 623—640 էջերը, ԻԱ պատում:

Պատում 47¹

1. Սարալանջում (Ապարանի շրջան), 1946 թվին.

¹ «Սասնա ծոերի» Բ հատորի Բ մասում առանձին համարի տակ տեղադրված է մի անտիպ պատումի ուրվագծային թերի նկարագիրը, որպես Հավելված։ Զնայած դա զբաղեցրել է առանձին համար (ԺԷ պատում), ինչպես խմբագրությունը, այնպես էլ մենք դա ամբողջական պատում լենք դիտում։

2. Վարդ Բղոյանը, Մկրտիչ Պետրոսյանից (81 տարեկան, հողագործ, անզրագետ).
3. «Սասունա ծոեր», 3 ճյուղ՝ Սանասար և Բաղդասար-Դավիթ-Մհեր, 1970 տող, տողատած (խմբագրություն).
4. «Սասունա ծոեր», հատ. Բ, մաս Բ, Երևան, 1951, 645—703 էջերը, իբ պատում:

Ա

Հ

Մ

Բ Ա Վ Ա Ն Դ Ա Կ Ո Ւ Թ Յ Ո Ւ Ն

Նրկու խոսք	5
Վեպի գրառման ժամանակը և հասարակական պայմանները	7
Վեպի գրառման վայրը, տարածում, տեղայնացում	30
Վեպի նյութերը	61
Վեպի կառուցվածքը	80
Առաջին ճյուղ	86
Երկրորդ ճյուղ	112
Երրորդ ճյուղ	133
Չորրորդ ճյուղ	162
Վեպի պատումների համակարգիլած նկարագիր-ցանկ	173



ՍԱՀԱԿԵԱՆ ԱՐՈՒՍՅԱԿ ՇԱՏԵՐԻ
СЛАКЯН АРУСЯК ШАТЕРОВНА

«ՄԱՍՆԱԿ ՇԻՒՐԻ» ՊԱՏՈՒՄՆԵՐԻ ՔՆՆԱԿԱՆ
ՀԱՄԵՄԱՏՈՒԹՅՈՒՆ

Տպագրվում է Հայկական ՍՍՀ ԳԱ
հնագիտուրյան և ազգագրուրյան ինստիտուտի
գիտական խորհրդի որոշմամբ

Հրատարակչական խմբագիր
Ս. Ա. ԳԵՎՈՐԳՅԱՆ

Նկարիչ Կ. Կ. ՂԱՅԱԴԱՐՅԱՆ
Տեխնիկական խմբագիր Ս. Կ. ԶԱՔԱՐՅԱՆ
Սրբագրիչ Մ. Վ. ՀԱԿՈԲՅԱՆ

Վե 03549

Հրատ. 4094

Պատվեր 701

Տպաքանակ 3000

Հանձնված է շարվածքի 18/X 1974 թ., ստորագրված է տպագրության 25/II 1975 թ.,
տպագր. 12,0 մամուլ + 8 ներդիր, իրատ. 10,35 մամուլ, պայմ. 11,8 մամուլ
բուղը № 1, $84 \times 1081/_{32}$: Գինը 1 ռ. 22 կ.:

ՀՍՍՀ ԳԱ հրատարակություն. Երևան, 19 Բարեկամության 24.

Издательство АН Арм. ССР, Ереван, 19. Барекамутյан 24.

Հայկական ՍՍՀ ԳԱ հրատարակության Էջմիածնի տպարան

60

2200

60

22

22

22
22
22
22

00

00

60

2200

60

22

22

22
22
22
22

00

00

60

2200

60

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

22

Գ ի Ա լ 1 ն. 22 կ ո ւ ա .

A 54673

